

**INSTITUTIONES
PHILOSOPHICÆ
AD STUDIA
THEOLOGICA
POTISSIMUM...**

François Jacquier



L. 60



INSTITUTIONES
PHILOSOPHICÆ

AD STUDIA THEOLOGICA
POTISSIMUM ACCOMMODATÆ,

AUCTORE

FRANCISCO JACQUIER.

EX MINIMORUM FAMILIA
PRIMARIARUM PER EUROPAM
ACADEMIARUM SOCIO,

IN LYCEO ROMANO, ET IN COLLEGIO
URBANO DE PROPAGANDA FIDE
PROFESSORE.

TOMUS QUARTUS

*Quo Physicæ Pars Prima sive Physica
Generalis continetur.*



VENETIIS MDCCLXII.

SIMONIS OCCHI CURIS,
Superiorum permissu, ac Privilegio.

AUCTOR LECTORI.

AD eam tandem pervenimus Philosophiæ partem, quæ *Physica* seu *Scientia nature* appellatur, præstantissimam sane disciplinam. De hoc præclarissimo studio duas invenio omnino quidem injustas hominum opiniones. Alii huic studio unice addicti, totique, ut ita dicam, mancipati, in aliis disciplinis haud supra vulgus sapiunt, hanc solam, quam profitentur & amant scientiam, summopere prædicant, cunctaque præterea doctrinæ genera fastidiose contemnunt. Alii Physices studium tanquam incertum & inutile arrogantiùs & temere traducunt, imo velut prophanum proscribunt & *Ecclesiasticis* viris vix concedendum. Primam opinionem, quæ quidem error est perniciosissimus, necesse non est ut fufius refellam. Et certe nemo nescit ad tria capita generatim revocari omnes, quantum patent, humanas cognitiones; Dei enim & animæ nostræ contemplatione, atque corporum, sive naturæ observatione studia omnia nostra continentur. Quod Dei contemplationem spectat, sacram scilicet Theologiam; Ecquis æquus rerum æstimator divinam hanc scientiam, scientiarum omnium Reginam & magistram, cæteris omnibus disciplinis infinita laude non anteponet? Ecquis etiam nisi perditissimus homo in cælum non feret sanctiorem illam disciplinam quæ circa nosmetipsos versatur, quæ de moribus agit, quæ certiori castiorique doctrina præclaris virtutibus animum excolit, atque ad honestatis, ad officii, ad religionis amorem traducit?

Hæc quidem duo sunt divina omnino &
 • 2 omnium

omnium longe utilissima studia, quibus ad purissimum omnis veritatis scientiarumque omnium fontem D. O. M. & rerum majestate & morum sanctitate propius accedere docemur, quoad humani generis patitur imbecillitas.

Nec tamen sua dignitate & utilitate defraudari debet vera & solida Physicæ ratio, in qua non infinitæ de vocolis atque nugis controversiæ disceptantur, sed, ut paucis multa complectar, quæ cælo, terra marique geri atque administrari videmus, quantum pro ingenii nostri mediocritate licet, explicantur. Neque hæc nuda & simplici mentis contemplatione aut conjecturis innixa, sed accurata ratiocinatione & captis sæpius experimentis demonstrata. Fructuosissimam esse accuratorem hanc naturæ considerationem eamque ad omnipotentis ac perfectissimi auctoris cognitionem nos evehere & ad divinas laudes excitare si quis negaverit, is statim ex S. Scripturæ auctoritate refelletur, atque hanc Isaïæ reprehensionem audire merebitur cap. v. vers. 12. *Opus Domini non respicitis, nec opera manuum ejus consideratis.* Verum qui in contemplandis divinis operibus nullum tempus, nullam attentionem collocat, is sane Physicæ pretium omnino ignorat, divinorumque operum gloriam & majestatem obscurius intuetur; atque ea de causa fit ut aliqui rerum Physicarum nihil aut parum studiosi alias quidem Philosophiæ partes commendent, Physicam autem aspernentur, in quo quidem non mediocriter peccare videntur. Quam autem sinistra sit & temere concepta hæc opinio, ex ipsa rerum explicandarum serie melius quam sermone ullo licebit intelligere; interim tamen singula harum Institutionum capita percur-

currere & doctrinæ utilitatem breviter & digito, ut ita dicam, commonstrare non abs re erit.

Ab *extensione* & *impenetrabilitate* Physicæ generalis initium facere solent plerique hujus disciplinæ magistri; Ego autem ab hac vulgari consuetudine aliquantulum deflectens, universales corporum vires, seu potius effectus primum explicabo, & vocabulorum quibus nulla vis, nulla notio persæpe subjecta est, ambiguitatem omnem clara nitidaque definitione amoveri curabo diligenter. Itaque vim *inertie*, vires *centripetas* & *centrifugas*, *gravitatem* & *attractionem* accurate considerabo, utilissimum sane argumentum quo cuncta prorsus naturæ effecta continentur. Hinc doctrinæ ordo postulat ut effectus ipsos inde oriundos, æquilibrii scilicet, variorumque motuum leges contemplemur. Ex his tandem veluti gradibus deducimur ad universales corporum proprietates quæ Physicæ generalis meta sunt ac terminus. Maxima sane voluptate afficiuntur adolescentum animi, quum tot admiranda acutissimorum hominum inventa cognoscent quibus Physica maximum cepit incrementum, & quamplurima ad usus vitæ excogitata. Hæc autem tot tantaque commoda fusius declarare supervacaneum est; singulis enim capitibus sua adjungitur appendix in qua uno veluti intuitu observare licebit non quidem utilitates omnes, sunt enim innumerabiles, sed aliquas tantum, atque etiam in rebus Theologicis, quem quidem usum vix suspicantur aliqui. Hanc vero tradendæ Physicæ rationem nemo, ut puto, improbabit; cum præclarissimi studii amorem studiosæ juventuti instillare possit, quantum unicuique pro vivendi instituto & ratione licet; sua enim sunt diversis vitæ conditionibus officia, quibus deesse nefas.

Universalibus corporum proprietatibus in Physica generali explicatis , jam progrediendum est ad Physicam *particularem* in qua varia specierum individua observantur , variazque species considerantur . Latissime quidem patet Physicæ particularis amplitudo naturamque omnem amplectitur ; sed tot tantaque scire datum non est mortalibus , in tam immensa rerum varietate Physicis pauca , ut ita dicam , delibare licet . A corporum *fluiditate* Physicæ particularis sumam exordium ; corporum fluidorum *pressionem* , *motum* , *resistentiam* explicabo . Ad fluida *elastica* deinde progressum faciam , *aerisque* proprietates considerabo . Jam rectus docendi ordo exigere videtur ut *luminis* doctrinam variasque affectiones statim subjungam . Ex his autem ad corpora *caelestia* assurgam , doctrinamque Astronomicam & varias illius partes sedulo explanare conabor . Neque prætermittam quæ cum Astronomia necessaria vinculo conjuncta sunt , *Chronologiae* & *Kalendarii* elementa , variasque *Cyclorum* & *Periodorum* rationes accurate demonstrabo . Ita autem tellus nostra cum cælo colligata est ut de *Geographia* sine Astronomiæ subsidio vix quidquam statui possit ; itaque ex Astronomia ad Geographiam , & , ut ita dicam , e cælo in terram pedem referam . Igitur cum Astronomia stricte connecti debent *Chronologia* & *Geographia* quas Astronomiæ *filiæ* merito appellant aliqui . Explicata Geographia , suadet ipsa rerum naturæque series , ut corpora illa quæ in Telluris superficie oculis nostris obversantur , primum consideremus ; deinde vero ad ea quæ in terræ gremio latent , descendamus . Quare de *animalibus* , *arboribus* , *plantis* , *metallis* , *fossilibus* , aliisque id genus plurimis distincte sermo

(VII)

sermo habebitur . Tandem quia ex ipsis terræ visceribus perpetuo avolant plurima , magna quidem varietate , effluvia , quæ in aerem sublata , varias constituunt phænomenon species ; ea denique contemplabimur quæ in aeris regione aguntur , *imbres* , scilicet , *grandinem* , *nivem* , *ventum* , *tonitrum* , aliaque *meteora* , & Physicæ particulari , Deo juvante , finem imponemus . Singulorum capitum utilitatem suo loco opportune adjungemus , ut factum est in Physica generali ; interea tamen , ut alia plurima omittam hujus doctrinæ emolumenta quæ omnibus obvia sunt , unum hic attingere satis erit quod nostris auditoribus Theologiæ studiosis maxime convenit . Astronomiæ & Chronologiæ doctrinam cum Historia sacra & prophana consociandam esse . Si quis in dubium vocaverit , excellentes de his rebus evolvat libros , suam in gravissimis etiam magnique momenti controversiis , imperitiam , si ingenuus fuerit , fateri non dubitabit . Cæterum ex iis quæ hactenus breviter attigi , satis intelligitur quos mihi lectores velim ; eos scilicet Arithmeticæ & Geometriæ elementis probe imbutos esse oportet . Ut autem præ manibus ea omnia habeant , quæ ad nostras Institutiones sunt necessaria , Arithmeticam & Geometriam tali studio adornavi , ut nihil nimis & nihil minus quam necesse sit contineant . Unum aliud a studiosis adolescentibus maxime exoptarem ut Arithmeticam & Geometriam Logicæ etiam studio præmitterent ; Etenim Arithmeticæ & Geometriæ principia , ob firmam & perpetuam veritatis possessionem , aptissima sunt ad mentis aciem expoliendam , Logicam naturalem perficiendam , rectamque methodum conciliandam ,

Nec

Nec me reprehendat aliquis quod hac nostra ætate, his cultioris sublimiorisque Physices temporibus, minus difficiles Institutiones tradere & proponere audeam. De me quidem modeste, ut par est, sentio, non tamen nimis demisse, quod quidem fictæ & affectatæ, quam abhorreo, foret humilitatis. At in reconditori Physica me omnino peregrinum & hospitem non esse, demonstratum confido & iis quæ jam edidi operibus, & aliis quæ apud me premo, possem confirmare. Verum doctos quidem se probant illi Physicæ magistri qui intricatissima Physices *Theoremata* Tyronibus explicare laborant; mea tamen sententia, rem faciunt non valde utilem, præsertim si frequentior sit auditorum numerus, & adolescentum mentes doctrinæ difficultate magis obnuere quam erudire videntur.

Sed quidquid sit de nostrarum Institutionum successu, meam saltem propensissimam voluntatem benigne excipiant studiosi adolescentes, quorum utilitati hunc meum qualemcumque laborem sincere & ex animo consecravi. Porro ab iis hunc unum, solumque expetendum vehementer exopto operæ meæ fructum, ut nempe utilissimum studium alacriter suscipiant, non quidem ad gloriam & doctrinæ ostentationem, sed ad tuendam insinuandamque Religionem. Neque tamen respicienda est doctrinæ fama, dummodo inde absit gloriæ, honorum & lucri cupiditas. Persæpe enim feliciter contingit ut vulgaris etiam, nec admodum sublimis rerum Physicarum cognitio apud gentes minus cultas, nominis splendorem atque auctoritatem conciliet. Hac fortunatissima oblata occasione utendum est, & de Religione sermones miscendi;

scendi; hæc quidem honestæ sunt & omnino licitæ artes; sed tamen præcedat morum vitæque exemplar, atque enixe imploretur divinæ gratiæ auxilium; nam, ut ait S. Augustinus in epistola ad Sixtum: *Restat ut ipsam fidem unde omnis iustitia sumit initium, non humano tribuamus arbitrio nec ullis præcedentibus meritis ... sed gratuitum Dei donum esse fateamur.*

Antequam ex hoc sermone ad Physicam transitum faciam, monendum superest, pro majori commoditate, modo telluris motum, modo quietem a me adhiberi. Cæterum me obedire profiteor Sanctæ Romanæ Ecclesiæ quæ sapientissime omnino prohibuit, ne hypothesis Copernicana tanquam *Thesis* defenderetur.

A P P R O B A T I O.

Reverendissimo Patri Thomæ Augustino Ricchinio Ordinis Prædicatorum Sacri Palatii Apostolici Magistro satis facturus legi uti studiose, sic etiam libenter egregium opus, cuius hæc est inscriptio: *Institutiones Physicæ &c.* In eo autem nihil me testor, deprehendisse, quod Christianæ, orthodoxæque Religionis decretis, rectæque morum institutioni minus esse consonum videretur. Imo vero si non omnia ordine, accurate, graviter, dilucide denique, quod & auctori peculiare, in eo tradita me vidisse dicerem, certe mentirer. Id opus igitur, quod cum ob seriem rerum, quas continet, universam, tum maxime ob corollaria, quæ in extremo quoque

(x)

que capite leguntur, non studiosis adolescentibus modo, sed etiam eorum Magistris utile imprimis prospicio futurum, dignum esse ajo, quod in lucem quam primum prodeat.

Dabam Romæ ex Monasterio S. Mariæ Novæ die 27. Mense Augusto ann. 1760. D. ALOYSIUS STAMPA Abbas Olivetanus, Promovendorum ad Episcopatum Examinator, & in Collegio Urbano de Propaganda Fide Studiorum Præfatus.

I N D E X.

- CAP. I. **D**E natura & divisione Phisices. Pag. 1
CAP. II. De regulis philosophandi. 5
REGUL. I. Effectuum naturalium causæ non plures sunt admittendæ quam quæ & veræ sunt & effectibus explicandis sufficiunt. 6
REGUL. II. Effectuum naturalium ejusdem generis eadem sunt causæ. 7
REGUL. III. Qualitates quæ in omnibus Corporibus in quibus experimenta sumere licet, sine ullo earundem qualitatum incremento vel decremento observantur, pro universalibus Corporum qualitatibus haberi debent. 9
REGUL. IV. In Philosophia experimentalis propositiones ex phenomenis per inductionem collectæ, non obstantibus contrariis hypothësis, pro veris aut accurate, aut quam proxime haberi debent, donec alia occurrant phænomena per quæ aut accuratiores reddantur aut exceptionibus obnoxia. II

P A R S

PARS PRIMA PHYSICÆ.

SECT. I. De universalibus Corporum viribus.	12
CAP. I. De vi inertia plurimisque inde colligendis Physices principiis.	13
ART. I. De vera notione & existentia vis inertiae.	ib.
CONCL. Demonstratur vis inertiae.	15
ART. II. De principio actionis & reactionis.	23
CONCL. Reactionem actioni contrariam & aequalem esse demonstratur.	24
ART. III. De virium compositione.	30
APP. De quibusdam capitulis præcedentis utilitatibus.	37
CAP. II. De vi attractionis variisque illius speciebus.	42
ART. I. De attractione generatim considerata.	43
CONCL. Universalem inter corpora omnia attractionem demonstrant phaenomena.	46
ART. II. De prima attractionis lege.	54
CONCL. Attractionis universalis lex est ut corpora omnia sese attrahant in ratione directa massarum & duplicata inversa distantiarum.	57
ART. III. De altera attractionis specie.	64
CONCL. Præter attractionis legem in ratione distantiarum duplicata decreascentem, admittenda est lex alia in ratione plusquam duplicata decreascentem.	68
APP. De quibusdam capitulis præcedentis utilitatibus.	76
CAP. III. De gravitate constanti.	83
ART. I. De gravitatis terrestris affectionibus præcipuis.	84
ART. II. De causa gravitatis.	91
CONCL. A vortice Cartesiano repeti non potest gravitatis causa, neque ab ullo impellente fluido quod easdem cum fluidis cognitis proprietates habeat.	94
ART.	

ART. III. De centro gravitatis.	104
APP. De quibusdam capitulis præcedentis utilitatibus.	116
SECT. II. De reliquis universalibus corporum proprietatibus ex virium notione derivandis.	124
CAP. I. De motu in genere; variisque illius speciebus.	ib.
ART. I. De motu generatim considerato.	125
ART. II. De rectilineo corporum descensu.	130
ART. III. De motu curvilineo.	137
CONCL. Gravitatis terrestris inæqualitatem demonstrant accuratissime instituta pendulorum experimenta.	145
ART. IV. De corporum conflictu.	162
APP. De quibusdam capitulis præcedentis utilitatibus.	183
CAP. II. De extensione & reliquis inde pendentibus corporum proprietatibus.	194
ART. I. De extensione penetrabili.	195
CONCL. I. Validissimis rationibus probatur vacuum.	197
CONCL. II. Corpora omnia innumeris poris pertusa esse demonstratur.	206
ART. II. De extensione impenetrabili.	211
CONCL. Extensio qualibet, in infinitum Geotrice divisibilis demonstratur.	215
ART. III. De figurabilitate.	225
CONCL. De perfecta minimarum particularum duritie, diversaque illarum natura nihil affirmandum videtur.	231
ART. IV. De corporis natura.	239
APP. De quibusdam capitulis præcedentis utilitatibus.	246

INSTITUTIONE'S


P H Y S I C Æ.

IN UNIVERSAM PHYSICAM

P R O Æ M I U M.

C A P U T P R I M U M.

De natura & divisione Physices .

I. HYSICA dicitur illa Philosophiæ pars, quæ corporis naturalis proprietates expendit. In hac autem definitione probe notari debent verba *corporis naturalis*, quæ quidem apposite omnino dicta fuere, ut quæstiones plurimæ, quæ in sacra Theologia opportunius tractantur ad hanc divinam scientiam reserventur. Itaque quidquid in corporibus præter consuetum naturæ ordinem, & per miraculum contingit, Physicorum contemplationi, & disputationi subiacere non debet. Hinc Physica definiri etiam solet *Philosophia naturalis*, vel *scientiâ naturæ*.

II. Duplicis generis proprietates in Corporibus generatim distinguuntur. Aliæ sunt proprietates omnibus Corporibus communes, quæ nempe deprehenduntur in omnibus Corporibus, quæ nostris experimentis, vel observationibus subjici possunt, atque ideo proprietates illæ dicuntur *universales*. Aliæ autem proprietates in certis dumtaxat Corporum speciebus observantur. Rursus autem proprietates universales, vel eædem in Corporibus perpetuo manent, vel per gradus crescunt, atque decrescunt, hoc est,

Jacq. T. IV.

A

ut

ut loquuntur Scholaſtici : *Suſcipiunt magis vel minus* . Ad primam proprietatum univerſalium claſſem pertinent : *Extenſio* , *impenetrabilitas* , *vis inertia* , *mobilitas* , *quietis* & *figuræ poſſibilitas* , ſive, ut vulgo dicitur, *quieſcibilitas* , & *figurabilitas* . Ad ſecundam claſſem referuntur , *vis gravitatis* , & *vis attractionis* . Has enim vires juxta certam legem decreſcere demonſtrabimus . Quod ſpectat proprietates ſpeciales , eas ſcilicet , quæ certis dumtaxat Corporibus conveniunt , has enumerare non licet ; tot enim ſunt , quot diverſæ Corporum ſpecies . Ad proprietatum illarum ordinem pertinent , *fluiditas* , *elaſticitas* , *pelluciditas* &c. Hic autem cavendum eſt ne proprietates univerſales cum eſſentialibus confundantur ; fieri enim poteſt , ut in Corporibus certas perpetuo obſervemus qualitates , quæ tamen ad ipſam Corporum eſſentiam non pertineant . Itaque monendi ſunt ſtudioſi adoleſcentes , ut Corporum proprietates illorumque effectus accurate contemplantur , quæſtiones autem Scholaſticas , quæ de proprietatibus eſſentialibus agitari ſolent , non multum curent ; ex his enim nihil , vel parum utilitatis ſperandum eſt ; hujus moniti rationem explicavimus in Logica .

III. Pro duplici proprietatum genere duplex eſt Phyſicæ pars . Alia eſt Phyſica *generalis* , quæ univerſales corporum proprietates conſiderat : alia autem eſt Phyſica *particularis* , quæ certas dumtaxat Corporum ſpecies expendit . Ex hac diviſione patet ampliſſimum eſſe Phyſicæ campum , & ad omnes fere ſcientias naturales extendi . Quia vero tam multa ſcire datum non eſt mortalibus , pro temporis brevitate , & humani ingenii limitatione , vaſtiſſimum illud argumentum intra juſtos limites coercere ſolent cultiores Phyſici . Itaque in Phyſica ge-
ne-

nerali explicabimus universales Corporum proprietates ; deinde ad Physicam particularem gradum facientes eas primum considerabimus præcipuas corporum species , quæ per experimenta nobis innotescunt ; & tandem ad remotiora Corpora assurgemus , quæ observationibus quidem , non autem experimentis subijci possunt . Sed hæc generatim dicta sint de Physices divisione ; singula enim hujus divisionis capita suo ordine , deinde rursus dividemus , & explicabimus .

IV. Physica sive generalis, sive particularis, vel est *experimentalis* , vel *theoretica* . Physica experimentalis ea est , quæ Corporum proprietates & effectus , experimentorum atque observationum ope ostendit . Physica autem theoretica ea dicitur , quæ non solum experimenta , & observationes adhibet , sed iis etiam ad inveniendos , vel explicandos naturæ effectus ratiocinando utitur . Probe autem distingui debent observationes & experimenta ; si nempe quidpiam attentius speculamur , quod natura nulla vi artis coacta demonstrat , ille speculandi actus non *experimentum* , sed *observatio* appellatur ; contra autem physicum experimentum est tentamen , quo Artificis industria , atque opera exploratur , & ob oculos ponitur . ali qua naturæ actio , quæ antea latebat , & lateret postea nisi eadem a natura velut invita per artem exprimeretur ; e. g. Cælum obducitur nubibus , nulla nostra opera interveniente . Si ergo nubes præsentis attente intuemur , Cælum nubibus obductum *observare* dicimur ; at si ope anthilæ-pneumaticæ ex globo metallico cavo aer educitur , ut deinde globus ad stateram appensus examinetur , *experimentum* facere dicimur . Quia vero *phenomenum* appellatur id omne , quod sensibus conspicuum est , patet ex-

4 INSTITUTIONES PHYSICÆ.

perimentis, & observationibus commune esse phenomeni nomen.

V. Ex his intelligitur, quid inter Physicam pure experimentalem, & Physicam theoreticam intercedat; experimentum *ratio* non est, sed *factum*, & vi experientiz tantummodo cognoscitur effectum aliquem ita se habere; at per Physicam theoreticam non solum effectus causa explicatur, sed etiam veritates universales colliguntur, & in re aliqua data in quolibet simili casu conclusiones statuuntur. Itaque Physica experimentalis est Physica *factorum*, Physica autem theoretica est *factorum* explicatio. Hinc ut sua laus unicuique iuste tribuatur, Physica mere experimentalis commendari quidem debet, sed manus magis quam ingenii dexteritatem postulat, atque optandum maxime foret, ut qui manuum industria pollent, solam experientiam tractarent: alii vero qui meliori, nobiliorique sagacitate, ingenii scilicet, præditi sunt, partem theoreticam sibi assumerent, & ita conjunctis viribus ad Physices progressum conferrent.

VI. Quamvis Physica theoretica in effectibus explicandis occupata sit, cavere tamen maxime debent Physici ne effectuum causas temerario proferant; igitur, ut totus Physices scopus intelligatur, quid *causæ Physicæ* vocabulo significari velim, clare exponam. Deus est prima, & unica rerum omnium causa; verum antequam ad primam alicujus effectus causam perveniamus, plurimæ aliquando percurrentes sunt intermedie causæ, ita ut effectus alicujus causa, non tam causa dici debeat, quam effectus alius, qui suam quoque habet causam, donec tandem perveniamus ad effectum, qui nullam agnoscat causam præter Deum, vel ipsam corporum naturam; rem exemplo illu-
stra-

PROEMIUM CAP. I.

5

strabimus: gravium descendendum legem accurate demonstrant Physici; hujus descensus causa est *gravitas*, quam velut effectum ex alia causa oriundum considerant plurimi Physici. Itaque licet corporum descensus proxima causa nota sit, *gravitas* nempe, ignota tamen est causa remota, sive causa gravitatis; quare ut plurimum sistendum est in causis proximis, nec remotiores causæ afferri debent, nisi fuerint perspicue cognitæ; inde autem sit ut in rebus physicis multa confusio persæpe oriatur. Quæ cum ita sint, jam evidens est in Physica theoretica confidenter ostentandas non esse causas ultimas, sed satis esse proximas, vel remotas, quæ clare innotescere possunt; & quidem ulterior cognitio exiguæ admodum esset utilitatis. Si enim descensus leges demonstraverit Physicus, si effectus gravitatis æstimare, & ad calculum revocare noverit, eadem in humanam societatem redundat utilitas, etiamsi gravitatis causa nos lateat. Itaque probe tenendum est eum esse debere melioris Physicæ scopum, ut nempe varii effectus probe observentur, accurate æstimentur, & ad nostram utilitatem transferantur. Ut autem hunc scopum pro mea tenuitate attingam, singulis Physices Capitibus in varios articulos juxta methodi regulas opportune dividendis Appendicem adjungam de uniuscujusque Capituli utilitate, vel in artibus, vel in aliis etiam disciplinis.

C A P U T I I.

De regulis philosophandi.

Quatuor primariis regulis comprehendi solet universa philosophandi ratio, quas-

A 3

qui

6 INSTITUTIONES PHYSICÆ
quidem regulas , utpote in rebus physicis uti-
lissimas fufius explicabimus.

REGULA PRIMA.

*Effectuum naturalium causæ non plures sunt ad-
mittendæ , quam quæ & vere sunt , &
effectibus explicandis sufficiunt .*

HÆC regula multas complectitur partes se-
orsim declarandas ; & 1. quidem oportet
causam esse veram , ideoque excludi debent
non solum causæ commentitiæ , quas existere
repugnat , sed etiam causæ mere possibiles ;
itaque satis non est , ut causa aliqua possit exi-
stere , sed etiam oportet ut revera existat . Li-
cet igitur philosophicarum hypotheseon absur-
ditatem , & repugnantiam demonstrare non pos-
simus , si tamen nulla ratiocinatione , nullis ex-
perimentis , aut observationibus probari possint ,
eas e Physicâ longe exulare jubemus . Ceterum
hanc primam regulæ partem ex aliis sequenti-
bus regulis clarius licebit intelligere . 2. Opor-
tet ut causa sufficiat , hoc est , singulis effectus
explicandi partibus , & circumstantiis debet sa-
tisfacere ; alioquin tota non haberetur effectus
causa . 3. Tandem non plures admittendæ sunt
causæ , quam quæ satis sunt ; etenim receptum
est in omnibus disciplinis principium : *Entia
non sine necessitate esse multiplicanda , nec fieri
debere per plura , quod potest fieri per pauciora .*
Ceterum evidens est huic regulæ præmittendam
esse certissimam effectus cognitionem , nec ag-
grediendam esse , quod tamen persæpe fit , ef-
fectus alicujus explicationem , nisi effectum i-
psam existere certo constiterit . Ita Plutarchus
olim hanc sibi proposuerat quæstionem : *cur*
pul-

pulli equini, si a lupis fuerint infectati, velocius currere soleant: variis explicationibus quaeritis veram tandem solutionem proponit: Sed id, inquit, fortasse verum non est.

REGULA SECUNDA.

Effectuum naturalium ejusdem generis eadem sunt causae.

HÆC secunda regula, quæ *analogia naturæ* solet appellari, ex prima facile derivatur. Etenim per primam regulam, natura simplex est, & sibi semper consona, neque superfluis causis redundat. Porro effectus ejusdem generis sive omnino similes, diversis causis tribui, naturæ simplicitati omnino repugnat. Ita gravium descensus in Europa, & America eidem causæ tribuendus est. Pari ratione cum in omnibus hominibus eadem respirationis instrumenta demonstrent observationes anatomicæ, eandem esse in singulis respirandi causam merito concludimus. Nulli exceptioni obnoxia esse potest hæc regula; quod autem incautos Philosophos in errorem aliquando inducat, id fit ex ipsius regulæ abusu; præcipiti nempe judicio persæpe credimus similes esse effectus, qui tamen sunt inter se diversissimi. E. G. Venti præferunt analogiam quamdam, ventosque singulos, tanquam effectus ejusdem generis facile sibi persuaderet, qui singulas circumstantias variasque conditiones accurate non consideraret. Cavendum ergo est diligenter ne ex characteribus mere externis, de perfecta effectuum similitudine audacter pronuntiemus. Ita plantæ quædam lethales externam plantarum salubrium speciem imitantur, sed principio quodam interno, & non facile conspicuo

inter se maxime differunt . Sæpe etiam miramur improvisum alicujus causæ effectum , alium plane diversissimum expectantes . Hæc autem effectuum diversitas proculdubio tribui debet causarum varietati , & subtilissimæ conditioni nobis imperviæ . Itaque id summopere curandum est , ut nempe certo compertas habeamus omnes effectuum partes , conditionesque singulas ; si autem eo pervenire liceat , jam regula extra omnem dubitationem posita est . Immerito igitur hujus regulæ vim enervare conantur aliqui Philosophi . Re quidem vera si de effectuum perfecta similitudine , vel minimum supersit dubium , errori obnoxia esse potest analogiæ regula , atque in hoc casu certissima veritatis norma haberi non debet . Quamvis autem analogia demonstrationis vim non semper obtineat , attamen tantam conciliat probabilitatem , ut non solum in rebus physicis , sed etiam in tota fere vivendi , agendique ratione sine stultitia rejici non possit ; ita si domus hodie stet firmissima , crastina die sine ullo timore eandem domum ingredi possum , si nullum appareat ruinæ indicium , quamvis tamen fieri possit , ut ob causam aliquam latentem præceps ruat ædificium . Huic regulæ innituntur pleræque hominum actiones . Etenim actiones suas secundum experientiam moderantur sapientes homines , in gravissimis negotiis experientia magistra utuntur , & quid agendum sit in casu singulari , judicant ex eo , quod factum fuit in alio casu præterito , cui præsens similis est vel apparet . Manifestum autem est hanc agendi rationem nihil aliud esse , nisi perpetuum hujus regulæ usum .

REGULA TERTIA.

Qualitates quæ in omnibus Corporibus , in quibus experimenta sumere licet , sine ullo earundem qualitatum incremento, vel decremento observantur ; pro universalibus Corporum qualitatibus haberi debent .

HÆC regula , qua universa Physica tanquam fundamento innititur , ex analogia naturæ evidens est ; at non sine maxima diligentia adhiberi debet . Et 1. Quidem satis non est experimenta in paucis corporibus haberi , sed in maximo corporum numero institui debent . Præterea etiam requiritur , ut qualitates illæ incerta lege non augeantur , neque minuantur ; qua enim ratione decrescerent , possent quoque minui in infinitum , atque tandem omnino evanescere . At si qualitates certa lege crescant , & decrescant , quales sunt gravitas & attractio , jam qualitates illæ in omnibus corporibus observatæ pro universalibus corporum qualitatibus haberi debent , certis tamen gradibus crescentes & decrescentes . Hinc patet quodnam sit discrimen inter qualitates , quæ sine ulla lege augentur atque minuuntur , & qualitates alias quæ certa lege crescunt , atque decrescunt . E. G. Calor in certis gradibus crescit , atque decrescit ; verum gravitas & attractio , certam servant distantiarum legem , quam deinde considerabimus 2. Inter proprietates universales aliæ distinguendæ sunt , quæ non solum per experimenta innotescunt , sed etiam ex ipsa corporis notione colliguntur ; aliæ autem per sensus tantum , atque experimenta acquiruntur . Quod spectat primi generis qualitates , evidens est illas competere singulis cor-

poribus iis etiam quæ sensuum potestatem , & vim omnem fugiunt . Quod autem attinet qualitates alias per sensus tantum acquisitas , haud pari jure ad corpora quælibet transferri possunt ; quod quidem monitum volui , ut alterationes omnes philosophicas effugerem ; in nostris enim Institutionibus physicis nihil affirmare volo , nisi quod omnino negari non potest ab iis , qui rem probe tenent atque intelligunt . Ita cum non desint Philosophi , qui simplicissima admittunt materiæ puncta , indivisibilia , inextensa , quæ omni carent figura ; licet qualitates illas in omnibus observemus corporibus , quæ sub sensus cadere possunt ; minus tamen accurate easdem proprietates transferre liceret ad puncta materiæ , quæ sensuum nostrorum limites excedunt ; nisi aliunde qualitates illæ ex ipsa corporis notione colligantur metaphysicisque argumentis comprobentur . Sed hac de re fusius differere ad præsentem locum non pertinet ; interim monere satis sit præsentem regulam eo quem dixi modo explicatam in dubium vocari non posse . Qua enim ratione affirmamus extensa , gravia &c. esse corpora , quæ in terræ gremio alte delitescunt , nostrisque experimentis subjici non possunt , nisi vi hujus regulæ ? & certe non sine summa insipientia aliquis negaret universales corporum proprietates , nisi eas in corporibus singulis , manibus tractasset , suisque experimentis comprobasset .

REGULA QUARTA.

In Philosophia experimentalī propositiones ex phenomenon per inductionem collectæ, non obstantibus contrariis hypothēsibus, pro veris aut accurate, aut quam proxime haberi debent, donec alia occurrant phenomena, per quæ aut accuratiores reddantur, aut exceptionibus obnoxie.

HAC ultima philosophandi regula statuitur hypothēsibus quibuscumque antepondas esse propositiones ex observationibus, & experimentis collectas. Et quidem cum hypothēses mera sint ingenii figmenta, evidens est propositiones, quæ aliqua observationum, vel experimentorum auctoritate nituntur, præferendas esse puris hypothēsibus, quæ nullam habent nisi ipsius ingenii fingentis auctoritatem. Ex hac ratiocinatione manifestum etiam est inductionibus, quæ ex phenomenon derivantur, justam probabilitatem tribuendam esse; eo scilicet accuratior censerī debet inductio, quo plura sunt phenomena quibus satisfacit; si consentiat cum plurimis, habenda est quam proxime vera; si cum omnibus, vera est accurate; si autem contraria occurrant phenomena, restringi debet inductionis veritas. Ad hanc regulam referuntur ea omnia, quæ de opinionum probabilitate, & hypothēseon usu explicavimus in Logica; quare non est quod hujus regulæ explicationi diutius immoremur.

P A R S P R I M A
P H Y S I C E S,
S E U
P H Y S I C A G E N E R A L I S.
S E C T I O I.

De universalibus corporum viribus .

AB extensione & impenetrabilitate Physices initium sumere solent plerique Philosophi . At cum virium doctrina ad universales alias corporum proprietates detegendas, atque explicandas breviorē, tutiorēque viam aperire videatur, a vulgari Physicæ tradendæ methodo mihi desectendum esse existimaui . Hic autem de viribus rursus monendum est, quod de causis jam diximus, nempe *vis* nomine, nihil aliud intelligimus, nisi effectum aliquem dato aliquo tempore productum, nec leviter quidem attingere volumus inanissimas quaestiones de virium natura, an sint *entitates* aliquæ corporibus inhærentes, an quodlibet aliud . Itaque ne profligatas veterum Scholasticorum qualitates occultas in scenam revocare videamur, hæc definitio nominis probe tenenda est . Et quidem unusquisque facile experitur, sibi nullam esse virium notionem, nisi effectum aliquem sibi repræsentet . Porro quamvis hæc Sectio de corporum viribus inscribatur, sæpe tamen, data occasione, per alias corporum proprietates excurremus, si nempe rerum perspicuitas, & doctrinæ ordo id postulaverint .

C A.

CAPUT PRIMUM.

*De vi inertiae, plurimisque inde colligendis
Physices principiis.*

ARTICULUS I.

De vera notione, & existentia vis inertiae.

I. **V**IS inertiae dicitur illa proprietas, qua corpora statum suum, vel motus, vel quietis perpetuo tueri conantur. Hujus definitionis partes singulas explicabimus. Non solum corpora statum suum quietis perpetuo servant, seclufis viribus quibushbet impressis, quod quidem a nemine in dubium vocatur, sed etiam seclufis omnibus impedimentis, statum motus perpetuo retinent, hoc est, si corpus moveatur, moveri perget in infinitum eadem semper velocitate, & in linea recta, nisi causa aliqua corporis directionem, & velocitatem turbaverit. Vim illam in corporibus non sentimus, nisi illorum statum mutare conemur; ille autem conatus ad mutandum corporis alicujus statum dicitur *actio*; at conatus quo corpus aliquod status mutationi resistit, vocatur *resistentia* vel *reactio*. Itaque vim inertiae, tanquam mere *passivam* habere possunt Physici, qui vis passivæ nomine eam vim intelligunt, quæ ex se nullum exerit effectum, nisi a vi alia excitetur; sed res est levioris momenti, & de nomine minime litigandum est. At vis inertiae confundi non debet cum vulgatissimo Scholasticorum principio de *indifferentia materiae ad motum & quietem*; hoc enim principio nihil aliud intelligendum videtur, nisi ad essentiam materiae non pertinere, ut perpetuo moveatur,
vel

14 INSTITUTIONES PHYSICÆ.

vel perpetuo quiescat ; at inde nullatenus colligitur in motu vel quiete , perpetuo manere corpus , quod movetur vel quiescit , seclulis omnibus impeditis.

II. Ut tota hæc doctrina in bono lumine collocetur , pauca de motu præmittenda sunt , fusius deinde explicanda . Quamvis ita clara sit , ac perspicua motus notio , ut nulla definitione indigeat , a Physicis tamen definiri solet motus *continua & successiva loci mutatio* . Hic autem locum generatim consideramus , & abstrahimus a loco *absoluto* vel *relativo* , ac proinde etiam a motu *absoluto* vel *relativo* . Velocitas dicitur illa corporis affectio , qua datum aliquod spatium dato tempore percurrit . Rursus velocitas dicitur *uniformis* sive *æquabilis* , si æqualibus temporibus æqualia spatia describantur ; secus autem *variabilis* appellatur . Inde autem plurima fluunt consectaria , quæ quidem sunt per se manifesta . Si velocitas uniformis fuerit duplo , vel triplo major &c. erit spatium eodem tempore descriptum duplo , vel triplo majus &c. ac proinde velocitates sunt directe ut spatia . Contra autem si maneat idem spatium , existente velocitate duplo , vel triplo majori &c. erit tempus duplo , vel triplo minus &c. ideoque *velocitates sunt reciproce ut tempora* . Quare generatim si spatium dicatur ,

S, velocitas, V, tempus , T, erit $V = \frac{S}{T}$

& $TV = S$, hoc est : *Spatia sunt in ratione composita velocitatum & temporum* .

His autem præmissis facile intelligitur , quid sit *quantitas motus* : si corpus aliquod moveatur , singulas ejusdem corporis particulas eadem velocitate moveri necessum est ; si enim aliæ irent tardius , aliæ velocius , jam solveretur par.

partium nexus, nec corpus maneret continuum, quod est contra hypothesim. Porro quantitas motus nihil aliud est quam aggregatum; seu summa omnium velocitatum; quare evidens est quantitatem motus esse productum ex numero partium; sive ex quantitate materiæ in velocitatem. Si igitur duorum corporum velocitates dicantur V, v , quantitates materiæ Q, q , Spatia iisdem temporibus percursa, S, s , quantitates motus A, a , erit $A : a = QV : qv = QS : qs$; sunt enim velocitates ut spatia iisdem temporibus descripta. Jam si quantitates motus ponantur æquales, erit $QV = qv$, & $QS = qs$, ideoque $Q : q = v : V = s : S$, hoc est: *quantitates materiæ sunt in ratione reciproca velocitatum, aut spatiorum*; quantitas materiæ appellari etiam solet *massa*, & quantitas motus dicitur etiam *vis motrix*; at si nulla habeatur ratio quantitatis materiæ, solaque consideretur velocitas aucta vel retardata, tunc vis illa appellatur *vis acceleratrix* in primo casu; in altero autem *retardatrix*. His præmissis fit

C O N C L U S I O.

DEMONSTRATUR VIS INERTIÆ.

I. Vim inertię demonstrat experientia. Et quidem quod spectat corpora quiescentia, ea in quiete perpetuo manere observamus, nisi vi aliqua ad motum concitentur. Si autem aliquando ignota vi corpus moveri contingat, id tamen non sine latente vi aliqua fieri, ex analogia naturæ jure optimo concludere debemus, & revera existit motus causa, licet sensus nostros fugiat, & nulla aliquando fortasse detur causa corporea, quod quidem probe notandum est. Etenim quamvis sine alio corpore impellen-

lente corpora non moveri ut plurimum observemus, analogiæ tamen lege abuteretur, qui corpora nulla sine alterius corporis impulsu unquam moveri pronuntiaret. Et certe si gravitatis causam attente quis meditatus fuerit, eam ab aliquo corpore repetendam esse non facile concedet, quinimmo in contrariam Nevvtonianorum opinionem propensior erit. Sed hæc de re data opera deinde sermonem habebimus.

Quod spectat corpora ad motum semel concitata, ea in motu diutius perseverare observamus, quo magis de medio tolluntur impedimenta. Quare si ita removeri possint obstacula omnia, quæ sane sunt plurima, ut nullæ omnino sint vires retardatrices, merito asserere possumus perpetuum futurum esse corporum motum. Pari ratione affirmare licet motum perpetuo futurum esse uniformem & rectilineum; diminutis enim impedimentis, ad uniformitatem & rectilineam directionem corpus magis tendere deprehenditur. Si globus aliquis eximie perpolitus in superficie plana probe lævigata incedat, in linea recta progredi videtur, neque ad dexteram declinans, neque ad sinistram, donec tandem motus extingatur asperitate plani aliisque impedimentis, quæ nulla vitari possunt hominum industria; at quo pauciora manent impedimenta, eo magis experimenta ad veritatem accedunt.

Doctrinam hanc variis exemplis illustrare non abs re erit. Corpus in navigii tabulato constitutum quiescit, manente navigii motu constanti & uniformi; porro si corpus tenderet ad quietem, ad ipsum gubernaculum corpus illud fugere deberet, quod quidem non minus mirandum videretur, quam si quiescente navi, idem corpus gubernaculum versus sponte recederet. Præterea si corpus directionem motus
spon-

sponte mutare posset, in prædicto casu, navigii scilicet, motu uniformi & rectilineo delati, corpus illud non quiesceret, quod est observationi contrarium. At si navigii motus subito sistatur, homines stantes in navi antrorsum præcipites ruent, quod facile experiri quisque potest stans in cursu celerrime delato, cujus motus statim sistitur, is enim in partem cursus anteriorem sese raptum sentiet. Si vas aquæ plenum in tabula aliqua collocetur, & vj satis magna impellatur, aqua in vase sub initio motus, versus partes motui vasis contrarias tendere videbitur, non quod revera talis motus aquæ impressus sit, sed cum aqua in eodem quietis statu perseverare conetur, vas motum suum aquæ statim imprimere non potest, ac proinde aqua, ut ita dicam, a vase derelicta & revera quiescens, locum mutare videbitur. Tandem postquam vasis motus in aquam transiit, & aqua una cum vase uniformiter, & eadem celeritate progredi cœperit, si vasis motus subito cohibeatur, aqua tamen in eodem motu perseverare conabitur, & super vasis latera assurgit. Huic causæ tribuendum est, quod navi turbulento mari jactata in ipsa sedentes homines, doloribus, nausea & vomitu afficiantur, præsertim si mari non fuerint assueti; etenim liquores in ventriculo, intestinis, vasis sanguiferis cæterisque canalibus contenti, navis jactationibus non statim obediunt; unde in corpore humano fluidorum motus turbabitur, & morbi orientur. Ex his omnibus sic tandem argumentamur: vis illa tanquam universalis corporum omnium proprietates haberi debet, quam in singulis corporibus observamus; atqui vim inertię, quoad partes singulas, in omnibus corporibus experimur, quantum ferre potest experientorum diligentia. Ergo &c.

II. Corpora mutationi status resistere demonstrant rationes Metaphysicæ. Et quidem si corpora mutationi status non resistant, corpus quodlibet etiam valde magnum e quiete ad motum, vel e motu ad quietem non solum facili manu; sed etiam sine ullo conatu posset reduci; vis etiam minima motum, quantumvis magnum posset producere, vel etiam sistere, nulla foret inter causam & effectum proportio, quod repugnat Ontologiæ principiis, atque experientiæ.

Et certe hanc proportionem ostendunt quoque experimenta; si enim producenda, vel extinguenda sit eadem velocitas in corpore duplo, vel triplo majori &c. id fieri non posse experimur sine vi duplo; triplo majori &c. ac proinde *vis inertie est, ut quantitas materie*; si autem manente eadem quantitate materie producenda, vel extinguenda sit velocitas duplo, vel triplo major &c. adhiberi debet vis duplo, vel triplo major &c. ac proinde *vis inertie est, ut velocitas producenda, vel extinguenda*. Quare generatim *vis inertie est, ut quantitas motus producenda vel extinguenda*. Hæc ratiocinatio accurate quidem demonstrat corpora mutationi status resistere, ac proinde vi inertie prædita esse; at vis inertie partes singulas, perpetuam scilicet motus uniformitatem illiusque rectilineam directionem non æque evincit. Argumentum aliud desumi solet ex principio rationis sufficientis; si enim corpus sibi ipsi relinquatur, nullaque accedat vis contraria, in statu suo perseverare debet; cum nulla sit ratio cur statum mutet. Id quidem facile concedunt Philosophi, si agatur de corpore quiescente, negant autem nonnulli de corpore moto, quod suapte natura ad quietem tendere affirmant; iis ergo ratio sufficiens est ipsa corporis

ris indoles & natura. Quamvis autem non raro utilissimum sit rationis sufficientis principium ; quia tamen sæpius mortales latet rerum ratio , fateri debemus principium illud caute admodum adhibendum esse. Quæ cum ita sint, patet vim inertię , si partes ejus singulas consideremus , habendam esse tanquam principium experientia magis , quam accurata aliqua demonstratione innixum.

Objic. Si corpus aliquod in aere deferatur , sibi que permittatur , sponte descendit sine ulla vi impellente . Ergo corpus non perseverat in quiete , seclusa etiam vi qualibet impressa .

Resp. distinguo antecedens . Sine ulla vi impellente , quæ sensibus conspicua sit concedo . ant. sine ulla vi impellente , quæ sensus fugiat . Neg. ant. & conf. Imperita hominum multitudo sensuum erroribus assueta , sibi facile persuadet corpora sine ulla vi in terram descendere , cum nullam videant . Unde credunt plerique homines corpora descendere , quia non sustentantur . Verum etiam si nulla oculis pateat vis extrinseca , nullam tamen esse temerario quis affirmaret ; fingere enim possumus fluidum quoddam subtilissimum omnem oculorum aciem longe fugiens , vel etiam , ut Névvtonianis placet , vim quamdam internam sine ullo interveniente fluido possumus admittere , ut jam observavimus ; sed argumentum illud fuse , & accurate convenienti loco persequemur . Hunc vulgi errorem quotidiano experimento depellere satis erit . Si corpus in tabula horizontali constituatur , quæ de causa per tabulæ superficiem motu horizontali non incedit corpus illud ? cum nihil impediat . Cur sursum non ascendit idem corpus ? cum nihil motui secundum hanc directionem resistat . Cum ergo corpus deorsum moveatur , necessum est ut vi aliqua , quæcumque sit , urgea-

geatur. Merito igitur Philosophi mirantur corporum descensum, quem sine ulla difficultatis suspitione negligenter aspicit hominum vulgus. Ceterum ex hac responsione patet, vim inertię diversam omnino esse a vi gravitatis, qua nempe corpora deorsum urgentur. Et quidem vis inertię secundum quamlibet directionem sentitur; si enim corpus aliquod e quiete ad motum, vel e motu ad quietem reducere, quis tentaverit secundum quamlibet directionem, vel horizontalem, vel perpendicularem, aut utcumque obliquam, id fieri non posse sentiet sine conatu aliquo, sine resistantia aliqua; imo si quis corpus descendens manu superne percutiat, resistantiam aliquam experietur; corpus nempe resistit accelerationi motus, secundum ipsam descensus, seu gravitatis directionem. Itaque evidens est vim gravitatis longe differre a vi inertię, & vires illas duas ab imperitis hominibus perperam confundi.

Instabis: 1. si corpus in plano etiam eximie lævigato incedat, sensim languescit motus, atque tandem omnino extinguitur. Si globus filo suspensus agitur, variosque itus & reditus perficit, sensim breviores fiunt globi vibrationes, atque tandem evanescunt. In ludo *trudiculari* globulus eburneus per aliquod tempus motu rectilineo in tabula progreditur, sed in certis casibus, veluti sponte, per eandem lineam rectam ad partes contrarias recedere videtur. Tandem si corpus aliquod secundum directionem horizontalem, vel ad horizontem obliquam projiciatur, in terram recidit curvam describens. Itaque sic argumentari licet; corporibus tribuenda non est vis illa, quam negare videntur experimenta, atqui &c. ergo.

Resp.

Resp. Concedo majorem . Nego minorem .
 Objecta experimenta explicabimus . Ad primum patet responsio ex dictis ; nullo enim artificio removeri possunt omnia impedimenta , ac proinde mirum non est , quod sistatur tandem penduli motus , aeris resistentia , filique in puncto suspensionis impedimento retardatus . At si maxima industria filum suspendatur , per longum satis tempus perseverat illius motus . Quod autem in certis casibus globus eburneus in contrariam partem tendere videatur , id fit , quod globus motum aliquem circa axem in partes contrarias admiserit , qui quidem motus adhuc perseverat extincto motu rectilineo , ac proinde globulus in contrariam directionem recedere videbitur ; donec asperitate plani extinguatur ipse quoque rotationis motus . Denique quod corpora horizontaliter , vel oblique projecta per curvam relabantur , nihil repugnat vi inertiae , quæ vires alias quaslibet excludit . Porro in præsentī casu præter motum impressum agit etiam vis gravitatis quæ corpus deorsum revocat . At si nulla adesset vis gravitatis , corpus recta , & uniformiter abiret in infinitum , secundum directionem motus impressi . Qua ratione autem compositis simul duobus motibus , motu scilicet impresso , & motu ex vi gravitatis oriundo curva describatur , & quænam curva ex tali motuum compositione oriatur , deinde suo loco demonstrabimus .

Instabis . 2. Si corpus nostrum moveatur , vel in obstaculum aliquod impingat , sensationum nostrarum testimonio acquirimus vis cujusdam majoris , vel minoris notionem , quam ex quiete nullatenus comparamus . Et quidem

cor.

corpus quiescens nullum unquam motum producere poterit; contra autem corpus incurrens in corpus quiescens, illud movebit. Ex his ergo sic concludere licet. Vis illa in corpore quiescente saltem admitti non debet quæ in corporum motu tantum sese manifestat. Atqui &c. ergo &c.

Resp. concedo maj. nego minorem. Facile sibi persuadent homines meditationibus philosophicis non satis assueti, in corporibus motis adesse conatum quemdam quo carent corpora quiescentia, inde autem originem habet error ille quod inanimatis corporibus ea facilius tribuamus quæ in proprio corpore observamus. Porro dum vis nomen ad inanimata corpora transferimus, levi etiam attentione patet id fieri non posse nisi in triplici duntaxat sensu. 1. Si corpori inanimato propriam sensationem tribuamus, quod est absurdum: 2. Si vis nomine intelligamus metaphysicam quamdam entitatem a nostris sensationibus diversam; quam quidem nulla ratione intelligere nec proinde definire possumus, ... 3. Tandem si vis nomine significemus effectum ipsum vel proprietatem aliquam effectui manifestatam cujus causam non investigamus. Hæc autem ultima significatio sola est rationi consona. At si vis nomini hanc significationem tribuimus, jam corpori quiescenti æque ac moto competit, & quietis non minus quam motus continuatio tanquam lex naturæ haberi potest. Tandem dum corpus incurrens corpori quiescenti motum imprimit, id facere non potest sine aliqua proprii motus jactura. Quæ quidem jactura oritur ex vi qua corpus quiescens status mutationi resistit; ac proinde corpori quiescenti non secus ac corpori moto tribuenda est vis ad confer-

servandum statum suum, quamcumque notionem huic vocabulo jungere placeat.

Instabis, 3. Si corpora prædita sint vi inertæ, jam nulla est motus continuati causa; atqui motum sine causa continuari repugnat. Ergo &c.

Resp. Nego maj. frustra quidem Philosophi de motus communicatione tantas lites excitant; continuati motus nulla alia agnoscenda est primaria causa præter Deum optimum maximum qui non motum duntaxat, sed res omnes conservat; secunda autem causa est ipsa vis inertæ. Nec alia ratione perseverat motus quam qua continuantur corporis alicujus figura, color, aut aliæ hujusmodi affectiones quæ semper eadem permanerent, nisi vis aliqua eas turbaverit. Multo quidem rectius & utilius se gererent Physici, si motus retardati vel accelerati rationes legesque investigarent. Hic autem observandum superest nos minime definitum velle, an vis motricis actio *continuata* esse debeat, an satis sit actio *instantanea* nullo deinde impedimento turbata. Quæstio illa ad æstimandos effectus, quod in Physica unice volumus, superflua omnino est, & ad Metaphysicam pertinet, stricteque conjuncta est cum disputatione quam de rerum conservatione in metaphysicis institutionibus tractavimus.

ARTICULUS II.

De principio actionis & reactionis.

I. **A**ctionem corporis definire solent plerique Physici *vim* quam corpus aliquod in aliud corpus exercet, seu vim qua corpus aliquod aliud corpus premit vel percutit; at talis definitio ipsa re definita obscurior videtur; nos
autem

antem omnem ambiguitatem remove vel maxime studentes, recordabimur in Corpore quod *actu* movetur vel ad motum tendit, nihil aliud clare intelligi nisi ipsam quantitatem motus quam habet, vel quam haberet, sublati omnibus impedimentis; ac proinde actio corporis per ipsam motus quantitatem duntaxat sese manifestare intelligitur. Itaque actionis vocabulo nullam aliam notionem subjici volumus nisi ipsam quantitatem motus actu productam, vel producendam, si omnia removerentur impedimenta. Inde autem statim intelligere licet quid sit *reactio*; nihil enim aliud est nisi actio contraria, nempe quantitas motus in corpore agente amissa vel amittenda.

II. Receptum est apud Physicos principium: *actioni semper equalem esse & contrariam reactionem*: quid hoc principio intelligendum veniat, ex dictis evidens est; nempe in omni actione corporea tantum motus corpori *agenti* decedit, quantum corpori *patienti* sive actionem suscipienti accedit. Illud autem utilissimum in universa Physica principium sequenti conclusione explicabimus.

CONCLUSIO

REACTIONEM ACTIONI CONTRARIAM ET
ÆQUELEM ESSE DEMONSTRATUR.

I. Principium illud ex vi inertię facile derivatur. Etenim si corpus aliquod certam motus quantitatem in alio corpore producat, id fieri non potest nisi mutationi status resistat corpus quod datam motus quantitatem accipit. Necessum est igitur inter corpus *agens* & corpus *patiens* mutuam veluti pugnam excitari, ita ut quantum motus accipit corpus *patiens*,
tan-

tantum amittat corpus agens. Etenim ponamus reactionem actioni æqualem non esse, jam corpus patiens omni mutationi status non resisteret, sed alicui duntaxat mutationis parti, quod falsum esse demonstravimus in præcedenti conclusione. Itaque patet actionis & reactionis æqualitatem necessarium esse vis inertię corollarium.

II. Idem principium experimentis & exemplis demonstratur atque illustratur. Si corpus unum in alterum quiescens impingat, quid quid motus quiescenti corpori imprimitur, tantumdem impingenti subtrahitur. Si corpora ambo moveantur & ad easdem tendant partes, corpus quod celerius movetur in aliud quod movetur tardius, incurrit, & tantum motus amittit quantum acquirit corpus fugiens. Si corpora duo sibi obviam eant sive in contrarias tendant partes, qualiscunque motus mutatio corpori uni accidet, eadem omnino corpori alteri continget, ita ut æqualis semper fiat in utroque corpore motuum jactura secundum propriam motus directionem. Casus singuli ad experientiam revocari facile possunt, si observentur spatia ab iisdem corporibus motu uniformi eodem tempore descripta; cum enim spatia illa sint inter se ut velocitates, ob datas corporum massas habebitur quantitas motus ante & post conflictum, ideoque instituta comparatione innotescet quantitas motus per conflictum acquisita vel amissa. Hæc autem experimenta omnia actionis & reactionis æqualitati semper consona deprehenduntur, quantum patiuntur inevitabiles superficierum asperitates aliaque impedimenta plurima; Sed tota res multo magis perspicua fiet, ubi conflictuum leges explicabimus. Actionis & reactionis æqualitatem observare licet in attra-

ctionibus magneticis ; non solum magnes trahit ferrum , sed vicissim ab ipso ferro æqualiter trahitur , ita ut æquales sint motus quantitates tum in magnete tum in ferro productæ . Experimentum hoc modo institui solet . Imponitur magnes suberis frusto & ferrum alio suberis frusto pariter imponitur , ut nempe hoc artificio tam magnes quam ferrum æque libere innatare possint . Deinde manu retinetur magnes , ferrum videbimus ad magnetem accedere ; si vero ferrum immobile teneatur , ad illud magnetem accedere observabimus ; Sed si utrumque corpus aquæ innatare libere permittatur , magnes & ferrum sibi mutuo obviam ire conspicientur , ita ut spatia a ferro & magnete percursa semper sint in ratione reciproca massarum . Itaque æquales sunt quantitates motus hinc & inde genitæ , ut patet ex demonstratis in articulo præcedenti .

Eadem lex variis exemplis confirmatur atque illustratur . Si navigium remis agatur , aqua per remorum palmulas retrorsum versus gubernaculum propellitur ; rursus aqua in remos æqualiter agit eosque una cum navigio cui affixi sunt , versus partem contrariam impellit , & hac vi promovetur navigium . Aqua scilicet reactione sua tantum motus imprimat navigio quantum ipsa remorum vi accipit ; atque hinc intelligitur eo celerius progredi navigium quo majores sunt vel numero plures remorum palmulæ , vel etiam quo celerius intra aquam agitantur . Hinc cum natatio nihil aliud sit quam brachiorum pedumque remigium , facile intelligitur cur intra aquas promoveamur natando ; dum scilicet per manuum pedumque palmas aqua retrorsum pellitur , illa iterum agendo in contrariam partem natantes propellit : eodem artificio utuntur pisces qui
pro

pro varia motus directione aquam repetitis variisque caudæ ictibus feriunt. Idem etiam dicendum est de avium volatu; dum enim aves alarum impetu aerem deorsum verberant, aer avium alas sursum sublevat; si versus orientem pellatur aer, reactio aeris aves in occidentem impellit.

Actionis & reactionis exemplum videre est in tormentis bellicis. Pulvis pyrius intra tormentum bellicum accensus rarefit, & vi sua æqualiter agit in globum missilem & in tormentum e quo exit globus; aer enim rare factus in omnem partem sese expandens, tam tormentum retrorsum quam globum antrosum urgebit, æqualem in utroque producens motus quantitatem; atque ea de causa fit ut tormentum bellicum sibi relictum ad distantiam satis magnam recedere videatur. Hanc reactionem experiuntur qui sclopetis tractandis non sunt assueti; Si enim sclopeti caput faciei vel humero proximius non satis firma manu retineant, validissimum reactionis ictum sentient. Plurima alia & quidem utilissima exempla afferre possem; sed cum ad alias Physicæ partes pertineant, de his sermo deinde recurret. Cæterum ex dictis satis demonstratum est actionis & reactionis principium.

Objicies. Inter varia actionis & reactionis exempla hoc primum a celeberrimo Nevvtono adhibetur: si equus lapidem funi alligatum trahit, æqua vi retrahitur equus in lapidem. Verum ex illa actionis & reactionis æqualitate nullus unquam sequi posset motus. Si enim vis agens æquali resistentia absorbetur atque retunditur, qui fieri potest ut in prædicto exemplo equus lapidem trahat? Itaque sic argumentari licet: principium illud admitti non debet quod perpetuam quietem perpetuum-

tuumque equilibrium induceret; atqui &c. ergo.

Resp. Concedo maj. nego min. Nonnulli Philosophi objectione præcedenti decepti de actionis & reactionis æqualitate dubitarunt, sed tota objectio pura nominis ambiguitate male fulcitur. Itaque confundi non debent *vis* & *actionis* nomina; vis corporum non est actio ipsa, idque allato exemplo manifestum fit. Dum equus lapidem trahit, totam vim suam non impendit ad superandam lapidis resistantiam, sed aliquam duntaxat vis suæ partem quæ *actio* dicitur. Itaque per reactionem lapidis eam vis suæ partem equus amittit, quæ necessaria est ad vincendam lapidis resistantiam, vi autem reliqua equus lapidem trahit. Porro evidens est legem æquilibrii longe differre a principio actionis & reactionis; duæ enim vires dicuntur in æquilibrio, si fuerint æquales & oppositæ, nullusque, manente æquilibrio, contingere potest motus. Verum quamvis actioni æqualis & contraria sit reactio, non tamen vi toti reactio semper æqualis est; dum autem id contingit, in hoc casu habetur æquilibrio, tumque vis tota æqualis est actioni.

Instabis 1. Si quis in navigio sedens, conto vel alio quolibet instrumento navigium a littore repellat, id fit reactione ipsius littoris, ac proinde ex principio mox explicato eadem motus quantitas qua navigium recedit a littore, in ipsum littus transferri deberet; atqui hoc est absurdum. Ergo &c.

Resp. Concedo maj. Nego min. Accurate distinguendum debet quantitas motus ab ipsa velocitate. Si quantitates motus fuerint æquales, erunt velocitates in ratione reciproca massarum, ex demonstratis, ac proinde quo major est massa, eo minor est velocitas. Jam vero littus est firmis-

missimus obex & corpus immensum, si confecturatur cum navi, ac proinde littoris velocitas erit minima & physice nulla. Quamvis ergo nullam in magnis corporibus velocitatem observemus, motus quantitas potest esse maxima.

Instabis 2. omnia corpora in superficie terræ posita versus terram gravia sunt; hac vi gravitatis corpora ad telluris superficiem descendunt. Consentiant Philosophi omnes corpora descendunt a tellure attrahi, quæcunque sit hujus attractionis causa, de qua quidem maxime dissentiant. Igitur si corpora a tellure trahantur, tellus vicissim trahetur a corporibus. Ita dum lapis ad terram descendit, terra vicissim ad lapidem assurgit, & æquales erunt motus tum in lapide, tum in terra geniti; atqui hoc repugnare omnino videtur: ergo &c.

Resp. Nego min. ex præcedenti responsione facile solvitur hæc objectio. Requidem veræ æquales sunt motus quantitates tum in lapide, tum in terra productæ; cum vero quantitas materiæ in terra immenso superet quantitatem materiæ in lapide, velocitas lapidis immenso superabit velocitatem qua terra ad lapidem tendit, ideoque, si physice loquamur, velocitas terræ nulla est, quod quidem calculo demonstrare non abs re erit. Ponamus lapidem centum pedum solidorum versus terram descendere; Spatium a lapide tempore unius minuti secundi percursum erit circiter pedum parisiensium 15. ut ostendunt experimenta; sed ex mensuris geographicis tota globi terræque moles continet pedes solidos 30, 000, 000, 000, 000, 000, 000, 000; itaque ponamus jam terram ubique esse ejusdem densitatis cum vulgaribus lapidibus, quamvis omnino credibile sit eam esse mul-

30 INSTITUTIONES PHYSICÆ.

to densiorem, erit materiæ quantitas in terra ad materiæ quantitatem in lapide, ut 3000 0000000000000000 ad 1. ; proindeque dum lapis descendit per spatium 15. pedum, terra versus lapidem trahetur per unius pedis

15

partes 3000000000000000000000, quæ tantilla est quantitas ut ipsam imaginandi vim longe effugiat; ac proinde in Physica negligi potest & pro nulla haberi, quamvis geometricæ & secundum veritatem loquendo terra ad lapidem accedat, & utrumque corpus æqualiter se mutuo trahat. His paucis objectionibus respondisse satis sit ad explicandum actionis & reactionis principium; cæterum hujus principii usus frequentissime recurret præsertim in Astronomia.

ARTICULUS III.

De virium compositione.

LVirium *compositio* dicitur virium plurium in vim unicam contractio; quia vero virium nomine nihil aliud intelligimus nisi motus ipsos dato aliquo tempore productos, hinc patet virium compositionem nihil aliud esse quam ipsam compositionem motuum. Itaque motus compositus dicitur is qui ex pluribus motibus diversam directionem habentibus resultat; neque enim tanquam compositum habemus motum illum qui ex pluribus motibus in eandem directionem conspirantibus vel directe oppositis oritur. Evidens enim est in primo casu unicum esse motum summæ motuum æqualem; in altero autem casu, motus æqualis est motuum differentię, quæ quidem diffe-

differentia si nulla fuerit, hoc est, si quantitates motus fuerint æquales & directe oppositæ, habetur æquilibrium. Motuum compositorum doctrina cum ipsa vi inertię necessario ordine conjuncta est; ut ex dicendis manifestum fiet.

Fingantur rectæ AB, AD, *Fig. 1.* perpendiculares & æquales quæ exhibeant vires secundum directiones AB, AD, sive quod idem est, quæ repræsentent spatia datis viribus eodem tempore motu uniformi percursa. Corpus immineat motuum angulo, A, urgeaturque viribus secundum directiones AB, AD; dato quolibet tempore corpus vi unica secundum, AD, percurrat spatium, AC, eodem tempore vi unica secundum, AB, percurreret spatium, AI, spatium priori, AC, æquale; ex demonstratis de vi inertię. Jam ponamus corpus illud viribus duabus simul urgeri, quo tempore progreditur per, AC, ascendet quoque per, AI, vel, CE; sunt enim, per Constructionem, rectæ, AI, CE, itemque, IE, AC, æquales & parallelæ, ergo corpus reperietur in directionum, AB, AD, concursu, ac proinde in concursu rectarum, IE, CE, hoc est in diagonali quadrati AIEC, atque ad punctum, E, perveniet eodem tempore quo motibus sejunctis percurreret AC, AI, ut patet. Eadem ratiocinatio ad aliud quodlibet tempus transferri potest; cum enim spatia AI, IE, itemque AB, BF; sint æqualia, erit AI:IE::AB:BF, ac proinde cum sint IE, AC, itemque BF, AD, æquales & parallelæ, erit recta AF diagonalis quadrati ABFD. In hac demonstratione velocitates non solum ponuntur uniformes, sed etiam æquales; at evidens est totam demonstrationis seriem perinde

de se habere, etiamsi velocitates non fuerint æquales. Etenim velocitates uniformes sunt ut spatia iisdem temporibus descripta, ergo velocitas per AI est ad velocitatem per IE, ut AI ad IE, ut AB ad BF, ac proinde $AI : IE :: AB : BF$, ideoque eadem manet demonstratio, quæ etiam valet quamvis velocitates non fuerint uniformes, dummodo tamen in eadem data ratione semper accelerentur vel retardentur; puta, si velocitas per AD, sit dupla, vel tripla &c. velocitatis per, AB, res perinde se habet quomodocumque acceleretur vel retardetur velocitas per AB & AD, dummodo velocitas per AD semper maneat dupla vel tripla &c. velocitatis per AB, quod evidens est, cum perpetuo servetur triangulorum AIE, ABF similitudo.

Hoc ergo est universalissimum principium: Si corpus urgeatur duobus motibus quorum directiones eundem angulum semper contineant, corpus illud describet diagonalem parallelogrammi cujus latera sunt spatia secundum utramque directionem eodem tempore percursa; dummodo tamen maneant prædictæ motuum conditiones; si nempe directiones eadem maneant & velocitates sint uniformes aut similes. Adolescentum imaginatio in hac demonstratione sublevari potest exemplo normæ quæ sibi semper parallela uniformiter moveatur, interea dum corpus aliquod uniformiter quoque progreditur secundum ductum normæ quam corpus perpetuo radat.

In hoc autem exemplo atque in præcedenti demonstratione unum monendum est. In hoc scilicet exemplo atque etiam in tota demonstrationis hypothese, vires duæ tamquam seorsim agentes perpetuo considerantur, quod quidem a statu quæstionis non nihil abluere videtur,

tur, cum primo motus initio vires duæ simul imprimantur & deinde conjunctim agant. Itaque ut præcedens demonstratio ad severitatem geometricam sit omnino composita, ostendi debet demonstrationem perinde se habere si vires considerentur seorsim, si conjunctim, quod quidem facile præstari potest; nam ponamus vires duas dato aliquo tempore seorsim uniformiter agere in corpus A, & deinde corpus illud sibi relinqui seu ab ipsis viribus deferri, evidens est in hoc casu describi diagonalem, ut patet ex demonstratione præcedenti & ex vi inertia; valet autem demonstratio si vires duæ dato quolibet tempore seorsim considerentur; itaque ex temporis conditione vel limitatione nullatenus pendent corporis directio & velocitas, ac proinde describitur diagonalis, etiamsi tempus ponatur minimum vel nullum, dum scilicet vires duæ conjunctim agant. Vulgari demonstrationi quæ in omnibus Physicorum libris passim legitur, addenda est hæc ratiocinatio; quamvis enim verum sit principium, si considerentur vires seorsim, si conjunctim, res tamen non ita est evidens ut sine demonstratione prætermitti debeat.

Motus compositi exemplum præbet cymba profluente amne delata. Si quis e cymba interim progrediente in littus desilire voluerit, eum quem sibi proponit littoris locum non attinget. Motus enim ille componitur ex duplici motu navigii scilicet, & hominis desilientis, ac proinde in hoc casu per motuum diagonalem homo ad littus perveniet. Idem est exemplum hominis præcipiti curru deVecti & interim sese in terram proripientis; quod quidem temere omnino fit; si enim satis magnus non sit desilientis hominis impetus, & currus ad saltus partem declinaverit, rotis ip-

sis imminere & opprimi facile poterit imprudens homo.

II. Quamvis duas dumtaxat vires consideraverim, simili tamen ratiocinatione patet vires utcumque numero plures in unicam diagonalem componi posse. Etenim considerentur primum vires duæ quarum inveniatur diagonalis quæ proinde vires duas repræsentabit. Deinde diagonalis illa conferatur cum vi tertia & iterum inveniatur diagonalis, & ita deinceps, donec perveniatur ad communem virium omnium diagonalem quæ *media directio* appellatur, atque hæc erit via quam corpus his omnibus viribus simul sollicitatum percurrat. Evidens autem est vim quamlibet compositam, inversa operatione, in vires per latera resolvi posse, atque hæc operatio *virium resolutio* vocari solet. Cavendum tamen est maxime ne vis composita cum viribus per latera confundatur; vis composita viribus componentibus æqualis non est; cum enim vires componentes exhibeantur per latera trianguli cujus tertium latus est ipsa vis composita, patet vires componentes majores esse vi composita, quemadmodum latera duo trianguli sunt tertio quolibet majora. At vires illæ *equipollentes* merito dici possunt; hoc est, motus perinde se habet sive corpus urgeatur viribus duabus per latera, sive urgeatur vi unica per diagonalem ex duabus viribus composita.

III. Hactenus consideravimus vel motus uniformes, vel similes; at si motus neque uniformes fuerint neque similes, ita ut spatia iisdem temporibus descripta datam inter se rationem non habeant, evidens est similia non esse triangula ex motibus componentibus, & ex diagonalis formata; ac proinde singulis temporibus minimis directionem perpetuo mutat diagona-
lis

lis ideoque abit in curvam. Exempli gratia recta CD *Fig. 2.* exhibeat spatia motu uniformi descripta, rectæ autem perpendiculares ut EI &c. exhibeant spatia vi aliqua perpetuo acceleratrice percurfa. Corpus motu uniformi sollicitatum per CD, recta abiret in infinitum singulis temporibus æqualibus æqualia spatia describens, per vim inertię. At ob vim acceleratricem per EI, corpus his duabus viribus sollicitatum progreditur per curvam CI. Etenim manentibus CE, EF æqualibus, erit CG minor quam GH ob motum perpetuo acceleratum secundum directionem EI. Igitur triangula CEI, CFK, CDB non sunt similia, ac proinde cum triangula illa utcumque minima concipi possint, evidens est rectas quascumque EI, FK, DB, ad lineam rectam non pertinere, ac proinde diagonalis est curvilinea.

IV. Si recta, CA, consideretur tamquam axis curvæ, erunt CG vel EI, GH vel FK *abscisse*, rectæ autem GI vel CE, HK vel FG &c. *ordinate*. Jam vero natura sive *equatio* curvæ definitur ex ratione abscissarum ad ordinatas; quare patet curvam duabus quibilibet viribus descriptam pendere ex ipsa virium natura seu ratione. Cæterum ex demonstratis patet vi unica curvam describi non posse; corpus enim per vim inertię, vis impressæ directionem seu lineam rectam perpetuo sequitur; quare dum corpus curvam aliquam describit, duabus saltem viribus illud sollicitari necessum est.

Curvam quamlibet considerant Geometræ tamquam polygonum constans ex lateribus rectis tangentibus numero infinitis, & infinite parvis; quare dum corpus movetur in arcu curvæ infinitesimo, idem omnino est ac si

moveretur per tangentem infinite parvam. Si ergo statim desineret actio vis per EI, corpus abiret secundum directionem tangentis per vim inertię; hinc fit ut curva quælibet considerari possit tamquam duabus viribus genita, quarum una dicitur *tangentialis*, altera autem quæ corpus a tangente retrahit, *centripeta* appellatur, quod quidem nomen retinet sive vis illa ad unum punctum perpetuo dirigatur, sive directionem perpetuo mutet. Vis autem contraria qua corpus ab arcu ad tangentem conatur deflectere, vocatur vis *centrifuga*.

V. De viribus centripeta, centrifuga, & tangentiali data opera, quantum licet, deinde tractabimus: hic observare satis sit vim tangentialem & centrifugam ex vi inertię originem quidem habere; at cavendum est diligenter ne vis centrifuga expressa per lineolam IE confundatur cum vi tangentiali quæ exprimitur per CE, in quem errorem mirum sane est quam graviter in tanta rerum physicarum luce prolapsi sint viri doctrinæ famia celebres. Et quidem virium illarum nec conveniunt directiones, ut patet, neque etiam mensuræ, imo vis tangentialis infinites major est vi centrifuga. Ponamus enim arcum CI esse circuli arcum infinitesimum, erit CG ad GI, sive EI ad CE, ut GI vel CE ad reliquam partem diametri. Quia vero arcus CI est infinitesimus, erunt rectæ CG, GI infinitesimæ, ac proinde GI erit infinitesima respectu reliquæ diametri, ideoque CG erit infinitesima respectu GI; quare vis tangentialis CE erit infinite major vi centrifuga IE. Alterum tandem monendum est vim centripetam & centrifugam per eandem lineolam exprimi, ac proinde æquales esse; cum enim vires sint ut spatia iisdem temporibus minimis

mis descripta, evidens est vim centripetam & centrifugam quæ per idem spatium eodem tempore minimo descriptum exhibentur, æquales esse. Quamvis autem æquales sint vires illæ, longe tamen inter se differunt; nam vis centrifuga est vis *passiva* dumtaxat quæ nullum exerit effectum nisi cessante vi centripeta; hæc autem ultima est vis *activa* quæ nempe perpetuo agit.

VI. Virium centripetæ & centrifugæ exemplum præbet lapis funda circumactus. Manus lapidem retinens exhibet vim centripetam; vis autem quæ funem tendit, qua scilicet lapis conatur recedere a circumferentia circuli descripti repræsentat vim centrifugam. Et requidem ipsa, si manus lapidem deserat, statim lapis abit per tangentem circuli antea descripti. Hæc autem pauca dicta sint; de hoc enim utilissimo argumento sermo deinde recurret.

Alteram quam breviter attigimus, motus compositi speciem oculis demonstrant Corpora per aerem horizontaliter vel oblique projecta: motu composito igneam curvam in aere delineant tubuli nitrato pulvere referti. In his casibus duæ considerandæ sunt vires, una scilicet *projectionis* ex manu vel pulvere pyrio oriunda; altera autem est vis gravitatis qua corpus motu accelerato descendit; sed hujus curvæ naturam demonstrabimus ubi de corporum projectorum motu.

A P P E N D I X

De quibusdam capitulis præcedentis utilitatibus.

I. **M**ateriam cogitationis expertem esse invictissimis argumentis in Metaphysica
jam

jam ostendimus; quamvis autem fide divinâ certissimum sit primarium illud Religionis dogma, varia tamen argumenta conquerere & adversus incredulos congerere religiosos Philosophos maxime decet. Vix suspicari quis statim posset vim inertię aliud Philosophis suppeditare hujus dogmatis argumentum quod tamen valide urgeri potest; & quidem substantia cogitans vim habet mutandi statum suum, potest nempe cogitationem præsentem deserere & ad aliam transire, actionem aliquam velle aut respuere, quam quidem facultatem proprio conscientię testimonio experimur. Cum ergo vis inertię universalissima sit materię proprietas, ita ut nulla materię pars statum suum vel leviter sponte mutare possit, manifestum est cogitandi facultatem ad materiam pertinere non posse. Neque est quod objiciant vim inertię locum habere dumtaxat in materia nullo principio intelligente informata; nam rursus principium illud intelligens materię conjunctum, vel est materiale, vel non. Si primum, jam eadem recurrit cogitandi impossibilitas; si secundum, principium illud facultatem cogitandi ex se habere necessum est, sine ullo materię auxilio, quæ ipsa non habet cogitandi vim quam proinde nullo modo conferre potest. Itaque ex duarum substantiarum quæ cogitare non possunt conjunctione oriri non potest cogitandi facultas. Præterea perversissimi homines qui materię cogitationem repugnare asserunt, si impiissimi Spinosa sectatores excipiamus, non inficiantur existere substantias spirituales & intelligentes; cum ergo vim intelligendi habeant, principium intelligens nulla materię ope ad cogitandum indiget. Itaque hoc argumentum validissime propugnari potest contra eos qui spiritus

ritus extra materiam existere fatentur ; at contra Spinosis aliis agendum est argumentis quæ in nostris institutionibus metaphysicis explicavimus , vel prius demonstranda est spirituum extra materiam cogitantium existentia . Neque est tandem quod objiciant , Deum omnipotentem his duabus substantiis simul conjunctis tribuere potuisse vim cogitandi quam materiæ convenire non posse proprio loco ostendimus ; ex præcedenti ratiocinatione id saltem evidens fit , universalissimis materiæ proprietatibus repugnare ut materia vim cogitandi habeat . Nemo igitur nos tamquam ultra modum religiosos reprehendat , quod hujus ratiocinationis pondus argumentis metaphysicis adjungamus .

II. Actionis & reactionis exempla ex avium volatu , piscium natatu , remorum actione afferre solent Physici . Idem vero principium ad eximiam utilitatem traduxit vir doctissimus Daniel Bernoullius qui in egregio opere cui titulus est : *Hydrodynamica* , novum & hætenus inauditum navigandi genus proposuit , sine velis & remis , quod quidem paradoxum omnino videbitur ; rem paucis exponam . Navigio versus puppim firmiter alligari præcipit Bernoullius canalem utrinque apertum & aquæ perpetuo plenum , quod quidem sine magno labore antliarum ope præstari potest . Jam aqua ex canali versus puppim effluens , in ipsam maris aquam agit , ipsa autem reagit , atque hac perpetua reactione antrorsum propellitur navis & sine velis ac remis gubernatur ; quo quidem loquendi modo res impossibilis & absurda exprimi solet . Hujus reactionis æstimandæ ratio ad sublimiorem fluidorum doctrinam pertinet ; neque tantam rerum physicarum difficultatem præ-

præfens locus fultinet ; quia tamen novus ille navigationis modus ex actionis & reactionis principio natus est, in præfenti appendice hanc doctiffimi viri cogitationem opportunè interponendam effe exiftimavi . Neque deerunt fortaffe imperiti homines qui rem velut infulfam rideant ; at Philofophi eff magnum virorum meditationes venerari , & tamen perpendere , atque , fi fieri poffit , ad experientiam revocare . Ego autem in navicula non fine fuffeffu rem tentavi , atque inito calculo invenitur tantam hoc artificio obtineri poffe prægrandis etiam navis velocitatem quæ magna remigum manu vix ac ne vix quidem haberi poteft . Calculo quidem fubjici non poffunt inordinatæ aquarum directiones ; marifque jaftationes , ac proinde minuitur inventi utilitas , non tamen omnino tollitur . Hæc maxima faltem haberi poterunt commoda ; nempe naves bellicas in præliis navalibus , deficiente omni vento , quo lubet agere licebit , atque etiam brevibus trajectibus ferena tempeffate tranquilloque mari inffituentis infervire poterit talis navigii ufus .

III. In capite præcedenti de vi centrifuga brevem mentionem injecimus . Ex hujus vis doctrina innumeræ in focietatem humanam derivarunt utilitates quarum unam hic feligere fatis erit . Clariffimo viro *Defagulierio* debetur machina quæ *rota centrifuga* appellatur ; ex tympano ligneo parum alto confat hæc machina , cujus cavitas in duodecim cellulas diftributa eff , fingulæ autem cellulæ ad tympani centrum protenfæ , cum aere externo communicant ex parte circumferentiæ quæ pro cellularum numero duodecim quoque foraminibus pertufa eff . Tympanum hoc modo comparatum capsula majori parallelopipeda inclu-

cluditur atque axe ita trajicitur ut manubrii ope extra capsulam prominentis converti possit. Rebus ita dispositis, si tympanum velocissime circumagatur, aeris particulæ in tympano inclusæ revolvuntur, ac proinde vim centrifugam acquirunt & exitum quærunt. Quare si in plano rotationis aperiantur foramina quibus annectantur flexiles tubuli extra cubiculum protensi, aer in tympano conclusus, revoluta machina, exhibit; aer autem in cubiculo contentus per foramen rotationis plano perpendiculare tympani cavitatem ingreditur, aeris expulso statim succedet aer iterum quoque expellendus. Jam vero quantum aeris excluditur, tantum quoque advenit per fenestras, januas vel etiam cubiculi rimas; quare patet id tandem commodum nos lucrari ut, repetitis motibus, nil fere pristini aeris superfit, quod quidem eximiae utilitatis esse potest in nosocomiis, in fodiis, aliisque locis impuro aere sædatis. Hujus machinæ utilitatem maximam testatam fecere peritissimi navium Præfecti qui in longinquis navigationibus hujus rotæ beneficio sese liberatos fuisse referunt a frequentissimo perniciosissimoque morbo qui *Scorbutus* dicitur. Dolendum ergo est quod utilissima inventa respuere soleant plerique homines haud satis æqui talium rerum æstimatores. Cæterum prædictæ machinæ usus oculis quoque fit conspicuus, si aeris loco crassiolem fumum ex saccharo excitatum in tympani cavitatem introducamus; hunc enim, circumactio tympano, velocissime extrudi observabimus. Idem quoque alio experimento manifestum fiet; si nempe foramini in ipsa vis centrifugæ directione aperto obijciatur candelæ flammula, hanc extrorsum pelli & statim extinguere videbimus: contra au-

tem

42 INSTITUTIONES PHYSICÆ.

tem introrsum urgebitur & extinguetur, si alteri foramini quod rotationis plano perpendicularare est, admoveatur; quod quidem manifestissimo est argumento pari ratione aerem ex una parte introduci, ex altera autem ejici. Hujus machinæ partes singulas explicare, & vim totam calculo æstimare nec præscripta his institutionibus brevitatis, nec rei difficultas patiuntur. Ex universa Physicæ serie magis ac magis fiet manifesta capitis præcedentis utilitas quam paucis exemplis indicasse satis sit, ut studiosæ juventuti instilletur præclarissimi studii amor, quantum unicuique pro vivendi instituto & ratione licet.

C A P U T II.

De vi attractionis variisque illius speciebus.

A *Ttractio* generatim spectata dicitur vis qua corpora in se mutuo, vel ad punctum aliquod tendunt, quod *centrum virium* id eo appellatur. Variæ sunt attractionum species quarum aliquæ certis dumtaxat corporibus competunt; talis est vis *magnetica*, *electricæ* &c. sed speciales illæ attractiones ad Physicam particularem pertinent. Aliæ autem attractiones omnibus corporibus conveniunt ac proinde in Physica generali considerandæ. Duplex autem est hujusmodi attractio universalis; alia inter magna corpora & ad magnas exercetur distantias; alia inter minimas corporum particulas viget, & in minimis dumtaxat intervallis. De hac utraque attractionis specie tractabimus, & generalem attractionis doctrinam præmittemus.

AR-

ARTICULUS I.

De attractione generatim considerata.

I. **C**ORpus aliquod projectum fingatur vi impressa secundum directionem, AF , *Fig.* 3. & interim vi alia perpetuo tendat versus punctum, S ; tempore minimo corpus vi impressa per AF , describere ponatur lineolam AB , tempusculo altero æquali percurreret æqualem lineolam BC , & ita deinceps. Jam vero dum corpus pervenit ad, B , agat vis tendens ad centrum, S , qua vi sola corpus describere possit lineolam BE ; completo parallelogrammo, EB CD , motu composito corpus describet diagonalem BD (ex articulo præcedenti). Ex elementis Geometriæ evidens est æqualia esse triangula ABS , SED æqualibus temporibus descripta. Etenim triangula ABS , SBC æqualia sunt, cum æquales habeant bases AB , BC , communemque verticem, S . Præterea æquantur triangula BSD , BSC , super eadem basi, BS , & inter easdem parallelas BS , CD , constituta. Igitur æqualia sunt triangula, BSD , BSA , utpote æqualia eidem triangulo BSC . Quod autem demonstravimus de minimis duobus triangulis ABS , BSD , idem facile intelligitur de alia qualibet triangulorum serie; & quidem seclusa vi tendente ad centrum, S , corpus per vim inertię moveri perget secundum BD ; sed accedente vi versus S , eadem rationatione patet tertio tempore æquali, æquale triangulum describi. Igitur æqualibus temporibus, æquales triangulorum areæ percurreuntur, tempore duplo describitur area dupla, tempore triplo tripla; quare generatim areæ tempore quolibet descriptæ sunt temporibus proportionales.

44 INSTITUTIONES PHYSICÆ.

Ies. Iam ponamus polygonum hoc modo descriptum, ex lateribus numero infinitis, & infinite parvis compositum abire in curvam, manifestum est corpus circa centrum virium, S, perpetuo describere areas temporibus proportionales. Demonstratum ergo est præclarissimum theorema, quod Astronomiæ & universæ fere Physicæ fundamentum est, nempe: *si corpus describat curvam quamlibet vi tendente ad punctum aliquod in curva datum, corpus illud describet areas circa idem punctum temporibus proportionales.*

Viceversa si corpus moveatur in curva, & areas temporibus proportionales circa punctum aliquod describat, urgetur vi tendente ad illud punctum. Etenim si vis alia ad punctum extra, S, diversum tenderet, jam directio, CD, non foret directioni, BE parallela, ac proinde triangula BSC, BDS super communem basim constituta, non forent inter easdem parallelas, nec proinde æqualia, quod est contra hypothesim; ponimus enim areas temporibus proportionales esse, ac proinde æqualia esse minima triangula temporibus æqualibus descripta. Itaque demonstratum etiam est corpus, quod movetur in curva, & areas circa punctum aliquod temporibus proportionales describit, urgeri vi ad illud punctum tendente. Ex hoc theoremate universa pendet attractionis doctrina.

Ex hoc ipso theoremate evidens est velocitatem corporis in diversis curvæ punctis eo majorem fore, vel minorem, quo minor est, vel major recta a centro virium ad tangentem perpendiculariter ducta; nempe *velocitates sunt reciproce, ut perpendiculara e centro virium in tangentes demissa.* Etenim velocitates utcumque variabiles tempore infinite parvo tanquam uniformes considerari possunt; ob minimum sive in.

infinitesimum velocitatis incrementum, vel decrementum. Itaque velocitates uniformes per AB, BD. sunt ut spatia AB, BD, iisdem temporibus minimis descripta; sunt autem spatia illa bases triangulorum æqualium ASB, BSD, quæ proinde sunt reciproce, ut perpendiculara ex centro, S, in bases AB, BD, demissa; sed polygono in curvâ abeunte, latera, AB, BD, evadunt tangentes curvæ in punctis A, B; erunt igitur velocitates in singulis curvæ punctis reciproce ut perpendiculara ex centro virium in tangentes demissa. Quod quidem corollarium eximie utilitatis esse, ex dicendis manifestum fiet.

II. Attractionem in variis curvis considerare solent, qui sublimiorem Physicæ doctrinam explicant; nos vero facilitati studentes in circulo dumtaxat rem considerabimus, atque hanc hypothesein ad physicam veritatem, quantum licet, accurate transferre conabimur. Revolvatur in peripheria circuli ACD corpus A Fig. 4 quod ubi ad A pervenit, sublato vi tendente ad centrum, qua in circumferentia retinetur, per tangentem AB, in infinitum excurreret; itaque ut corpus in peripheria detineatur, necessum est vim aliquam perpetuo agere, quæ corpus urgeat versus, D, per spatium, BC, interea dum mobile vi impressa progrediretur per spatium infinitesimum AB; his enim viribus conjunctis mobile describet lineam, AC; hæc omnia facile patent ex demonstratis de virium compositione. Vis quæ exhibetur per, BC, dicitur *attractio*, quam alio nomine vim *centripetam* appellavimus; vim autem qua mobile ex arcu curvilineo transit ad tangentem, quæque exhibetur per, CB, diximus vim *centrifugam*; ambæ autem vires communi nomine *centrales* vocantur. Igitur lineola BC, exprime

met vim centralem . Jam vero in circulo ducta chorda infinitesima , AC , erit ob triangulorum ACD , ACM , similitudinem , AM vel BC : AC = AC : AD , ac proinde AM , vel

$$BC = \frac{AC^2}{AD} ; \text{ hoc est vis centralis in circulo}$$

est , ut quadratum chordæ divisum per diametrum ; quia autem arcus infinitesimus , illiusque chorda æquipollent , loco chordæ substituere licet ipsum arcum , ideoque vis centralis est ut quadratum arcus divisum per diametrum , vel per radium ; cum enim virium centralium rationem dumtaxat hæc formula exprimat , perinde est , siue diametrum , siue semidiametrum adhibeamus . Porro vis centralis nomen retinet attractio , etiam si vis illa ad unicum punctum non dirigatur : singulis temporibus directionem mutare potest ; ut enim mobile curvam describat , satis est vis centralis directionem non congruere cum ipsa directione tangentis , quod quidem evidens est ex articulo præcedenti . His præmissis in proximo articulo fusius explicandis sit

CONCLUSIO.

UNIVERSALEM INTER CORPORA OMNIA ATTRACTIONEM DEMONSTRANT PHÆNOMENA .

I. Circa solem revolvi observantur stellæ quinque , *planetæ* siue *erraticæ* ideo appellatæ . Harum nomina sunt : *Mercurius* : *Venus* : *Mars* : *Jupiter* : *Saturnus* . Planetas illos ita circa solem revolvi demonstrant observationes Astronomicæ , ut radiis ad solem ductis areas describant temporibus proportionales ; lex illa qua planetæ circa solem areas describunt temporibus proportion-

portionales , ab inventore suo *prima lex repleri*
 solet appellari . Saturnum comitantur stellulæ
 quinque quæ satellites dicuntur , & Jovem qua-
 tuor ; illi autem satellites qui *planetæ secunda-*
rii etiam appellantur , eadem lege circa plane-
 tas primarios revolvuntur , areas scilicet circa
 suos planetas , & circa solem ipsum describunt
 temporibus proportionales . Revolvitur quoque
 Luna circa terram nostram , radiisque ad ipsius
 centrum ductis areas describit temporibus quam
 proxime proportionales . Igitur planetæ prima-
 rii vi centripeta tendunt in Solem , & planetæ
 secundarii tendunt quoque in suos primarios ,
 atque in Solem ipsum ; Luna etiam vi centri-
 peta urgetur in terram . Porro actioni æqualis
 est & contraria reactio , ergo mutua est attra-
 ctio , nempe planetæ attrahuntur a Sole , & vi-
 ceverfa Sol trahitur a planetis , satellites ten-
 dunt in planetas primarios , & contra planetæ
 primarii in secundarios , ac proinde Luna ten-
 dit in terram , & vicissim terra in lunam .
 Hanc mutuam lunæ , tellurisque attractionem
 demonstrant astronomicæ observationes plurimæ ,
 sed explicata Astronomiæ doctrina tota res de-
 inde facilius intelligitur ; quare mutuam pla-
 netarum attractionem nunc generatim ostende-
 re satis erit . Cum inter planetas primarios &
 secundarios , inter solem & planetas singulos
 actio sit reciproca , inter varios planetas actio-
 nem quoque mutuam esse ex analogia naturæ
 colligi potest ; hanc autem ratiocinationem ,
 quæ non satis firma fortasse videbitur , confir-
 mant errores in Saturni , Jovisque motibus ex
 mutua illorum actione oriundi . Pro varia pla-
 netarum illorum distantia a sole , & a se invi-
 cem , pro diversa illorum mutua & respectu so-
 lis positione , multæ in illorum motibus obser-
 vantur inæqualitates , quæ nulli alteri causæ ,
 quam

quam mutuz attractioni tribui possunt. Quam enim ratione alia fieri posset, ut planetæ illi pro varia positione suos motus turbarent? nisi vi aliqua attrahente, quæ in minoribus distantis major est, in majoribus autem minor. Errores in Jovis & Saturni motibus sese facilius Astronomis conspicuos præbent; certum enim est planetas illos esse reliquorum omnium longe maximos, ac proinde & major esse debet actio mutua; sed hujus attractionis legem in proximo articulo expendemus, & attractionis doctrinam magis, ac magis declarabimus.

II. Vim attractivam qua sese mutuo petunt corpora cælestia, inter corpora terrestria etiam vigere ostenditur exemplo lunæ. Satis accurate ponunt Astronomi lunam motu uniformi circa terram revolvī in circulo, cujus radius æqualis est sexaginta semidiametris terrestribus. Itaque cum circularum peripheriæ sint inter se, ut radii, erit orbis lunaris circumferentia circuli maximi terrestris circumferentia sexagesies major. Inventa autem est circuli maximi terrestris circumferentia pedum parisiensium 123249600, ac proinde nota est orbis lunaris peripheria, quæ sexagesies major est. Jam vero tempus periodicum lunæ, quo nempe luna circa terram revolvitur, est dierum 27. horarum 7. minutorum primorum 43. quia autem motus ponitur uniformis, facile invenitur spatium dato aliquo tempore descriptum, V. G. minuti unius primi tempore. Sunt enim spatia velocitate uniformi percursa directe ut tempora, quare per *regulam trium* dicatur: tempus totum periodicum lunæ est ad tempus minuti unius primi, ut tota lunaris orbis peripheria ad ejusdem orbis arcum tempore minuti primi descriptum: datis autem in proportionē tribus terminis datur & quartus, ac proinde invenietur ar-

arcus minuti unius primi tempore descriptus ,
cujus arcus quadratum dividatur per lunaris or-
bis diametrum , habebitur , ex demonstratis , li-
neola , BC , hoc est , vis centripeta lunæ ; hæc
autem lineola inito calculo invenitur æqualis
pedibus $15 \cdot \frac{1}{12}$ parisiensibus ; nempe talis est vis
centripeta lunæ in distantia a terra semidiamet-
rorum terrestrium sexaginta , ut luna urgente vi
illa tempore minuti unius primi versus terram
descenderet per spatium pedum $15 \cdot \frac{1}{12}$ Jam fin-
gamus lunam accedere ad terram , erit veloci-
tas lunæ sexagesies major ; sunt enim velocita-
tes reciproce ut perpendiculares ex centro vi-
rium ad tangentes demissæ , hoc est in ratione
semidiametrorum , ex hypothesi orbis circularis .
Itaque luna prope terram tempore sexagesies
breviori nempe minuto uno secundo describeret
pedes $15 \cdot \frac{1}{12}$; dato enim spatio velocitates uni-
formes sunt inverse ut tempora ; sed hoc idem
spatium eodem tempore percurrunt gravia ter-
restria : Igitur vis centripeta lunæ & vis cen-
tripeta terrestris sunt ejusdem generis , cum eam-
dem utraque mensuram habeat , eandemque di-
rectionem . Ergo luna graviaque terrestria ten-
dunt in terram atque etiam se mutuo trahunt
corpora omnia terrestria non secus ac faciunt
cælestia , per legem analogiæ .

III. Non solum in se mutuo tendunt corpo-
ra , sed etiam eadem vi mutua pollent omnes
corporum partes ; alioquin tota dissolveretur
corporum tellurisque compages . Illa autem at-
tractio non solum mutua est , sed etiam æqua-
lis ; etenim distinguatur terræ moles in binas
quascunque partes vel æquales vel utcunque in-
æquales ; jam si partium attractio mutua non
foret atque etiam æqualis , attractio minor ce-
deret

Jacq. T. IV.

C

deret

deret majori, & partes conjunctæ recta moveri pergerent in infinitum. Partes igitur sese mutuo æqualiter urgent, ita ut actioni semper æqualis sit & contraria reactio; quæ quidem omnia allato jam antea magnetis exemplo illustrari possunt; quod autem dictum est de binis utcumque terræ sectionibus, idem quoque intelligitur de aliis quibuscunque corporum partibus. Itaque attractionem universalem demonstrant phenomena cælestia atque terrestria, ita ut hanc naturæ legem in dubium vocare non possit ingenuus Philosophus; quæcunque sit attractionis causa quam deinde variis in locis data occasione expendemus. Hæc doctrina mortalibus omnibus tamdiu ignota a Nevvtono tandem admirabili quadam felicitate in bono lumine collocata est. Extiterant sane qui ante ipsum attractionem nominarent. Keplerus qui motuum cælestium leges felicissime detexit, earum causas per *magnetismum* quemdam explicare conatus est. Verum quæ hac de re protulit tam incerta ratione deducta sunt & plerumque etiam ita sunt absurda, ut cum iis comparata quæ Nevvtonus certissima methodo invenit, pro nullis omnino haberi debeant. Hinc Nevvtonianæ doctrinæ parum doctos sese probant aliqui Philosophi qui haud satis æqui rerum æstimatores inventionis gloriam hac in re Nevvtono eripere conantur.

Objicies attractionis universalis doctrina maxime innititur prima Kepleri lege, qua nempe statuitur planetas primarios circa solem, secundarios circa primarios areas temporibus proportionales describere; atqui lex illa nequaquam observatur, imo attractionis doctrinæ repugnat omnino. Et quidem in motibus Jovis & Saturni demonstrant observationes astronomicæ variationes plurimas quæ areas temporibus proportionales

tionales maxime perturbant. Tot mutationibus obnoxii sunt lunares motus ut nulli fere legi subijciantur, easdem mutationes patiuntur Satellites Jovis; ergo &c.

Ref. Distinguo min. lex illa non observatur *accurate* concedo min. *quamproxime*, nego min. & conseq. Requidem vera erroribus plurimis obnoxii sunt corporum cælestium motus, sed errores illi attractionis doctrinam apprime confirmant; ut jam observavimus. Demonstratum quidem est areas temporibus proportionales esse; verum in hac demonstratione unius duntaxat corporis vim centripetam consideravimus, neque errores ex mutua aliorum corporum attractione oriundos æstimavimus. Porro Kepleri legem aliquantulum perturbat mutua planetarum attractio, & præsertim in Jove & Saturno ob majorem illorum massam. At aberrationes illæ in minoribus duntaxat planetarum distantis conspicuæ fiunt; quo magis autem a se invicem recedunt planetæ, eo minores deprehenduntur errores atque tandem evanescent. Eadem est ratio cur variationes plurimas experiatur luna ob variam scilicet telluris solisque positionem, variamque illorum distantiam. Tandem varia satellitum jovialium positio diversaue distantia aliquam in illorum motibus mutationem afferre debent. Sed omnes illos errores ad calculum revocare norunt Geometræ, quorum quidem diligentiam & peritiam demonstrat calculorum cum observationibus astronomicis summa consensus. Itaque ex præcedenti objectione nihil aliud colligi potest, nisi pro varia corporum massa variaque distantia, diversam quoque esse attractionem. Addere jam satis erit probatam quoque manere vim attractivam, etiam si corpora cælestia areas temporibus proportionales non describant; evidens enim est ex demon-

stratis de virium compositione, sine vi aliqua centripeta nullum fieri posse motum curvilineum quæcunque sit vis centripetæ directio; igitur curvilinei planetarum motus vim aliquam centripetam ac proinde attractionem demonstrant.

Instabis 1. Ex illa mutua attractione sequeretur universi sistematis planetarii confusio; Si enim planetæ se mutuo attrahant, progressu temporis in se mutuo præcipites ruere debent, atque tandem in eandem cum sole massam coalescere. Ergo &c.

Resp. Nego Ant. cujus probatio tota facile evanescit, si attendamus, planetas duabus viribus urgeri, una secundum directionem tangentis, altera autem centripeta. Et quidem sine virium illarum compositione nullum orbem curvilineum describi posse sæpius demonstravimus. Et certe sola vi centripeta in se mutuo ruerent corpora omnia, atque in rudem indigestamque molem tandem rediret totus hujus universi ordo. At omnipotenti divinaque manu ita inter se temperati fuerunt cælestes motus, ut planetæ in orbibus suis circa solem certa & admiranda lege regantur atque retineantur.

Instabis 2. Stellæ fixæ eandem perpetuo a se invicem distantiam servant, suisque locis immotæ manent; Iis ergo nullus impressus est motus ac proinde sola remaneret vis centripeta qua stellæ fixæ in unum tandem coirent globum. Itaque sic argumentari licet: universam mundi compagem perturbaret attractio illa qua stellæ fixæ in se mutuo tenderent atque in unicam tandem coalescerent massam, atqui &c. ergo &c.

Resp. Neg. min. etiamsi nullus stellis fixis impressus fuerit motus, tanta tamen esse potest stellarum a se invicem distantia, ut mutua attractio quam ex distantia pendere observavimus, omnino

omnino evanescat. Præterea certissimum est stellas esse totidem soles proprio lumine fulgentes, circa quos probabilissimum est revolvi non fecus ac circa solem nostrum diversa planetarum sistemata. Si autem hæc fiat hypothesis, jam facile intelligitur stellas singulas in proprio vi-rium centro quiescere, vel nihil fere moveri, atque ex sistematum omnium conjunctione & æquilibrio, sua mundanz machinz constabit firmitas; luculentissimum sane divinæ intelligentiæ & omnipotentiz argumentum.

Instabis 3. Attractio universalis inter corpora terrestria sese conspicuam præberet; globi duo in ipsa telluris superficie magno etiam dif-fiti intervallo ad se mutuo tenderent atque tandem ad contactum pervenirent; non secus ac faciunt magnes & ferrum; atqui mutuus ille accessus non observatur, ergo &c.

Res. Nego maj. Corpora quælibet tendunt in se mutuo, sed tendunt quoque in terram. Porro attractionem universalem ex quantitate materiæ pendere jam observavimus, illamque attractionem, cæteris paribus, esse ut quantitatem materiæ in proximo articulo demonstrabimus. Itaque cum quantitas materiæ in terra immense superet quantitatem materiæ in prædictis globis, patet attractionem globorum versus terram esse fere infinite magnam, si conferatur cum mutua globorum attractione, quæ proinde tantilla est ut sentiri nequaquam possit. At si tanta sit corporum massa ut cum ipsa quantitate materiæ in terra satis magnam habeat rationem, jam sub sensus cadere poterit attractio. Magna observationum subtilitate hanc attractionem expertus est D. Bouguer unus ex doctissimis parisiensibus Academicis qui laboriosum æternaque fama dignissimum iter aggressi sunt ad definiendam telluris figuram.

Prope ingentem montem in Peruvio qui dicitur *chimboraco* pendulum constituerat vir clarissimus; observavit autem filum penduli septem minutis secundis cum dimidio a perpendiculari aberrare, ab ipso scilicet monte attractum. Quo autem artificio & quanta diligentia usus fuerit D. Ponguer, legere est in eximio opere de figura telluris. Quod autem spectat exemplum magnetis & ferri, ad præsentem casum trahi non potest. Agitur enim de attractione universali, attractio autem magnetica est alterius plane generis, & ad magnetem ferrumque duntaxat pertinet. Hæc pauca dicta sint de attractione universali, quæ quidem ex tota hujus capituli serie magis ac magis intelligetur, sed confirmabitur maxime, dum suo loco astronomicum sistema explicabimus.

A R T I C U L U S II.

De prima attractionis lege.

I. **A**D investigandam attractionis legem virium centralium doctrinam in circulo considerabimus; hanc facili ratiocinatione demonstravit Nevvtonus. Ponamus corpora duo in circulorum peripheriis revolvi; haberi possunt circuli illi tanquam polygona similia ex lateribus numero infinitis & infinite parvis composita. Quare moveri intelligantur corpora in polygonorum suorum latere aliquo, seclusa vi centripeta secundum hujus lateris directionem pergerent in infinitum; dum ergo ex latere uno polygoni in aliud latus proxime contiguum transeunt, vi centripeta in polygoni angulum incurunt. Vis autem qua polygoni angulum feriunt, est quantitas motus, nempe ictus magnitudo est ut massa per velocitatem multiplicata, eritque

que vis centralis tota ut magnitudo ictus & numerus ictuum simul . At quo major est velocitas & quo minor circumferentia circuli, eo major est ictuum numerus eodem tempore ; ergo numerus ictuum est ut velocitas directe , & circumferentia inverse . Quare vis centralis quæ est ut ictus magnitudo & numerus ictuum conjunctim, erit in ratione composita directa quantitatis motus & velocitatis atque inversa radii, sive quod idem est, ut productum ex massa in quadratum velocitatis divisum per radium . Plurimæ leguntur hujus principii demonstrationes, sed hanc anteponimus quæ ex per ipsa virium centralium natura facile derivatur . Jam corporum massæ dicantur M, m , circulorum circumferentiæ C, c , velocitates V, v , tempora T, t , vires centrales F, f , circulorum radii R, r .

Erit $F : f = \frac{M \cdot V \cdot 1}{R} : \frac{m \cdot v \cdot 2}{R}$. Quia vero in

circulo velocitates sunt uniformes, ac proinde ut spatia descripta sive circumferentiæ directe,

& tempora inverse, erit $V : v = \frac{C}{T} : \frac{c}{t} =$

$\frac{R}{r} : \frac{r}{R}$, ob circumferentias radiis proportio-

nales . Quare tandem habebitur $F : f = \frac{MR}{T^2} :$

$\frac{mR}{t^2}$; jam ponantur massæ æquales, itemque tem-

pora æqualia, erunt vires centrales ut circulo-

rum radii . Fingantur vires centrales decrefcere ut crescunt quadrata distantiarum a centro,

hoc est, ponantur vires centrales in ratione du-

plicata inversa distantiarum, erunt $F : f$ ut $\frac{M}{R} : \frac{m}{r}$, ac proinde in proportionem præceden-

$$\text{si } F : F = \frac{MR}{T_1^2} : \frac{MR}{T_2^2} \text{ erit } \frac{M}{R_1} : \frac{M}{R_2} =$$

$$\frac{MR}{T_1^2} : \frac{MR}{T_2^2} \text{ positisque massis } M, M, \text{ æquali-}$$

$$\text{bus fiet } \frac{1}{R_1^2} : \frac{1}{R_2^2} = \frac{R}{T_1} : \frac{R}{T_2}, \text{ ideoque } R^3 :$$

$$R^3 = T_1^2 : T_2^2, \text{ hoc est, cubi distantiarum sunt}$$

ut temporum quadrata, si vires centrales fue-
rint ut distantiarum quadrata inverse. Et vice
versa, si ponantur cubi distantiarum ut tempo-
rum quadrata, erit in præcedenti analogia $F : R$
 $= \frac{R}{R_1} : \frac{R}{R_2} = \frac{1}{R_1^2} : \frac{1}{R_2^2}$. Nempe vires cen-

trales sunt ut quadrata distantiarum reciproce.
Probe autem tenendæ sunt hæc duæ virium cen-
traliū leges quibus tota innititur Astronomia.
Prima: *Si corporum in circulis revolvētiū vi-
res centrales fuerint in ratione duplicata inversa*
*distantiarum a centro, erunt temporum periodico-
rum sive revolutionum quadrata ut cubi distan-*
tiarum. Secunda: *Si temporum periodicorum qua-*
drata fuerint ut cubi distantiarum, erunt vires
centrales in ratione duplicata inversa distan-
tiarum. Demonstratæ hæcenus virium centralium
leges virorum non geometrarum oculis repræsen-
tari solent ope machinæ, quæ virium centralium
machina solet appellari. Hanc autem machinam
utpote oculis melius quam explicatione ulla usur-
pandam prætermittimus.

II. Notissima est omnibus curva quæ *ovalis*
vulgo dicitur, a Geometris autem *ellipsis* fre-
quentius appellatur. Si per duo puncta quæ in
ellipseos circumferentia a centro magis distant,
ducta intelligatur recta quæ per ellipseos cen-
trum transeat, hæc dicitur *axis major*, ad quem
si perpendiculariter erigatur recta per centrum
tran-

transiens & ad circumferentiam utrinque terminata, hæc vocabitur *axis minor*. Jam vero si ex duabus axis minoris extremitatibus hinc & inde ad partes centri oppositas ducta intelligatur recta ad axem majorem, quæ recta æqualis sit dimidio axi majori, habebuntur in axe majore puncta duo quæ ellipseos *foci* appellantur. His præmissis definitionibus, ex observationibus astronomicis notum est planetas revolvi in ellipsis quarum focum unum communem sol occupat. Quamvis autem hæc sola curva cælestibus motibus accuratissime respondeat, quia tamen circularis planetarum orbita non multum ab astronomicis observationibus aberrat, imo nihil fere in quibusdam planetis, in re præsentis sine errore hanc hypothesim quæ ad veritatem proxime accedit, facere licet. His explicatis sit

C O N C L U S I O.

ATTRACTIONIS UNIVERSALIS LEX EST UT
CORPORA OMNIA SESE ATTRAHANT IN
RATIONE DIRECTA MASSARUM ET DUPLI-
CATA INVERSA DISTANTIARUM.

Demonstratur 1. planetæ revolvuntur in ellipsis circa solem quarum focum unum communem sol occupat. Hæc autem curva a planetis circa solem descripta prædictam attractionis legem omnino postulat; demonstrant scilicet Geometræ corpus aliquod in ellipsi revolvi non posse vi tendente ad focum, nisi vis centripeta decrescat in ratione duplicata distantiarum ab eodem foco. At cum hæc demonstratio pendeat ex ipsa ellipseos natura de qua nihil tradidimus, satius est planetarum orbitas velut circulares considerare, quod quidem satis accurate fieri posse jam observavimus. Porro demonstrant observationes astronomicæ temporum pe-

riodicorum quadrata in planetis esse ut cubi distantiarum a sole, ergo vis planetarum in solem decrescit in ratione duplicata distantiarum a sole. Hæc temporum periodicorum & distantiarum ratio quæ celeberrimo *Keplero* debetur, appellari solet: *Lex secunda Kepleri*. Hanc autem legem non solum servant planetæ primarii circa solem, sed etiam planetæ secundarii circa primarios. Mutuam planetarum perturbationem, lunaresque inæqualitates laboriosissimo & fere insuperabili calculo in hac attractionis lege nuperrime investigarunt doctissimi viri, & calculum cum observationibus astronomicis accurate consentire testantur diligentissimi Astronomi; imo eo pervenit, quod sperare vix fas erat, doctissimus mihiq; amicissimus dominus *Clairaut* ut cometarum reditum prædicere Astronomos docuerit; neque celeberrimi viri laborem sefellit eventus, cum anno proxime elapso 1759. paucorum dierum intervallo a calculis aberraverit reditus cometæ qui anno 1682. apparuerat. Quæ cum ita sint, *Nevvtonianam* attractionis legem demonstrant observationes astronomicæ, neque eam in dubium vocare possunt qui demonstrationis vim sentiunt.

II. Eandem attractionis legem terrestribus quoque corporibus convenire ex analogia naturæ colligi potest; at rem ipso corporum terrestrium exemplo ostendamus. Quod ut fiat, in memoriam revocandum est vim centripetam lunæ esse ejusdem generis cum gravitate terrestri; vi enim centripeta describeret luna pedes

15. $\frac{1}{12}$ minuto uno secundo, non secus ac faciunt

corpora terrestria. Jam vero investigari poterit spatium vi eadem centripeta lunari prope terram descriptum tempore minuti unius primi seu minutorum secundorum sexaginta; etenim
com-

compertum est experimentis gravia terrestria hac lege descendere, ut nempe spatia descripta semper sint, ut quadrata temporum, quare per regulam trium dicatur $1'' : 15\frac{1}{12} = 60 \times 60'' :$

$15\frac{1}{12} \times 60 \times 60'$; in hac proportionem virgulæ,,

designant minuta secunda, quemadmodum virgula, designare solet minuta prima. Itaque spatium minuti unius primi tempore prope terram a luna descriptum erit $15\frac{1}{12} \times 60 \times 60''$;

sed spatium a luna eodem tempore descriptum in distantia a terra semidiametrorum 60 est $15\frac{1}{12}$. Quare cum vires sint ut spatia iisdem

temporibus descripta, erit vis centripeta lunæ in telluris superficie ad vim centripetam in distantia semidiametrorum terrestrium sexaginta,

ut $15\frac{1}{12} \times 60 \times 60$ ad $15\frac{1}{12}$, seu ut $60 \times 60 \times 60$

ad 1; quare si semidiameter terrestris repræsentetur per, 1, erit distantia mediocris lunæ a

terra ut 60, ac proinde 60×60 erit hujus distantie quadratum. Quare cum quadratum unitatis sit, 1, erit vis centripeta lunæ in super-

ficie telluris ad vim centripetam lunæ in distantia mediocri a terra, ut mediocris distantie quadratum ad quadratum semidiametri terre-

stris, hoc est, in ratione duplicata inversa distantie. Itaque eadem lex obtinet quoque in

corporibus terrestribus. Porro observandum est attractionem considerari posse, vel in corpore

attrahente, vel in corpore quod attrahitur. Si primum, vis illa *attractionis* nomen retinet;

si secundum *gravitas* appellatur. Quia autem

omnis attractio mutua est, patet hanc esse universalem gravitatis legem, ut nempe se ha-

beat in ratione directa massæ, & duplicata inversa distantie.

Obijcies . Prædictam attractionis legem demonstrare non possunt astronomorum calculi atque observationes , nisi cognitæ sint planetarum massæ ; ita enim componi potest massarum & distantiarum ratio , ut eadem prodeant phenomena ; atqui cognita non est planetarum massa ; qua etenim ratione corporum remotissimorum massæ explorari , atque , ut ita dicam , ponderari possunt ? Ergo &c.

Resp. Nego maj. & min. & 1. quidem ut definiri possit lex attractionis , satis est ex observationibus astronomicis innotescere curvilineas planetarum orbitas , illorumque tempora periodica , ut ex præcedentibus demonstrationibus patet ; sed hæc duo certissimis observationibus constant , ergo ad determinandam generalem gravitatis legem necessarium non est perspectas esse planetarum massas . 2. Quamvis imperito hominum vulgo res absurda videatur , planetarum massas ad calculum revocare , Geometris tamen non desunt methodi , quibus id obtinere possunt . Methodum ex præmissis principiis facile colligendam hic explicare non abs re erit . Sint planetæ duo M , m , quos comitentur satellites ad distantias A , a revolventes , temporibus T , t , erunt satellitum vires centripetæ M , m

$\frac{M}{A^2}$, $\frac{m}{a^2}$; sunt enim attractiones versus M , m , in ratione directa corporis attrahentis , & duplicata inversa distantiarum . Præterea vis centrifuga æqualis est vi centripetæ , &

satellitum vires centrifugæ sunt $\frac{A}{T^2}$, $\frac{a}{t^2}$. Quare erit $\frac{M}{A^2} : \frac{m}{a^2} = \frac{A}{T^2} : \frac{a}{t^2}$. Hinc data ratione

A ad a , & T ad t , dabitur quoque ratio M ad

P A R S I. C A P. II. 61

ad M ; nempe ratio massarum in duobus planetis primariis . Itaque hoc modo innotescere poterit ratio massarum in Jove , Saturno , terra , & sole ipso ; illi enim planetæ suos habent Satellites , ne excepto quidem Sole , circa quem planetæ tanquam Satellites revolvuntur ; præterea etiam datur ratio distantiarum Satellitum a planetis primariis , atque eorundem Satellitum tempora periodica . Ex his principiis innotuit quantitates in Sole , Jove , Saturno , & terra esse inter se , ut numeri sequentes I.

I	I	I		Verum
1067	3021	169282	.	

hæc methodus valet dumtaxat in planetis , qui Satellites habent ; hinc in Mercurio , Venere , & Marte , cum Satellitibus careant , quantum hætenus per observationes iudicium ferre licet , non ita accurate innotescit massarum ratio . Hanc quidem methodum explicare placuit , tum ob rei ipsius utilitatem , tum ut vobis demonstretur superba quorundam hominum imperitia , qui velut absurdum , ridiculumque traducunt , quod ipsi non intelligunt , a quo quidem gravissimo errore vos longe alienos volo .

Instabis 1. Lex attractionis in ratione distantiarum duplicata decrescentis , contraria omnino est gravitatis terrestris legi . Etenim experimentis constat vim gravitatis in eodem terræ loco , & in diversis a tellure distantis , eandem manere ; si corpus aliquod manu suslineamus , sive in summa turri , sive in ima , eandem pressionem sentimus ; crassior quidem est hæc æstimatio ; at res accuratius definiri potest , si in summa turri stateræ brachiis imponantur corpora duo , quæ sint in æquilibrio , deinde corpus alterutrum e lance ipsa filo suspendamus , ac paulatim demittamus , æquilibrium

brium manere experiemur in diversis etiam a terra distantis. Quare sic argumentari licet. Attractio illa non decrescit in ratione distantiarum duplicata, quæ in diversis a tellure distantis eadem observatur; atqui &c. ergo &c.

Resp. distinguo maj. Si distantiarum differentia fuerit satis magna, concedo maj. Secus, nego maj. D. M. nego consequentiam. Quamvis gravitas terrestris decrescat in ratione distantiarum duplicata a centro telluris, in exiguis tamen a terra distantis gravitatem terrestrem, velut constantem, & perpetuo eandem considerare licet. Etenim tantilla est distantiarum, in quibus experimenta sumi possunt, differentia, ut pro nulla omnino haberi debeat, si cum integra telluris semidiametro conferatur, quod exemplo patebit. Ponamus haberi experimentum in vertice Montis omnium altissimi insularum Canariarum dicti *pico de tenerif*, cujus altitudo sit trium milliarium. Jam vero semi-diameter telluris ponatur circiter quater-mille milliarium, sumptis quadratis erit gravitas in Montis vertice ad gravitatem in Montis radice, ut 16000000 ad 16024009, quæ quidem ratio est quam proxime ratio æqualitatis, ita ut gravitatis differentia nullo experimento sentiri possit. Ceterum de gravitate constante, illiusque directione tractabimus in Capite sequente; quare hæc pauca dicta sint.

Instabis 2. Ad demonstrandam gravitatis legem, hac ratiocinatione utuntur plerique Physici. Sit, A, Fig. 5. punctum a quo undique emanet qualitas quælibet secundum rectas, AB, AC, AD &c. per totum spatium indefinite protensas. Jam vis hujus qualitatis decrescit in ratione duplicata distantiae, nempe erit vis illa in, D, ad vim in, G, ut quadratum distantiae AG, ad quadratum distantiae AD.

Et.

Etenim cum (ex hypothesi) qualitas undique in orbem per lineas rectas diffundatur, evidens est qualitatis hujus vim, seu intensitatem eo majorem esse, quo majori copia confertiusque accumulatur ejusdem qualitatis radii; sed cum idem fit in unaquaque superficie HDB, GDK, radorum numerus, patet radios illos eo confertiores esse, quo minor est circulorum superficies, ita ut spissitudo, sive densitas radorum semper sit in ratione reciproca superficialium; sed circulorum superficies sunt in ratione duplicata radorum, ergo virtus e centro propagata, quæ est ut circulorum superficies reciproce, erit ut quadratum distantiae a centro inverse. Hoc argumento utuntur Physici fere omnes, & ad solis planetarumque actiones allatam demonstrationem transferunt; quod quidem quam perperam faciant, facile patet; fingunt enim attractionem effluviolum instar propagari, ergo &c.

Resp. Ad totam hujus argumenti seriem frustra nobis objici præcedentem demonstrationem quam non solum non adhibemus, sed contra longe rejicimus; & quidem reprehendi omnino debet talis hujus demonstrationis usus qui tamen in plerisque Physicorum libris legitur. Præcedens demonstratio transferri quidem potest ad propagationem luminis, cujus intensitas decrescit in ratione duplicata distantiarum a puncto radiante; verum proculdubio errant Physici, qui de omnibus qualitatibus a dato puncto in spheram diffusis eandem legem pronuntiant. Et certe id verum non est, nisi addatur qualitatem illam progredi motu uniformi, & nullam ejus partem sisti vel dissipari. Si enim celeritas mutetur, radii qui dato aliquo tempore in orbe uno includuntur, non continebuntur in orbe altero, sed magis vel minus, pro-

64 INSTITUTIONES PHYSICÆ.

prout vel retardabitur motus vel accelerabitur. A vero igitur aberrant, qui ad æstimandam quantitatem odoris e dato globo emissi, assument odoris intensitatem decrescere in ratione duplicata distantiarum. Neque enim verisimile est motu uniformi, recta progredi odoriferas particulas quarum plurimæ circa ipsum corpus a quo emanant, hærent ipsi aeri admixtæ, alix autem spirante vento inde avelluntur, & longius abeunt. Sed multominus ad definiendam attractionis legem trahi potest præcedens demonstratio; & quidem attractio considerari non potest, qualitatis instar per radios diffusæ. Præterea intelligi nequaquam potest, quid ad attractionem conferre valeat illa corpusculorum emissio. Hanc objectionem asserre placuit, ut moneantur studiosi adolescentes Philosophicis ratiocinationibus temere, & non sine examine credendum esse.

ARTICULUS III.

De altera attractionis specie.

1. **I**N præcedenti articulo illam dumtaxat consideravimus attractionem, quæ inter magna corpora, & ad distantias satis magnas exercetur; at inter minimas corporum particulas in ipso contactu, & in minimis intervallis viget potentissima attractio, cujus legem investigabimus. Sed præmittenda sunt experimenta aliqua. Inter minimas fluidorum particulas mutuam attractionem exerceri, demonstrant ipsa guttarum fluidarum tenacitas atque rotunditas; duæ guttæ fluidæ in minima distantia sese attrahunt, & in majorem guttam coalescunt; eandem mutuam attractionem inter corpora dura, & fluida ostendunt etiam experimenta. Si la-
mel-

mella vitrea superficiei aquæ admoveatur, ita ut ipsam aquam lambat, non sine conatu aliquo lamellam ab aqua distrahi posse sentiemus, nempe per totam lamellæ superficiem minimæ aquæ columnæ adhærescunt quæ tandem, aucta vel tantisper distantia, proprio pondere relabuntur. Neque prætermittenda sunt præclarissima de lucis inflexione, & attractione experimenta. Si in cubiculo undique clauso, & satis tenebroso per foramen exiguum admittantur solares radii, qui deinde prope corporis alicujus aciem transeant, radius aciei proximior vi maxima a corpore attrahetur, atque inflectetur, & postea reflectetur; ordine succedent radii alii qui attrahentur minus, donec crescente paululum distantia, oculorum aciem fugiat attractio. Inter corpora dura eandem attractionis speciem vigere demonstrant vulgatissima experimenta. Si duæ lamellæ vitreæ sibi invicem arcte apprimantur, lamellas illas non sine magno conatu a se mutuo avelli posse experiemur, atque etiam attractionem quandam sentimus licet subtilissimis filis separatæ sint lamellæ; sed crescente tandem filorum crassitie, attractio omnis evanescit. Probe notari debent hæc experimenta, illorumque conditiones; in omni corporum specie inter corpora quælibet hæc attractio exercetur, sed ea conditione ut in contactu & prope contactum sit maxima, in distantibus autem etiam valde exiguis evanescat.

II. Demonstrata in articulo præcedenti attractionis lex descriptis experimentis satisfacere non potest. Etenim intelligantur coni similes $PAEA$, $PMBN$, quorum vertex communis P . *Fig. 6.* ponantur singulæ conorum partes attrahi versus P , in ratione duplicata inversa distantiarum, fingaturque conos illos dividi in
su-

superficies innumeras sphaericas, erit attractio superficiei MM, ad attractionem superficiei AA, ut superficies ipsæ directæ, & quadrata distantiarum inverse, ex hypothesi. Sunt autem superficies, ut quadrata diametrorum, & ob triangula PMM, PAA, similia, diametri sunt ut distantia, ergo attractiones sunt ut quadrata distantiarum directæ, & earundem distantiarum quadrata inverse, nempe attractio superficiei AA erit ad attractionem superficiei MM, ut $\frac{PA^2}{PA^1} \text{ ad } \frac{PM^2}{PM^1}$ hoc est ut $\frac{PA^2}{PA^1} \text{ ad } \frac{PA^2}{PA^1}$, scilicet in ratione æqualitatis. Quare si attractio, quæ in distantia qualibet eadem manet, dicatur, A, erit attractio coni truncati MM AA ad attractionem coni PMM, ut $AXMA$ ad $AXPM$, sive ut MA ad PM; ac proinde si fuerint PM, MA æquales, attractio in contactu P, haud erit validior, quam in qualibet a contactu distantia, quod quidem manifeste repugnat recensitis experimentis.

III. Prima attractionis species, de qua in articulo præcedenti sermonem habuimus, pendet ex quantitate materiæ; at præsens attractio in minimis dumtaxat exercetur intervallis, ac proinde ad eas non extenditur ejusdem etiam corporis particulas, quæ sunt a contactu longius positæ. Itaque licet hæc attractio certam quoque distantiarum legem servare debeat, illæ tamen distantia non a corporum centro, sed ab ipsa superficie computandæ sunt; atque hoc alterum est discrimen inter utramque attractionis speciem. Etenim dum in præcedenti capite diximus attractionem esse in ratione duplicata inversa distantia, hanc distantiam ab ipsa corporum superficie æstimare non licet, nisi corporum diametri cum mutua corporum distantia-

stantia comparatæ rationem valde exiguam habuerint; quod quidem in præcedenti capite ponebamus. Jam vero mutuam sphærarum attractionem considerabimus. Intelligatur corpusculum aliquod extra sphæram positum, & a singulis sphære particulis attractum in ratione distantiarum duplicata inversa. Fingatur sphæram illam condensari, ita ut tota coeat in centrum; partes anteriores a corpusculo recedentes, aliquam vis attractivæ partem amittunt in ratione scilicet duplicata semidiametri, sed hanc mutuam attractionem luçantur partes alia oppositæ, ita ut attractionis decrementum ex una parte, incremento ex parte altera compensetur; quare eadem manet attractio tota, sive partes circa centrum dispergantur, sive in centro colligantur. Quia vero quælibet materiæ particula aliam quamlibet attrahit in ratione duplicata inversa distantia, evidens est corpusculum in utroque casu eadem lege a sphæra attrahi, nempe in ratione duplicata inversa distantia a centro. Cum eadem ratiocinatio de sphæris duabus institui possit, patet sphæras duas sese mutuo attrahere in ratione duplicata inversa distantiarum a centro, non vero ab ipsa superficie. Hanc attractionis legem ratiocinatione magis geometrica demonstrant Philosophi, qui attractionis doctrinam sublimiori modo explicant, nobis vero qui breves, sine obscuritate tamen, fieri laboramus, satis sit facilem exposuisse ratiocinationem, quæ ad omnium captum sit accommodata. Jam vero utriusque attractionis constituto discrimine, sit

CON.

CONCLUSIO.

PRÆTER ATTRACTIONIS LEGEM IN RATIONE DISTANTIARUM DUPLICATA DECRESCENTEM, ADMITTENDA EST LEX ALIA IN RATIONE PLUSQUAM DUPLICATA DECRESCENS.

Demonstratur 1. Attractio illa satis non est, quæ omnibus attractionis effectibus non satisfacit; atqui &c. ergo &c. major est evidens. Minor autem patet ex phenomenis modo recensitis, & ex aliis jamjam declarandis. Si vis attractiva decrescere in sola ratione duplicata distantiarum, paulo major foret vis illa in contactu, quam in exiguis a contactu distantis, quod repugnat experimentis. Harum virium rationem ex radiorum lucis inflexione calculo æstimavit Nevvtonus, & invenit in minimis a contactu distantis attractionem esse ad vim gravitatis ut 10000000000000000 ad unitatem; quæ quidem tanta virium differentia eidem attractionis legi tribuenda non est. 2. Quoniam hæc vis attractiva in contactu dumtaxat vel prope contactum exercetur, evidens est corporis attrahentis massam ad majorem attractionem nihil conferre, sed contactus magnitudini attractio illa proportionalis est. Quia tamen minimæ particulæ non longe a contactu, neque extra ipsos attractionis limites sunt positæ, attractionem auget minimarum partícula- rum densitas. Hinc si marmora duo jungantur, & oleo vel pice, aut etiam aqua perfundantur, validius inter se cohærent, ob auctam contactus magnitudinem. Augetur cohæsi- o si calefiant liquores, quibus superficies imbuuntur; hoc enim artificio poros altius penetrant liquo- rum

rum particulæ, minima interstitia facilius subeunt, augetur minimarum partium densitas, ideoque & attractio. En alterum utriusque attractionis discrimen; prima enim attractio quantitati materiæ proportionalis est, non autem contactus quantitati. Itaque in minimis particulis attractio est, ut densitas particularum & superficies simul; cæteris paribus; quia vero superficies sunt ut quadrata diametrorum, soliditates autem ut earumdem diametrorum cubi, evidens est minimas particulas, quæ ratione soliditatis majorem habent superficiem, fortius cohærere; contra corpuscula, quorum minor est contactus, quales sunt minimi globuli eximie perpoliti, facilius a se invicem distrahuntur; atque hinc fluiditatis rationem reddunt aliqui Physici; sed hac de re in Physices progressu sermonem habebimus.

Si quis autem a nobis requirat talem attractionis legem quæ in minimis magnisque distantis possit phenomenis satisfacere, haud difficile erit demonstrare innumeras esse posse hujus attractionis leges; quænam vero in rerum natura obtineat, nulla experimentorum subtilitate definiri potest. Legem unicam in exemplum afferre satis erit. Ponamus legem attractionis ex duobus terminis esse compositam, quorum primus sit ut quadratum distantiae inverse, alter autem ut distantiae cubus etiam inverse. Jam si distantia dicatur, D , erit in

hac hypothese lex attractionis $\frac{A}{D^2} + \frac{B}{D^3}$, litte-

ræ A , B , designant quantitates quaslibet finitas. Fingamus distantiam minimam seu infinitesimam, erit D^2 quantitas infinitesima ordinis secundi, & D^3 quantitas infinitesima ordinis

ter-

tertiū; quare evidens est quantitatem $\frac{B}{D}$ esse infinitam, si conferatur cum $\frac{A}{D}$ ac proinde in distantis minimis evanescit ratio duplicata inversa distantiarum. Rursus si distantia ponatur valde magna, erit D quantitas maxima si conferatur cum D^2 . Igitur $\frac{B}{D}$ erit quantitas minima respec-

tu $\frac{A}{D}$ ideoque in distantis maximis sola valebit ratio duplicata inversa distantiarum. Quare si talem fingamus attractionis legem ex duobus terminis compositam quorum unus exprimat rationem duplicatam inversam distantiarum, alter autem inversam triplicatam, evidens est talem legis compositionem ita se habere ut in contactu minimisque distantis sola vigeat attractio in ratione triplicata inversa, in distantis autem paulo maioribus sola supersit attractio in ratione inversa duplicata. At diligenter observandum est propositam attractionis legem exempli loco dumtaxat habendam esse; infinitæ enim huiusmodi leges excogitari possunt. Præterea si proposita lex accurate servaretur, attractio in contactu tanta foret ut corporum cohesio nullo pondere frangi posset; foret enim cohesio respectu gravitatis infinita, quod est absurdum. Igitur patet hanc attractionis legem considerari posse tamquam exemplum, quo intelligatur minime repugnare talem attractionis legem ex ratione duplicata inversa distantiarum compositam & ex alio termino, ita ut in contactu vel prope contactum secundus legis terminus habeat ad primum rationem valde magnam, non tamen infinitam; contra autem in di-

distantiis paulo majoribus, primus terminus ad secundum habeat rationem valde magnam sed tamen finitam; verum, ut jam supra observavimus, legem hanc licet reipsa existentem & minime commentitiam nemini divinare hactenus licuit, neque unquam fortasse licebit.

Objicies. Admittenda non est lex illa quæ analogiæ naturæ repugnat, atqui &c. ergo &c.... probo minorem. Universalissima naturæ lex est attractio decrescens in ratione duplicata distantiarum. Repugnante ergo analogia naturæ, alia fingitur lex omnino ignota & mere arbitraria.

Resp. Nego min. ad cujus probationem dico optimam quidem philosophandi regulam esse naturæ analogiam, sed ea abutendum non esse; neque enim contra hanc philosophandi regulam peccatur, si alias admittamus leges quas phenomena omnino postulant. Præterea simplicitati & analogiæ naturæ minime obstat prædicta lex ex duobus terminis composita; hæc enim tamquam simplicissima & unica naturæ lex haberi debet. Sed quidquid sit, supremo rerum omnium creatori leges quis audebit præscribere? Deus optimus maximus eas quas & quot voluit, leges ad consequendos in creatione præstitutos fines sapientissime constituit. Et certe vis magnetica & electrica ad generalem attractionis legem revocari nequaquam potest. Itaque analogia naturæ perperam abuteretur qui omnia attractionis phenomena ad unicam legem reducere tentaret. Natura quidem simplex est, sed simplicitatem hanc solus novit supremus naturæ auctor qui res omnes illarumque relationes unico intuitu perspicit: naturæ simplicitatem intueri datum non est nobis mortalibus qui facta dumtaxat seorsim consideramus, sed rerum causarumque nexum ignoramus.

In-

Instabis 1. demonstrant Geometræ singulas sphaerarum particulas ipsasque etiam sphaeras attrahi in ratione duplicata inversa distantiarum. Ita telluris globus suam attractionem exercet in ratione duplicata inversa distantiae, & singulae globi terrestris particulae eandem servant attractionis legem; at si lex attractionis ex duobus componatur terminis, jam attractio particularum & sphaerae totius eadem non est. Ergo &c.

Resp. Concedo maj. Nego minorem. Eandem quidem legem attractionis in sphaeris & sphaerarum particulis demonstrant Geometræ, & nos quoque facili ratiocinatione ostendimus. At corporis totius singularumque partium eandem esse legem in solis sphaeris dumtaxat invenerunt Physici; minime vero in sphaeroidibus aliisque corporibus quae in rerum natura occurrunt. Et quidem si ponamus singulas materiae particulas quae corpus aliquod componunt, trahere punctum quodlibet datum ad distantiam quamlibet, evidens est singulas corporis attrahentis particulas respectu puncti attracti diverse positas esse, ac proinde particularum vires diversam habere directionem diversamque mensuram. Quare cum attractio tota versus punctum aliquod nihil aliud sit quam vis unica ex viribus singulis resultans & in datam directionem unicam composita, patet in diversis corporibus pro varia partium positione diversam quoque esse posse attractionis legem. Et requidem ipsa haec attractionis lex in ratione scilicet directa massae & duplicata inversa distantiae in paucissimis dumtaxat corporibus obtinet, E. g. in sphaeris ut quocumque magnis, quod jam demonstratum est. Tandem haec obiectio ad nostrae conclusionis sensum minime accommodata est; re quidem vera singulae sphaerarum par-

particulæ & sphaeræ ipsæ a puncto aliquo attrahuntur in ratione duplicata inversa distantiarum, sed in hac conclusione sermo est de mutua particularum attractione inter se & in minimis distantiiis vel in contactu.

Instabis I. ex præcedenti responsione sequeretur, nulla corpora vel saltem paucissima sese attrahere in ratione distantiarum duplicata; etenim hanc attractionis legem in solis sphaeris invenerunt Geometræ. Atqui id repugnat alteri conclusioni in qua prædictam attractionis legem constituimus, ergo &c.

Resp. Nego mini. Hanc quidem attractionis legem in corporibus cælestibus vigere ex observationibus astronomicis demonstravimus. Nec minus invicte in corporibus terrestribus eandem attractionem ostendimus. Corpora scilicet trahuntur a terra in ratione duplicata inversa distantiarum & viceversa. Neque obstat corporum terrestrium figura; si enim corpora illa conferantur cum tota telluris massa, velut corpuscula minimaque particulæ haberi debent, illorumque proinde negligenda est figura. Quod autem spectat terræ corporumque cælestium figuram, eam velut proxime sphaericam considerare licet. Quamvis ergo paucissima sint corpora in quibus lex illa accuratissime servari possit, hanc tamen legem physice obtinere certissimum est.

Instabis III. Ex attractionis lege in ratione triplicata inversa distantia id colligeretur, corpora duo quælibet in minimis distantiiis sese validissime attrahere & ad contactum tandem pervenire. Præterea corpora duo contigua tenacissime cohærent & vi infinita, atqui hæc duo experimentis repugnant, ergo &c.

Resp. Nego maj. Viget quidem potentissima attractio inter minimas particulas in minimis

distantiis. At si corpora nimia fuerint, vis attractiva in proximis dumtaxat minimisque particulis residet. Porro si corpora duo eadem vi moveantur, velocitates illorum sunt in ratione inversa massarum; quare si corpora duo dicantur A, B, minimæ particulæ C, D, velocitas qua corpus, A, tendit ad, B, est ad velocitatem qua particula, C, solitarie spectata tenderet ad B, ut particula, C, ad corpus A; igitur ob corporis magnitudinem fere infinitam respectu particulæ, patet inter magna corpora hanc alteram attractionis speciem ne in minimis quidem distantiiis exerceri posse; atque hinc aliqui Philosophi rationem reddunt principii chimici; *Sales non agunt nisi soluti*. Tandem neque in contactu inter corpora quælibet viget attractio. Etenim attractio illa est ut contactus magnitudo directe, & ut cubus distantiarum inverse. Quare si contactus magnitudo fuerit valde exigua, & fere infinite parva, jam patet attractionem fore etiam infinite parvam vel nullam. Neque in ullo casu attractio erit infinita; probe enim meminisse oportet, quod jam monuimus rationem triplicatam distantiarum exempli loco dumtaxat habendam esse; admittenda est lex attractionis quæ non solum aliquam distantiarum dignitatem contineat, sed alias quoque tali modo admixtas habeat quantitates ut attractio in contactu sit valde magna, non autem infinita. Talis autem quantitarum permixtio appellari solet ab Algebristis *functio*. Porro evidens est innumeras fingi posse distantiarum functiones quæ huic conditioni satisfaciant. Quidquid ergo hætenus diximus, non in eo sensu intelligendum est quasi veram hujus attractionis legem determinare velimus; hoc unum nobis erat demonstrandum, præter legem attractionis in duplici-

plicata distantiarum ratione decrefcentis, aliam quoque legem admittendam eſſe.

Inſtabis 4. Corpufcula aliqua in contactu & in minimis diſtantiis ſeſe repellunt, quod quidem patet corporum elafiicorum exemplo & maxime radiorum ſolarium reflexione; imo non defunt ſubriliſſimi doctiſſimique Philoſophi qui vim attractivam in omnium corporum particulis ad certos uſque limites admittunt; quam vim attractivam deinde in repulſivam abire affirmant, itaut nullus omnino ſit in rerum natura phyſicus immediatusque contactus. Unde ſic argumentari licet. Tamquam univerſalis naturæ lex admitti non debet attractio, ſi corpufcula aliqua, imo omnia ſecundum aliquos Philoſophos, vim repulſivam demonſtrent; atqui &c. ergo &c.

Reſp. Nego maj. Vis attractiva negari non poteſt ab iis etiam Philoſophis qui in omnibus corporum particulis vim repulſivam admittunt. Certiſſimum quidem eſt ſeſe repellere minimas quorundam corporum particulas, quidquid ſit vis illa repulſiva, ſed repulſio præcedentem attractionem non excludit, imo ex vi attractiva originem habere repulſionem affirmant nonnulli, quod deinde fuſius explicabimus ubi ſermo erit de corporum elafiicitate, & de luminis reflexione. Cæterum nos quoque vis repulſivæ nomine utemur, ſed effectum dumtaxat, non vero cauſam aliquam ſignificantes. Etenim quæcumque ſit repulſionis cauſa, vis hujus actionem ad calculum revocare & æſtimare licet; quoad utilitatem tota res perinde ſe habet. Neque repulſio quidquam obſtare poteſt iis quæ antea demonſtravimus, attractionem nempe, cæteris paribus, contactus magnitudini proportionalem eſſe; ibi enim ſermonem habuimus de corporibus quorum partes cohererent, non ve-

ro de corporibus elasticis quorum partes sese fugiunt atque repellunt. Tandem contactus hic a nobis intelligitur qualis in corporum co-hærentium partibus observatur, neque de contactu phisico & immediato quidquam pronuntiare volumus. Certum quidem est, ubi de primis causis, corporumque principiis agitur, multas fieri posse hypotheses quæ validis rationibus difficile refelluntur. Itaque hanc primam nobis esse volumus philosophandi regulam in causarum universalium investigatione nostram fateri ignorantiam, iudiciumque cohibere.

A P P E N D I X

De quibusdam capitis præcedentis utilitatibus.

I. **A**Dversus impiissimam veterum Atomistarum doctrinam invicti roboris argumenta ex præcedenti capite deduci possunt. Materiam æternam effutiebant atomistæ, non tamen æternum materiæ ordinem admittebant. Stultissime delirabant præsentem materiæ dispositionem ex fortuito atomorum sive corpusculorum concursu originem habuisse, eandem dispositionem casu quoque conservari, contrario tandem casu finem habituram. Hinc patet veteres Atomistas puros putosque atheos fuisse; quia autem etiamnum hodie non desunt nequissimi stultissimique homines quos hæc absurdissima deliria recoquere non pudet, ex præcedentibus demonstrationibus hos invictè refellere officii nostri partes esse existimamus. Et 1. quidem sic ratiocinari solent.

Finitus corpusculorum numerus finitum dumtaxat combinationum numerum admittit. At per totam infinitam æternitatem exitisse debuerunt combinationes numero infinitæ. Quare
si in

si in fortuita atomorum agitatione omnia se æqualiter habuerint, ut in longa casuum fortuitorum serie contingit, evidens est combinationem quamvis determinatam infinities redituram, ac proinde infinities major est probabilitas hanc præsentem combinationem redituram quam non redituram: en absurdissimam Atomistarum argumentationem. At imprimis in eo turpiter errant quod putant esse aliquid revera fortuitum; nihil fortuito & puro casu contingere demonstravimus in institutionibus metaphisicis; Sed præterea hujus ratiocinationis absurditatem facile ostendemus. Et quidem falsissimum est infinito terminorum numero contineri numerum combinationum finitum, si de mundi constitutione sermo habeatur. Finitus quidem est combinationum numerus, si *combinationis nomine* intelligatur tantum ordo quidam quo alii termini aliis succedunt, & sese mutuo excipiunt. Ita si omnes litteræ quæ Virgilii poema componunt versentur temere in sacco aliquo, tum extrahantur & ordinentur omnes litteræ, aliæ post alias, atque ejusmodi operatio repetatur in infinitum, evidens est infinities redituram combinationem Virgilianam. Verum in mundi constitutione res longe aliter se habet. Etenim planetæ circa solem certa lege in determinatis orbitis revolvuntur; spatium in quo planeta aliique cælestes globi suas periodos absolvunt in longum latum & profundum quaquaversum patet. Porro rectæ in uno plano sunt infinitæ, plana in spatio sunt infinita, & pro recta quavis in quovis plano infinita sunt curvarum genera, ac proinde & infinities plures sunt curvæ quæ per datum punctorum numerum non transeunt. Præterea infinitis modis variari potest lex attractionis: pro quavis materiæ particula infinitus est dispositionum

numerus ; quare pro ipsis materiæ particulis haberetur numerus combinationum infinitus per ipsum particularum numerum multiplicatus . Itaque in mundi constitutione finitus non est casuum diversorum numerus , sed infinitus & quidem ordinis altissimi . Inde ergo fit evidens in immenso isto combinationum numero infinities plures esse combinationes inordinatas , quæ exhibeant incertum chaos corpusculorumque temere volitantium massam , quam quæ exhibeant mundum ordinatum & certis constantem legibus . Quamobrem nisi sit aliquis qui ex omnibus æque per se possibilibus combinationibus unam ex ordinatis eligat , infinities probabilius est obventuram combinationum seriem inordinatam , minime vero eam quam cernimus & admiramur ; atque ad vincendam hanc improbabilitatem infinitam requiritur in finita vis supremi conditoris qui unicam seriem ordinatam inter alias infinitas seligat atque determinet .

Nec est quod obijciatur etiam hominem qui statuam aliquam effingit , finita intelligendi vi eligere unicam formam inter infinitas possibiles . Nam Statuarius illam unicam formam non eligit , sed modo admodum confuso quamdam determinat figuram quæ unica oritur ex naturæ legibus & ex mundi constitutione , quam naturæ opifex infinitus vi infinita determinavit ; per hanc scilicet determinationem ab humanæ voluntatis actu oriuntur certi motus in brachiis , & ab his motus instrumentorum .

Sed nec dici potest hunc ipsum ordinem necessarium esse & æternum ac per se subsistere , ita ut casus quilibet sequens determinetur a præcedente , & a lege virium intrinseca atque omnino necessaria . Et quidem , quis sibi serio persuadeat has solas virium leges quas in præ-

ce-

cedenti capite explicavimus, fuisse possibiles & necessarias, ut nimirum corpora sese attrahant tanta potius attractione quam alia? Nulla sane inter distantiam & attractionis speciem ita necessaria est connexio, ut alia quævis esse non potuerit. Præterea cur hæc potius in rerum natura existat materiæ quantitas quam alia, nulla sane ratio esse potest, nisi arbitrium entis potentia infinita præditi; nemo sanæ mentis sibi facile persuadebit in determinata quadam materiæ massa haberi necessitatem existentia potius quam in alia quavis.

Tandem licet materiæ talis fingatur natura ut habeat necessariam sibi que essentialem vim inertia & virium legem, itaut status quilibet datus a præcedenti determinari debeat, eadem nihilominus manet contra Atomistas demonstrationis vis. Etenim status ille qui habetur tempore quolibet dato, nec a se ipso, nec a materia, nec ab ullo ente materiali tum existente, suam habet determinationem ad existendum, sed determinationem illam accepit a statu præcedenti. Porro status præcedens non potest sequentem determinare, nisi quatenus ipse determinate existit; ipse autem nullam quoque in se habet determinationem ad existendum, sed illam accipit a præcedente. Quod de secundo præcedente statu diximus, dicendum de tertio qui determinationem debet accipere a quarto, atque eodem modo progrediendo in infinitum orietur infinita series statuum in quorum singulis habemus merum nihil, relate scilicet ad determinatam existentiam postremi status. Summa autem nihilorum utcumque numero infinitorum est nihil; jam diu enim constitit merum esse paralogismum, infinitorum nihilorum summam finitæ alicui quantitati æqualem esse.

Ex his ergo id evidenter colligitur ens seriei

ipsi extrinsecum quod hanc seriem elegit præ seriebus aliis infinitis, infinitam habere determinationem & vim electivam quæ unam illam ex infinitis eligat. Cognitionem habere debuit & sapientiam ut hanc seriem ordinatam præ inordinatis abhibuerit. Si enim sine cognitione & electione egisset, infinities probabilius foret ab illo determinatam fuisse aliquam seriem inordinatam quam unam ex ordinatis; cum nimirum ratio inordinatarum ad ordinatas sit infinita. Igitur ex ipsis quoque Atomistarum principiis manifestum fit infinitam esse probabilitatem pro cognitione, sapientia, ac libera electione, quæ quidem probabilitas infinita omnimodam certitudinem inducit, ac proinde Atomistas propriis armis impugnavimus. Hæc autem quæ brevius demonstrata sunt, jungi debent iis quæ in *Metaphisica* de fato & necessitate fuisse tractavimus.

II. Ex mirabili minimarum partium structura, magnitudine, vel attractiva magis, ac magis elucescunt divina bonitas illiusque sapientia infinita. Pauca exempla hic considerare & admirari satis erit. Calore solis rarefiunt aquæ particulæ, e mari ad superiorem aeris regionem sub forma vaporum evehuntur; nec unquam consistunt vapores donec ad aerem ejusdem gravitatis perveniant, tumque subsidunt nubesque componunt, & mille figuras induunt. Mox eadem particulæ frigoris vi aliisve causis condensantur, & in minus spatium coactæ formam priorem amittunt, & in terram pluviz, nivis, grandinis instar relabuntur. Maxima pluviz pars per fluvios ad mare deducitur, iterum in vapores abitura; pars vero aliqua terræ se immiscet & ibi deposita arborum herbarumque radices & semina ingreditur e quibus in alias corporum species affurgit. Diversa corpora componit eadem pluvialis aqua prout diversa ingreditur rerum
semi.

semina, quædam scilicet transit in plantas; quædam in gramina, aliqua in flores, aliqua in quercus, ornos, fagos & alias quamplurimas arborum & plantarum species. Ecquis ergo non admirabitur divinam providentiam quæ sapientia & bonitate infinita ad hominum commodam minimarum particularum structuram composuit atque ordinavit? sed idem exemplum rursus persequamur. Nec in eadem planta eadem omnino manet pluvia; plantæ omnes ex innumeris heterogeneis constant partibus, sic in lino E. G. alia est forma radicis, alia caulis, alia tenuium fibrarum, alia florum. Rursus consideremus ipsam vel unius caulis utilitatem miramque varietatem. Caulis membranam separant lini artifices, & postquam mille tractaverunt modis, fibras in oblonga contorquent fila quæ deinde in se convoluta, glommorum species referunt. Fila hæc varie inter se connectunt & texunt linteones, & arte sua telas ex illis componunt quæ vestimenta hominibus præbent. Hæc denique annis oblita, in linteola redacta aquæ immittuntur, malleis ligneis in mollem quasi pulpam subiguntur quæ tandem exsiccat humore aqueo in papirum transmutatur, quæ si igni immittatur, partim in tenuissimum pulverem, partim in fumum evanescit. En quantam ex mutato partium situ, ex mutata illarum vi attractiva, rerum & effectuum varietatem!

Sed universæ naturæ pro varia cæli temperie mutationem variamque dispositionem breviter percurramus. Cum terræ partes singulæ situm suum respectu solis continuo mutant, ejusdemque radios nunc magis nunc minus obliquos, nunc breviorē nunc diuturniorē tempore excipiant, universa fere rerum natura novam faciem per vices induit. Autumno exarescunt segetes & fructus maturescunt, viridem amœnam-

que faciem paulatim deponunt campi & decidunt arboribus folia, mox ingruente hyeme frigent & horrent omnia, nix tegit alta montes ejus onere depressæ laborant silvæ, ipsæ maris aquæ stabiles & firmæ redduntur, quodque prius fuit navibus tantum penetrabile, nunc exercitus & castra gerit. Iterum mutato telluris solisque respectu diffugiunt nives, redeunt gramina campis & sua arboribus folia, *nec stabulis jam gaudet equus nec arator igne*, sed nova prorsus & læta apparet rerum facies & annus per æstatem ad autumnum revertitur.

Quamvis ex sola minimarum particularum mutatione, figura, magnitudine, vi attractiva oriri certissimum sit infinitam effectuum varietatem, pro ea tamen quam nobis præscripsimus philosophica timiditate atque ingenuitate, asserere non audemus materiam omnem ita homogeneam esse ut ex diverso duntaxat minimarum partium situ repetenda sit specifica corporum differentia. Hanc quæstionem deinde revocabimus variasque Philosophorum opiniones expendemus, ubi sermo erit de corporum natura. Interim ingenue fatendum est nobis innotescere duntaxat corporum superficiem, ipsumque, ita ut dicam, corticem, intimam vero texturam atque naturam nos omnino latere. In hac autem nostra ignorantia iterum elucet divina bonitas quæ humanam superbiam reprimere voluit, eas tantum permittens cognitiones quæ ad vitæ necessitates & utilitates conducere possunt.

III. Longius esset referre utilissima experimenta quæ in præsentī argumento sumpserunt celeberrimi Physici, unum asserere satis erit quod in publicam utilitatem maxime redundare potest. Accuratissimis experimentis compertum est eam esse salis marini & salis tartari saluberrimam indolem, ut sulphureos vapores aliosque per-

perniciosissimos halitus plurimos potentissime attrahant atque absorbeant, cujus quidem virtutis in periculosis occasionibus nonnullis utilitas maxima esse potest. Artifices aliqui ut plumbarii fusores, noxias tractant materias e quibus perniciosissima erumpunt corpuscula. Si autem hanc adhibeant diligentiam ut pannum salina aliqua solutione madidum ori naribusque admoveant, vaporum periculum declinare poterunt. Eadem de causa factum est ut adversus pestiferos halitus tanquam optimum antidotum credi soleat acetum album. Hac salium proprietate admodum saluari ad minuendum saltem præsens periculum, uti possent qui in fodinis aliisque infectis locis non sine vitæ discrimine labori manum dare coguntur. Sed de hac re legenda sunt quæ refert clarissimus dominus Hales in eximio opere cui titulus est: *Statica vegetabilium*. Hæc pauca dicta sint ad demonstrandam præcedentis capitis utilitatem. Minimarum particularum vim attractivam ad explicanda artis chymicæ phænomena transferunt magni quidem viri; verum quamvis hæc doctrina nonnullis experimentis feliciter satisfacere videatur, ea tamen abutuntur Physici qui singulas operationes chymicas per attractionis vel repulsionis nomen clare explicasse confidunt; Illi autem merum effectum, nullam vero effectus causam proferunt.

C A P . U T III.

De gravitate constanti.

Quamvis in præcedenti capite demonstrata fuerit gravitatis cælestis atque terrestis lex communis, quæ nempe decreseat in ratione duplicata distantiarum a centro, observavimus tamen ita exiguas esse distantias in quibus ex-

D 6

peri-

perimenta habere licet, si conferantur cum integra telluris semidiametro, ut nulla in gravitate terrestri variatio experimentis vel observationibus conspicua esse possit. Præterea corpora omnia, quæcunque sit illorum natura, figura, magnitudo, sublata aeris resistentia, ut sit in vacuo boyliano, æqualibus temporibus æqualiter descendunt, ac proinde vis gravitatis æqualibus temporibus æqualiter agit. Itaque gravitatem terrestrem licet reipsa variabilem, tanquam constantem & uniformem usurpant Physici, nosque hanc gravitatem in præsentī capite considerabimus. Tria autem potissimum expendemus; 1. præcipuas gravitatis affectiones explicabimus, 2. gravitatis causam investigabimus, 3. tandem centri gravitatis doctrinam exponemus.

ARTICULUS I.

De gravitatis terrestris affectionibus præcipuis.

I. **G**RAVITATIS nomine hic generatim intelligitur vis illa qua corpora ad terram tendunt. Porro confundi non debet gravitas cum ipso corporum *pondere*; gravitas enim est vis quæ singulas materiæ particulas deorsum urget; pondus autem est ipsa gravitatis quantitas in unoquoque corpore, seu est ipsa gravitatum summa vel aggregatum. Pondera quantitativis materiæ proportionalia esse ex ipsa gravitatis natura facile colligitur. Etenim cum vis gravitatis sit constans & in singulas æquales materiæ particulas æqualibus temporibus æqualiter agat, seu æquales ictus imprimat, erit numerus ictuum ut particularum æqualium numerus. Præterea cum corpora omnia per lineas ad sensum parallelas recta descendere observentur, patet gravitatis directiones esse parallelas; ideoque gravitatis ictus
in

in eandem directionem conspirant. Igitur gravitas tota erit, ut numerus ictuum, hoc est, ut quantitas materiæ; nam quo plures sunt æquales materiæ particulæ, eo plures erunt ictus. Quare pondera sunt quantitatibus materiæ proportionalia; evidens autem est hanc demonstrationem valere in quolibet corporum genere; quæcumque sit illorum figura, textura, natura; cum gravitas ex his corporum conditionibus nequaquam pendeat.

Ex his autem facile intelligitur experimentum, quod vix in animum sibi inducere possunt viri rerum physicarum imperiti & sensuum præjudiciis assueti. In longioris tubi parte superiori suspenduntur duo pondera, utrumque inæqualia, E. G. gravissimum aurum, & levissima pluma; factio deinde, ut moris est, vacuo ope machinæ pneumaticæ, corpora illa eodem temporis puncto demissa, eodem omnino tempore descendunt, & æqualibus temporibus æqualia spatia percurrunt. Experimenti ratio statim patet; & quidem corpora duo divisa intelligantur in particulas æquales innumeras, vis gravitatis in particulas illas æquales æqualibus temporibus æqualiter agit, ac proinde singulæ particulæ, æqualibus temporibus, æqualiter descendunt. Id vero declaratur exemplo hominum eadem velocitate currentium; sive enim conjunctis, sive sejunctis manibus currant, eodem tempore ad propositum scopum perveniunt. Pari ratione, sive corporum particulæ seorsim descendant, sive majus minusve corpus, atque aggregatum componant, eodem plane tempore debent descendere. Quod ergo corpora inæquali velocitate per aerem descendant, idtribuendum est aeris resistentiæ; sed, hujus inæqualitatis causam, deinde fusi-

sius

fius exolicabimus, ubi de medii resistantia sermo erit.

II. Gravitationem hætenus consideravimus in eodem terræ loco; verum quamvis gravitas in eadem regione sit constans, vi tamen centrifuga in remotioribus terræ locis eam plurimum immutari certissimum est, quod qua ratione detectum fuerit, atque confirmatum, enarrabimus. Superioris Sæculi anno 72. Cayennam insulam Æquatori proximam profectus est, dominus Richerus ad Astronomicas observationes ineundas a regia Parisiensi Academia missus; secum detulerat horologium, quod Parisiis cum cælestibus motibus accurate conspirabat. Eo adhibitq̃ deprehendit multo lentiolem ejus motum, ita ut singulis diebus per bina minuta cum dimidio ab integræ diei mensura deficeret. Rem miratus, quam nec ab aliqua machinæ mutatione, nec ab alia ejusmodi causa videbat oriri posse, illud conjecit vim minorem esse versus Æquatorem quam Parisiis, unde fieret, ut pendulum lentius vibrationes suas perficeret, & horologium ipsum retardaret. Ut autem certius constare posset, an res ita se haberet, accuratissime inquisivit in longitudinem penduli, quod singulis minutis secundis horariis, singulas oscillationes absolveret, & ejus longitudinem æri incidit, ut eadem observatione in Galliam regressus iterata, utramque mensuram conferre posset. Constat enim pari gravitatis vi longiora pendula lentius oscillationes suas peragere, breviora citius; pari longitudine penduli, & diversa vi gravitatis ea pendula lentius moveri, quæ minori aguntur vi; si autem bina pendula eodem tempore oscillationes suas peragant, quæ idcirco *isochrona* appellantur, inæqualem vero habeant longitudinem, illud quod lon.

longius est, gravitate majori urgetur. Hæc quidem omnia pendent ex pendulorum doctrina, quam deinde explicabimus; interim vero evidens est vim illam majorem esse qua fit, ut pendulum eodem tempore per majores arcus excurrat. Nec Richeri spem fefellit eventus; regressus enim Parisios, ita brevioris penduli isochroni mensuram invenit, ut is quidem de inæqualitate gravitatis in diversis terræ locis dubitare omnino non posset.

Rei novitas universam perculit litterariam Rempublicam, atque commovit mirum in modum, multis sub initium renuentibus, aliis observationum vitio phænomenum tribuentibus, aliis vi caloris durissima quæque metalla dilatantis; nec defuerunt, qui observationibus per Europam institutis gravitatem ubique æqualem se invenisse affirmarent, cum nimirum iis methodis, quæ tum in usu erant, minus perfectæ & perpolitæ, exiguum discrimen in tam exiguis locorum intervallis nequaquam deprehendere potuerint. Hinc observationes multo accuratiores in plurimis, & admodum diffitis terræ locis fuerunt institutæ; hinc Academici Parisienses Regis jussu, & liberalitate versus polum Borealem, & versus Æquatorem expeditionem litterariam susceperunt, atque tandem summo observationum consensu, certo definitum habemus gravitatis vim ab Equatore ad polos augeri perpetuo. Nos quoque hic Romæ in hortis Regii SS. Trinitatis Cœnobii longitudinem penduli ad minuta secunda oscillantis investigavimus. Neque in hac observatione ullam passi sumus desiderari diligentiam; observatio per plures dies instituta est in loco nullis currum tremoribus agitato; adhibuimus pendula duo, quorum unum a celeberrimo artifice Londinensi *Grahamo* elaboratum est. Urebamur etiam
men-

mensura bipedali Londinenſi accuratiſſima, factaque obſervationum comparatione, res eadem propriis experimentis innotuit. Verum quod ſpectat hujus variationis legem, ad præſentem locum non pertinet, tota res cum figura telluris, aliisque difficilioribus nondum explicatis Phyſicæ principiis conjuncta eſt. Eo loci ponimus vim gravitatis conſtantem, & per rectas parallelas tendentem; quod quidem facere licet, cum in hoc capite gravitatem conſideremus in eodem terræ loco, vel in locis a ſe non multum diſſitis. Sed hæc doctrina, quam minus accurate nunc conſiderare ſatis eſt, majori deinde ſubtilitate, & diligentia explicari debet, ubi de pendulis & telluris figura tractabimus.

III. Neque tamen hic omnino prætermittendum eſt, quod de hujus variationis cauſa afferri ſolet. Vi imaginandi nobis eſſingamus globum aliquem, qui circa ſuum axem converſatur. Partes illæ quæ proximæ ſunt polis, per quos axis ipſe traducitur, eodem tempore peragunt giros admodum exiguos, qui quidem eo magis creſcunt, quo magis a polis receditur, ita ut omnium maximus iſ ſit, qui ab utroque polo æque diſtat, & in eo globi motu æquator appellatur. Hinc ibi vis centriſuga omnium maxima eſſe debet, atque eo gradatim decreſcit magis quo magis acceditur ad polos; quod quidem demonſtratum eſt ubi ſermonem habuimus de vi centriſuga. Rem igitur ad tellurem tranſtulerunt; poſito ejus diurno motu conſiderarunt vim centriſugam ſub æquatore maximam eſſe debere, prope polos minimam, in polis nullam. Illud præterea notarunt, vim centriſugam ſub æquatore dirigi ad partes centro telluris oppoſitas, quod ipſius æquatoris eſt centrum, in reliquis autem locis dirigi ad partes oppoſitas illi axis puncto, quod eſt

est circuli descripti centrum, quod quidem centrum eo remotius est a centro terræ, quo magis circulus ille ab æquatore recedit, ac proinde cum vis gravitatis ubique dirigatur versus terræ medium, observarunt ipsam vim centrifugam sub æquatore magis etiam directe gravitati opponi, quam versus polos. Ex dictis patet duplicem considerari posse gravitatem, unam scilicet quam *primitivam* vocant, nulla vi centrifuga turbatam, hæcque gravitas sub polis duntaxat habetur, altera autem est gravitas *variabilis*, vel *actualis* pro varia scilicet a polis distantia. Neque huic gravitatis variationi obstat, quod nullam in corporum pondere inæqualitatem deprehendere liceat; ejusdem corporis idem pondus tum hic Romæ, tum in America per balances experimur. Etenim pondus examinandum comparamus cum alio pondere, quod in Americam translatum æque mutatur, ita ut eadem maneat ponderum relatio, ac proinde corpus, quod hic inventum est libræ unius, debet & in America unius libræ pondus demonstrare. Re quidem vera si possemus perfecte nosse vim, quam nos hic in sustinendo pondere exercemus, & ejusdem vis meminisse, ubi pondus in remotam regionem transfertur, liceret ex ea vi æstimare auctam, vel imminutam gravitatis vim. At nostri conatus nobis omnino ignoti sunt, vix crassiorẽ quãdam comparationem sensationum ope instituimus, subtiliora discrimina nequaquam percipimus, atque etiam ipsæ vires nostræ mutantur in horas.

IV. Gravia esse corpora omnia jam apud cultiores Philosophos compertum est. Et quidem pondus demonstrant corpora omnia, in quibus experimenta sumere licet, ne his quidem demptis corporibus, quæ a vulgo imperito levissima creduntur. Ita sumus qui in aere sursum ascen-

ascendit factō vacuo Boyliano, deorsum relabitur proprio scilicet pondere. Quod ergo fumus per aerem sursum evehatur, id tribuendum est majori aeris gravitati, qua fit ut aer majori conatu tendat deorsum, ac proinde fumum propellat sursum. Itaque nulla est vera corporum levitas, sed *relativa* duntaxat & *apparens*. Quare distinguenda est gravitas in *absolutam* & *relativam*. Gravitas absoluta est tota vis illa, qua corpora tendunt deorsum. Gravitas autem specifica est ratio gravitatis absolutæ corporis unius ad gravitatem absolutam corporis alterius sub eodem volumine, sive quod idem est, gravitas specifica est ratio ponderis corporis unius ad pondus corporis alterius, eodem manente volumine. *Volumen* vel etiam *moles* dicitur totum spatium extrema corporis superficie comprehensum, sive includat spatiola vacua, sive heterogeneous etiam particulas. Ex idea massæ, & voluminis oritur idea *densitatis*. Densitas eo major dicitur, quo major est corporis massa, seu quantitas materiæ sub eodem volumine; si vero eadem maneat quantitas materiæ, mutetur autem volumen, quo minus est volumen, eo major dicitur densitas; ac proinde densitas est, ut massa directe & volumen inverse. Quare si massa dicatur M , volum-

men V , densitas D , erit $D = \frac{M}{V}$, ac proinde

etiam $M = DV$. Quia vero gravitas specifica est ratio quantitatis materiæ, seu ponderis ad volumen, eodem manente volumine, evidens est gravitates específicas esse ut densitates. Contraria ratione eo rarius dici solet corpus quo minorem sub eodem volumine continet materiæ quantitatem, ac proinde raritas est in ratione inversa densitatis. Igitur ad corporum
ra.

raritatem facile transferuntur præcedentes formulæ. Jam vero quamvis ob minorem specificam gravitatem nullum pondus aliquando ostendere videantur corpora, probe tamen meminisse oportet levitatem illam relativam esse dumtaxat; sed hæc omnia in meliori lumine collocabimus ubi fluidorum doctrinam expone-
mus. Cæterum quamvis dicamus corporum gravitatem experimentis compertam esse, id tamen dictum nolumus de subtilissimis quibusdam corporibus, igne, E. G. & flamma; horum enim corporum tantillum est pondus ut nulla experimentorum subtilitate innotescere potuerit; quidquid affirmant Philosophi quidam suis experimentis plus æque confisi. Sed totam rem deinde ad examen revocabimus ubi ignis proprietates considerabimus.

ARTICULUS II.

De causa gravitatis.

I. **M**irantur imperiti homines a Philosophis tanto studio quæsitum esse cur gravia descendant, hancque statim in promptu rationem adesse respondent quod nempe non sustineantur. Verum quod ita facile & obvium creditur, ut imperitorum hominum mos est, summos viros in varias traxit sententias & adhuc sub iudice lis est. De gravitatis causa quatuor circumferuntur Philosophorum opiniones. Peripatetici existimant gravitatem esse vim quamdam vel qualitatem realem corporibus omnibus intrinsicam a Deo ipsis impressam, ita ut quemadmodum corpora per extensionem locum occupant, per impenetrabilitatem sese mutuo ab eodem loco excludunt, sic quoque per gravitatem ad locum infimum sive telluris cen-
trum

frum ferantur. Nevvtoniani gravitatem omnibus omnino corporibus inditam ac impressam esse constituunt, ita ut non modo ignis & aer quos Peripatetici leves existimant, sed ipsa quoque tenuissima ætheris substantia quæ gravitatis expers a Carresianis effingitur, gravitatem aliquam habere debeat, ac nulla proinde levitas positiva in rerum natura reperiatur. Atque ista quidem evidenter adeo nitideque experimentis demonstrantur, ut dubitari non possit gravitatem hanc, vel, ut vocant Nevvtoniani, vim centripetam corporibus omnibus inesse. At unde nam centripeta vis illa singulis corporibus imprimatur, id nobis hæctenus, occultum atque inexploratum esse Nevvtonus ingenue fatetur, variasque causas enumerat ex quibus eadem vis centripeta velut origine pendere possit. At Nevvtonus non *physice* gravitatis originem scrutatur, sed *mathematice* tantum gravitatis effectus, leges atque phænomena exponere aggreditur. Itaque a definienda gravitatis origine prudenter abstinuit, & quamvis illam ab attractione oriri dixerit, in variis tamen locis profitetur, si physice res exploretur, ab impulsione originem habere posse. At eximiam sapientissimi viri modestiam haud semper emulati sunt qui Nevvtoni doctrinam exponunt; etenim attractionem ipsam velut physicam exploratamque gravitatis causam ita ingerunt ut eam in dubium vocari minime patiantur. Neque tamen putandum est Philosophos illos occultas Peripateticorum qualitates obtrudere voluisse. Peripatetici attractionem considerabant velut *entitatem* aut *qualitatem* certis quibusdam corporibus inhærentem, quas quidem qualitates ex specificis corporum formis oriri ajebant; formæ autem nomine in veteri Philosophia nihil obscurius esse potest. Porro

nūl-

nullam talem *entitatum* aut *qualitatem* fingunt recentiores Nevvtoniani, sed attractionem admittunt velut universalem naturæ legem a supremo rerum omnium auctore constitutam, vel etiam ut corporum omnium proprietatem habent; quæ quidem opinio a Scholasticorum qualitatibus longe differt. Gassendus existimat particulas, atomos, sive corpuscula plurima quaquaversum velut radios e terræ gremio diffundi, quæ corpuscula cum fere uncinata & hamata intelligi possint, ubi in corpus aliquod incurrunt, illi maxime *adhzrent*; hinc fit ut terrestres particule cum corporis ejusdem particulis arctissime devinciantur, illudque secum in terram abripiant eo prorsus modo quo tenuissimæ quædam particule ex magnetis substantia prodeuntes, ubi ad ferrum pervenerint illisque fuerint implicite, ferrum ipsum ad magnetem referunt; vix refelli merentur hac in re Peripateticorum & Gassendistarum figmenta. Quid sint qualitates occultæ neque explicant illarum defensores, neque ipsi videntur intelligere; recentioris philosophiæ lumine jam dissipatæ sunt illæ qualitarum occultarum tenebræ. Neque firmiori fundamento innituntur uncinata atque occulta Gassendistarum corpuscula; nihil enim admitti jubet cultior Physica nisi quod experimenta, atque observationes certo existere demonstrant. Deinde quam causam assignare poterunt Gassendistæ cur uncinata illa corpuscula e tellure exeant, ad diversas altitudines rapiantur, & tandem relabantur. Talia certe commenta difficultatem non explicant, imo non parum augent. Quid sentiendum sit de Nevvtonianorum sententia, ex hujus articuli progressu manifestum fiet.

Ultima tandem superest Cartesianorum hypothesis magno doctrinæ apparatu munita. Ma-

teriam quamdam subtilissimam comminiscuntur Cartesiani, hanc ponunt circa terram vorticis motu agitari ipsamque terram circa axem revolvi, quo fit ut eadem materia vim centrifugam acquirat, & corpora terrestria versus terram propellat, nempe secundum directionem vis centrifugæ directioni contrariam. Id autem illustrent exemplo fluidorum quæ corpora sibi demersa si minorem habeant gravitatem specificam, sursum evehunt; ita etiam vorticis materia, corpora quæ non tanta polent vi centrifuga, deorsum trudere debet. His explicatis fit

CONCLUSIO.

A VORTICE CARTESIANO REPETI NON POTEST GRAVITATIS CAUSA, NEQUE AB ULLO IMPELLENTE FLUIDO QUOD EASDEM CUM FLUIDIS COGNITIS PROPRIETATES HABEAT.

Probatur prima Pars. 1. Ex hac hypothese sequeretur vim centrifugam vorticis ipsa vi centrifuga corporis multo majorem esse, vel materiam subtilem ipso corpore esse multo densiorem. Etenim gravitas corporis fluido Cartesiano immergi æqualis foret virium centrifugarum, vorticis scilicet & corporis differentia per suas respective massas multiplicatæ; si nempe gravitas corporis immergi dicatur, G , vis centrifuga materiæ subtilis cujus locum occupat, dicatur V , massa M , vis centrifuga corporis, U , massa, m , erit $G = V \times M - U \times m$, evidens enim est virium illarum differentia corpus pellendum esse, ac proinde $V \times M$ major esse debet $U \times m$, ideoque vel V major est quam U , vel M major quam m ; sed utrumque repu-

pugnat. Primum quidem; etenim vis centrifuga corporis ex rotationis velocitate circa terram oritur, hæc autem velocitas telluris velocitati proxime æqualis est. Itaque in primo casu multo majorem fore oporteret vorticis velocitatem ipsa velocitate telluris; hinc secundum rotationis terrestris directionem ab occidente scilicet ad orientem perpetuus isque vehementissimus sentiretur ventus. Neque minus repugnat casus alter, majorem scilicet esse vorticis quam materiæ terrestris densitatem; hujus enim densissimæ materiæ resistantiam aliquam experiremur, tum sursum deorsum, tum deorsum sursum. At experimentis compertum est totam quam experimur resistantiam, aeri tribuendam esse, eamque nullam esse in vacuo boyliano in quo corpora omnia æquali velocitate descendunt. Absurdissimum ergo est fingere tantam in materia vorticis densitatem, quod quidem ultro largiuntur Cartesiani. Quare in primo casu paulo diutius immorabimur, variasque considerabimus velocitatis hypotheses.

Ponamus vorticis circumterrestris velocitatem eandem esse quam proxime cum velocitate telluris; jam ob datam diurnam telluris rotationem, 24. horarum spatio, dabitur quoque ipsa vorticis velocitas. Præterea ex observationibus geographicis nota est semidiameter terrestris, ac proinde & ipsa maximi terrestris Circuli peripheria, datur ergo vorticis circumferentia. His autem datis, meminisse oportet vim centrifugam corporis in circulo revolventis tempore minuti unius secundi esse ut quadratum arcus eodem tempore descripti per diametrum divisi. Ille autem arcus facile invenitur per notissimam regulam trium, si dicatur: tempus totum viginti quatuor horarum est ad integram vorticis sive maximi terrestris circuli circumferent-

rent-

rentiam, ut tempus minuti unius secundi ad arcum eodem tempore percursum; hujus arcus quadratum dividatur per vorticis sive telluris diametrum, habebitur vis centrifuga; illa scilicet lineola perpendicularis quæ continetur inter tangentem & arcum minuti unius secundi tempore descriptum; tali scilicet vi centrifuga corpus aliquod per lineolam prædictam minuti unius secundi tempore descenderet. Si ex his principiis calculus ineatur, invenietur spatium tempore minuti unius secundi a corpore vi centrifuga vorticis agitato percurrendum, non excedere pedem dimidium; igitur gravia vi centrifuga vorticis Cartesiani prope terram tempore minuti unius secundi non ultra dimidium pedem descenderent; at hoc ipso tempore pedes quindecim percurrunt, ut notum est experimentis. Ergo gravitatis phænomenis non satisfaceret Cartesiana hypothesis.

Ut hujus demonstrationis vim effugiant Cartesiani, fingunt vorticis celeritatem telluris vertigine esse multo majorem. Et requidem ipsa, velocitatis decies septies majoris hypothese facta, initoque ut jam exposuimus calculo, prodit lineola quæ vim centrifugam exhibet pedum quindecim, ut postulant gravitatis phænomena. Verum explicandis deinde motuum legibus repugnat hæc major velocitas; vortex enim velocior in ipsam terram transferret aliquam velocitatis suæ partem, donec tellus & vortex communi velocitate moverentur; hanc tamen concedamus hypothese & quid ex ea sequatur expendamus. Quicumque animo paululum attento rem perpenderit, facile assentietur effici non posse ut materia subtilis ipsaque tellus tanta ferantur velocitatum differentia, nisi prominentia quæque corpora in telluris superficie, veluti arbores, ades, turres abripiantur

tur atque subvertantur. Quis, quæso hominum erectus stare super terra vel ad punctum temporis posset? capite decies septies velocius pedibus versus orientalem plagam translato.

Præterea experientia quotidiana compertum est gravia in sublime jacta deorsum recta tendere, idemque soli terreni punctum cui ad perpendicularum projecta respondent, relapsa attingere; at in prædicta hypothese, longe aliter se haberent experimenta. Corpus omne quo altius in atmosphaera translatum foret, eo longius in ortum recideret & a perpendicularo longissime aberraret: At nulla in quolibet corporum terrestrium statu deprehenditur experimentorum differentia, omnia perinde se habent ac si terra quam inhabitamus, plane quiesceret. Nec aliquis dicat subtilissimum ætherem dum ab occasu in ortum girat, corporum crassiorum poros rotationi suæ obvios pervadere sicque perpendiculari eorum casui non obistere. Quonam enim modo corpora versus communis vorticis centrum materia illa depelleret? Cum eorundem gravium poros secundum vis centrifugæ directionem patefactos, nihil eidem materiæ intercludat. His demonstratis, jam concludere licet. Rejici omnino debet hypothesis illa quæ certissimis repugnat gravitatis phenomenis, atque &c. ergo.

II. In hypothese Cartesiana per circulos æquatori parallelos defertur vorticis materia, ac proinde vires centrifugas secundum lineas in horum circulorum planis semper jacentes agere oporteret; descenderent ergo corpora omnia in eorundem circulorum planis & perpendiculariter ad axem, non ad ipsam telluris superficiem tenderent; quod quidem falsum esse demonstrant experimenta; in circulis enim æquatori parallelis per lineas obliquas gravia descende-

Jacq. T. IV.

E

rent,

rent, quod est contra experientiam. Hanc demonstrationem experimento ita representare solent Physici. Sphæra vitrea aquam ex parte continet, aquæ innatant corpuscula plurima; machina hoc modo comparata circa axem velocissime convertitur; id vero observare licebit, corpuscula non centrum petere, sed disponi secundum axis longitudinem. Experimentum illud Cartesianam hypothese[m] satis apte representare videtur. Sphæra circumacta ipsam telluris vestiginem exhibet, corpuscula autem aquæ immersa vices gerunt corporum terrestrium quæ vorticis materiæ innatant in prædicta hypothesi; idem proinde facere deberent corpora terrestria quod in corpusculis illis observamus, nempe ad axem telluris tenderent. Itaque tum ratiocinatione tum experientia facile refellitur Cartesiana vorticum hypothesis.

Probatur secunda pars. Si gravia subtilis materiæ vi deorsum quovis modo pellantur, vis qua descendunt corpora, erit ut numerus particularum fluidarum quibus simul agentibus versus terram trudentur; Sed numerus particularum est ut corporis superficies, quod est evidens; quare vis qua corpus deorsum premitur, erit ut ejusdem superficies, non ut ipsa quantitas materiæ, quod quidem experientiæ repugnare jam antea demonstravimus. Et quidem in hac hypothesi corpora quælibet sub eodem volumine eandem haberent gravitatem specificam ob æqualem fluidi actionem; Ita æquale pondus haberent pes cubicus auri, & pes cubicus suberis. Præterea ob eandem rationem, seclusa aeris resistentia, descendentium corporum velocitas sub eodem volumine foret in ratione reciproca massarum; si enim eadem vis maneat, velocitates se habent in ratione inversa quantitatum materiæ, ut jam demonstratum est.

est. At Corpora omnia æquali velocitate in vacuo boyliano descendunt, ac proinde gravitas agit in ratione massæ, non autem voluminis. Hæc demonstratio quamlibet fluidi prementis hypothesim evertit, nisi reponant Cartesiani, quod quidem faciunt recentiores huius hypotheseos reformatores, fluidum illud quod gravitatis causa est, a nostris fluidis longe diversissimum esse, alias proprietates habere & secundum alias plane leges agere; Sed ita philosophari, nugari omnino est. Tali enim philosophandi modo jam ineptissima quæque hypotheseon commenta in Philosophiam invehere licet & de universa Physica actum est. In hac conclusione de gravitate terrestri duntaxat sermonem habemus; quæ enim ad gravitatem celestem pertinent, explicato sistemate planetario convenientius tractabuntur. Proprio etiam loco differemus de causa attractionis quæ inter minimas viget corporum particulas, ubi phenomena ad hanc aliam attractionis speciem referenda exponemus.

Objicies contra primam partem. Gravia ad telluris centrum non ad axem tendere ex Cartesianæ hypothesi intelligitur. Nec contrarium probat allata inter probationes demonstratio. Requidem vera si fingatur particula materiæ revolvens in circulo cujus radius GB, Fig. 7. huius materiæ vis centrifuga secundum radium GB, dirigitur; accurate quidem se habet demonstratio, si circulus solitarie spectatur. At si circulus ipsaque revolvens materia in vortice sphærico cujus partes sint considerentur, jam radius GB ideoque & vis centrifuga in puncto, B, oblique se habet respectu tangentis, BR; quare directio obliqua, BG, resolvi debet in BC, quæ transit per centrum & ad tangentem, RR, perpendicularis est. Hæc vis centri-

E 2

fugæ

fugæ resolutio patet ex demonstratis de virium compositione & resolutione. Igitur vi centrifuga vorticis non pellentur gravia versus G sed versus vorticis centrum C . His demonstratis sic argumentari licet. . . Gravissima omnium difficultas quæ obijci solet hæc est, quod nempe gravia ad centrum telluris non tenderent, atqui huic objectioni satisfactum est, ergo &c.

Resp. transeat major, nego min. Mirum sane est quod accuratissimæ demonstrationis vim tali responsione eludere tantaverint scriptores aliqui rerum physicarum non omnino imperiti. Et quidem si virium resolutionem instituere velimus, vis centrifuga, GB , non in solam vim per CB resolvitur, sed simul in vim tangentialem per BR . His autem duabus viribus junctis per BC , BR , corpus describet diagonalem BG . Propositam objectionem absurdam omnino esse experientia confirmat. Si enim vas MAD liquore plenum, corpus aliquod in B , minus grave specificè contineat, corpus illud verticaliter ascendet per BG , non autem per BC , quod tamen fieri oporteret si valeret obiectio.

Instabis. Fingi potest vortex duplici motu simul agitatus circa axes duos, quam quidem hypothese[m] factam legimus a Clarissimo Bulfingero in dissertatione de causa gravitatis quæ ab Academia regia Parisiensi anno 1728. præmio condecorata fuit. Hac posita vorticis duplici vertigine, jam fieri ait vir prælaudatus, ut fluidi particulæ circulos maximos singulæ describant; Itaque vis centrifugæ directio in quolibet puncto jacebit in circuli maximi plano, ac proinde vi centrifuga corpus pelletur ad commune circulorum maximorum centrum, hoc est, ad centrum vorticis.

Resp. Nego ant. Fictitia omnino est & male com-

compacta Bulfingeri hypothesis. Vix in prædictam dissertationem oculos conieceram, cum statim cognovi curvam hoc duplici motu describendam ad illud pertinere curvarum sublimiorum genus quas duplicis curvaturæ appellant Geometræ; idem problema litteris communicavi cum clarissimo viro Petro Martinio Neapoli Astronomiæ professore, nonnullaque ad hanc rem spectantia demonstravi; talem vero inveneram quæsitæ curvæ figuram ut numeri arithmetici 8 notam referat. Proposuerat Bulfingerus machinam quamdam cujus ope ad experientiam problema posset revocari, sed hanc nondum perfectam affirmat, cum tempus instaret transmittendæ Parisios dissertationis quam transmisit experimento nondum facto. Talis autem est machinæ structura; globus vitreus circa axem perpendicularem & simul circa axem horizontalem eodem tempore convertitur, qui quidem duplex motus facile obtineri potest. Globi superficies macula aliqua facile conspicua notatur, ejusdemque maculæ motus observatur. Curavi talem machinam executioni mandari, sæpiusque experimento instituto maculæ viam attentis oculis persecutus, eam curvam observavi quam Geometria mihi jam certo demonstraverat.

Objicies contra secundam partem. Extant Nevvtoni litteræ ad Boylium datæ in quibus ætheris cujusdam subtilissimi hypothesein hunc in modum constituit. Ponit Nevvtonus ætherem formari ex particulis per gradus indefinitos mole diversissimis, fingit deinde in corporum poris minus ætheris crassioris latere quam in spatiis liberis, ideoque in telluris globo multo minorem contineri ætheris crassioris quantitatem quam in aeris regione. Ponit deinde ætherem crassiorem in aere ad regionem tellu-

ris superiorem tendere, subtiliorem vero ætherem in terra tendere ad partes aeris inferiores, ita ut a parte superiori atmosphæræ usque ad telluris superficiem, & a telluris superficie usque ad centrum, æther per gradus perpetuo fiat subtilior. Fingamus jam corpus aliquod in aere suspensum aut in ipsa telluris superficie positum, ætheris particulæ in superioribus corporis partibus crassiores sunt particulis ætheris quæ in inferioribus corporis partibus continentur (ex hypothesi). Præterea æther crassior cum sit poris minus accommodatus quam æther inferior atque subtilior, descendere debet æther crassior & locum subtiliori ætheri inferiori cedere; id vero fieri non potest nisi corpus spatium ab æthere relictum occupet, ideoque corpus descendet. Hæc est hypothesis Nevvtoniana quam fere de verbo ad verbum ex prædicta epistola latine reddidimus; eandem hypothese plurimis aliis in locis indicavit Nevvtonus. Tandem aliæ fingi possent hypotheses. Quid enim vetat quominus aliud quoddam invehamus fluidum quod diversissimas a fluidis cognitis proprietates habeat, secundum alias omnino leges agat, quod nullam aut fere nullam resistantiam præbeat, quod vi inertię, vi gravitatis careat, sit tamen gravitatis causa. Unde sic concludendum: admitti possunt hypotheses philosophicæ quarum falsitas demonstrari non potest. Atqui &c. ergo.

Resp. Nego maj. Tanquam vanissimam repudiamus illam Philosophiam quæ meris innititur conjecturis, atque hypotheses communibus naturæ legibus contrarias longe rejicimus. In memoriam revocentur quæ de philosophandi regulis & hypotheseon usu præscripsimus. Descripta hypothesis non satis digna videtur celeberrimo auctore suo qui tantam in philo-
phan-

phando severitatem atque diligentiam adhibuit. Et certe nullam gravitatis rationem reddit hæc hypothesis, huic enim commentitio ætheri tribuit gravitatem cujus proinde alia superest afferenda causa. Igitur non sine fundamento credunt Nevvtoniani, magistrum suum in proponenda hac hypothesis usum fuisse quadam *philosophica* prudentia, & receptis vulgaribus Philosophorum opinionibus parcere voluisse. Tandem philosophicam Nevvtoni modestiam nos imitati nequaquam pronuntiamus nullam esse extrinsecam & ab aliquo fluido oriundam gravitatis causam, id unum affirmamus ex vorticibus cartesianis eam repetendam non esse, neque ex ullo fluido quod easdem cum fluidis cognitis proprietates habeat. Et quidem si fluidum illud grave sit, iterum de causa gravitatis redit quæstio. Si idem fluidum agat in corporum superficiem vel in interiores corporum particulas, secundum vulgares fluidorum leges corporibus imprimere non potest talem motus quantitatem quæ sit accurate ut quantitas materiæ. Tandem fluidum illud ita subtile foret ut corporum etiam durissimorum substantiam penetraret, neque corporum motibus resistentiam præberet, vi tamen maxima in se mutuo corpora impelleret. Hæ quidem proprietates communibus fluidorum proprietatibus omnino repugnant, easque nobis ignotas esse fatemur. Quæ cum ita sint, facile concedimus gravitatem esse *qualitatem occultam*, dummodo hoc nomine nihil aliud intelligatur nisi ignota effectus alicujus causa. Valde autem probabile est Aristotelem nullam aliam huic vocabulo tribuisse significationem, eamque ab illius sectatoribus fuisse corruptam & pro arbitrio varie explicatam vel potius obscuratam.

ARTICULUS III.

De centro gravitatis.

I. **C**UM ab ipsa gravitate ortum habuerint centri gravitatis doctrina & nomen, rerum ordo postulat ut argumentum illud, hic data occasione, pertractemus. *Centrum gravitatis* est punctum, ex quo corpus utcumque suspensum manet in æquilibrio; nulla parte præponderante. Quare si centri gravitatis motus omnis impediatur, immotas manere necessum est omnes corporis partes, ac proinde totum corporis pondus in ipso gravitatis centro collectum fingi potest, & loco ponderis ipsum gravitatis centrum substituere licet. Itaque patet centrum gravitatis hoc modo definitum idem esse cum *centro æquilibrii*: quare utrumque vocabulum indiscriminatim usurpabimus. Non solum in corpore unico, sed in quolibet corporum numero seu, ut vocant, systemate considerari potest centrum gravitatis. Si virgam rigidam, atque inflexibilem fingamus omni pondere & inertia destitutam, ipsaque suspendatur e puncto medio, & ad æquales hinc inde a medio suspensionis puncto distantias annectantur bini globi æqualis ponderis, ipsi in æquilibrio manent, & neuter alterum vincere potest; quod evidens est, cum omnia hinc & inde sint paria, nullaque proinde sit ratio, cur unum alteri prævaleat. Si ex altera parte addatur pondus quantumvis exiguum, tolletur æquilibrium, & pars illa descender, ascendente altera. Si distantia a puncto suspensionis non sit eadem, bina corpora æqualia non manent in æquilibrio; imo fieri poterit, ut id quod gravius est, sed puncto suspensionis propius cogatur ascen-

ascendere; atque hæc est regula generalis æquilibrîi; habetur nimirum æquilibrium, si distantia a puncto suspensionis sint ponderibus appensis reciproce proportionales, ita ut tanto minor sit distantia, quanto pondus majus est:

Hæc autem lex æquilibrîi facili ratiocinatione ita intelligi potest. Si quædam vis requiritur ad movendum corpus aliquod per datum spatium dato tempore, evidens est requiri vim duplam ad movendum idem corpus per spatium duplum eodem dato tempore; item requiritur vis tripla ad movendum corpus per spatium triplum, & ita deinceps. Quare & illud manifestum est: si nempe quædam vis potest vim aliam contra propriam illius directionem agere per datum aliquod spatium dato tempore, ad eandem vim ita agendam per duplum, triplum, dimidium spatium, requiritur vis dupla, tripla, dimidia. Jam vero in virga prædicta si ponendum sit ex parte alterutra pondus, quod pondus aliud ex parte altera constitutum in eadem distantia sublevare debeat, ipso nonnihil majus esse oportet, ut ostendimus. Si autem corpus attollendum sit in dupla, tripla, dimidia distantia, attollendum erit per duplum, triplum, dimidium circuli arcum; illa enim pondera circa punctum suspensionis, similes describunt circulorum arcus, qui proinde sunt ut radii, sive ut distantia a centro motus. Quare requiritur dupla, tripla, dimidia vis &c., ac proinde si pondus eo sit minus, quo distantia major est in eadem ratione, neutra pars vincere potest, sed pondera in æquilibrio manere necessum est. Hoc ergo est principium æquilibrîi: distantia scilicet a centro motus sunt in ratione reciproca ponderum sive massarum; sunt enim pondera massis proportionalia. Fin-

gi autem possent infinitæ gravitatis hypotheses in quibus pondera non forent massis proportionalia; tumque *centrum massæ* per quod nempe traducto utcumque plano corpus divideretur in massas æquales, idem non foret cum centro gravitatis. Verum tales hypotheses Geometris considerandas relinquimus; Physicis gravitatem constantem, qualem in machinarum viribus, aliisque experimentis sese manifestat, contemplari satis sit.

II. Præcedens doctrina ad machinarum quarumlibet vires æstimandas maxime valet. In quavis machina binæ utcumque vires inter se ponuntur connexæ, quarum quidem unam appellare solent *potentiam*, alteram vero *resistentiam*. Ubi autem vires quæcunque ad machinam transferuntur, non solum attendi debet ipsa potentia *absoluta* sine ullo scilicet machinæ adjumento, sed etiam velocitas qua moveri inciperent vires secundum propriam directionem si vincerent, vel contra directionem propriam, si vincerentur. Jam vero in casu æquilibrîi, vires sunt in ratione reciproca distantiarum a centro motus; vel quod idem est, reciproce ut spatia eodem minimo tempore percurrenda, aut etiam ut velocitates *initiales* reciproce. Quare si vires absolutæ oppositæ multiplicentur per suas a centro motus distantias, vel per spatia iisdem temporibus describenda, erunt producta illa hinc & inde æqualia, in casu æquilibrîi. Productum ex potentia in distantiam a centro motus vocatur *momentum potentie*, productum vero ex resistentia in suam a centro motus distantiam dicitur *momentum resistentie*. Hic vero recordari oportet sæpius inculcatam virium definitionem; nempe virium nomine nihil aliud intelligimus nisi motum quemdam dato tempore genitum, ac proinde

Inde æquilibrii nomine nihil aliud intelligi volumus, nisi motum æqualem eodem tempore in partes contrarias producendum; unde patet æquilibrii notionem, & demonstrationem nulli ambiguitati, aut exceptioni obnoxiam esse posse. Eamdem vero demonstrationem manere evidens est, si vires quolibet ad machinam adhibeantur; collectis nempe virium omnium momentis, si summa omnium, quæ machinam in unam partem nituntur convertere, inveniatur æqualis momentorum summa in partem oppositam, habebitur æquilibrium. Si autem altera summa sit major, hæc vincet, machinamque movebit. Sed hæc omnia simpliciorum machinarum exemplis illustrabimus.

In statera quæ *Romana* dicitur, pondus mobile excurrit per virgam ferream in partes æquales divisam, adscriptis numeris qui libras, librarumque partes designant. Quo magis pondus removeretur a puncto suspensionis, quod *hypomoclium* dicunt, eo majus pondus ex adversa parte in constanti quadam distantia suspensum requiritur ad servandum æquilibrium. In statera *vulgaris* æquales sunt a puncto suspensionis distantia. Evidens autem est utriusque stateræ ope æstimari posse corporum pondera. In *veste* generaliter, sive fulcrum immobile, cui vectis innititur, sit inter vim & resistentiam, quæ dirigantur ad partes oppositas, sive fulcrum jaceat ultra vim & resistentiam, quæ in eadem directione agant, quo remotior erit vis ab ipso fulcro, eo majus erit ejus momentum, ideoque quo magis removemus manum a fulcro, eo facilius pondus sublevamus. In *cuneis* augetur momentum, si longiores sint & tenuiores; nimirum si minor sit angulus, qui corpus frangendum, vel dividendum penetret.

Nam si minor est angulus, eo majus erit spatium, quo cuneus promovetur a vi ipsum impellente, & minus erit spatium, quo a se invicem discedunt partes *laterales*, quæ cunei progressum impedire nituntur. Quoniam autem angulus quem efficiunt binæ lineæ curvæ ubi se contingunt, est in immensum minor, quam angulus quem efficit recta cum alia recta, ut constat ex ipsis Geometriæ elementis, idcirco ungues & rostra incurvata, & multo magis novaculae utrinque introrsum excavatae, tam facile penetrant. In *Coclea* dum manus ingentem peragit girum, axis per unicam Spiram promovetur. Hinc momentum eo majus, quo Spira tenuior, & circulus, quem manus peragit eo amplior. In machina quam dicunt *axem in peritrochio*, vectibus oblongis horizontaliter infixis cylindrus convertitur, cui interea dum advolvitur funis ponderi trahendo, vel attollendo adnexus, pondus ipsum promovetur in singulis revolutionibus, quanta est cylindri circumferentia; vis autem vectibus illis applicata movetur per totam circuli circumferentiam, cujus radius est ipsa vectis longitudo. Alteram tandem subjungimus machinam, *trochleas* scilicet, quæ si fixæ fuerint vim non augent; at si ita fuerint conjunctæ, ut aliæ sint immobiles, mobiles aliæ, jam vis in immensum augeri potest. Dum enim manus removetur a proxima trochlea, tantum ipsa movetur quantum funis educitur, & tantumdem contrahitur summa funium omnium a trochlea ad trochleam aliam tendentium, ideoque singula funium intervalla, quæ tot sunt quot trochleæ, eo minus contrahuntur, quo major est trochlearum numerus, & eo minus trochleæ mobiles ad immotas accedunt, ideoque pondus eo minore spatio promovetur. Præcedentes machinas nulla

la subjecta figura explicavimus ; nemo enim est qui machinas illas oculis frequenter non usurpaverit , visu autem multo facilius , quam auditu percipiuntur .

Nunc vero breviter explicandum quid valeant machinæ , seu quanta utilitate adhiberi possint . Demonstratum est in casu æquilibrii esse $MV = mv$, ubi M, m , denotant pondera quælibet ; V, v , velocitates . Jam vero si spatia dicantur S, s , tempora T, τ , erit $V = \frac{S}{T}$, $v = \frac{s}{\tau}$, ideoque $\frac{MS}{T} = \frac{ms}{\tau}$, vel MS

$= ms$, cum in machinarum actione tempora sint æqualia . Eo itaque reducitur machinæ cujuslibet actio ut potentia m , quæ tempore unius horæ , E. G. describere potest spatium s , pondus , M , per spatium S , sublevare valeat . His positis , si m , exhibeat pondus exiguum , M vero massam valde magnam , evidens est producto , ms , repræsentari non posse momentum valde magnum , nisi spatium S , eo minus sit respectu , s , quo majus est pondus , M , respectu potentiæ m . Quare si , s , repræsentet spatium valde magnum , oportet ut tempus in eadem ratione majus sit ; cum necessario determinatum sit spatium dato aliquo tempore unius horæ percurrendum . Hinc ergo colligitur in machina qualibet etiam perfectissima compendium virium necessario conjunctum esse cum temporis , & spatii dispendio . Quare minime credendum est imperitis , ut non raro contingit , hominibus qui ingentia pondera brevissimo tempore ad magnam altitudinem attollere pollicentur .

III. In æstimandis viribus , ipsa virium directio considerari omnino debet . Sit , *Fig. 8.* C , in vecte , KL , centrum motus , sintque A, B , vires duæ quæ agent secundum directionem-

ctiones, KA, LB. Ex centro motus ducantur CM, CN, perpendiculares ad directiones virium in M, & N; ponatur CM minor quam CN, & ex centro C, intervallo CN describatur circulus NHD, rectæ KA occurrens in D. Vis absoluta A repræsentetur per DA; hæc resolvi debet in vim DG, secundum directionem CD, & in vim DF perpendicularem ad CD, completo scilicet parallelogrammo AFDG. Jam vis DG agens secundum directionem CD, a centro scilicet circuli, vel rotæ DHN versus circumferentiam, nihil valet ad convertendam rotam circa C; sola vis DF, quam *relativam* appellant, hunc effectum producere potest, ac proinde vis absoluta est ad vim relativam, ut DA ad DF. Præterea vis, B, tendens ad partem contrariam considerari potest applicata in N vel L; vis enim eadem manet in quocumque directionis suæ puncto constituitur; pondera enim eadem manent in variis a terra distantis, ac proinde & vires, quæ ponderibus æquivalent. Jam si vis, B, æqualis ponatur vi respectivæ DF, erunt conatus æquales & oppositi, ac proinde in æquilibrio ob distantias CD, CN æquales, erit ergo in casu æquilibrii vis relativa per DF ad vim absolutam per DA, ut DF ad DA, ut B ad A, atque ob triangula AFD, DMC, similia erit $B : A = DF : DA = CM : CD = CM : CN$. Hanc ergo generalem demonstravimus pro qualibet virium directione æquilibrii legem, nempe vires esse in ratione reciproca perpendicularium, quæ ex centro motus ad respectivas virium directiones ducuntur.

I V. Ad demonstrandam æquilibrii legem, virgam inflexibilem, gravitate & inertia carentem, qualis nulla existit in rerum natura,
fin.

fingunt Physici . Igitur in æstimandis ponderibus , gravitatis ratio habenda est . Id vero stateræ Romanæ exemplo declarare non abs re erit . In hac machina considerentur brachia duo inæqualia , quorum nota sint pondera , jam brachiorum pondera in suo gravitatis centro respectively collecta fingi possunt , ac proinde momentum brachii utriusque erit , ut productum ex pondere in distantiam centri gravitatis a puncto suspensionis respectively , eritque momentorum differentia excessus ponderis , qui proinde auferri debet , ut justum pondus habeatur . Quia vero brachia sunt homogenea , centrum gravitatis in brachiorum medio constitutum est ; sunt autem tota inter se ut medietates ; quare pondus uniuscujusque brachii ducatur in suam a centro suspensionis distantiam , momentorum differentia erit ipsum pondus subtrahendum . Ex his patet stateram Romanam ob brachiorum inæqualitatem minus accuratam exhibere ponderis mensuram ; fraus autem maxime crescere potest si brachia non fuerint homogenea . Hinc stateram vulgarem ob brachia æqualia in commercii usu adhibere præstat ; si autem statera illa fraude aliqua peccaverit , facile detegitur dolus , permutatis ponderibus ; ex demonstratis enim facile intelligitur nullum in statera dolum latere , si in utroque casu maneat ponderum æqualitas . At statera Romana ad examen revocari non potest , quod quidem machinæ hujus vitium est maximum .

V. In omnibus machinis aliud est incommodum omnino inevitabile , mutuus nempe partium attritus . Nulla enim machina moveri potest , nisi partes aliæ super alias incedant atque labantur . Nulla autem est superficies
etiam

etiam eximie levigata, quæ plurimis non emineat asperitatibus; & ut ita dicam, monticulis, quod quidem demonstrant observationes microscopicæ. Illæ vero asperitates sine resistantia, sine difficultate aliqua superari non possunt. Igitur quæ hactenus demonstravimus de machinarum viribus, dicta volumus dumtaxat in hypothesi, quod omnia abessent impedimenta: quæ profecto efficiunt ut ad movendum pondus major potentia requiratur, quam quæ ex præcedenti doctrina definitur. At quo magis impedimenta de medio tolles, eo propius experimenta ad demonstrationes physicas accedent.

Resistentiam ex mutuo partium attritu oriundam variis experimentis æstimare tentarunt diligentissimi Physici, sed irritò, ut nobis videtur, conatu. Alii resistantiam illam ex ipsa superficierum magnitudine computandam esse existimarunt, alii ex corporum pondere; alii tandem ex ipsa velocitate; at mihi facile persuadeo ex his tribus conditionibus pendere mutuum partium attritum. Et quidem quo major est superficies, eo plures occurrunt superandæ asperitates. Præterea quo majus est corporis pondus, eo altius corporis unius asperitates alterius corporis cavitatibus inferuntur. Tandem quo major est velocitas, eo plura dato aliquo tempore superanda occurrunt impedimenta. At præter condiciones illas maxime etiam considerari debet ipsa superficierum natura, prominentium scilicet partium asperitas, numerus, textura, durities, alizque plurimæ qualitates nullo experimento satis accurate definiendæ, atque hinc fit ut varia experimenta varias præbeant resistantiarum mensuras. Tandem in æsti-

man.

manda resistentia considerari etiam debet vectis longitudo quam tamen prætermittere solent plerique Physici, perperam quidem. Etenim mutus partium attritus corporis motum destruit ac retardat, non secus ac faceret potentia quæ ad partes directioni motus contrarias ageret, ac proinde ad æstimandam resistentiam satis non est resistentiæ absolutæ rationem habere, sed vectis longitudo attendi etiam debet. Exemplo sit trochlea circa axem mobilis, cujus ope pondera attolli solent; resistentia ex mutuo partium attritu oriunda est mutui axis trochleæ & cavitatum quas ingreditur, attritus; quare resistentia illa eo breviori vectis brachio applicatur respectu potentiæ trochleam moventis, quo minor est axis diameter respectu diametri trochleæ, atque hinc fit ut multo minor sit trochleæ circa axem mobilis resistentia. Inde etiam intelligitur trochlearum rotarumque majorum commoditas, & ex iisdem principiis pendet vulgaris usus quo nempe ad retardandum rapidiorem currus descensum sufflaminari solent rotæ. Etenim resistentia ex partium attritu oriunda rotæ circumferentiæ in hoc casu applicatur, secus autem ipsius axis peripheriæ. Ex hæcenus explicatis derivari possunt in datis casibus utilissima sane artificia ad minuendam mutui attritus resistentiam; sed rem fusius persequi non est hujus loci.

VI. Ex centri gravitatis doctrina non solum pendent machinarum vires, sed alia quoque phenomena plurima quorum pauca proponere satis erit. Si ex centro gravitatis corporis aliqujus ducta intelligatur recta ad horizontem perpendicularis, hæc vocatur *linea directionis*. Porro linea illa vel cadit intra basim, vel extra ipsam excurrit; quare cum in ipso gravitatis centro totum corporis pondus locatum fingi possit,

possit, patet in primo casu nullum esse ruinæ periculum, si nempe linea directionis intra basim cadat; sustinetur enim corpus; contra autem linea directionis extra basim excurrente corpus labi & præceps ruere necessum est, nisi ipsa obstarer partium tenacitas. Mirum ergo non est quod turres Pisana & Bononiensis licet maxime inclinatæ, firmæ tamen & stabiles consistent. Hinc naturali quadam mechanica corpus retrorsum inflectunt imperiti quoque homines, si per locum declivem descendant; contra autem si ascendant corpus antrorsum incurvant, ut nempe linea directionis in basim retrahatur. Hinc homines ambulantes singulo passu a dextra ad sinistram & vice versa, corpus convertunt. Hinc homines pingues & obesi situm rectum affectare solent. Eadem de causa bajuli qui pondus alterutra manu gestant, manum alteram in partem oppositam extendunt. Tandem eodem artificio funambuli sese in omnes partes pro necessitate contorquent, & longiori pertica utuntur quam hinc & inde versant maxima industria, ut linea directionis extra angustissimam funem non excurrat.

VII. Centri gravitatis inveniendi rationem formula algebraica exhibere solent Geometræ, nobis vero qui rerum facilitati maxime studeamus, centrum gravitatis in corpore quocumque mechanice invenire satis erit. Corpus aliquod filo suspendatur, volvetur converteturque corpus illud, donec filum ad terræ superficiem perpendiculariter dirigatur, centrum gravitatis erit in hac perpendiculari, nempe in linea directionis, quod quidem evidens est ex gravitatis directione & ex ipsa centri gravitatis natura. Jam attramento vel colore aliquo facile conspicuo in ipsa corporis superficie notetur linea quam perpendiculi filum fecerit: rursus ex
alio

alio puncto suspendatur corpus invertaturque corporis situs, & pari modo linea perpendiculi signetur, communi duarum linearum intersectioni imminet centrum gravitatis; & re ipsa si corpus ex hoc puncto suspendatur, immotum manebit. Res eadem facilius præstari potest adhibita tabula horizontali probe lævigata; promoveatur nempe corpus quantum fieri potest versus marginem tabulæ, ita ut tamen non cadat; notetur in ipsa corporis superficie linea quæ est communis intersectio superficiæ & tabulæ. Deinde iterum invertatur corporis situs promoveaturque ut ante, habebuntur communes intersectiones duæ, nempe secundum longitudinem & latitudinem quarum communi intersectioni intra ipsum corpus subiacebit centrum gravitatis. Cæterum evidens est in corporibus homogeneis quæ nempe in partes æquales & similes dividi possunt, centrum gravitatis idem esse cum puncto corporis medio, quod *centrum figuræ* vel *magnitudinis* solet appellari.

Dato gravitatis centro in quolibet corporum numero, commune gravitatis centrum omnium ex antea demonstratis facile invenitur. Si bina fuerint corpora quæcumque, centrum commune gravitatis erit in recta jungente utrumque gravitatis centrum; in medio si fuerint æqualia; si vero inæqualia, ita propius erit centrum commune gravitatis massæ majoris centro ut distantia sint ipsis massis reciproce proportionales, ex demonstratis. Si corpora sint tria, conjuncto gravitatis centro communi binorum corporum cum centro tertii, divisaque recta jungente in ratione reciproca massæ minoris ad summam massarum, punctum hoc modo inventum erit centrum commune quæsitum. Eadem ratione progredi licet ad massas quascumque:

Hæc

Hæc autem omnia facile deducuntur ex demonstrato æquilibrii principio, si nempe consideretur corporis pondus tamquam coactum in centro gravitatis, atque eadem ratione evidens est centrum gravitatis esse unicum; fingamus enim aliud esse punctum; jam quia totum corporis pondus in centro gravitatis adunatum fingi potest, corpus suspensum extra gravitatis centrum, quantum fieri potest descendere debet, nec potest quiescere donec ad punctum infimum pervenerit. At proprietatem illam punctis duobus convenire repugnat. Itaque si corpora quotlibet inter se quomodocumque connexa e centro gravitatis communi suspendantur, totum corporum sistema in æquilibrio manere necessum est. Hæc pauca dicta sint de centro gravitatis, non quidem pro rei dignitate, sed quantum posulare videtur harumce institutionum ratio.

A P P E N D I X

De quibusdam Capitis præcedentis utilitatibus.

I. **Q**UOD gravitatis doctrinam spectat, illius utilitas satis manifesta fiet ex dicendis deinde, ubi scilicet motus ex gravitate oriundos explicabimus. Interim vero observare satis sit, ex variis Philosophorum hypothefibus de causa gravitatis & ex ipsius rei difficultate omnino evinci, in Physica sua esse & quidem abditissima arcana quæ nulla humani ingenii vis referare potest. Si autem in rebus limitatis a Deo creatis insuperabiles per sepe occurrant difficultates, quod quidem a nemine suæ tenuitatis & ignorantie conscio negari potest, qua fronte creatorem infinitum & sanctissima religionis misteria curiosius scrutari atque penetrare tentant superba impissimorum hominum in-

ge-

genia, qui id omne respuunt & velut a ratione alienum fastidiose traducunt, quod suo imbecilli quidem ingenio non possunt comprehendere? itaque apud religiosos probosque Philosophos ea semper obtinere debet præstantissima & unica philosophandi ratio quæ fundatur in experimentis & observationibus; hæc vero si ad physicam mechanicamque causam non semper nos deducat, ad causam infinitam, Deum conditorem & Dominum nos certissime perducit. Hic est fructus Philosophiæ uberrimus, naturæ majestatem propius intueri, naturæ authorem impensius colere & venerari, illique soli servire. His autem pietatis & religionis ergo præmissis, jam inter innumeras capitis præcedentis utilitates, paucas seligamus.

Ad explicandos animalium motus maxime valet præcedentis capitis doctrina, quam quidem utilitatem satis demonstravit *Joannes Alfonso Borellus* in eximio opere cui titulus est: de motibus animalium. Paucis exemplis rem declarare satis erit. Fingatur brachium horizontaliter extensum extremisque digitis alligatum; intelligatur pondus viginti octo librarum, quod quidem onus ab homine satis robusto in hoc situ sustineri posse experientia compertum est. Tale pondus sustinetur vi musculi cujus extremitas superior annexa est capiti rotundo ossis humeri, altera autem extremitas capiti rotundo ossis cubiti alligatur. Jam cubitus cum manu extensa circa centrum articulationis in osse cubiti revolvi potest; notum præterea est ex diligentiori Anatome distantiam musculi a centro articulationis esse ad ponderis ab eodem centro distantiam ut 1 ad 20. Quare ut habeatur momentum musculi, multiplicari debet pondus absolutum nempe 28 librarum per 20, distantiam scilicet a centro

mq-

motus, efficiturque productum 560 librarum, tanta nempe est vis musculi ut libris 560 æquivalet, ob superandam vectis longitudinem; id vero ex demonstratis facile intelligitur. Simili ratione ad calculum revocari possunt in alio quolibet casu musculorum vires, dummodo per Anatonien data sit distantia a centro motus, & per experientiam superata resistentia innotescat. Porro hic obiter observanda est admirabilis plane musculorum dispositio; musculi scilicet ossibus alligantur in minori a centro motus distantia, ita ut potentiam musculi multo majorem esse oporteat. Quamvis autem animalibus orta inde videri possit aliqua virium jactura, in hac tamen structura omnipotentem Creatoris manum plane mirari debemus; Si enim potentia longius distaret a centro motus, jam ob majorem articulationis distantiam non solum deformis atque molesta foret musculorum animaliumque figura, sed etiam ad motum minus idonea, suaeque mole ac crassitie animalia laborarent.

II. Ad firmitatem ædificiorum æstimandam eadem principia transferri possunt. Fingantur trabes duæ similes cylindricæ vel prismaticæ ABDE, FGHK *Fig. 9.* muro immobili IL infixæ, divisæ intelligantur AB, FG æqualiter in C, M. Jam illarum pondera fingi poterunt collecta in punctis, C, M, centro gravitatis directe oppositis. Facilitatis ergo ponatur $AB = 2FG$, erit pondus trabis ABDE octuplo majus pondere trabis FGHK; sunt enim trabes illæ utpote similes in ratione triplicata laterum homologorum, ex elementis Geometriæ. Quare cum pondus trabis ABDE, locatum fingatur in C, sitque AC duplo major distantia FM, erit momentum totum ad rumpendam trabem in puncto A, deciessexies majus momento

mento trabis alterius . Jam conferantur vires
 quæ trabes illas integras muroque infixas ser-
 vare conantur . Sit ARE , trabis majoris se-
 ctio , & FSK minoris . Dividantur AE , FK ,
 æqualiter in P , Q ; erit in qualibet sectione
 fibrarum *longitudinalium* numerus , ut sunt se-
 ctiones ipsæ , ac proinde ut quadratum rectæ ,
 AE , ad quadratum rectæ FK , (ex elementis
 Geometriæ) , nempe ut 4 ad 1 , ideoque etiam
 cohæsiō quæ est ut fibrarum numerus , erit in ea-
 dem ratione ; sed cohæsiō illa considerari pot-
 est ut vis resistens , cuius proinde resistentiæ ut
 habeatur momentum , hæc collecta poni debet
 in centro gravitatis PQ ; ideoque cum sit AP
 $= 2FQ$, erit in prima trabe momentum resi-
 stentiæ octuplo majus . At momentum vis quæ
 trabem majorem in puncto A rumpere & a mu-
 ro avellere conatur , est decies sexies majus . Un-
 de evidens est vires quæ ad trabes rumpendas
 tendunt , crescere in ratione quadruplicata lon-
 gitudinum ; vires autem oppositas , adhæsiōnis
 nempe , crescere tantum in ratione triplicata .
 Hinc trabes majores , servata licet partium pro-
 portione , rumpuntur facilius ; imo tanta esse
 posset illarum longitudo ut proprio pondere fra-
 ctæ necessario ruerent . Merito igitur concludit
 Galilæus ædificium aliquod firmum stare posse ,
 quod procul dubio rueret in formam justo am-
 pliorem redactum , manente licet partium pro-
 portione ; quod quidem in arte architectonica
 utilitate non vacat .

Ex eodem principio infert celeberrimus Au-
 thor suos esse in operibus naturæ & artis limi-
 tes quos ultra consistere eadem opera minime
 valerent . Ita si arbores nimio donarentur vo-
 lumine , gravitate sua oppressi rami facile rum-
 perentur . Simili ratione crassiora animalia vim
 non habent quæ illorum magnitudini respon-
 deat ;

deat; atque hinc si aliqua forent terrestria animalia multo majora iis quæ novimus, vix organicos motus exequi possent, suæque mole fatiscerent perpetuisque obnoxia essent periculis. Ex hac doctrina concludere audent intemperantiores quidam critici, nullos unquam existisse homines qui iustam vulgaremque hominum magnitudinem multum excederent. Nec Scriptores illos hac in re valde moratur S. Scripturæ auctoritas; ajunt enim nominibus Hæbreis *Nephilim* & *Gibborim*, quæ in primigenio textu leguntur & in *vulgata* nostra gigantum nomine redduntur, significari etiam posse scelestos homines suisque flagitiis non minus quam staturæ magnitudine famosos. Quod autem refertur Deuter. 3. de lecto Og *qui novem cubitos habebat longitudinis & quatuor latitudinis*, de sola lecti magnitudine iidem auctores intelligunt, eamque ferunt apud orientales populos consuetudinem ut amplissimos lectos ad pompam ornarent & in tali ornamento factum collocarent. Verum quidquid sit de hebraicorum nominum ambiguitate, eam omnino dirimit *vulgatæ* versionis & 70. Interpretum auctoritas, nullumque dubitandi locum relinquit gigantis Goliath altitudo quæ lib. 1. Reg. describitur: *Sex cubitorum & palmi*. Itaque ex dictis hoc unum colligere licet, præter consuetas naturæ leges conformatos fuisse enormes gigantes & singulari virium proportionem donatos, quod quidem exemplo suo confirmant aliqui inusitatæ staturæ homines qui his nostris temporibus per urbes vagantur suæque magnitudinis beneficio victum quæritant. Tales autem homines, si cum antiquis gigantibus conferantur, velut nani & pumilioes haberi debent, sua tamen magnitudine quasi opprimi & laborare observantur. Necessaria ergo fuit antiquis gigantibus insolita &

præ-

SECTIO I. PARS I. CAP. III. 121

præter naturæ humanæ ordinem virium proportio ; præsertim si verum sit quod de gigantibus illis legitur , aliquos scilicet longe ultra vulgarem hominum ætatem & per multa sæcula vixisse . Idem dicendum de gigantibus quos etiamnum hodie magno numero extare narrant viatores nonnulli , quibus tamen facilius & nisi dicto fides constiterit , credendum non est .

Fornicum stabilitas ex centri gravitatis doctrina omnino pendet . Rem leviter attingam . Intelligatur fornicis arcus ex diversis constans lapidum segmentis , cuneorum instar dispositis & ad arcus centrum tendentibus . Lapis arcus superior qui fornicis *conclusura* seu *clavis* appellari solet , perpendicularis est ad horizontem , atque hinc & inde contiguis lapidibus sustinetur . Ductæ concipiuntur verticales per singula gravitatis centra in singulis lapidum segmentis . Hæc lapis superior lapidibus contiguis veluti planis inclinatis incumbit , ac proinde tota vi gravitatis non tendit ad descensum , sed aliquantum gravitatis parte quæ eo major est quominus inclinata sunt contigua lapidum plana . Quare si planorum inclinatio fingatur infinite parva , hoc est , si lapidum segmenta forent ad horizontem perpendicularia non secus ac fornicis clavis , jam clavis tota vi gravitatis ad descensum tenderet , & se ipsa descenderet nisi arenato & valce retineretur ; atque hinc minus tuti sunt & facile ruinosi fornices plani ; sed accuratos fornices consideremus . Clavis intra contiguos lapides constricta per lineam verticalem ad descensum tendit ; hanc vero conatum exercere non potest , nisi hinc & inde premat contigua lapidum segmenta eaque conetur repellere . Hæc autem clavis a quo in lapidem contiguum exhibetur per rectam ex centro gravitatis clavis perpendiculari-

ter ductam ad lapidis contigui superficiem. Patet autem ex virium compositione & resolutione, hanc lineam esse diagonalem parallelogrammi, cujus latera duo sunt vis perpendicularis qua clavis tendit ad descensum, & vis horizontalis qua clavis tendit ad removendum lapidem contiguum. Secundum illud lapidis segmentum vi clavis per diagonalem prædictam impulsam, urgetur quoque vi gravitatis ad horizontem perpendiculari, atque hinc resultat vis alia composita qua urgetur lapis alius contiguus, atque ita deinceps ad ultimum usque lapidem fornicis fulcro insistentem. Jam vero ea esse debet singularum fornicis partium structura atque sectio, ut lapides singuli a fornicis clavi ad fulcrum vim compositam exerçant, ad horizontem per gradus minus ac minus inclinam, atque ita vis tota in ipsum fulcrum fere perpendiculariter dirigatur. Superest jam ut vim horizontalem ipsiusque fulcri resistantiam consideremus. Totum dimidii fornicis pondus collectum fingatur in centro gravitatis ex quo ad superiorem lapidis ultimi superficiem ducta intelligatur perpendicularis, secundum hanc directionem dumtaxat dimidius fornix in ultimum fornicis segmentum agere potest. Hæc autem vis ad fulcrum debet referri & in duas vires dividi, verticalem unam, horizontalem alteram. Vis ad fulcrum perpendicularis fulcrum ipsum magis ac magis premit atque confirmat; vis autem horizontalis ad fulcrum evertendum tendit. At fulcrum totam gravitatem huic conatui opponit; hæc autem gravitas agit per lineam verticalem e centro gravitatis ductam ad basim ipsius fulcri. Itaque in æstimandis fornicum viribus duæ considerandæ sunt actiones contrariæ, prima horizontalis qua fornix ad fulcrum subvertendum tendit; perpendicularis altera, nempe fulcri resi-

resistentia . Tandem duæ illæ actiones ad centrum motus in ipsa basi referendæ sunt , atque eo majus est virium illarum momentum quo major est a centro motus distantia ; tota ergo huc reducitur fornicis stabilitas , ut nempe dimidii fornicis actio horizontalis fulcri resistentia major non sit . Hæc sunt utilissimæ doctrinæ elementa quæ ad calculum facile revocabunt Geometræ , nobis autem satis sit rem generatim indicasse .

III. Ad principia in præcedenti capite explicata pertinet horologiorum rotis instructorum motus , sed utilitas melius intelligetur deinceps , demonstrata scilicet pendulorum doctrina , unicum aliud utilitatis exemplum afferemus . Nemo non vidit in *portatilibus* horologiis *machinulam conicam* quam catenula amplectitur . Hujus figuræ ratio ut intelligatur , observandum est desinente horologii motu , catenulam cylindrico horologii timpano totam circumplicari ; Si autem horologio motus restituatur , catenula e timpano ad conicam machinulam transire debet . Id vero fieri non potest , nisi timpanum convertatur totque revolutiones perficiat quot gyris catenula ipsa timpano convolvitur . Præterea talis est in timpano partium structura ut , eo per vices revoluto , magis ac magis tendatur lamella elastica in timpano conclusa . His præmissis evidens est majorem tunc haberi lamellæ elasticæ tensionem , ac proinde & majorem vim , dum catenula tota conicæ machinulæ circumponitur ; hæc autem tensio per gradus decrescit , dum machinula revolvitur , ac tandem vis fit omnium minima dum gyros fere omnes catenula absolvit & puncto ultimo proxima est . Itaque patet ex illa vis motricis inæqualitate futurum esse , ut perpetuæ variationi obnoxius sit rotarum motus , nisi figura

conica paratum fuisset huic incommodo remedium. Igitur ad corrigendam motus inæqualitatem, efficiendum erat ut majore existente vi motrice minor foret distantia a centro motus, ideoque & minor machinulæ diameter, & contra; oportet nempe ut in machinulæ puncto quolibet productum ex vi tensionis in distantiam a centro motus sit constans semper & æquale; hoc enim artificio fit ut vis motrix eadem perpetuo maneat atque uniformiter fere moveantur rotæ, non secus ac facerent appenso aliquo constanti pondere. Cum ergo demonstrata principia accuratam nobis suppeditent temporis mensuram, hanc quoque utilitatem inter innumeras alias commendare voluimus. Problema est apud Geometras notissimum: invenire curvam cujus revolutione genitum solidum, quæsitam præberet in horologiis motus æqualitatem: ex qua proinde curva formari deberet prædicta machinula; verum res est sublimioris indaginis, atque motus uniformitatem convenientemque figuram repetitis experimentis accuratissime inveniunt peritiores horologiorum artifices; talis figuræ rationem exposuisse satis fit.

SECTIONO SECUNDA.

De reliquis universalibus corporum proprietatibus ex virium notione derivandis.

CAPUT I.

De motu in genere, variisque illius speciebus.

EX ipsa virium notione derivari *mobilitatem* & *quiescibilitatem* evidens est; motus enim est virium effectus, & seclusa vi qualibet impressa corpus semel quiescens perpetuo quiesceret.

sceret. Amplissimum quidem patet hujus capituli argumentum, sed præcipuas dumtaxat motuum species expendemus. Et 1. quidem de motu generatim paucis præmissis, ad motum rectilineum & deinde ad curvilineum progrediemur; illas autem dumtaxat motuum leges explicabimus quæ in rerum natura maxime obtinent, prætermisiss variis motuum variabilium pro arbitrio confectis hypotheseibus. Tandem corporis solitarii motu considerato, diversos corporum motus inter se comparabimus & conflictuum regulas demonstrabimus.

ARTICULUS I.

De motu generatim considerato.

I. **M**OTUM jam antea definivimus *continuum loci mutationem*; unde intelligitur quietem esse *perseverantiam* in eodem loco. Quare cum *mobile* non consideremus nisi quatenus locum mutat, & a magnitudine aliisque affectionibus quibuscumque abstrahamus, mobile instar puncti consideratur quamdiu solius mutationis loci ratio habetur, atque ideo durante motu lineam describere ponitur; continuo enim motu puncti linea describi concipitur. Locus a quo mobile recedit vel recedere conatur, dici solet in scholis: *terminus a quo*; locus vero ad quem mobile accedere conatur: *terminus ad quem* appellatur. Locus duplex distinguitur, *absolutus*, & *relativus*. Locus absolutus dicitur pars spatii immobilis & immensi quam res occupat. Locus autem relativus est spatii alicujus dati pars illa quæ tamquam immota spectatur & in qua res locatur. Hinc patet fieri posse ut mutetur locus absolutus, non mutato loco relativo, & viceversa; nam si nauta

in navi quæ plenis velis fertur, dormiat, locum suum absolutum mutat cum navi ipsa, servat vero eundem locum relativum respectu partium navis; at si nauta pari velocitate qua fertur navis ipsa, progredieretur contra navis directionem, mutaret locum relativum, manens in eodem loco absoluto. Itaque pro varia loci mutatione, motus vel est absolutus, si mutetur locus absolutus; vel relativus, si mutetur locus relativus. Idem dicendum est de quiete quæ est perseverantia in loco vel absoluto, vel relativo. Fieri igitur potest ut ea quæ absolute quiescunt, nobis videantur moveri, dum nempe locum suum mutant relative ad alia objecta quæ tamquam immota consideramus, vel quorum motum non percipimus. Nam cum omne corpus nobis conspicuum suam imaginem ope radiorum ab eodem objecto prodeuntium, in oculi fundo, seu in retina depingat, ea objecta moveri videntur quorum imagines in retina moventur seu diversas retinæ partes continuo ac successive occupant, dum quis oculum suum velut immotum fingit. Contra autem velut quiescentia cernimus objecta illa quorum imagines eandem semper occupant retinæ partem; cum scilicet imaginum motus in fundo oculi non sentitur; atque hinc est quod homines in navi sedentes ipsum navis motum non percipiant; omnes quippe navis partes inter se relative quiescentes, eandem quoad oculum positionem & distantiam servant, imaginesque suas in iisdem retinæ partibus delineant; at cum oculos ad littora convertit spectator, necesse est ut objecta in littore posita situm suum respectu oculi continuo mutant, ac proinde imagines suas in aliis aliisque retinæ partibus successive pingant; qua ratione fit ut littora urbesque moveri videantur.

II. Omisſis quaſtionibus plurimiſ & omnino ſuperfluiſ de natura motuſ, conſiderare ſatiſ erit motum velut certiffimum atque indubitatum naturæ effectum, a nemine niſi ſceptico negandum. Et quidem experientia quotidiana conſtat plura corpora inter ſe relative moveri cum infinita propemodum varietate; ſed corpus unum non poteſt moveri relative ad alterum, niſi alterutrum ſaltem moveatur absolute. Etenim ſi corpora duo absolute quieſcunt, poſitionem ſuam inter ſe non mutant; ac proinde ſi unum ſpectetur ut immotum, alterum etiam immotum apparebit, nullaue erit locorum mutatio relativa; ergo ex motu relativo evidenter demonſtratur motuſ abſolutuſ. Serio reſelli non merentur ineptiffimæ veterum ſcepticorum argutiae quibuſ impoſſibilitatem motuſ adſtruere ſtultiſſime laborabant. Tales cavillationeſ riſu excipi debent, quemadmodum ab Herophilo medico factum fuiſſe narrat Sextuſ Empiricuſ. Hoc argumentum propoſuerat Diodoruſ Chronuſ Sophiſta: Si corpus moveretur, vel moveretur in loco in quo eſt, vel in loco in quo non eſt; atqui nec moveri poteſt in loco in quo eſt; ut enim moveatur, debet mutare locum. Nec moveri poteſt in loco in quo non eſt; ſiquidem nec agere nec pati poteſt, ubi non eſt: ergo corpus nullo modo moveri poteſt. Hoc ſophiſma lepide ſolviſſe fertur Herophiluſ; Cum enim a Diodoro ut luxatum ipſiuſ humerum inſtitueret, vocatuſ eſſet, ſubridens dixit eum forte alio morbo laborare, humerum e ſuo loco excidere non potuiſſe, cum nequeat moveri; etenim, inquit Herophiluſ, ſi motuſ eſſet, vel motuſ eſt in loco in quo erat, vel in quo erat, ſed neutrum fieri poteſt, ergo humeruſ luxatuſ non eſt. Sophiſta cui non placebat argumen-

I

100000000 & sic in infinitum, est series quantitatum in progressionē geometrica decrescentium, ideoque illius summa cum sit æqualis quantitati finitæ, a mobili tempore finito percurri potest. Ponamus achillem spatio unius horæ milliari peragrasse, ergo & partem milliaris centesimam in parte horæ centesima conficiet, & partem milliaris decem millesimam in horæ parte decem millesima percurreret, & ita in infinitum. Si hujus serici in infinitum continuatæ summa infinito temporis spatio responderet, jam achilles testudinem nunquam assequeretur tempore finito. Verum; ut di-

ctum est, horæ pars $\frac{1}{100} + \frac{1}{10000} + \frac{1}{1000000}$ &c. quantitati finitæ æqualis est uni scilicet parti nonagesimæ nonæ unius horæ, ut facile demonstratur in Arithmetica. Igitur achilles testudinem assequetur post elapsam horam unam & partem horæ nonagesimam nonam. Itaque evanescit argumentum cujus vim insuperabilem toties jactaverunt illius patroni; & quidem absurde omnino sibi que parum consentientes, cum testudinem & achillem, etsi nunquam se invicem attingerent, magis tamen ac magis ad se mutuo accedere ac proinde & moveri concedant. Hæc de motu generati dicta sint, quibus adjungenda essent alia nonnulla, sed hæc ex primo Phisices articulo repetenda, ubi ea tractari doctrinæ necessitas postulabat.

ARTICULUS II.

De rectilineo corporum descensu.

I. **M**otum *variabilem* jam in primo Physices capite definivimus; is nempe est, cujus velocitas continuo crescit aut decrescit. Dicitur autem *uniformiter acceleratus*, si temporibus æqualibus, æqualia accedant velocitatis incrementa; contra *uniformiter retardatus* appellatur, si velocitas temporibus æqualibus ad quietem usque æqualiter decrescat. Uniformiter acceleratum esse motum vi gravitatis constantis productum, ex ipsa definitione facile colligitur. Et quidem 1. descensum perpendiculararem consideremus. Ponatur tempus, quo grave aliquod descendit divisum esse in particulas æquales, & valde exiguas, primaque temporis particula agat gravitas, & corpus perpendiculariter impellat. Si jam post primum illud tempus omnis gravitatis actio cessare fingatur, nihilominus, per vim inertię, acquisitam velocitatem corpus perpetuo servaret. At cum gravitas indefinenter agat, etiam in secunda temporis particula corpus, alium gravitatis impulsu priori æqualem accipiet, ac proinde velocitas elapso secundo tempore dupla erit. Simili ratiocinatione patet velocitatem esse triplo majorem, elapso tertio tempore, & ita deinceps. Ergo velocitas crescit ut tempus, seu æqualibus temporibus æqualia accedunt velocitatis incrementa, ac proinde motus est uniformiter acceleratus..... 2. Si corpus descendat per planum inclinatum, res eadem facile demonstratur. Etenim corpus, C, *Fig. 10.* in-cumbat plano inclinato F. Ex centro C, ducta intelligatur, CG, ad basim horizontalem DB

SECTIO II. PARS I. CAP. I. 131

DB perpendicularis, quæ exhibeat gravitatem totam absolutam corporis C, & dividatur in vires duas, quarum una CF sit plano inclinato perpendicularis, altera vero eidem plano parallela. Vis quæ est, ut CF, nihil confert ad descensum corporis per planum inclinatum, sed tota impenditur in premendo plano; superest ergo dumtaxat vis FG; sed ob triangula rectangula DAB, CEG similia erit $FG : CG = AB : AD$. Hæc autem ratio eadem manet, in quocumque loco plani inclinati positum sit corpus, ac proinde & eadem est ratio gravitatis absolutæ CG ad gravitatem relativam FG; igitur gravitas relativa constans est, ideoque eadem est demonstratio, quæ pro gravitate absoluta, quare motus est uniformiter acceleratus. Contraria ratione intelligitur motum corporum in eadem recta sursum tendentium esse uniformiter retardatum; cum scilicet vis gravitatis contra motus impressi directionem perpetuo & uniformiter agens, aequalibus temporibus æqualiter motum minuat, usque dum velocitas omnis sursum extincta sit.

II. Recta AB Fig. 11. exhibeat tempus, quo corpus aliquod per datum quodlibet spatium descendit. Divisum intelligatur tempus in particulas innumeras, ei, im &c. Jam velocitas temporis particula infinite parva erit uniformis; hæc autem repræsentetur per e f, recta i k, exhibebit velocitatem particula temporis infinite parva, im, & ita deinceps; sed ex demonstratis in primo articulo, spatium motu uniformi percursum est ut rectangulum sub tempore & celeritate; quare erit spatium percursum tempore, e i, velocitate, e f, ut rectangulum if; eodem modo spatium percursum tempore im, & celeritate ik, erit ut rectangulum, mk, & sic de cæteris. Quare erit

F 6

spa-

spatium his omnibus temporibus percursum, ut omnia hæc rectangula. Cum autem temporis particulæ sint infinite parvæ, rectangulum, if, non differt a trapezio, eisk, ac proinde rectangulorum omnium summa æqualis est triangulo ABC. Jam vero ob motum uniformiter acceleratum, tempora Ao, AB, sunt ut velocitates, or, BC, ac proinde similia sunt triangula Aor, ABC, ideoque sunt ut quadrata laterum Ao, AB, vel or, BC, hoc est, ut quadrata velocitatum aut temporum, ac proinde etiam, quod idem est, velocitates aut tempora sunt in ratione subduplicata spatiorum. Ex hac uniformis accelerationis lege statim evidens est spatium dimidio tempore AB, percursum velocitate CB, tempore AB, acquisita, æquale esse spatio tempore AB, descripto motu uniformiter accelerato. Etenim spatium velocitate uniformi BC, tempore AB, percursum repræsentatur per rectangulum ABCD, duplum trianguli ABC, ac proinde dimidium spatium, quod est ut triangulum ABC, velocitate uniformi BC, dimidio tempore percurritur.

III. Si corpus aliquod vi gravitatis constantis tempore quolibet dato datum spatium percurrat, tempore duplo describet spatium quadruplum, tempore triplo spatium noncuplum &c. Nempe si tempora fuerint in proportionem arithmetica, 1. 2. 3. 4. &c. spatia percurfa se habent in proportionem 1. 4. 9. 16. &c. hoc est si corpus minuto uno secundo describat pedes 15. duobus secundis percurrat pedes 15. \times 4. tribus secundis, 15×9 , & ita deinceps. Igitur spatia singulis temporibus seorsim descripta sunt, ut numeri impares, 1, 3, 5, 7 &c. ut patet. Si enim ex spatio 4, duobus primis temporibus percurso auferatur 1, spatium scilicet primo tempore descriptum, remanet, 3, spa-

SECTIO II. PARS I. CAP. I. 133

spatium descriptum secundo tempore, & ita dicendum de aliis quibuslibet temporibus. Cæterum patet hæc omnia convenire etiam corporibus, quæ per plana inclinata descendunt. Demonstravimus enim hunc esse plani inclinati effectum, ut corporis gravitatem absolutam minuat, manente tamen constante gravitatis parte reliqua.

Hinc merito inter machinas recensetur planum inclinatum; cum enim *machina* appelletur quidquid ad motum faciliorem confert, evidens est machinis annumerandum esse planum inclinatum; cum aliquam gravitatis absolutæ partem sublevet, eam tantum superandam relinquens gravitatis partem, quæ plano inclinato parallela est.

IV. Constantem esse gravitatem terrestrem, jam antea ostendimus; itaque quidquid demonstratum est hætenus, ad gravium descensum transferri debet; ac proinde dato quolibet tempore inveniri potest spatium vi gravitatis cadendo descriptum, & viceversa dato spatio definitur tempus. Sit altitudo quælibet data, vel spatium cadendo percursum, a , tempus, t , spatium data aliqua temporis parte, i , descriptum dicatur, s , erit $i : s = t^2 :$

a , ideoque $s = \frac{a}{t^2}$, & $t^2 = \frac{a}{s}$; quare,

$t = \sqrt{\frac{a}{s}}$. E. G. Si corpus pedes 60 percur-

rat tempore minutorum duorum secundorum, spatium quatuor minutis secundis percurrentum erit 16. $60 : 4 = 4. 60 = 240$. Viceversa si tempore secundorum quatuor corpus percurrat 240 pedes, tempus quo percurritur spatium pedum 135 erit $\sqrt{135. 16 : 240 =}$

$\sqrt{135} :$

✓ 135: 15 = ✓ 9 = 3. At observandum est demonstratam accelerationis legem valere dumtaxat in vacuo, sublata aeris resistentia, seclusisque aliis quibuslibet impedimentis. Attamen si experimenta fiant in globis, qui pondus satis magnum sub exiguo volumine continent, demonstratam accelerationis legem satis accurate servat globorum illorum descensus; hac lege descendunt globi plumbei in angustum volumen redacti; at si iidem globi in sphaeram cavam magnæ diametri extenderentur, jam turbaretur maxime lex illa; imo eo tenuitatis reduci posset globus, ut aeri mollioris plumæ instar innataret. At de aeris, fluidorumque resistentia sermo erit deinceps. Neque etiam hic consideramus gravitatem in magnis a terra distantibus; hanc enim in ratione distantiarum duplicata decrescere jam demonstravimus. Verum cum in distantibus a terra mille, & mille ducentum exapedarum gravitatem constantem demonstrent experimenta, talem gravitatis legem nunc explicasse satis sit. Hæc autem gravitatis doctrina debetur *Galileo*, qui motus uniformiter accelerati leges primus omnium invenit, atque demonstravit.

V. Ex demonstratis facile comparantur inter se corporum descensus per diversa plana inclinata. 1. Si ex puncto, B, ad planum inclinatum AD, demittatur perpendicularis BK *Fig. 11.* iisdem temporibus percurruntur spatia AB, AK. Enim gravitas absoluta CG est ad gravitatem relativam FG, ut longitudo plani inclinati AD, ad illius altitudinem AB, ac proinde cum vires illæ sint constantes, erunt inter se, ut velocitates dato tempore genitæ, ex sæpius demonstratis; jam ob angulum rectum in B, erit $AK : AB = AB : AD$, quare AK erit ad AB, ut velocitas per planum
AK

SECTIO II. PARS I. CĀP. I. 135

AK ad velocitatem per planum AB eodem tempore genitam. Igitur spatia AK, AB, eodem tempore percurreuntur. Inde autem statim patet æqualia esse in circulo descensuum tempora per chordam quamlibet, & per diametrum verticalem, ac proinde æqualia descensuum tempora per chordas singulas. Et quidem cum angulus K sit rectus, per puncta tria A, K, B, describi poterit circulus cujus diameter erit AB, chordæ autem erunt AK, BK; ac proinde diameter verticalis, & chorda AK, vel BK, eodem tempore describentur. Hæc autem ratiocinatio valet in circumferentiæ puncto quolibet, cum angulus semidiametro insiliens sit semper rectus. Quare chordæ singulæ eodem tempore percurreuntur..... 2. Tempus quo corpus C descendit ex A in D, est ad tempus, quo cadit ex altitudine perpendiculari, ut AD ad AB. Nam ob motum uniformiter acceleratum, AD est ad AK ut quadratum temporis per AD ad quadratum temporis per AK vel AB. Sed (ex elementis Geometriæ) AD est ad AB, ut AB ad AK, & AD : AB = AD : AK. Igitur quadratum temporis per AD est ad quadratum temporis per AK, ut AD² ad AB². Ergo tempus descensus per AD est ad tempus descensus per AK (hoc est) per AB ut AD ad AB..... 3. Tempora descensuum per plana quotlibet inclinata ejusdem altitudinis, sunt inter se ut planorum longitudo. Nam tempus per AD est ad tempus per AB, ut AD ad AB; simili modo tempus per AM est ad tempus per AB, ut AM ad AB, ac proinde tempus per AD est ad tempus per AM, ut AD ad AM..... 4. Si corpus descendat per plana quotlibet inclinata AD, AM ejusdem altitudinis, velocitates in punctis M, D, acquisitæ æquales sunt inter se, & velocita-

citati acquisitæ in descensu perpendiculari per AB. Cum enim spatia AB, AK motu uniformiter accelerato percurrantur, velocitas acquisita in B erit ad velocitatem acquisitam in K, ut $\frac{AB}{T}$ ad $\frac{AK}{T}$, reducendo motum uniformiter ac-

celeratum ad motum uniformem, quod fieri posse jam demonstravimus, sumpto scilicet spatio duplo motu uniformi eodem tempore percurso. Jam vero ob tempora T, t, æqualia, & numerum constantem, 2, erit velocitas in B ad velocitatem in K, ut AB ad AK, vel ut AD ad AB, ob triangula similia AKB, ABD. Sed quadratum velocitatis in D, est ad quadratum velocitatis in K, ut AD ad AK, & præterea (ex elementis Geometriæ) $AD : AB = AB : AK$, quare $AD : AK = AD^2 : AB^2$; ergo quadratum velocitatis in D est ad quadratum velocitatis in K, ut AD^2 ad AB^2 ; ac proinde velocitas acquisita in D est ad velocitatem acquisitam in K, ut AD ad AB, vel ut velocitas acquisita in B, ad velocitatem acquisitam in K. Ergo velocitas in D, æqualis est velocitati in B. Simili ratiocinatione velocitas in M, æqualis demonstratur velocitati in B, ac proinde & velocitati in D, atque demonstratio valet de alio quolibet planorum numero. His quatuor numeris comprehendimus præcipuas corporum per plana inclinata descendantium leges, eas scilicet quæ ad sequentem articulum intelligendum necessariæ omnino sunt.

ARTICULUS III.

De motu Curvilineo.

I. **D**Emonstratum est jam, ubi virium compositionem & resolutionem explicavimus, nullam curvam vi unica describi posse, sed requiri saltem vires duas diversæ naturæ, quæ scilicet rationem perpetuo variabilem inter se habeant. Evidens est infinitum a Geometris considerari posse virium ordinem, ac proinde & curvas numero infinitas; at Physicis considerare satis est illas virium rationes, quæ in rerum natura generatim obtinent. Itaque duas in hoc articulo distinguemus motuum species; alii sunt motus *liberi*, corporum scilicet quæ semel mora sibi deinde libere permittuntur; alii autem sunt motus *non liberi*, corporum nempe quæ impedimento aliquo retinentur. Ad primam motuum speciem pertinet corporum projectilium motus; ad alteram autem pertinet motus pendulorum. De hac duplici motuum specie ex ordine tractabimus, præmissis principio, ex quo universa pendet curvilineorum motuum doctrina.

Consideretur latus infinitesimum curvæ AB, per quod labatur corpus B, velocitate qualibet finita expressa per BC. *Fig. 12.* Jam ubi corpus pervenit in C, viam flectit per CD, ita ut producto latere BC, angulus externus BCM sit infinite parvus. Potest enim curva quælibet considerari, tanquam composita ex planis inclinatis numero infinitis, & infinite parvis, quorum proinde inclinatio debet esse infinite parva, ut planorum inclinatum series abeat in curvam continuam. Jam vero latus, CD, se habet tanquam obstaculum, uniformem corporis

ris motum secundum directionem BC retardans. Quare vis finita, BC, dividi debet in vires duas, unam secundum directionem BN, vel CD lateri CD parallelam, & alteram BM vel NC perpendiculararem ad CD. Sola vi finita expressa per BN corpus describit latus CD eodem tempore, quod describeret latus BC, ideoque æquales sunt CD, BN motu uniformi eodem tempore percurſæ; quæ quidem omnia manifesta sunt, si revocentur in memoriam, quæ de virium compositione & resolutione demonstrata sunt. Porro in hac demonstratione ponitur abesse vim omnem elasticam & resistantiam quamlibet. Est autem vis expressa per NC, vel BM quantitas infinitesima primi ordinis, cum sit sinus anguli infinitesimi BCM cujus radius est BC exprimens vim finitam; vis autem NC tota consumitur in premendo latere CD, nihilque confert ad velocitatem per curvam. Igitur velocitas corporis, B, per latus CD est ad illius velocitatem per latus BC, ut BN ad BC. Jam centro B radio BN describatur arcus NI, erit BI = BN, ac proinde CI exhibebit velocitatem amissam. Sed arcus, NI, considerari potest, tanquam recta infinite parva ex angulo recto N in hypotenusam BC perpendiculariter demissa. Ergo NC est media proportionalis inter CB & CI; sed CB est quantitas finita, NC infinitesima primi ordinis, ergo CI est infinitesima ordinis secundi, ac proinde corpus curvam describens ex latere infinitesimo in aliud contiguum transiens, non amittit nisi velocitatis partem infinitesimam ordinis secundi, ac proinde per finitum curvæ arcum descendens amittet duntaxat velocitatis partem infinitesimam ordinis primi, hoc est, nullam; atque hoc est universalissimum curvilinei motus principium.

Jam

SECTIO II. PARS I. CAP. I. 139

Jam primam motuum speciem consideremus .

II. Ex præalti montis vertice explosus intelligatur globus missilis , secundum directionem horizontalem ; alia quælibet directio considerari posset , sed directionem hanc omnium simplicissimam , & commodissimam nunc adhibere satis sit . Jam si vis globo missili impressa , fingatur infinite parva , vi gravitatis in terram globus perpendiculariter recidet ; si autem vis impressa ponatur infinite magna , secundum directionem horizontalem globus perpetuo movebitur . Hæ sunt duæ extremæ hypotheses , inter quas infiniti alii casus esse possunt , sed eos dumtaxat exponemus , qui ad Physicam pertinent . I.^o Globus missilis projiciatur per rectam horizontalem AB, Fig. 13. & interea vi gravitatis constanti perpendiculariter urgeatur , secundum directionem AR . Jam recta AB divisa intelligatur in partes innumeras æquales , ut AE vi semel impressa temporibus æqualibus descriptas , rectæ illæ repræsentare poterunt tempora ; sunt enim tempora inter se , ut spatia motu uniformi descripta ; si autem ad singula divisionum puncta ducantur rectæ ad horizontem perpendiculares , ut QE , ita ut rectæ illæ sint ut quadrata rectorum , AE , spatia singulis temporibus motu uniformiter accelerato descripta per easdem rectas exhibentur . Itaque corpus motu composito describet diagonalem virium AE , EQ , cujus hæc erit natura , ut nempe rectæ EQ , vel AH semper sint ut quadrata rectorum AE vel QH , ductis scilicet AE , HQ , & AH , EQ parallelis ; sed hæc est natura curvæ , quam *parabolam apollonianam* vocant Geometræ , ut nempe *abscissæ* semper sint ut quadrata *ordinatarum* , ergo gravia projecta in hac gravitatis lege parabolam describunt .

Evi-

Evidens autem est eandem manere demonstrationem, etiam si projectionis directio fuerit ad horizontem utcumque obliqua; tota enim demonstratio pendet ex duorum motuum compositione, quorum unus est uniformis, alter autem uniformiter acceleratus. Porro quæcumque sit projectionis ad horizontem inclinatio, eadem manet motuum illorum natura, ac proinde & eadem natura curvæ 2. Luna revolvitur circa terram, ideoque globi missilis instar projecta intelligi potest secundum directionem tangentis orbitæ, & interim vi centripeta tendens in terram. Verum in primo casu ob exiguas a tellure distantias gravitatem tanquam constantem fingere, illiusque directiones velut parallelas habere licet, quæ quidem hypothesis ad corpora cælestia transferri non potest; cum ob magnas distantias, neque constantem gravitatem, neque illius directiones velut parallelas considerare liceat. Jam evidens est globum juxta telluris tangentem minori velocitate emissum describere arcum minorem, majore autem velocitate arcum majorem, atque aucta adhuc velocitate longius pergere, ita ut prætergredi possit totum telluris ambitum, & ad montem unde projectus fuerat redire. Fingamus jam corpora quælibet de regionibus altioribus projici, & ad terram, vel solem, aut quodlibet punctum vi centripeta tendere, pro varia corporum velocitate, & vi gravitatis describentur arcus vel concentrici, vel excentrici, atque in suis orbitis pergent corpora ad modum planetarum per cælos vagari. Sed hæc breviter annotata sint; de hoc argumento jam aliqua diximus attractionis doctrinam explicantes, atque rursus dicendi recurret locus in Astronomia; de motu pendulorum jam paulo fufius differendum.

III. Pendulum vel *simplex* est vel *compositum* ; pendulum simplex appellatur filum puncto aliquo suspensum quod tanquam inflexibile & gravitatis expers consideratur , altera autem extremitate pondere onustum . Si filum plura habeat annexa pondera , pendulum compositum appellatur , penduli *oscillatio* aut *vibratio* appellatur motus alternus quo virga penduli circa fixum suspensionis punctum itum & reditum absolvit ; Si autem pendula duo suas vibrationes eodem tempore absolvant , pendula illa dicuntur *isochrona* . Si pendulum aliquod simplex CP Fig. 14. in linea verticali constituatur , in puncto infimo P quiescit , ideoque punctum illud vocatur punctum *quietis* . At si pendulum attollatur ad punctum , A , & deinde sibi permittatur , motu accelerato relabetur in , P ; & quidem penduli motum consideremus in puncto aliquo , N , atque ponderis gravitas absoluta representetur per NG ; hæc dividi poterit in vires NH , NI , quarum prima , cum tota dirigatur ad punctum suspensionis C , ipsius puncti resistentia omnino extinguitur ; altera autem quæ est secundum directionem tangentis , exprimit gravitatem relativam , atque vi illa corpus motu accelerato descendit ad punctum P , ubi vis NI omnino evanescit ; in hoc tamen puncto quiescere non potest pendulum , sed per vim inertię , acquisitam servans velocitatem , ascendit versus B , ita ut æquales sint arcus AP , PB , descendendo & ascendendo descripti , atque etiam æqualia descensus & ascensus tempora . Verum dum corpus ex , P , versus K , ascendit , perpetuo agit vis relativa gravitatis secundum directionem oppositam , NI , ac proinde in puncto B extinguit omnes velocitatis gradus acquisitos ; quare corpus propria gravitate relabitur , non secus ac ex puncto , A , primum descendit .

Hæc

Hæc autem omnia manifesta sunt ex articulo præcedenti & ex numero primo articuli hujus.

IV. Tempora descensuum per curvas similes & ad horizontem similiter inclinatas, esse in ratione subduplicata laterum homologorum ex locis citatis facile etiam colligitur. Etenim I terra minima HG, GF, FD, *Fig. 15* itemque hg, gf, fd, exhibeant infinitesimas curvarum partes similes & ad horizontem similiter inclinatas, jam tempus per HG est ad tempus per, hg, ut \sqrt{HG} ad \sqrt{hg} . Similiter tempus per GF est ad tempus per gf ut \sqrt{GF} ad \sqrt{gf} ; sed (per hypothesim) $HG : hg = GF : gf$, ergo $\sqrt{HG} : \sqrt{hg} = \sqrt{GF} : \sqrt{gf}$, ac proinde tempus per GF est ad tempus per gf ut $\sqrt{HG} : \sqrt{hg}$. Simili ratione tempus per FD est ad tempus per fd, ut $\sqrt{HG} : \sqrt{hg}$. Ergo tempus totum per HG + GF + FD est ad tempus totum per hg + gf + fd ut $\sqrt{HG} : \sqrt{hg}$, hoc est, in ratione subduplicata laterum homologorum. Inde autem pendet universa pendulorum per circulares arcus excurrentium doctrina I. Velocitas penduli, CB, in puncto infimo B est ut chorda BK *Fig. 16*, arcus KDB ex puncto K descripti. Etenim ducatur KF ad CB perpendicularis, erit velocitas penduli in descensu per arcum KDB acquisita æqualis velocitati quam corpus acquireret cadendo ex altitudine FB, ac proinde ut \sqrt{FB} ; sed (ex elementis Geometriæ) $BF : BK = BK : BA$, ideoque $BF \times BA = BK^2$; ergo cum sit BA constans, erit BF ut BK^2 , ideoque \sqrt{BF} est ut BK : quare velocitas acquisita in B quæ est ut \sqrt{BF} erit etiam ut BK, nempe ut chorda; quæ quidem

dem proprietas circuli eximie est utilitatis, præfertim ubi ad experientiam revocandæ sunt conflictuum leges in proximo articulo demonstrandæ . . . 2. Si pendula duo arcus similes describant, erunt vibrationum tempora in ratione subduplicata longitudinum pendulorum, ut ex præcedenti demonstratione patet; sed numerus vibrationum eo major est, dato tempore, quo minus est vibrationis unius tempus; seu quod idem est, numeri vibrationum sunt in ratione subduplicata inversa longitudinum pendulorum. Quare datis duorum pendulorum longitudinibus, datoque vibrationum numero tempore aliquo ab alterutro pendulo peractarum, invenietur numerus vibrationum eodem dato tempore ab altero pendulo confectarum, dicendo: longitudo penduli unius est ad longitudinem penduli alterius, ut quadratum numeri vibrationum dati ad quadratum numeri vibrationum quæsiti; & vice versa invenietur penduli longitudo talis ut datum quemlibet vibrationum numerum dato tempore perficiat . . . 3. Si pendula duo fuerint isochrona, erunt vires gravitatis acceleratrices ut pendulorum longitudines. Sunt enim vires constantes ut spatia iisdem temporibus descripta, spatia autem in hoc casu sunt similes pendulorum arcus qui proinde sunt ut longitudines pendulorum; quare & vires gravitatis in eadem sunt longitudinum ratione; quod quidem maxime valet ad definiendum gravitatis incrementum vel decrementum in variis terræ locis, ut deinde explicabimus.

V. Hactenus consideravimus pendulum simplex, quale nullum existere potest in rerum natura; nulla enim est virga quæ gravitate omni careat, ac proinde pendula omnia sunt composita. Rem breviter exponemus quantum difficultas patitur. Si bina pondera filo suspensa in di-
versa

versa a puncto suspensionis distantia suas oscillationes peragant, virgaque ipsa concipiatur inflexibilis, sine pondere & sine vi inertiae, pondus quod puncto suspensionis propius est, suas oscillationes citius absolvere debet; contra autem tardius quod a puncto suspensionis remotius est, in ratione scilicet subduplicata distantiarum. Id quidem contingeret, si pondera oscillationes suas seorsim peragerent; verum quia penduli virga omnino rigida & inflexibilis ponitur, suas oscillationes eodem tempore peragere absolvant, atque ita componentur inter se velociores & tardiores ponderum motus ita medio quodam tempore suas vibrationes perficere debeant. Jam si inveniatur punctum aliquod in quo bina pondera collecta, suas vibrationes eodem tempore perficerent, illud punctum dicitur centrum oscillationis, ejusque a puncto suspensionis distantia erit longitudo penduli simplicis pendulo composito isochroni. Quod autem diximus de binis ponderibus, idem quoque intelligi potest de alio quolibet ponderum numero, ac proinde & de infinitis pondusculis per virgam penduli dispersis, in quo quidem casu gravitatis fili ratio habetur. At si filum sit subtilissimum ita ut illius pondus cum ipso globi appensi pondere comparatum sit valde exiguum, & præterea si valde exigua sit globi diameter cum fili longitudine comparata, jam pendulum velut simplex considerari potest. Quia vero sublimior Geometria exhibet generales formulas quarum ope invenitur centrum oscillationis, ideoque pendulum compositum ad simplex reducitur, satis nobis fuit penduli simplicis doctrinam explicasse; alia autem plurima quæ in hoc articulo brevius diximus, ex sequenti conclusione magis fient manifesta.

CON.

CONCLUSIO.

GRAVITATIS TERRESTRIS INÆQUALITATEM
DEMONSTRANT ACCURATISSIME INSTITU-
TA PENDULORUM EXPERIMENTA.

Demonstratur . Si observetur longitudo pen-
duli isochroni in duobus locis , erunt vires in
iis locis , ut pendulorum longitudines , ex an-
tea demonstratis . Licebit ergo gravitatis incre-
mentum perspicere , diligenter observata in va-
riis terræ locis penduli isochroni longitudo .
Quanta autem in capiendis hujusmodi experi-
mentis adhiberi debeat diligentia , repetendum
est ex monumentis Parisiensibus anno 1735 :
nihil enim accuratius , ac religiosius tradi po-
test , quam quod ibidem hac in re præscripsit
vir clarissimus Dominus De Mairan . Hæc au-
tem præcipue curanda monet . 1. Accurata ha-
benda est mensura pedis Parisiensis , vel altera
quælibet mensura , cujus ad pedem Parisiensem
nota sit ratio , ita ut decima , & , si fieri po-
test , centesima lineæ parte non aberret
2. Parari debet globus exacte rotundus , dia-
metro circiter unius pollicis , ex materia bene
compacta 3. Adhibendum est filum flexibi-
le , nec ita complicatum ut oscillationes latera-
les mutet in conicas , quas quidem diligenter
evitari multis de causis expedit . Optimum o-
mnium , & jam fere ab omnibus adhiberi soli-
tum , est filum , quod paratur ex foliis *aloes* .
Fili autem pondus si fuerit millesima pars pon-
deris globi , in pendulo pedum 3 , linearum 8
attollit centrum oscillationis , una quartadeci-
ma parte lineæ unius ; in aliis casibus , ea ele-
vatio erit , quam proxime ut longitudo fili di-
recte , & ut pondus globi inverse , quod de-

Jacq. T. IV.

G

mon-

monstrat vir prælaudatus. . . . 4. Summa utendum est diligentia in capienda distantia puncti suspensionis a centro globi, vel ab imo globi puncto; habita autem distantia puncti suspensionis a centro, si ei addantur $\frac{2}{3}$ tertiæ proportionalis post ipsam & globi semidiametrum, habebitur penduli longitudo. 5. Demum paratum sit oportet horologium accuratum, quod dirigatur per appulsum stellæ alicujus ad telescopium immotum, vel solis ad lineam meridianam; oscillationes autem maxima cura & sine ullo erroris periculo numerandæ sunt.

Tanta autem adhibita diligentia quæ in re subtilissima, omnino quidem necessaria est, jam certo definitum habemus penduli isochroni mensuram breviorẽ fieri pergendo a polis ad æquatorem, contra vero longiorem ab æquatore ad polos. Ita ergo comperta est gravitatis inæqualitas in diversis terræ locis, ut nemo sit qui de ea dubitet. Non defuerunt quidem doctissimi etiam viri, qui observationibus per Europam institutis gravitatem ubique æqualem se invenisse profiterentur; verum quod minus feliciter successerit observatio summo consensu, nunc tribuunt Physici iis methodis, quæ tum in usu erant minus perfectæ & perpolitæ, ita ut exiguum gravitatis discrimen, tam exiguis locorum intervallis debitum deprehendere nequaquam licuerit. Hinc observationes multo accuratiores & accuratioribus instrumentis institutæ sunt in plurimis, & admodum diffitis terræ locis; omnium autem observationum fide certo constat gravitatis inæqualitas. Hic autem longius esset describere varias pendulorum longitudines quarum tabulas videre est in eximiis operibus, quæ de telluris figura paucis ab hinc annis in lucem prodire.

Quamvis ad determinandam gravitatis inæqua-

qualitatem solius penduli isochroni mentionem
 fecerimus, evidens tamen est pari successu ad-
 hiberi posse pendulum non isochronum. Etenim
 ex doctrina motus uniformiter accelerati in
 præcedenti articulo explicata, spatia crescunt
 ut quadrata temporum, eadem manente vi ac-
 celeratrice; si autem vires acceleratrices di-
 versæ fuerint, seorsim tamen consideratæ uni-
 formes maneant, quo major est vis accelera-
 trix, eo majus est spatium dato tempore per-
 cursum, ac proinde spatia sunt ut quadrata tem-
 porum, & vires acceleratrices conjunctim, id-
 eoque vires acceleratrices sunt, ut spatia descri-
 pta directe, & quadrata temporum inverse. Jam
 vero in casu pendulorum, spatia sunt ut lon-
 gitudines pendulorum; erunt ergo vires gravi-
 tatis ut longitudines pendulorum directe, & qua-
 drata temporum oscillationum inverse. Igitur
 manente penduli longitudine, vires gravitatis
 sunt ut quadrata temporum oscillationum reci-
 proce. Itaque patet ejusdem penduli ope gra-
 vitatis comparisonem in diversis terræ locis in-
 stitui posse; tanta enim diligentia numerus o-
 scillationum dato tempore determinatur, ut ne
 dimidiæ quidem oscillationis error committi pos-
 sit. Hac methodo gravitatis inæqualitas pri-
 mum detecta est a *Richero* cujus observationes
 jam antea commemoravimus.

Ut tota hæc quæstio maximi sane momenti
 in bono lumine collocetur, meminisse oportet
 duplicem considerari posse gravitatem; aliam
 nempe *primitivam* nulla vi centrifuga pertur-
 batam, aliam autem vi centrifuga imminu-
 tam, quam gravitatem *actualem* appellare li-
 cet; totam rem breviter explicabimus, ut fa-
 cere solent qui telluris circa axem rotationem
 admittunt. Sit AB diameter æquatoris cujus
 P, p, poli, sitque DE, Fig. 17. semidiamet-

ter paralleli cuiusvis. Quoniam in circulari motu vis centrifuga dirigitur ad partes circuli descripti centro oppositas, in æquatore A, dirigitur ad partes oppositas centro terræ, C, per CA; in parallelo D ad partes oppositas centro paralleli E per ED. Jam vero gravitas ubique dirigitur ad centrum terræ, C, saltem quoad sensum, nimirum in A per AC, in D per DC. Præterea directio CA est penitus contraria directioni AC; at patet ex motuum compositione & resolutione, directionem vis centrifugæ per ED referendam esse ad directionem vis gravitatis per CD; nempe vim centrifugam in D exprimat recta DO, hæc resolvatur in ON ipsi CD normalem, & in DN secundum directionem ipsius CD. Hæc sola pars vis centrifugæ opponitur directioni gravitatis in D. Jam facile invenitur ratio vis centrifugæ in D, secundum directionem DN, ad vim centrifugam in A. Etenim exprimat AI vim centrifugam in A, erit, ex demonstratis de vi centrifuga, AI ad DO ut AC vel DC ad DE. Præterea ob triangulorum DCE, ODN, similitudinem, erit iterum CD ad DE ut DO ad DN, ideoque compositis rationibus CA^2 ad DE^2 ut AI ad DN. Ex hac demonstratione æstimari potest effectus vis centrifugæ in quolibet terræ loco; patet autem vis centrifugæ effectum talem esse ut gravitati primitivæ minus detrahat pergendo ab æquatore ad polos, & quidem duplici de causa; tum quia decrescit ipsa vis centrifuga quæ in polo evadit nulla, tum quia ejus directio gravitatis directioni minus directe opponitur. Ex his etiam facile determinatur ratio vis centrifugæ ad gravitatem primitivam. Si fingamus corporis alicujus sub æquatore gravitatem omnem sublatam, jam posito rotationis motu corpus illud per telluris tangentem elabere-

tur,

SECTIO II. PARS I. CAP. I. 149

tur , ideoque minuti unius secundi intervallo supra ipsum telluris globum attolleretur tota illa altitudine , quæ est inter tangentem & arcum minuti unius secundi tempore descriptum , quæ quidem lineola tangente , & arcu comprehensa ex elementis Geometriæ facile invenitur. Hæc exprimet vim centrifugam sub æquatore ; addi autem debet spatio , quod corpora sub æquatore minuti unius secundi tempore libere descendendo percurrunt , atque ita habebitur gravitas primitiva sub æquatore , quæ proinde conferri poterit cum vi centrifuga data , atque ita dicendum de aliis quibuscumque terræ locis . Sed hæc paucis indicasse sufficiat ; convenientius enim explicabuntur , ubi de figura telluris ; in hac conclusione solam gravitatis variationem demonstrandam suscepimus .

Obicies doctrina pendulorum hætenus explicata omnem excludit medii resistantiam . Ac certissimum est pendula impedimentis plurimis obnoxia esse . Et quidem aeris resistantia maxime retardantur ; in ipso suspensionis puncto mutuus fit attritus , atque hinc oritur aliud omnino inevitabile impedimentum . Itaque sic argumentari licet . Gravitatis variationem non demonstrant experimenta illa , quæ nulla sufficienti diligentia institui possunt , atqui &c. ergo &c.

Resp. Concedo maj. Nego min. Aeris , aut mutui attritus impedimento tribui non potest differentia , quæ in pendulorum longitudine observata est . Et quidem iisdem impedimentis afficiuntur pendula tum sub æquatore , tum versus polos . Neque est quod dicant aliqua fortasse de causa majorem esse aeris resistantiam versus æquatorem , ac proinde & majorem penduli retardationem . Et certe in tam exigua velocitate , exigua omnino esse debet & fere nul-

la aeris resistentia, quæ si quid agit, ubique eodem fere modo motum retardat, & potius minus sub æquatore ob minorem aeris densitatem, majori scilicet calore vigente. Præterea etiam diligentissimi viri, qui pendulorum longitudinem observarunt, nullam prætermisere diligentiam ut penduli retardationem ex aeris resistentia oriundam cognoscerent, adhibitis quoque accuratissimis barometris, quæ atmosphæræ variationem indicarent; sed tanta diligentia necessaria quidem fuit ut accurate, & adamussim definiretur vera penduli longitudo, mediocris autem diligentia satis fuit, ut variatio penduli innotesceret; tanta enim est, ut observationibus etiam sine maxima subtilitate institutis sese conspicuam præbeat. Præterea omni caret verisimilitudine, observationes omnes in eundem errorem perpetuo conspirare, quod nempe penduli isochroni longitudinem per gradus minorem faciant, pergendo a polis ad æquatorem. Porro in præsentī conclusionē generatim dumtaxat agimus de gravitatis inæqualitate; rem vero accuratius determinare pertinet ad Geographiam, ubi telluris figuram investigabimus.

Instabis I. In pendulorum observationibus non apparet summus ille consensus, qui tamen ad fidem faciendam necessarius omnino est. Circumferuntur plurimæ observationum tabulæ, quæ quidem a se invicem non parum discrepant. Imo Picardus per totam Galliam & *Uranoburgi* eandem invenit penduli longitudinem. Unde sic concludi potest: gravitatis variationem non demonstrant observationes illæ, quas erroris suspectas reddit earum dissensus, atqui &c. ergo &c.

Resp. Distinguo maj. Erroris suspectæ sunt observationes, quoad veram & accuratam pendulo-

SECTIO II. PARS I. CAP. I. 151

dulorum longitudinem : transeat. Quoad longitudinem penduli generatim consideraram : Nego. Quare distincta min. Nego. Consequentiam. Re quidem vera plurimos observationum Catalogos inter se minime conspirantes exhibuerunt doctissimi viri ; sed quamvis ob rei difficultatem in eadem non consentiant penduli longitudine, in id tamen conspirant omnes, ut in præcedenti responsione observavimus, quod nempe pendulum ostendant brevius sub æquatore, longius versus polos. Quod autem *Coupletus* eandem in universa Galia invenerit penduli longitudinem, referri debet nimis exiguarum locorum distantiarum, atque etiam instrumentis minus accuratis, pro ea quam tales observationes postulant subtilitate. Dixi autem *transeat* : tanta enim diligentia his nuperrimis annis iterata fuerunt experimenta, ut miranda omnino sit tanta consensio ; tantillas enim habent differencias, quas nulla diligentissimorum virorum industria vitare potest.

Instabis II. Durissima quæque metalla vi caloris extendi, frigore autem contrahi certissimum est. Notissimum est Physicis instrumentum, quod *pyrometrum* dicitur : hæc est illius structura. Constat ex lamella metallica, cujus extremitas una in denticulos desinit ; hi autem denticuli axis perpendicularis cavitatibus, seu canaliculis inferuntur ; axis autem rotæ horizontalis dentes ingreditur. Subtus lamellam metallicam aptata sunt ellichnia quæ adinoto igne, flammam concipiunt. Rebus ita dispositis, lamella distenditur illiusque proinde denticuli axis cavitates per vices subeunt, & eundem axem convertunt ; revolvi autem non potest axis, nisi moveatur quoque rota superior horizontalis huic contigua. Quare si centro rotæ aptatus fuerit indiculus, qui circum-

loris effectus summa diligentia impediabatur, vel redacto conclavi, in quo experimenta instituebantur, ad calidioris loci temperiem, quod igne admoto & adhibito Thermometro in Laponia præstitit dominus *De Maupertuis*, vel notando oscillationum discrimen singulis gradibus caloris debitum, quod Thermometri ope diligenter perfecit *Grahamus*; hac enim adhibita diligentia variatio calori debita a tota penduli inæqualitate tuto detrahebatur. His autem præsidis exercitatissimi viri in plurimis locis plures observationes habuerunt. *Torneæ* in Laponia inventa est longitudo penduli ad minuta secunda oscillantis pedum 3, linearum $9\frac{1}{100}$, Parisiis pedum 3, linearum $8\frac{67}{100}$, sub

æquatore pedum 3, linearum $7\frac{21}{100}$: hanc autem tantam differentiam vi caloris tribuendam non esse, ex hactenus dictis facile patet.

Instabis III. Quamvis gravitatem minorem sub æquatore ostendant pendulorum observationes, inde tamen minime colligi potest gravitatis inæqualitas, ab æquatore ad polos certam servans legem: etenim fingamus gravitatem qualem requirit *Newtoniana* hypothesis, in ratione reciproca duplicata distantiarum a singulis materiæ particulis, fingatur quoque terra sphaerica homogenea, ac dematur sub æquatore B, sphaera materiæ cujus radius BI *Fig. 18.* contineat milliaria quatuor; jam detrahetur in B pars circiter millesima gravitatis. Nam terræ semidiameter CB est milliarium circiter 4000. & attractio in sphaeram CB est ad attractionem in BI, ut BC ad BI, sive ut 1000 ad 1, quod antea demonstravimus; at in F nullum observari poterit decrementum gravitatis. Est enim attractio puncti F in sphaeram IB, ad attra-

tionem puncti B in eandem ut BI^2 , ad FI^2 , sive proxime ut IB^2 , ad $2BC^2$, sive ut 16 ad 32000000; nimirum decrementum gravitatis in F, e-

I

I

rit 200000 decrementi in B & 2000000000 gravitatis totius. Si jam sphaera BI transferatur in F, eodem argumento ibi crescet pars millesima gravitatis, nihil in B, eritque differentia inter B & F pars quingentesima gravitatis. Si dupla sphaeræ diameter adhibita fuisset, prodiiisset differentia dupla, nimirum pars ducentesima, & quinquagesimaquarta, qualis ferre per observationes pendulorum invenitur; quamvis autem gratis omnino fingatur sub æquatore in B existeret cavernam ingentem, cujus diameter sit milliarium octo; certum tamen est multo minus materiæ sub æquatore, quam sub polis contineri; nam ob ingentem calorem perpetuum corpora omnia rariora sunt versus æquatorem; at versus polos perpetuis nivibus, & glacie rigent omnia. Præterea observationes pleræque in America factæ sunt in locis maritimis, immenso Oceano cinctis, cujus & magna est profunditas & ingens extensio; reliquæ in Europa observationes institutæ sunt in locis a mari remotioribus, & supra maris superficiem ita elatis ut illa major a centro distantia minus detrahat gravitati quam addat tanta materiæ quantitas late circumfusa. Ex his omnibus sic aliqui solent argumentari. Certum gravitatis incrementum, vel decrementum non ostendunt inæqualitates illæ, quæ recensitis causis tribui possunt, atqui &c. ergo &c.

Resp. transeat maj. Nego min. Ad majorem dico *transeat*; in præsentī enim quæstione sermo est duntaxat de gravitatis inæqualitate, non

SECTIO II. PARS I. CAP. I. 155

non vero de hujus inæqualitatis lege & causa; at pro merito figmento certe haberi debent in locis quibusdam cavernæ, in locis aliis montes; ecquis enim facile crediderit per universam tellurem tali ordine montium cavernarumque seriem distributam fuisse, ut certis pendulorum legibus accurate respondeat? Et quidem observationes non tantum sub æquatore & prope polos, sed etiam in locis aliis plurimis, & longius a montibus fuerunt institutæ. Tandem versus æquatorem eminent' altissimi montes quorum ea fuit vis attractiva ut pendulum a perpendiculari directione septem secundorum intervallo dimovere potuerit, ut antea observavimus. Verum juxta objectionis hypothese[m] tellus sub æquatore montibus eminere non debet, sed contra cavernis ingentibus hiare. Hic autem data iterum occasione de montium attractione pauca revocabimus, ex quibus intelligetur altioribus quoque montibus exiguam omnino vim tribuendam esse, illosque minimam continere materiæ quantitatem, si cum massa telluris conferantur. Ponamus montem tria milliaria altum qualis est circiter altitudo montis *Chimboraco*. Hunc montem exhibeat sphaera *D* in superficie telluris quam tangat recta *CLD*, Fig. 19, erit gravitas in *L* in tellurem ad gravitatem in *D* in sphaeram ut sphaerarum radii (ex demonstratis); gravitas autem in *L* in tellurem ad gravitatem in *D* in eandem in ratione reciproca duplicata distantiarum *LC*, *DC*, a centro ejusdem, ac proinde si *DH* exprimat gravitatem in terram in *D*, erit $DC^2 : LC^2 = LC : DH$, & completo rectangulo *ODHA*, dirigetur gravitas per *DA*, ex motuum compositione. Jam vero in triangulo rectangulo *DHA* dicatur: ut *DH* est ad *HA*, ita radius ad tangentem anguli *HDA*; quia

G 6

autem

autem data est semidiameter telluris quæ minor est milliariis parisiensibus 3940, ac proinde & ipsa DH , dabitur angulus, HDA qui invenitur $1.18''$. Talis ergo esse deberet aberratio penduli prope montem *Chimboraco*, quæ tamen aberratio per observationem prodiit duntaxat $7''$. Hic asserre placuit demonstrationem antea omissam, principiis necessariis nondum constitutis. Hinc patet ingentes etiam montes minimam habere densitatem pro ratione voluminis; quare certum est montes illos cavitatibus seu cavernis hiare. Illæ autem telluris inæqualitates quæ tantæ nobis videntur & minimæ tamen sunt cum tota telluris massa comparatæ, probabilissime referendæ sunt in vehementiores aliquas telluris concussiones quarum effectum ultra superiores telluris partes propagatum non fuisse, verisimillimum est. Itaque ex his omnibus colligitur ad explicandam gravitatis inæqualitatem sine ulla ratione fingi montes & hiatus certa lege per universam terram dispersos. Cæterum quamvis sæpe dixerimus, gravitatis legem per observationes pendulorum hic a nobis non determinari, nemo tamen putet id contrariam esse constitutæ antea attractionis legi in ratione distantiarum duplicata decrescantis. Etenim hanc attractionis legem demonstravimus inter corpora cælestia magnis intervallis a se invicem remotissima, in quibus proinde diversam densitatem negligere licuit. Gravitatem terrestrem in eadem quoque ratione decrescere ostendimus, sed gravitatem consideravimus in eodem duntaxat telluris loco; nullam vero rationem habuimus illarum inæqualitatum quæ ex varia telluris densitate aliisque causis originem habere possunt. Tandem inæqualitates illæ nihil repugnant demonstratæ attractionis legi, cum oriantur ex ipsa attractionis lege in ratione

SECTIO II. PARS I. CAP. I. 157

ne directa massarum & duplicata inversa distantiarum. Sed ut jam sæpe monuimus fusior explicatio ad alium locum pertinet, ubi de figura telluris.

Instabis IV. Pendulorum observationes haberi non possunt nisi facta comparatione cum horologii motu. At horologia constant ex variis partibus quæ singulæ impedimentis plurimis afficiuntur; humido vel arido cælo magis vel minus lubricæ fiunt rotæ, modo velociores, modo tardiores; hinc fit ut pendulum horologii in longiores vel breviores arcus excurrat, ac proinde idem non servetur singularum oscillationum tempus. Tandem vitium aliud quod in pendulo simplici jam notavimus, in horologiorum pendulis multo magis crescit ob partium multitudinem & varietatem, nempe pro varia cæli temperiem utantur, varieque extenduntur & contrahuntur plurimæ horologiorum partes; hinc mutatur centri oscillationis situs. Ex his omnibus ita concludi potest: incertis causis & sine ulla lege variis tribui potest diversa penduli longitudo, si incertus omnino sit horologiorum usus, quantum in re tam subtili desideratur, atqui &c. ergo &c.

Resp. Concedo maj. Nego min. Re quidem vera horologiorum partes singulæ variis mutationibus sunt obnoxie; at comparatione diligenter instituta inter horologii solisque aut stellarum motum, innotescere facile potest an horologium errorem aliquem admittat. Præterea ad vitandam mutationem ex cæli temperie oriundam adhiberi debent artificia de quibus jam supra mentionem fecimus. His horologiorum incommodis plurima parata sunt remedia. Grahamus celeberrimus instrumentorum artifex utilissimum sane tantis malis remedium excogitavit. In extrema penduli virga suspendit tubum mercurio plenum ita ut tamen in tubo spacioli
ali-

aliquid superesset, per quod mercurius ipse caloris vi dilatatus cum virga intra tubum ascenderet, descendente interim tubo ipso, atque ita centrum oscillationis suo loco maneret. Est & alia ejusdem erroris corrigendi ratio: suspenditur pondus diversorum metallorum lamellis ita inter se connexis, ut dum altera lamella magis distenta ultra alteram itidem distentam pondusque deprimentem excurrit, ipsa pondus sursum attollat & priori altitudini restituat, in quo etiam non nihil majori ita ut ipsius virgæ centri oscillationis descensus compensetur, totiusque penduli centrum oscillationis suo persistet loco. Neque hic prætermittendum est aliud artificium non minus ingeniosum quod paucis ab hinc diebus excogitavit peritissimus horologiorum artifex Parisiensis *Lepautius*. Accuratissimis observationibus notum sit oportet quantum dilatetur virga metallica pro dato quolibet thermometri gradu; hos autem dilatationis gradus cepit *Lepautius* ex *Bougueri* & *Ellicottii* virorum diligentissimorum experimentis. Deinde curvam delineavit cujus radii inæquales virgæ dilatationibus semper forent proportionales, ita ut anguli quos radii singuli cum ipso divisionis initio continent, semper crescant ut gradus thermometri. Id vero obtineri posse evidens est descripto circulo & in suos gradus diviso, non secus ac dividitur thermometer, hoc est, in partes 40; nam Parisiis intra hos limites consistit altitudo liquoris in thermometro; patet autem hanc curvam imitari spiralem quam *archimedeam* a suo inventore dicunt Geometræ. Tandem compertum est partem centesimam lineæ in dilatatione virgæ per horas 24 id efficere ut pendulum retardet minuto uno secundo. Jam si radii centesima parte lineæ pro singulis divisionibus minuantur, manifestum est

pun-

SECTIO II. PARS I. CAP. I. 159

punctum curvæ quod quadragesimæ divisioni respondet, centro propius esse quadraginta centesimis partibus lineæ, seu duabus quintis lineæ quam sit ipsum curvæ initium. Quæ cum ita sint, in descriptam curvam flectatur lamella metallica, eaque sub ipsa horologii suspensione collocetur, aptata etiam acu quæ thermometri gradibus respondeat. Totum ergo negotium huc redit, ut pro tempore aliquo dato observetur gradus thermometri, curandumque ut acus eidem gradui respondeat. Hoc idem instrumentum alteri quoque graviori malo remedium affert. Rotarum cardines in horologiis oleo imbuuntur; olei autem particulæ æstivo tempore vi caloris solutæ fluunt, tempore autem hiberno frigoris vi constringuntur & indurescunt. Hinc liberiores vel difficiliore sunt oscillationes. Verum cum malum istud ex eadem causa pendeat, nempe ex gradu thermometri, idem quoque adhibetur remedium, augenda nempe est radiorum inæqualitas. Igitur non solum minui debet spiralis radius centesima parte lineæ seu quadragesima parte circumferentiæ totius circuli, sed multari etiam debet quantitate huic alteri effectui debita & per observationes cognita.

Supereft tandem ut de vibrationum inæqualitate aliquid adjungam. Re quidem vera horologiorum pendula in breviores longioresque arcus variis de causis sæpe excurrunt; verum arcus illos licet inæquales iisdem quam proxime temporibus describi demonstrant Geometræ; quod ut intelligatur, brevis sermo haberi debet de celeberrima quadam curva quam *cycloidem* appellant. Cyclois est curva linea quam describit punctum aliquod in circuli circumferentiâ pro lobitu assumptum, intereadum circulus totus super lineam rectam revolvitur. Hujus curvæ genesis representari solet per imaginem cla-

vi in rotæ superficie defixi ; dum nempe rota per planum circumvolvitur, clavus in aere cycloidem percurrit ; De prima cycloidis inventionē acerrime certatum est circa annum 1643. inter *Torricellium* & *Robervallium*, illo primam cycloidis considerationem tribuente in Italia *Galileo* ; hoc autem in Gallia *Mersenno* nostro. Sed quidquid sit de illa concertatione quæ in rixas apertasque inimicitias deinde exarsit, solam rei utilitatem, minime vero gloriam considerabimus. Plurimas inter & quidem elegantissimas cycloidis proprietates unam præ aliis afferemus quæ ad præsentem casum pertinet ; si nempe cyclois ita invertatur ut crura sursum tendant, punctum autem infimum horizontem tangat, tum e quavis distantia demittatur grave per ipsam cycloidem, eodem omnino tempore per arcum utcumque magnum vel parvum descendet. Itaque patet hanc cycloidis proprietatem ad pendulorum usum transferri posse ; si nempe efficiatur ut virga penduli in cycloide suas vibrationes absolvat ; hac enim arte servatur temporis æqualitas, mutata utcumque arcuum descriptorum longitudine. Illud autem commodum sequenti artificio obtineri potest. Si curvæ cuilibet ex ejus parte convexa advolvatur filum, tum evolvatur itaut pars evoluta semper tensa maneat, punctum fili quodcumque curvam quamdam lineam delineabit motu illo per aerem. Curva quam filum complectitur, dicitur *evoluta* ; curva autem quam filum in aere describit, curva *evolutione genita* appellatur. Curva genita fere semper admodum diversa est ab evoluta ; at cæteris proprietatibus cycloidis hæc addenda est sane elegans ; si nempe a summo vertice cyclois evolvatur, se ipsam generat sibi prorsus æqualem, ita ut binæ semicycloides in situ erecto positæ, & e par-

SECTIO II. PARS I. CAP. I. 161

parte convexa in ima sui parte sibi conjunctæ integram cycloidem generent . Quamobrem si binæ lamellæ semicycloidales in ima parte connexæ invertantur deorsum, itaut ima pars evadat summa, & ex ipso lamellarum angulo appendatur filum quod semicycloidis perimetro æquale sit, pondus imo filo suspensum oscillationes suas in cycloide peraget, isochronas prorsus, sive in ampliores arcus excurrant, sive brevioribus arcubus se contineant, tempore semper æquali . Hanc cycloidis proprietatem ad horologiorum usum primus omnium traduxit *Hugenius*. In horologiis vel pondus appensum, vel lamina chalibea elastica per vim contorta, motum primæ rotæ imprimit a qua in totam machinam derivatur . Jam diu in usu erat id machinarum genus, sed *Hugenius* eidem machinæ pendulum adjecit, ita ut cum illius oscillationibus celerioris rotæ motus connecteretur; dentesque singuli post singulas oscillationes procurrerent . Verum jam diximus a Geometris demonstratum esse descensus per arcus circuli minimos etiam inæquales, esse quam proxime isochronos. Quare cum minimi sint circulorum arcus a pendulis descripti, tanta non est hac in re cycloidis utilitas. Præterea in pendulis simplicibus sola gravitate sollicitatis valere quidem potest cycloidis usus; sed minus felici successu horologiis aptatur. Et quidem ad penduli vibrationes præter gravitatem concurrunt quoque motrices horologii vires quæ penduli isochronismum turbare maxime possunt . Quare minimos circulorum arcus præferendos esse ipsa quoque experientia edocti sunt horologiorum artifices. Sed hæc pauca dicta sint quantum patitur nobis imposita doctrinæ facilitas.

A R.

ARTICULUS IV.

De Corporum conflictu.

I. **T**Ria distingui debent corporum genera, *dura, mollia, & elastica*. Dura dicuntur quæ ad mutandam figuram nulla vi cogi possunt. Mollia quæ figuram ita mutant ut mutationi resiliant, eam autem amissam recuperare non nitantur. Elastica tandem dicuntur ea quæ figuram amissam recuperare nitantur. Rursus autem corpora vel sunt perfecte elastica, si nempe restituuntur eadem vi qua fuerunt compressa; vel imperfecte elastica si restituuntur vi minori. Corporum perfecte elasticorum restitutionem ita exprimere solent Physici. Dicunt nempe in corporibus perfecte elasticis, *vim restitutum æqualem esse vi compressivæ*. Has definitiones exemplo illustrabimus. Globi duo elastici sibi mutuo occurrant; primum quidem in puncto sese contingunt, sed partes contingentes & sese mutuo prementes cedunt magis ac magis ad certos usque limites, ac proinde augetur per gradus contactus magnitudo, donec partes compressæ per eodem gradus, sed velocitatis ordine inverso sese restituant & ad pristinum statum redeant. Jam ut inter corpora elastica & non elastica comparatio instituitur, fingamus corpora dura AB, Fig. 20, longa elastorum serie connexa esse; si A moveatur versus B, id fieri non potest nisi comprimantur elastra, ac proinde corpus A, agit in B per elastra interposita, atque magis ac magis hæc elastra comprimuntur, donec corpora duo æquales secundum eandem directionem velocitates habeant: in hoc autem statu nulla vis agat in elastra ac proinde vim elasticam exerent & la-

SECTIO II. PARS I. CAP. I. 163

laxari incipient, sed inverso velocitatis ordine. Itaque in corporum elasticorum conflictu considerandæ sunt actiones duæ. In prima scilicet actione res se habet non secus ac si corpora essent omni elasticitate destituta; at cessante prima actione statim altera incipit, elastra nempe restituentur eadem vi qua fuerunt compressa, si perfecta sit elasticitas. Igitur in prima actione extinguitur velocitas qua corpora ad se invicem accedebant, seu, ut vocant, velocitas *respectiva*; in altera autem actione corpora a se invicem recedunt eadem velocitate respectiva qua nempe ad se mutuo accedebant in prima actione. Unde patet motus quantitatem ab unoquoque corpore acquisitam vel amissam in prima actione æqualem esse quantitati motus acquisitæ vel amissæ in actione altera, ita ut quantitas motus per conflictum acquisita vel amissa in corporibus perfecte elasticis duplo major sit quam in corporibus perfecte duris. Quod spectat corpora imperfecte elastica idem est in prima actione effectus ac in corporibus perfecte elasticis; verum quia vis restitutiva minor est vi compressiva, minor quantitas motus in secunda actione acquiritur vel amittitur. At quia ex data corporum elasticitate, data etiam est ratio vis compressivæ ad vim restitutivam, seu ratio velocitatis respectivæ ante conflictum ad velocitatem respectivam post conflictum, evidens est quantitatem motus in prima actione acquisitam vel amissam in eadem ratione augendam esse post conflictum. Tandem quod spectat corpora molia quorum partes cedunt, sed ad pristinam non redeunt figuram, prima actio eadem est ac in corporibus perfecte elasticis vel perfecte duris; illorum velocitas respectiva per conflictum extinguitur & unius corporis instar progrediuntur, cum nulla sit

fit vis restitutiva. Illud autem discrimen inter omnia corpora probe notandum est. Corpus molle tempore finito motum suum alteri communicaret, eo scilicet tempore quo cedunt corporis partes, & ipsam corporis diametrum percurrunt, si corpus perfecte molle fingatur. At in corpore duro cujus partes cedere non possunt, unico temporis puncto indivisibili communicatur motus. Tandem in corpore perfecte elastico, tempore finito motus producitur, cedunt nempe corporis partes, & crescente compressione, motu retardato ad se invicem accedunt, donec tandem continuo agat vis restitutiva qua fit ut partes motu accelerato ad pristinam properent figuram.

II. Omnes conflictuum leges hoc uno principio innituntur; in quavis scilicet binorum corporum collisione quantum motus lucratur corpus unum secundum datam directionem, tantum quoque lucrari debet corpus alterum secundum directionem oppositam; quod quidem evidens est ex actionis & reactionis æqualitate. Porro duplex casus contingere potest; vel enim corpora tendunt ad easdem partes, vel ad partes contrarias. Si primum, quidquid motus additur corpori fugienti id detrahitur corpori incurrenti, ac proinde eadem manet tota motuum quantitas post conflictum quæ fuit ante conflictum. Si secundum, quidquid motus amittit corpus unum secundum propriam directionem, tantum quoque perit in corpore altero; illa enim corpora agunt in partes propriæ directioni oppositas. Igitur in hoc casu eadem manet differentia motuum post conflictum quæ fuit ante conflictum. Dux autem hujus principii partes ex duplici axioma arithmetico facile patent: si nempe dux fingantur quantitates ex quarum una tantum de-

detrahatur, quantum additur alteri, eadem manet quantitas summa: si vero ex duabus quantitatibus æquales hinc inde partes detrahantur, eadem manet quantitas differentia. Jam vero antequam collisionum leges ex demonstrato principio colligamus, observandum est corporum conflictum, vel *directum* esse, vel *indirectum*. Directus quidem dicitur, si corporum sibi occurrentium directio sit in eadem linea recta; indirectus autem vel obliquus appellatur si corporum directiones angulum inter se contineant. De corporum conflictu directo, deinde de indirecto agemus.

III. Si corpora duo non elastica sibi invicem occurrant ad easdem partes, vel ad partes contrarias; in utroque casu post conflictum instar unius corporis progredientur; sed in primo casu, velocitas communis post conflictum erit æqualis quantitati motus ante conflictum per summam massarum divisæ; in casu autem altero, æqualis fiet differentię quantitatum motus ante conflictum divisæ per summam massarum; si nempe corporum massæ dicantur M , m , velocitates ante conflictum V , v , velocitas communis post conflictum erit 10.

$$\frac{MV + mv}{M + m} \quad 20. \quad \frac{MV - mv}{M + m} \quad \text{Et quidem communem esse velocitatem post conflictum, seu corpora duo post conflictum instar unius corporis progredi, evidens est. Cum enim corpora illa ponantur omni elasticitate destituta, nulla est ratio cur a se invicem resiliant vel separentur. Facile etiam patet in primo casu velocitatem communem æqualem esse quantitati motus ante conflictum per summam massarum divisæ. Etenim quantitas motus eadem manet ante & post conflictum; est autem quan-}$$

titas

titas motus productum ex massa in velocitatem; habebitur ergo velocitas, dividendo quantitatem motus ante conflictum per summam massarum. Simili ratione patet in casu altero velocitatem æqualem esse differentie quantitatum motus ante conflictum per summam massarum divisæ; cum enim eadem maneat motuum differentia ante & post conflictum, sitque quantitas motus ut factum ex massa in velocitatem, evidens est ad habendam velocitatem id efficiendum esse ut nempe differentia motuum a massis liberetur, quod fit dividendo per massas. Jam hujus secundi casus aliquas condiciones expendamus. Si massæ & velocitates fuerint æquales, erit $mv = MV$, ideoque $MV - mv = 0$, quare velocitas nulla est, & ambo corpora post conflictum quiescunt. . . . Si massæ fuerint æquales, quiescat autem massa, m , erit $\frac{MV - mv}{M + m} =$

$$\frac{MV}{M} = \frac{V}{2}; \text{ corpora nempe post conflictum di-}$$

midia velocitate progredientur. . . . Si massa M quiescat, sitque valde magna & fere immedia respectu massæ, m , erit $MV = 0$, ideoque velocitas post conflictum fiet $M v$

$$\frac{M v}{M + m},$$

ac proinde physice nulla, ob massam M valde magnam.

IV. Ex demonstratis conflictuum legibus in corporibus omni elasticitate destitutis, facile colliguntur conflictuum leges in corporibus elasticis. Etenim si corpora omni elasticitate careant, ex data velocitate communi post conflictum & ex data corporum massa invenitur quantitas motus in unoquoque corpore post conflictu.

flictum, quæ si conferatur cum quantitate motus ante conflictum, habebitur quantitas motus per conflictum acquisita vel amissa. Jam vero in corporibus perfecte elasticis quantitas motus acquisita vel amissa duplo major est; in corporibus autem imperfecte elasticis mutatio motus augetur in ratione vis restitutivæ ad vim compressivam, ex demonstratis. Quare corpora elastica considerentur primum tamquam omni elasticitate destituta; atque inveniaturs quantitas motus acquisita vel amissa; utraque duplo major fiat, si elasticitas fuerit perfecta; augeatur autem in ratione vis restitutivæ ad vim compressivam, si imperfecta fuerit elasticitas, atque ita conflictuum leges pro quacumque elasticitatis hypothese determinare licebit. Has autem leges exemplis illustrabimus. Si corpora omni elasticitate destituta & æqualia ponantur, illorumque unum quiescat, post conflictum dimidiata velocitate ad easdem partes velut unum corpus progredientur, ut patet ex demonstratis. Quare corpus quiescens dimidiam motus quantitatem acquirit quam amisit corpus incurrens. Jam si corpora sint perfecte elastica, duplo major fiat mutatio motus in unoquoque corpore; ergo corpus quiescens totam acquireret motus quantitatem quam amitteret corpus incurrens quod proinde quiesceret.

Alterum consideremus casum, dum nempe corpora ad partes contrarias tendunt, & facilitatis causa ponamus corpora æqualia & eadem velocitate moveri. Si corpora non fuerint elastica, ambo post conflictum quiescunt, ac proinde totam & æqualem motus quantitatem amittunt; verum in corporibus perfecte elasticis duplo major est mutatio; quare corpora perfecte elastica non solum amittere de-
 bent

bent totam motus quantitatem secundum propriam directionem, sed contrariam & *negativam*, ut ita dicam, motus quantitatem acquirere; quare corpora ad partes contrarias a se invicem resilient æquali motus quantitate. Simili modo ad calculum revocari possunt aliæ quælibet motuum conditiones. Tandem si corpora fuerint imperfecte elastica, accuratissimis experimentis nota sit oportet ratio velocitatis respectivæ ante conflictum ad velocitatem respectivam post conflictum, atque in eadem ratione augeri debet mutatio motus. Observavit Nevvtonus in globis vitreis velocitatem respectivam ante conflictum esse ad velocitatem respectivam post conflictum ut 16 ad 15. Quare si in globis vitreis æstimari debeant conflictuum leges, hac proportionem utendum est. Cæterum in præcedentibus demonstrationibus corpora omni elasticitate destituta & perfecte dura consideravimus; qualia fortasse nulla existunt in rerum natura. Verum hanc quæstionem ad alium articulum in Physices progressu rejicimus; interim patet hanc hypothesim, falsam an veram, a nobis fingi potuisse ut in corporibus elasticis conflictuum leges eruere liceret.

V. Demonstratæ hæcenus conflictuum leges pendulorum ope ad experientiam revocari solent. Globus A vibrationes suas perficiat in circulo EAF, itemque B in circulo æquali GBH, Fig. 21, moveatur, & arcum RA descendendo, vel arcum ar, ascendendo percurrat. Demonstravimus jam velocitates in puncto infimo A fore ut sunt arcuum ascendendo vel descendendo descriptorum chordæ. Itaque effici facile potest ut corpora datis quibuslibet velocitatibus inter se congregiantur, atque ex arcuum descriptorum chordis post
con-

SECTIO II. PARS I. CAP. I. 169

conflictum, invenitur velocitas acquisita vel amissa; atque ita per experientiam probari possunt conflictuum regulæ. Verum in instituendis hujusmodi experimentis calculo subduci debet aeris resistentia quæ rem maxime turbat; in causa enim est, ut globus A descendens per arcum EA ex R, ascendendo per AF non percurrat arcum æqualem, nec iterum revertatur ad R, ut contingeret in vacuo, sed deveniat ad punctum aliquod V. Nevvtonus ad habendam velocitatem globi A descendentis in aere per arcum datum, præscribit ut sublato altero globo B, demittatur libere globus A, ex aliquo puncto R noteturque punctum V ad quod post duas oscillationes regreditur; tum pars quarta arcus RV collocetur in medio in ST, ut RS & TV æquantur inter se, nimirum ut VT ad VR sit in ratione 3 ad 8. Quod quidem ita se habere ex constructione patet; nam

$$VR = 2 DV + \frac{1}{4} VR = \frac{3}{4} TV + \frac{1}{4} VR$$

ideoque $4 VR = 8 TV + VR$, & $3 VR = 8 TV$. His positis affirmat Nevvtonus velocitatem in A globi decidentis ex S in aere eandem esse quæ foret in vacuo, si globus caderet ex T. Eodem modo si globus post collisionem ascendit ad S inveniendum est punctum V, ex quo libere demissus globus ipse A post itum & reditum ita ascenderet usque ad r, ut esset $rs = tv$, & st quarta pars totius rv, sive quod idem est, ut rs sit ad rv, in ratione 3 ad 8, affirmatque velocitatem in A fore illam ipsam qua in vacuo ascenderet ad t.

Hujus correctionis ratio facile patet. Nam RV est effectus resistentiæ aeris qui in duplici illa oscillatione debetur binis descensibus & binis ascensibus, ideoque ejus pars quarta ST

Jacq. T. IV.

H

de.

debetur soli descensui ; hanc partem in medio collocat ad habendum medium quemdam effectum ; cum nimirum bini illi descensus & ascensus non sint inter se æquales, sed primus ascensus ac secundus descensus æquales inter se, medii sint inter primum descensum & secundum ascensum. Hæc correctio exhibet velocitatem proxime solum, non accurate, quæ nimirum in exigua aeris resistentia parum a vera abluere possit ; nam ad veram velocitatem determinandam multo sublimior & adhuc incerta resistentiarum doctrina requiritur, sed in re præsentitantiæ subtilitates sub sensum non cadunt. Testatur autem Nevvtonus se plurimis experimentis diligenter institutis, invenisse experimenta ipsa doctrinæ hæcenus explicatæ omnino consentanea.

De corporum conflictu directo hæc pauca demonstrasse satis sit, ex quibus omnes conflictuum casus facile derivari possunt. Cæterum quæstionem metaphysicam de motus communicati causa paucis verbis hic iterum revocabimus. Affirmat Malebranchius motuum communicationem cum principiis physicis aut cum aliqua corporum proprietate necessario conjunctam non esse, ita ut inter corporum duorum motum seu quietem nulla major sit connexio quam inter corporum figuram, colorem &c. Hinc concludit celeberrimus metaphysicus corporis incurrentis motum causam physicam non esse cur corpus percussum moveatur, sed totam motuum communicationem divinæ voluntati illiusque immediatæ actioni referendam esse. Certum quidem est, voluntatem Creatoris, omnium naturæ effectuum ac proinde & motus communicati primam & supremam esse causam ; verum quod asserit Malebranchius inter mutuos corporum conflictus nullam majorem esse conjunctionem.

junctionem quam inter illorum figuram & colorem, id quidem parum accurate dictum est. Et certe corporis alicujus figura & color ad corporis alterius figuram coloremque nihil omnino conferre possunt. At si corpus aliquod in aliud incurrat, necesse est aliquam status mutationem contingere vel in corpore alterutro, vel in utroque corpore. Etenim cum partes corporum ob illorum impenetrabilitatem ex eodem loco sese excludant, corpus aliquod incurrens motus directionem persequi non potest, nisi corpus percussum moveatur; quod si corpus incurrens post conflictum quiescat, jam idem corpus statum mutat, transiens scilicet ex motu ad quietem. Quare oportet ut in corporibus aliqua fiat status mutatio. Res alio exemplo confirmatur. Si corpora duo æqualia elasticitate destituta sese mutuo in partes directe oppositas æquali velocitate percutiant, ambo post conflictum quiescere ex illorum impenetrabilitate colligitur; ob eam rationem quiescere etiam debent corpora, si massæ fuerint in ratione reciproca velocitatum. Quæ cum ita sint, ex ipsis corporum proprietatibus fluere videntur conflictuum regulæ. Et re quidem ipsa ex vi inertię atque ex actionis & reactionis æqualitate pendent omnes quas tradidimus, conflictuum leges. Itaque nos quidem latet quæ vi aut virtute corpora motum inter se dividant; motus enim nihil in se reale est, sed tantum aliquis existendi modus, nec facilius intelligitur motus quam quietis communicatio; *virium*, *actionum* nomina adhibent plerique Philosophi, sed obscuris vocabulis rem implicant, non explicant. Concludendum ergo est motuum communicationis principium metaphysicum ignotum nobis esse, ex corporum tamen proprietatibus pendere conflictuum leges quas

infinita sapientia ad fines in huiusmodi creatione propositos direxit & ordinavit omnipotens rerum omnium auctor & gubernator. Quamvis autem ex proprietatibus corporum pendere videantur percussione regulæ, nemo tamen temerario inferat leges illas omnino necessarias esse & ab omnipotentis Creatoris voluntate nequaquam pendere. Etenim Deus corpora omnia totumque universum libere creavit & conservat, eadem pro arbitrio destruere, annihilare, ubi voluerit iterum creare potest, ac proinde corpora omnia omnesque naturæ leges infinitæ Dei omnipotentis subordinantur. Sed hæc conferantur cum iis quæ de miraculis diximus in Metaphysica, atque etiam cum dicendis deinceps de essentialibus corporum proprietatibus.

VI. Indirectus corporum conflictus ad directum revocari potest. Sint corpora duo spherica, A, B, quæ ex locis A, B eodem tempore exeant secundum directiones AC, BC, *Fig. 22*, sitque velocitas corporis A ad velocitatem corporis B, ut AC ad BD. Describatur parallelogrammum ABHC, ducaturque DH. Centro C, & radio corporum A, B semidiametris æquali describatur arcus circuli, rectæ DH occurrens in L, I, agaturque LN parallela rectæ CA, itemque NR parallela rectæ CL; corporum duorum centra eodem tempore pervenient ad puncta N, R, tumque corpora se mutuo tangent; nam ex triangulorum similitudine DN est ad NL, vel CR, ut DB ad EH vel AC, vel etiam ut velocitas corporis B ad velocitatem corporis A. Quare spatia BN, AR, eodem tempore describentur, & corporum centra eodem tempore puncta N, R attingent. Quia vero recta NR æqualis est semidiametrorum summæ NR, evidens est corpora sese contingere

gere sibi que occurrere. Jam ducantur BM , AQ perpendiculares ad NR , erunt corporum conflictus iidem ac si corpus A velocitate RQ , occurreret corpori B velocitate MN , secundum directionem NR . Etenim velocitates corporum A , B sunt ut rectæ AR , BN . Præterea motus AR resolvi debet in duos AQ , RQ , itemque motus BN resolvitur in duos BM , MN ; sed motus AQ , BM , secundum directiones parallelas, nihil conferunt ad conflictum; quare corpora ambo, in se invicem agunt non secus ac si occurrerent sibi mutuo secundum directionem NR , cum velocitatibus RQ , MN . Itaque ex demonstratis patet motus indirectos ad directos revocari, ideoque invenietur, ut ante, corporum velocitas post conflictum secundum hanc directionem; quo facto reperietur directio composita in hunc modum. Ponatur velocitas corporis A post conflictum $= Rg$, velocitas corporis $B = Nn$, sitque Rq æqualis & parallela rectæ AQ , itemque Nl æqualis & parallela rectæ BM , compleanturque parallelogramma $RqAg$, $NlBm$, moveri pergent corpora A , B post conflictum per diagonales Rx , Nb , cum velocitatibus Rx , Nb . Quoniam ergo motus indirectus ad directum revocatur, facile patet qua ratione conflictuum leges ad corpora utcumque elastica indirectis motibus in se invicem incurrentia transferri possint; varios casus percurrere longius foret atque superfluum.

VII. Ad conflictuum leges referuntur etiam quæ de corporum reflexione tractari solent. Sit MN Fig. 23. planum immobile in quod perpendiculariter incidat globus F omni elasticitate destitutus, is post conflictum totam velocitatem amittet, ut ex dictis evidens est; cum nec in plano nec in globo quidquam sit quod

globum determinet ad regressum ; & præterea corporis progressum ipsa plani immobilitas non permittit. Adveniat globus oblique per AC, & ducta AD perpendiculari ad MN, complectoque rectangulo ADCF, motus per AC compositus intelligatur ex motibus AD, AF, quorum alter AD vel FC elidetur a plano MN, manebit autem alter AF vel DC, ac proinde globus excurrat versus N, & æquali tempore percurrat $CE = DC$, quæ erit ad AC ut cosinus anguli ACD ad radium. At si globus fuerit perfecte elasticus, in primo casu delatus per FC regredietur itidem per CF eadem velocitate qua advenerat, ut patet ex demonstratis de elasticitate perfecta. Si autem adveniat per AC, resoluta, ut ante, motu in motus duos AD, DC, vel FC, CE, globus progredietur per diagonalem rectanguli FC EB, in quo cum latera CE, EB, æquantur lateribus CD, DA, & anguli ad E, D, sint recti, patet angulum ACD qui dicitur angulus *incidentiæ*, æqualem esse angulo BCE qui angulus *reflexionis* appellatur. Si globus fuerit imperfecte elasticus & adveniat per FC, jam resiliet in F, ea scilicet velocitatis parte quæ per conflictum recuperatur, ita ut CF semper sit in data ratione vis restitutivæ ad vim compressivam. Tandem si globus oblique adveniat per AC servata velocitate per CE & recuperata velocitatis parte per Cf vel Eb, resiliet per Cb, eritque angulus reflexionis ECb semper minor angulo incidentiæ ACD. Hæc omnia quæ ex motuum compositione & resolutione facile colliguntur, vera sunt dumtaxat si ponantur conditiones quædam, nempe si planum fuerit perfecte lævigatum, ita ut mutus partium attritus nihil officiat. Præterea consideravimus corpora velut puncta, aut etiam ea spherica esse

esse postulavimus, cum sphaerae in unico puncto sese tangant. Verum si diversas corporum figuras consideremus, res est sane ardua & sublimioris doctrinae; at conflictuum leges exposuisse satis sit in corporibus sphaericis ex quibus vulgares conflictuum & elasticitatis effectus licet intelligere. Tandem monendum superest nullam nos habuisse rationem exiguae compressionis quae in ipso globorum conflictu contingit; compressio enim & reflexio fiunt per curvam quamdam, sed cum exiguus omnino sit tactus ille quo globi comprimuntur, hac de causa nihil turbantur collisionum regulae quas quidem experientia confirmat.

VIII. Ex praecedentibus regulis pendet ludus tridicularis quem dicimus *trucco*, *billard*. In eo solemus ictus reflexos determinare per aequalitatem angulorum reflexionis & incidentiae, id vero quibuldam exemplis explicare non abs re erit. I. Datis globulis duobus, P, G, Fig. 24. positione & magnitudine, per regulas praecedentes effici potest ut globulus G post unicam reflexionem pleno ictu percutiat globulum P. *Ictus plenus* dicitur, si linea jungens in conflictu globorum centra, sit in ipsa directione globi percutientis. Jam determinata sponda XT in qua fieri debeat reflexio, in ipsa tabula ducatur recta spondae parallela, ita ut spondae & parallelae intervallum globuli unius semidiametro aequale sit. Ex centro P globuli ferendi agatur ad RV perpendicularis indefinita PL, sumaturque $FL = FP$. Jam si globulus G recta via versus L dirigatur, hic post unicam reflexionem in N pleno ictu percutiet globulum P; quod quidem facile demonstratur. Nam ducta LN, manifestum est centro globuli perveniente ad N, ejus superficiem ad spondam pervenire illamque tangere, ictuque suo

reflexionem in globulo producere, ita ut centrum regrediatur in P, efficiendo angulum reflexionis æqualem angulo incidentiæ; nam triangula rectangula PNF, FNL sunt æqualia, ob latus commune FN, & latera FP, FL per constructionem æqualia. Ergo $\text{angulus FNP} = \text{FNL}$; sed $\text{angulus FNL} = \text{GNV}$, quare cum sit GNV angulus incidentiæ, & PNF angulus reflexionis, globus G post reflexionem in N percutiet globulum P in directione NP per centrum transeunte. Quia vero quatuor sunt in tabula tridiculari spondæ, evidens est quatuor modis rem perfici posse

2. Datis duobus globulis, A, B, positione & magnitudine, pleno ictu feriri potest globulus B post duplicem reflexionem. Etenim determinatis spondis duabus XT, XM, in quibus faciendæ reflexiones proponuntur, ducantur parallelæ RV, RO quarum distantia a sponda sit globulorum semidiametro æqualis; ex centro B globuli ferendi demittatur perpendicularis Bl ad primam spondam XT, sumaturque $f = fB$. Ex puncto l. ad rectam RO productam in D ducatur perpendicularis lE, sumaturque $DE = Dl$. Deinde recta dirigatur globulus A versus E, hic pleno ictu feriet globulum B post duas reflexiones in C & n, ut patet ex demonstratione præcedenti. Si autem tres vel quatuor reflexiones proponantur, eadem operatio iterari debet. E. G. Si globulus A ponatur in L, evidens est rem obtineri posse hoc modo. Invento puncto E secundæ reflexionis, ducatur EH perpendicularis ad ST productam in H, sitque ST parallela spondæ & ab ea distet intervallo quod globi semidiametro æquale sit; sumatur $Hl = HE$, globusque L recta dirigatur versus I, obtinebuntur tres reflexiones in K, C, N; 3. Datis

tis duobus globulis A, B *Fig. 25.* impelli potest globulus A versus punctum datum C, & mitti in cavum datum C, atque etiam globuli B via post ictum invenietur. Per centrum cavi vel per punctum datum C & per centrum globi A ducatur recta indefinita CO, occurrens in I superficiei globuli cavo oppositæ. Sumatur IE = AI agaturque per E recta indefinita DG perpendicularis ad CE. Jam si globus recta via dirigatur ad E, hic impellet globum A secundum directionem AC, & post conflictum progredietur per EG. Etenim si per punctum I ducatur IY parallela DG, evidens est rectas illas inter se distare intervallo semidiametri globi B, ideoque globus ille adveniens in E tangit globum A in I illumque impellit secundum directionem EI quæ transit per punctum C (ex constructione). Quia vero globus A quiescit ante conflictum, & globo B æqualis est, vis relativa qua globus B ipsum A offendit, & expressa per OE perpendicularem ad DG & ipsi BD æqualem, tota extinguitur per conflictum; globo B superest dumtaxat vis secundum BO parallelam DE vel IY, ac proinde post conflictum globulus B abit per EG....

4. Datis duobus globulis H, F, positione & magnitudine, effici potest ut globulus F post varias, ut libuerit, reflexiones globulum H impellat secundum directionem HK, vel mittat in cavum K, atque etiam invenietur directio globuli F post conflictum. Per punctum K & per centrum H globuli ducatur recta indefinita KM, superficiei globuli puncto K oppositæ occurrens in S. Fiat SB æqualis SH, ducaturque PQ perpendicularis ad KP, mittaturque, ut ante, globulus F ad punctum P, post plures, ut libuerit, reflexiones jam globus F impellet globum H versus K ut patet, & globulus F

H,

ut

ut in casu præcedenti post conflictum progredietur per rectam PQ. Eodem fere modo effici potest ut globus H in dato puncto S feriatur post datum quemlibet reflexionum numerum, atque inveniri poterit utriusque globi directio post conflictum. Nam per punctum datum S & per centrum H ducatur recta indefinita MSK, erit SK directio globuli H post conflictum; sumatur ST æqualis SH, & post varias pro arbitrio reflexiones, centrum globi F mittatur in P, tunc globus F tanget globum H in puncto dato S, & deinde per directionem PQ progredietur. Hæc dicta sint de subtilioribus ludi tridicularis legibus; neque enim dedecet religiosos studiososque viros ad moderatam animi relaxationem honestos ludos adhibere; mens enim citra culpam & innoxie recreata vires acquirit atque ad sua officia alacrior redit.

IX. Ex his omnibus quæ in toto præsentī capite explicavimus nascitur quæstio de *viribus vivis* magna animorum contentione agitata ubique gentium. Leibnitius occasione arrepta ex corporum ascensu uniformiter retardato hanc controversiam primus invexit, quam deinde corporum elasticorum collisione aliisque plurimis argumentis tueri conati sunt magni quidem viri. Cum videret Leibnitius corpus dupla vel tripla velocitate projectum sursum ascendere ad altitudinem quadruplo vel noncuplo majorem, censuit distinguenda esse bina virium genera; illarum scilicet quæ etiam sine motu habentur, ut est vis gravitatis, vis elastica quæ meram pressionem gignunt ubi oppositis viribus impeditur motus; has vires idcirco vires *mortuas* appellavit, quo nomine eas discernere voluit a viribus in corpore motum aliquem habente admittendis, quarum effectus sit ut ve-

lo-

locitatis quadratum, easque idcirco vires *vivas* nominavit. Eandem virium distinctionem ex corporum elasticorum collisione confirmant Leibnitiani; cum enim in globis elasticis in se invicem utcumque incurrentibus, productum ex quadrato velocitatis in massam idem inveniat post collisionem, quod erat ante, inde inferunt in corporibus esse aliquid quod respondeat massis ductis in quadrata velocitatum, quod illæsum remaneat, & ab uno corpore in aliud transeat, vim scilicet vivam quæ perpetuo conservatur. Mirum sane quam multas hæc quæstio contentiones excitavit, aliis vires vivas æstimantibus ex massa & simplici velocitate, aliis ex massa & velocitatis quadrato. Pro quadrato velocitatis Leibnitiani omnes in Germania steterunt, pro simplici velocitate Carthesiani in Gallia, Nevvtoniani in Anglia, apud Italos divisa studia. Verum quamvis inter celeberrimos viros etiamnum hodie acrius ferveat philosophica lis illa, eam tamen in solo nomine positam esse mihi facile persuadeo. Et quidem in memoriam revocandum est quod sæpius monuimus, vis nomen ambiguum omnino esse, nullamque distinctam notionem habere nisi effectum aliquem intelligamus. Itaque vis nomine nihil aliud clare significari potest nisi illa proprietas qua fit ut corpora ad motum concitata, vel obstacula superent vel iis resistent. Quo major est superata obstaculi alicujus resistentia, eo major censetur vis, quo quidem vocabulo nulla entitas corpori inhærens intelligi debet, sed merum factum seu effectus. His jam explicatis, corporum motibus opponi possunt tres obstaculorum species. Vel enim insuperabilia sunt obstacula ita ut omnem qualemcumque destruant motum; vel obstacula eam dumtaxat præbent resistentiam quæ ad

extinguendum corporis motum satis sit, illumque statim extinguit, ut fit in æquilibrio; vel tandem obstacula paulatim & per gradus motum destruant, ut fit in motu retardato. Quia autem obstacula insuperabilia motum omnem sistere valent, ad corporum vires æstimandas nihil conferre possunt; itaque superest ut virium mensuram aut in æquilibrio aut in motu retardato investigemus. Quod æquilibrio spectat, motus quantitates æquales esse consentiunt omnes, ac proinde vires in hoc casu ex sola velocitate æstimandas esse fateantur necesse est. Neque etiam repugnat in motu retardato vires ex motus quantitate æstimari. Etenim si vis nomine intelligatur resistantiarum summa quam obstacula quælibet corporum motibus afferunt, jam nulla difficultas esse potest; & quidem evidens est quantitatem motus amissam tempore infinitesimo esse ut productum ex resistantia in tempus infinitesimum, ac proinde resistantia tota est ut productorum illorum summa, sive ut tota quantitas motus amissa. Porro virium notioni convenientissimum est vim corporum hoc modo æstimare; nullam enim obstaculi ideam habemus, nisi quatenus resistit, ac proinde resistantiarum summa sive quantitas motus amissa quæ eidem resistantiæ proportionalis est, considerari potest tamquam obstaculum superatum, ac proinde vires vivæ hoc modo consideratæ ex producto massæ in velocitatem æstimari debent. At si nomine vis vivæ intelligatur alter effectus, puta numerus obstaculorum quæ superantur, jam alia prodit virium mensura. Etenim ponamus globum aliquem projici in elastrorum seriem velocitate duplo, triplo majori; in primo casu elastrorum compressorum numerus erit quadruplo major, in casu secundo erit major noncu-

plo

SECTIO II. PARS I. CAP. I. 181

plo, & ita deinceps, quod facile patet; nam quo majus est spatium percursum, eo major est elastrorum quæ in spatio continentur, numerus, ac proinde numerus elastrorum est ut spatium percursum; hoc est, ut quadratum velocitatis. Itaque patet totam quæstionem huc revocari, an vires vivæ æstimari debeant ex primo vel secundo effectû, nempe ex ipsa resistentiarum summa vel ex ipso obstaculorum numero. Præterea observandum est effectum aliquem majorem longiori tempore produci. Ita si diversis velocitatibus in exemplo præcedenti projiciantur globi contra plura elastra, globus qui dupla velocitate projicitur, quatuor elastra comprimit, sed longiori tempore scilicet duplo, ac proinde mirum non est quod dupla velocitas tempore duplo effectum quadruplum producere debeat. Pari ratione corpus sursum projectum velocitate duplo majori ad quadruplam altitudinem ascendit, sed tempore duplo. Hæc ergo altera est quæstionis ambiguitas, an scilicet in virium effectibus æstimandis haberi debeat ratio temporis vel non; hæc autem considerationes ex Physicorum arbitrio omnino pendent. Hac facta distinctione & accurate constituta virium definitione, jam omnibus quæ proponi solent, argumentis statim parata est responsio. Neque immorandum est principio quod *virium vivarum conservationem* appellant; nempe in globorum elasticorum conflictu productum ex quadrato velocitatis in massam invenitur idem ante & post collisionem. Principium illud ex sola elasticitatis natura atque ex actionis & reactionis æqualitate unice pendet. Et quidem si globi non fuerint perfecte elastici velocitatum quadrata ac proinde & vires vivæ non servantur. Hanc quæstionem *logomachia* laborare non solum demonstrant ratiocinationes jam explicatæ,

tæ, sed magis ac magis manifestum fiet, si rem ita consideremus; nempe corpus vel tendit dumtaxat ad motum obstaculo aliquo impeditum, vel revera movetur velocitate uniformi, vel tandem illius motus obstaculo aliquo retardatur ac tandem omnino extinguitur; in his omnibus casibus diversus est effectus a corpore productus, corpori tamen nihil novi accedit, sed illius actio dumtaxat varie applicatur. Itaque dum dicitur vim corporis in certis casibus esse ut velocitatem, in aliis ut quadratum velocitatis, nihil aliud significatur nisi effectum in quibusdam casibus esse ut velocitatem, in aliis autem ut quadratum velocitatis; atque etiam probe notanda est *effectus* significatio quæ ut plurimum vaga est & definitione indiget. Et quidem in tribus enuntiatis casibus effectus vocabulum diversam habet significationem; in primo casu solam tendentiam exprimit; in secundo spatium dato tempore descriptum & constans designat; in tertio tandem casu spatium usque ad motus totius extinctionem percursum denotat; in his autem casibus singulis nulla habetur ratio temporis quo actio consumitur. Accurate ergo notandum est corporis *tendentiam* ad motum prout est diversimode applicata, varios producere effectus, quorum alii sunt velocitati, alii autem velocitatis quadrato proportionales. Ex his patet quo sensu intelligi debeat vulgatissimum axioma: *cause suis effectibus sunt proportionales*: obscure quidem enuntiatum est axioma illud, cum eadem causa diversos effectus producere valeat. Igitur ita restringi debet hæc propositio, ut nempe effectus causas suis proportionales sint, si causæ eodem modo agant; quod quidem probe observandum est; persæpe enim fit ut principium illud quod est omnino inutile vel saltem vago modo express-

pressum, incautos Philosophos in paralogismos adducat. Hæc satis dicta sint de celeberrima controversia, quæ licet superflua omnino & inter *logomachias* rejicienda videatur, præstantissimis utilissimisque operibus occasionem dedit.

A P P E N D I X.

*De quibusdam capituli præcedentis
utilitatibus.*

I. **D**E corporum descendantium motu uniformiter accelerato in præcedenti capite sermonem habuimus. Ex demonstrata accelerationis lege statim intelligitur quantus debeat esse corporis ex alto delapsi impetus, quem quidem maximum esse oportet in minimo etiam corpore, dummodo tamen maxima sit descensus altitudo. Hic igitur prætermittendum non est luculentissimum divinæ providentiæ argumentum; cum enim minimæ aquæ guttulæ, levissimique nivis flocculi aut grandinis globuli ex alto cælo delabantur, durissimas etiam cervices nostras tanta vi facile frangerent, nisi Deus optimus maximus, opposita aeris resistentia, nostræ conservationi providere voluisset. Maximam fluidarum particularum percussione vulgatissimo experimento exhibere solent Physici. Tubus vitreus aliqua ex parte aquam continet, pars autem superior aere vacua est; tubus hoc modo comparatus manu agitur ita ut aqua ad partem tubi superiorem ascendat & deinde in fundum recidat. Aqua fundum percutiens minima licet quantitate & ex minima altitudine, lapidis ictum sonumque imitatur, atque tubus paulo vehementiori manu succussus in frustra dissilit, qui vix levissimum ictum excipit, si aerem contineat. Id autem, oblata
occa-

occasione pro religioso institutionum nostrarum fine breviter observatum sit.

Quamvis autem tales nobis proponamus erudiendos auditores qui non armorum strepitum, sed religionis pacem amare debent, explicatæ tamen doctrinæ in arte *ballistica* sive *tormentaria* utilitatem exponere licebit. Sit AL altitudo ex qua grave descendens, velocitatem acquireret projectionis velocitati æqualem; tempore quo grave descendit per AL, Fig. 26, percurreret motu uniformi spatium duplum ipsius AL, puta AI. Erit autem, ex antea demonstratis EQ ad AL ut quadratum temporis per EQ, quod idem est ac tempus motus æquabilis per AE, ad quadratum temporis descensus per AL, quod idem est ac tempus motus æquabilis per AI, ideoque ut quadratum AE ad quadratum AI, sumptisque AL, AI, AV, continue proportionalibus, hoc est, sumpta AV. quadrupla ipsius AL, erit rectangulum ex AL, AV æquale quadrato ipsius, AI, ac proinde ductis extremis & mediis habetur $EQ \times AL \times AV = AL \times AE$ sive $EQ \times AV = AE$, & $AV : AE = AE : EQ$; quare rursus patet gravia horizontaliter vel oblique projecta parabolam describere. Ex hac demonstratione tota pendet ars ballistica, atque ad facilem usum comparari poterunt tabulæ quarum ope data vi pulveris pyrii, datisque loci ferendi distantia & altitudine invenietur elevatio *Mortarii*, sive quod idem est, angulus quem directio globi tormentarii efficit cum horizonte.

Nihil hac in re brevius & elegantius legitur quam quod tradidit D. De Maupertuis in Mon. Paris. an. 1731. hoc fere modo; rem analytice exprimamus. Sit $AE = r$, $EA = z$, $AL = a$, ideoque $AV = 4a$, erit $EA \times AV = 4az$, & $AE = r$, ac proinde habetur æquatio ad

pa-

SECTIO II. PARS I. CAP. I. 185

parabolam $v^2 = 4az$. Jam vero parabola AQ
 ad lineam horizontalem AB facile refertur.
 Linea *jaetus* AE, ut vocant, sive directio mor-
 tarii cum horizonte AB, datum efficit angu-
 lum cujus tangens dicatur, n , sitque $AH =$
 x , $PM = y$; sumpto AH pro radio $= 1$,
 erit AH ad HE ut radius ad tangentem, ac pro-
 inde $HE = nx$. Igitur $EQ = EH - QH =$
 $nx - y$, & $AE^2 = AH^2 + HE^2$, hoc est, tt
 $= xx + nn xx$. Quare si in prima æquatione
 $tt = 4az$, loco tt & z , substituuntur præceden-
 tes valores, habebitur $nn xx + xx = 4nax -$
 $4ay$. Jam hujus formulæ usum consideremus.
 Data sit distantia horizontalis loci ferendi AC
 $= b$, ejus altitudo CP $= c$, in præcedenti
 æquatione erit $x = b$, $y = c$. Quare muta-
 bitur in hanc $nn + bb = 4nab - 4ac$. Hinc
 per radicem extractionem & vulgares æquatio-
 num regulas facile invenitur directio mortarii

$$n = \frac{2a}{b} \pm \frac{1}{b} \sqrt{4a^2 - 4ac \cdot b^2}, \text{ ubi signum } \pm \text{ de-}$$

signat signum positivum vel negativum, ac pro-
 inde patet duplicem esse posse mortarii directio-
 nem. Etenim sive adhibeatur signum $+$ sive
 , restitutis quadratis, eadem redit æquatio.

Si locus P, sit in horizonte, jam evanescit
 PC, ideoque $n = \frac{2a}{b} \pm \frac{1}{b} \sqrt{4aa - bb}$. Si lo-

$$\text{cus P, sit infra C, erit } n = \frac{2a}{b} \pm \frac{1}{b} \sqrt{4aa -$$

$4ac - bb}$. Si data sit directio mortarii, erit, a

$$= \frac{nn bb + bb}{4nb - 4c};$$

quare invenietur velocitas

projectionis, seu vis pulveris pyrii. Itaque pa-
 tet ad usum ballisticæ artis faciles expeditæque
 tabu-

tabulas imperitis etiam militibus parari posse ope hujus formulæ, quæ quidem ipsa sola continet quidquid in magnis voluminibus scriptum invenitur, atque eam ob causam prætermittere nolui hoc elegantissimum problema ex primis algebrae principiis facile intelligendum. Cæterum in doctrina ballistica hætenus explicata nullam aeris resistentis habuimus rationem, quam expertissimi quidam viri considerandam esse affirmant, alii vero negant. Quare in hac interperitissimos etiam viros opinionum varietate, nova experimenta diligentius iteranda esse censeo. Porro hoc quidem certissimum est resistentiam maxime minui, si globus missilis sub exiguo volumine maximum pondus contineat, ac proinde in hoc casu experimenta ad doctrinæ veritatem magis accedunt.

II. In hoc ipso capite pendulorum doctrinam explicavimus; hæc autem est maxima pendulorum utilitas ut accuratam exhibeant temporis mensuram. In motu quærendam esse temporis mensuram demonstravimus in Metaphysica. Si motus sit uniformis, spatii descripti partem accipimus pro unitate & deinde æquales ejusdem spatii partes consideramus. Tempus quod hoc modo per motum uniformem metimur, tempus *medium* & *uniforme* appellamus; at tempus *apparens* & *verum* dicitur externa quælibet & sensibilis per motum temporis mensura, qua vulgus vice veri temporis utitur, ut hora, dies, mensis, annus. *Æquatio temporis* vocatur differentia inter tempus verum & tempus medium. *Æquabilem* censent Astronomi diurnum communem motum, qui ex diurna terræ revolutione circa proprium axem oritur; at inæquale est temporis intervallum inter binos appulsus solis ad meridianum; illud autem temporis intervallum *diem astronomicam* vocant.

Sit

SECTIO II. PARS I. CAP. I. 187

Sit S , Sol *Fig. 27*, AB , portio orbitæ telluris, linea, MD , repræsentet meridianum aliquem, cujus planum productum transit per centrum solis, dum tellus versatur in A . Progrediatur deinde tellus in sua orbita per arcum AB ad B , interea dum completur una telluris revolutio circa axem; completa revolutione meridianus, MD , perveniet ad situm, md , priori, MD , parallelum, ideoque meridianus in hoc statu nondum per solem transit, neque incolis qui sub meridiano illo degunt fiet meridies, sed oportet ut meridianus, dm , motu angulari feratur describatque angulum dBf , donec meridiani planum per centrum solis transeat. Exinde fit ut dies solares una telluris revolutione circa axem longiores sint.

Si meridianorum plana ad orbitæ terrestris planum normaliter insisterent, & tellus æquali semper motu orbitam suam percurreret, post peractam a meridiano aliquo revolutionem, ob md , MD , parallelas, angulus, dBf , esset æqualis angulo, BSA , & arcus, df , similis arcui AB , atque, ob tempora semper æqualia, arcus AB , ac proinde angulus, dBf , esset sibi semper æqualis, ideoque dies omnes solares æquales essent, tempusque apparens cum medio congrueret. At res longe aliter se habet; inæqualis enim est telluris velocitas, quæ in motu annuo est reciproce ut perpendicularum ad tangentem demissum, ex antea demonstratis. Præterea meridianorum plana non sunt ad eclipticam; sed ad æquatorem normalia. Sola hæc causa, dempta etiam terrestri motus inæqualitate, dierum inæqualitatem produceret; nam ecliptica efficit cum æquatore angulum $23^{\circ} \frac{1}{2}$; si autem dividatur ecliptica in exiguos arcus æquales qui solis iter, posito ejus motu uniformi, singulis diebus repræ-

præsentent , ductis per polos mundi , & per singula divisionum puncta circulis meridianis , æquales non sunt æquatoris arcus his meridianis comprehensi , ac proinde nec æquale semper est temporis intervallum inter binos appulsus solis ad meridianum . Hic autem pro commoditate majorique facilitate , modo telluris , modo solis motum adhibemus ; res enim perinde se habet quoad motum apparentem .

Quæ cum ita sint , etiamsi fingamus solem uniformi motu in eccliptica progredi , non tamen per binos appulsus solis ad meridianum definiri potest tempus medium . Itaque adhibent Astronomi fictitios quosdam dies inter se æquales , & inter longiorem , breviorisque diem medios ; quod ut efficiant , numerum horarum quibus sol in eccliptica defertur , considerant , tempusque totum in tot dividunt partes quot sunt horæ , quarum 24 diem integram constituunt . Quoniam autem nullum novimus in natura corpus , quod motum perfecte æquabilem conservat , qui tamen motus solus idoneus est ad dies , horasque æquales connotandas , fingunt Astronomi aliquod sidus quod in æquatore versus orientem semper incedat , & motum suum nusquam intendat aut remittat , sed uniformiter æquatorem percurrat eodem tempore , quo sol ecclipticam videtur describere . Talis sideris motus tempus æquale & verum repræsentabit , ejusque motus in æquatore diurnus esset $59^{\circ} 8'$ qualis scilicet est medius solis motus in eccliptica , ac proinde dies æqualis & medius per appulsus hujus sideris ad meridianum definitus , æqualis erit tempori quo tota circumferentia æquatoris , seu gradus 360 per meridianum transiunt , & insuper $59^{\circ} 8'$; hoc autem addita-

men-

SECTIO II. PARS I. CAP. I. 189

mentum idem semper manet , ac proinde dies omnes medii inter se æquales erunt . Cum ergo sol inæqualiter secundum æquatorem orientem versus promoveatur , aliquando citius hoc fidere ueridianum attinget , aliquando serius ad eundem appellet . Hæc differentia ea ipsa est quam *temporis æquationem* appellavimus ; hæc autem aliquando ablata , aliquando addita , evidens est tempus medium revocari ad verum , & viceversa verum ad medium . Porro hæc æquatio excurrit per 31 partim hinc , partim inde , ita ut inæqualitatum omnium summa quadrantem horæ superet dimidio minuto . Itaque dierum astronomicorum inæqualitatem explicavimus .

Ejusdem generis inæqualitas habetur etiam inter binos appulsus ad horizontem , quod temporis intervallum diei italicæ durationem definit ; sed in hac temporis mensura , multo major est inæqualitas ob multo majus discrimen inclinationis ecclipticæ ad horizontem . Hic apud nos Romæ horum dierum tanta est inæqualitas ut tres horas superet , atque inde fit ut horologium quod æquabili motu feratur , accurate referre non possit per totum annum nec astronomicas & communes Europæ horas , nec Italicas , sed accelerari debeat identidem & retardari , vel index jam promoveri , jam retrahi ; sed hoc incommodum in communi Europæ horologio multi minus est quam in Italico . Hic autem , data occasione prætermittenda non est sæpius renovata ab imperitis hominibus controversia de horologii Italici cum Astronomico consensu , & de hora meridiei quæ in hoc stabilis est , in illo variabilis ; dierum inæqualitatem non perpendunt hi pertinacissimi viri , quod indoctorum hominum vitium est , & ab infantia

tia ipsas horas considerarunt tamquam certam quamdam & constantem mensuram quæ 24 vicibus repetita diem compleat. Inde autem fit ut crasse errent & in conciliandis italicis astronomicisque horis sese varie implicant. Illud tandem adjiciendum, stellarum fixarum regressum ad meridianum & ad quemvis cælestis sphaeræ circulum eodem quam proxime fieri tempore quo diurna revolutio peragitur; cum stellæ proprios motus perquam exiguos habeant, ita ut in singulis conversionibus discrimen ab æquali diurni motus intervallo sensum omnem penitus effugiat; sed motus illos deinde explicabimus in Astronomia. Explicata temporis æquatio non solum adhibetur ab Astronomis, sed etiam ad ordinanda in usu civili horologia usurpatur. Hinc intelligitur qua de causa pendulum quod tempus medium demonstrat, non consentiat cum sole qui tempus verum indicat, sed modo citius eat, modo tardius. Eadem de causa mirari minime debemus quod horologia etiam assabre elaborata cum horologiis solaribus non convenient; hinc *solem dicere falsum* audent Astronomi. Hæc pauca indicasse satis sit; quæ subiecto Tyronum oculis terrestri vel cælesti globo debent explicari.

III. Horologia pendulis instruere primus omnium docuit Hugenius in opere immortali: *De horologio oscillatorio*; quod quidem præclarissimum inventum eximiam hujus capitis utilitatem satis demonstrat; pauca igitur de horologiorum structura & ex præcedentibus facile colligenda hic adjungam. Pendula horologiis ita communiter aptari solent. Rotam quam vocant *occursus* horizontaliter volvitur ac proinde *librator* supra rotam extenditur, ejusque *pinne* duæ quarum plana angulum rectum comprehendere solent, ita denticulis inseruntur, ut
pin-

SECTIO II. PARS I. CAP. I. 191

pinna altera denticulo impellatur, dum opposita a suo denticulo se eximit; id autem facile obtinetur, si rota numerum imparem denticulorum habeat, & libratoris axis per centrum rotæ transeat. Facilitatis ergo consideremus horologium duabus tantum rotis instructum; prima seu inferior rota 120 denticulos habere ponatur eaque duas circulationes intra horam fingatur absolvere; hæc ergo æquivalet rotæ denticulorum 240. Secunda rota habeat rotulam denticulorum 5; dum quinque denticuli majoris rotæ transeunt, unam circulationem secunda rota absolveret. Jam per divisionem inveniendum est quoties quaternarius numerus contineatur in 240, *quotiens* erit 48; quare intra horam, secunda rota circulationes 48 absolveret. Ponatur autem secundam rotam constare 35 denticulis quorum quilibet duas vibrationes efficit, cum bis libratores attingat; quare singulis circulationibus efficiet vibrationes 70. Jam multiplicetur numerus 70 per 48, habebuntur 3360 vibrationes simplices intra horam. Calculus perinde se habet, si eadem manente rota inferiori 120 denticulorum, mutantur rotula & secunda rota. Itaque prima rota sit denticulorum 120 quæ duas circulationes intra horam efficiat, ideoque æquivalet rotæ denticulorum 240; rotula secunda sex habeat denticulos; dividatur numerus 240 per 6, *quotiens* erit 40; quare secunda rota quadragesies intra horam rotatur; habeat autem denticulos 45; & quia, ut jam dictum est, denticulus quilibet singulis circulationibus bis libratores attingit, duplicetur is numerus, fientque 90, quæ multiplicentur per 40 & habebuntur vibrationes simplices intra horam 3600, hoc est, vibratio quælibet simplex minutum secundum æquabit.

Si-

Simili ratione initur calculus pro alio quolibet rotarum numero. Instruētum ponatur horologium rotis tribus quarum prima dentes 112 habeat, secunda rotula dentes 7, rota secunda 60; rotula seu axis tertiæ rotæ habeat denticulos 8, rota occurfus 15, hoc modo habebitur vibrationum numerus. Dividatur 112 numerus denticulorum primæ rotæ quæ singulis horis semel circumvolvitur per 7, nempe axem secundæ rotæ, inveniatur rotam secundam intra horam decies sexies circumvolvi; habet autem hæc rota denticulos 60; quare multiplicentur 16 per 60, inveniuntur 960; ideoque intra horam 960 denticuli rotæ secundæ transeunt, qui numerus dividendus est per 8, axem tertiæ rotæ, quæ proinde 120 circumvolutiones absolvet. Habet autem hæc rota 15 denticulos qui vibrationes simplices 30 perficiunt; quare multiplicentur 30 per 120, inveniuntur vibrationes simplices 3600, quarum una minuto uni secundo æquivalet.

Ex his omnibus intelligitur praxis horologiorum artificibus vulgatissima; quærunt scilicet numeros qui exprimunt quoties numerus dentium rotæ alicujus denticulos rotæ alterius contineat; illos autem numeros *exponentes* vocant. Itaque ex demonstrata pendulorum doctrina determinari debet numerus vibrationum penduli dati, quo tempore rota aliqua circulationem unam absolvit; quod quidem facile habetur, cum sit numerus vibrationum dato tempore peractarum in ratione subduplicata inversa longitudinis penduli. Numerus vibrationum inventus dividatur per 2, quotiens erit productum ex omnibus exponentibus; sive quod idem est, duplum productum ex singulis exponentibus æquatur numero vibrationum penduli, durante una rotæ inferioris revolutione, ut

SECTIO II. PARS I. CAP. I. 193

ut ex dictis evidens est . Itaque si construendum proponatur pendulum aliquod rotis instruendum , primo notum esse oportet numerum vibrationum penduli , quo tempore rota una suam circulationem perficit ; tempus illud ponatur unius horæ , pendulumque ad minuta secunda suas oscillationes componat , ita ut singulæ vibrationes sint minuti unius secundi , seu pars

$\frac{1}{3600}$ unius horæ . Itaque interea dum rota semel circumvolvitur , pendulum absolvet vibrationes 3600 , qui numerus erit duplum productum ex singulis exponentibus . Quare si exponentes dicantur r, s, t , erit $3600 = 2rst$, ac proinde $1800 = rst$. Quia vero exponentes r, s, t sunt quantitates indeterminatæ , patet id effici posse ut nempe rota occurfus eundem circulationum numerum dato tempore conficiat , mutatis rotarum axiumque dentibus , dummodo productum ex singulis exponentibus idem maneat . E. G. Ponamus horologium pluribus instructum rotis quarum una denticulos habeat 48 , dentibus 8 donata sit rotula cuius axi affixa sit rota dentibus 40 instructa , habeatque rotula dentes 6 , & illius axi inferatur rota dentium 36 , quæ cum rotula dentium 6 , connectatur ; cum hac rotula jungitur tympanum vel rota occurfus , numerus circulationum rotæ occurfus , intereadum prima rota circulationem unam absolvit, erit $\frac{48}{8} \times \frac{40}{6} \times \frac{36}{6} = 240$; Si au-

tem alii adhibeantur numeri $\frac{64}{10} \times \frac{30}{8} \times \frac{36}{10} = 240$, alia prodit rotarum series priori æquivalens . Ex his paucis derivari possunt plurima ad praxim utilissima . Cæterum unusquisque facile intelligit explicatam rotarum combinationem non solum valere in majoribus horologiis pondere appenso sollicitatis , sed etiam in horologiis

Jacq. T. IV.

I

por-

portatilibus quæ elastico aliquo moderantur .
Hæc autem omnia subiecto auditorum oculis
horologio exponi debent .

C A P U T I I.

*De extensione & reliquis inde pendentibus cor-
porum proprietatibus .*

SUB duplici ratione considerari potest exten-
sio, vel quatenus est *sensibilis* seu, *physica*;
vel quatenus est notio *abstracta* seu *metaphysi-
ca* . Extensio primo modo considerata, est ef-
fectus certa corporum actione in organis corpo-
reis productus, quo fit ut corporum superficies
tactu percursæ, plures a se invicem diversas
partes seu varias partium distantias nobis re-
præsentent . Extensio considerata quatenus est
notio *abstracta*, est ipsa notio materiæ a qua-
litatibus sensibilibus, & quibuscumque limiti-
bus per mentem separatæ . Hæc altera exten-
sionis species ad Metaphysicam proprie pertinet
& spatii *imaginarii* nomine generatim venire
solet . Si autem spatium undequaque expansum
certis corporum distantis, atque intervallis re-
stringamus & limitemus, spatium illud deter-
minatum dicitur *vacuum* . Itaque duplex ex-
tensio rursus intelligi potest, *penetrabilis* & *im-
penetrabilis* . Extensio penetrabilis, seu vacuum,
illa est quæ corpora admittit; impenetrabilis
autem vel *soliditas* quæ corpora excludit . Evi-
dens autem est *figuram* nihil aliud esse quam
diversam partium extensionem diversumque or-
dinem, ac proinde ad idem caput referri po-
test corporum *figurabilitas* . Quare totum caput
illud in quatuor articulos dividemus . 1. Erit
de extensione penetrabili . 2. De impenetrabili .
In 3. de corporum figurabilitate differemus .

In

SECTIO II. PARS I. CAP. II. 195

In 4. tandem explicatis octo universalibus corporum proprietatibus , de corporis natura ultimum articulum adjungemus.

ARTICULUS I.

De extensione penetrabili.

I. **C**ertissimum est nullam extensionis etiam penetrabilis notionem sine corporum interventu , sine tactu & motu nos acquirere . Etenim fingamus hominem sensuum omnium facultatibus præditum , qui tactus organum in unicam duntaxat materiæ portionem sine ullo motu exercuerit , extensionis notione careret talis homo , eamque acquirere inciperet , ubi primum moveretur . Et re quidem ipsa , corporis alicujus extensionem non cognoscimus , nisi tactus organo ipsam corporis superficiem continue & successive percurramus . Neque satis est ipsam corporis superficiem moveri , interim quiescente organo , ipsum quoque organum moveri necessum est . Etenim per motum extra propriam existentiam , ut ita dicam , erumpimus , objecta externa agnoscimus , illorum dimensiones , distantias novimus . Ad extensionis notionem ita necessario pertinet motus , ut existente etiam unica atomo , extensionis notionem possimus acquirere , si tactus organum moveretur & successive ab illa atomo in diversis punctis afficeretur ; etenim organi motus , & *impressionis successive* continuitas ipsam atomum veluti multiplicant atque extendunt .

Re quidem vera extensionis sensatio per visus organum nobis etiam advenit , oculus amplissimum spatium ad quod tactus non pervenit , longe lateque amplectitur , instrumento-

rum ope maximas etiam objectorum distantias metitur. Verum id fieri non potest, nisi oculus tactu fuerit edoctus, quod quidem demonstrat exemplum cæci nati qui ablata cataracta oculorum usum acquisivit. Hanc historiam narravimus & explicavimus in Metaphysica, ubi de extensionis & spatii notione plura tradidimus. Id ergo compertum est, sine tactus exercitio, nullum de objectorum dimensionibus, formis, distantis, extensione fieri posse iudicium. Neque extensionis ideam formare quis posset, etiamsi objectorum imagines in fundo oculi delineatas moveri fingamus; hi enim apparentes motus, simplici *successionis* notioni originem præberent, non secus ac faceret tonorum vel odorum series, quæ successive auditus vel olfactus organa afficeret; sed nulla motus realis ac proinde & extensionis notio nasci posset. At tactus organum in ipsam materiam immediate agit, dimensiones formasque corporum sentit, & quandam experitur resistantiam quam ad aliquid extra nos existens referre cogimur,

II. Quamvis extensionis notio ex ipsa corporum existentia ducat originem, immerito tamen inde colligeretur, nullam esse extensionem corpore vacuum seu penetrabilem. Hac de re magno animorum æstu in scholis disputatur. Vacui existentiam negabant Peripatetici, possibilitatem negant Cartesiani. Ab utraque tamen Philosophorum secta longe differunt Leibnitiani, qui nullam *realem* extensionem admittunt, sed extensionem quamlibet velut merum *phenomenum* rerumque coexistentium ordinem arbitrantur. Hanc opinionem quam in Metaphysica jam explicavimus, variis in locis opportune revocabimus. Porro licet sensuum testimonio circa hanc quæstionem nihil omnino de-

SECTIO II. PARS I. CAP. II. 197
definiri possit, vacuum tamen existere ostendunt rationes validissimæ. Ad præsentem articulum pertinent conclusiones duæ.

CONCLUSIO I.

VALIDISSIMIS RATIONIBUS PROBATUR VACUUM.

I. Fingamus nullum existere vacuum; corpora omnia sunt æqualiter plena, seu eandem materiæ quantitatem continent sub eodem volumine, quod quidem fateri coguntur qui vacuum negant. Demonstravimus autem pondera quantitativis materiæ proportionalia esse; igitur sub eodem volumine idem pondus habent corpora singula quæ proinde forent ejusdem gravitatis specificæ; sed absurdum est aurum levissimamque plumam ejusdem dici gravitatis specificæ; diversissimas corporum gravitates specificas, ideoque & vacuum demonstrant experimenta.

II. In Physica notissimum est jam antea a nobis descriptum experimentum, quo nempe corpus quodlibet in vacuo Boyliano æqualibus temporibus æqualia spatia percurrit, sive idem corpus in amplissimum volumen extendatur, sive in angustissimum redigatur. Illud vero experimentum demonstrat non solum aerem hauriri, sed etiam illius loco nullum aliud fluidum succedere. Etenim quodcumque sit fluidum illud; quo major est corporis superficies, eo plures fluidi particule corpori descendentem resistunt, ac proinde corpus, mutata utcumque superficie, eadem non descenderet velocitate; imo corpora sibi libere relicta per aerem non descenderent; aer enim

foret ejusdem gravitatis specificæ cum corpore immerso, quod proinde aeri innataret. Hujus argumenti vis tota intelligitur, explicata deinde fluidorum doctrina; interim vero experimentis compertum habeatur, idem corpus majori vel minori volumine donatum per idem fluidum eadem velocitate non descendere, imo quiescere, si eandem cum fluido habeat gravitatem specificam.

III. Demonstravit Nevvtonus motum globi intra fluidum æque densum delati, ob ipsam fluidi resistantiam totum amitti eo tempore quo globus percurreret $\frac{2}{3}$ diametri suæ partes. Hæc quidem demonstratio ad difficiliorum fluidorum doctrinam pertinet; interim tamen evidens est & experientia compertum, fluida densissima corporum motibus maxime resistere. At si nullum admittatur vacuum, jam fluida omnia talem habent densitatem qua nulla major esse possit. Itaque a multis retro sæculis perturbatus atque extinctus omnino fuisset globorum cælestium motus, qui tamen certa perpetuaque periodo absolvitur. Alia quidem plurima afferri solent argumenta, sed hæc pauca omnium validissima seligere satis sit, ex quibus tandem sic concludere licet. Admittendum est vacuum quod experimenta phænomenaque cælestia demonstrant, atqui &c. Ergo.

Objic. Admittere non repugnat fluidum aliquod subtilissimum quod corporum omnium poros libere permeet, quod proinde in *campanam pneumaticam*, extracto aere, succedat, nullumque vacuum permittat. Neque etiam repugnat fluidum illud esse omnis gravitatis expers. Etenim quid prohibet fluidum aliquod concipi sine conatu vel *tendentia* ad centrum terræ? Hanc vim in subtilissimis flammæ lucisque particulis minime observamus. Hinc Cartesiani ita
ar-

argumentantur: ad demonstrandum vacuum di-
 versam corporum gravitatem specificam maxi-
 me jactant qui vacuum admittunt, atqui in
 prædicta hypothese ratio illa evanescit omni-
 no, ergo &c. Resp. C. Māj. D. Min. Ta-
 lis hypothesis fictitia omnino est & philosophan-
 di regulis contraria C. hypothesis illa philoso-
 phica est & philosophandi regulis consentanea,
 N. Quare N. Conf. Commentitium illud flui-
 dum e cultiori Physica proscribendum esse jam
 demonstravimus, ubi sermo fuit de vorticibus
 Cartesianis. Et re quidem ipsa hujus argumenti
 pondus gravissimum ita senserunt recentiores
 Cartesianæ hypotheseos reformatores ut vacuum
 admittere non dubitaverint. Quod spectat flam-
 mæ lucisque materiam, tantilla est illarum gra-
 vitas ut nullo experimento conspicua esse possit
 omnemque Physicorum diligentiam longe fugiat.
 Hæc autem levitas quæ *relativa* est dumtaxat,
 nostræ conclusionis veritatem apprime confir-
 mat; inde enim evincitur lucis particulas nihil
 fere materiæ continere, ac proinde & vacuum
 existere. Id rursus facili ratiocinatione intelli-
 gere licebit. Tanta est radiorum solarium ve-
 locitas ut totum illud vastissimum spatium quod
 solem inter nostrumque globum expanditur,
 brevissimo septem vel octo minutorum inter-
 vallo percurrat; quod quidem demonstrant suo
 deinde loco referendæ observationes astronomi-
 cæ. Jam vero fingamus minimam materiæ por-
 tionem quæ sub experimentis cadere possit in
 delicatulum visionis organum tanta & fere im-
 mensa velocitate incurrere, unico ictu solve-
 rentur omnino delicatissimæ oculorum partes &
 in pulverem redigerentur: recordandum enim
 est vires corporum esse ut productum ex quan-
 titate materiæ in velocitatem, aut in quadra-
 tum velocitatis. Quare cum ex perpetuo radio-

rum solarium fluxu offensionem nullam patiantur oculi, hinc patet exiguam omnino esse & fere nullam in radiis solaribus materiæ quantitatem. Id vero magis ac magis manifestum fiet comparatione instituta cum minimis globulis vi pulveris pyrii explosis, quorum tanta vis est ut non solum homines, sed urbium quoque muros disjicere & solo æquare valeant. Tandem fatendum est nulla severa demonstratione ostendi posse talis fluidi impossibilitatem, cum ignota nobis sit intima corporum natura; verum in hisce institutionibus, corporis *physici* & *sensibilis* dumtaxat proprietates consideramus, illasque ad humanæ societatis utilitatem transferre conamur. Quare etiamsi tale fluidum liberalius concedamus, quod tamen philosophandi legibus repugnat, nobis perinde est ac si nullatenus existeret, ideoque de hoc inutilissimo fluido nihil curare debent Physici qui *multa scirent utilia, si non discerent superflua*.

Inst. 1. Ad explicandam motuum cælestium perpetuitatem atque constantiam, radorum solarium exemplo iterum utuntur Cartesiani. Et quidem solares radii sine ullo impedimento, sine perturbatione ulla sese mutuo decussant, & secundum quamlibet directionem intersecant. Fingamus ergo planetas in simili fluido deferri, jam nullam resistantiam patientur; ponamus nempe fluidi cælestis particulas omni tenacitate & inertia esse destitutas, nullum errorem experientur cælestes motus, ideoque evanescit alterum vacui argumentum. Unde sic argumentantur: Non repugnat hypothesis illa quæ radorum solarium exemplo confirmatur, atqui &c. Ergo Resp. N. Min. Ad illam objectionem eadem fere est quæ ad præcedentem responsio. Etenim quod solares radii sine ulla perturbatione sese mutuo traſſiant, id re-

pe-

petendum est ex illorum incredibili fere subtilitate & materię quantitate fere infinite parva. Hęc ergo summa radiorum mobilitas & directionis cujuscumque facilitas ipsum vacuum demonstrant. In hac objectione fingitur fluidum omni inertia & partium tenacitate destitutum; quod quidem fingere non minus absurdum est & philosophandi regulis contrarium, quam corpus aliquod gravitate spoliare.

Inst. II. Non repugnat extensionem merum esse phænomenum, nullamque extensionem revera existere. Leibnitianam hac de re hypothesim in Metaphysica jam explicavimus; Si nempe res plures tales sint, ut diversas in organo sensoriis impressiones, diversasque in nobis excitent ideas, jam res illas consideramus tamquam plures ideoque extra se invicem existentes. Ex illa diversitatis notione per sensus & maxime per organum tactus acquisita nascitur notio extensionis. Pari modo quod corpus determinatam repræsentet figuram, magnitudinem, motum, id fit non quod res ita se habeat, sed nihil aliud significatur nisi corpus tale esse ut illas in nobis excitet ideas quas experimur. Unde sic argumentari licet: nullum existit vacuum, si extensio merum sit phænomenum, atqui hęc hypothesis non repugnat, cum nos lateat intima rerum natura, ergo &c. . . . Resp. D. Maj. Si extensio *sensibilis* merum sit phænomenum, hoc est, si mere *idealis* sit nihilque *realitatis* extra mentem habeat, C. Maj. Si extensio merum sit phænomenum, hoc est, si nihil *substantialitatis* habeat, non sit tamen merum nihil, N. Maj. D. Min. N. C. Brevius explicari debet hęc objectio quę deinde in meliori lumine collocabitur, ubi sermo erit de corporis natura. Cartesiani dividunt corporum proprietates in *absolutas*, seu *primitivas*,

tivas, & in *relativas* seu *secundarias*. Proprietates absolutas dicunt illas quæ ad tactum pertinent, extensionem imprimis & soliditatem; reliquas vero quales sunt odores, colores, sapores, soni &c. relativas appellant. Arbitratur nimirum proprietates absolutas eo modo in corporibus existere quo nobis repræsentantur. At proprietates relativas tales esse affirmant ut certam ad nostras ideas habeant relationem, vi cuius tales ideas constanti lege in nobis excitant, ita ut tamen res longe aliter se habeat ac nobis apparet. Verum alii subtiliores Metaphysici omnes omnino corporum proprietates æque relativas esse existimant, ignotam prorsus nobis esse intimam corporis naturam asserunt, nullamque proinde asferri posse accuratam definitionem, sed a nostro dumtaxat cognoscendi modo desumptam. Quod ut intelligatur, diligenter notandum est, ideas nostras proprietatibus illis similes omnino esse non posse, ut externæ hominis figuræ pictura est similis; nam horum utrumque & substantiale est & æque materiale; at idea ad mentem pertinet, nihilque substantiale aut materiale habet, quale est ideæ objectum; quare hoc similitudinis genus ne in ideis quidem per tactus organum excitationis haberi potest. Deinde notandum est talem in omnibus ideis ad objecta ipsa haberi relationem, ut ab iisdem objectis eodem modo applicatis eadem in nostra mente excitentur ideæ; quod quidem in nostris institutionibus metaphysicis fuisse explicavimus. Itaque Philosophi illi nullum inter sensibiles corporum qualitates statuunt discrimen, easque considerant tantum velut actionem quam corpora certis legibus in sensuum nostrorum organa exercent, ex qua sensatione certa idea in mente excitatur. Sed quidquid sit de variis illis Philosophorum placitis

SECTIO II. PARS I. CAP. II. 203

citis ad examen deinde revocandis, interim evidens est hanc objectionem nostræ conclusioni minime contrariam esse, si probe recordemur cultioris Physices scopum; consideramus nempe sensibiles corporum qualitates quatenus sunt effectus ad nos & humanæ societatis utilitatem referendi. Porro manifestum est in hoc sensu negari non posse extensionem, *sensibilem* scilicet, quidquid sit de extensionis natura; sed *nostrum non est tantas componere lites*. At observandum est cum *idealists* confundi non debere Philosophos qui extensionem velut phænomenum habent. Et quidem Idealistæ corpora existere negabant, nostrasque omnes sensationes perpetuum errorem esse somniabant. Ab hac autem insania quam in Metaphysica confutavimus, longe absunt prædicti Philosophi qui corpora existere admittunt & ex ipsa partium coexistentia extensionis notionem oriri affirmant. Eodem nimirum sensu extensionem phænomenum appellant quo color phænomenum dici solet. In hac hypothese evanescere & submoveri omnino videtur tota de *vacuo & pleno* controversia. Cum enim ex spatii & extensionis notionem hæc quæstio originem habeat, tota huc revocatur, an scilicet extensio & spatium sint realitates quæ aliquid substantialitatis habeant, an vero in simplici partium coexistentium ordine consistent. Si quæstio ita explicetur, jam tota cadit; cum plenum & vacuum mera sint phænomena. Itaque investigari non debet utrum existat plenum aut vacuum, sed potius instituenda est quæstio, an per phænomenum vacui aut per phænomenum pleni naturam nobis possimus repræsentare. Imo cum hic agatur de natura, non prout est in se, sed quatenus nobis apparet, non repugnat vacui & pleni phænomena simul existere, si non in eodem casu,

saltem in casibus diversis . Et re quidem ipsa pari jure nobis repræsentare licet extensionem ex partibus *similaribus* & sine ulla vi compositam, vel constantem ex partibus *dissimilaribus* & vi aliqua præditam . In primo casu Leibnitiani vacui, in altero autem pleni notionem formamus. Hæc autem explicatio conferri debet cum iis quæ de spatio & extensione diximus in *Metaphysica*. Cæterum hæc omnia quæ incautis nulliusque attentionis hominibus frivola videri possent, utilissima tamen esse atque gravissima in appendice demonstrabimus.

Inst. III. Si vacuum existere fingamus, jam nulla est ratio cur corpora hunc vel illum locum occupent; cum enim similes sint atque uniformes singulæ spatii partes, sine ulla ratione sufficiente ad Orientem vel Occidentem locata fuissent corpora, atque hinc in hypothesis vacui creationis impossibilitatem arguunt Leibnitiani, cum Deus sine ratione nil facere possit. Unde sic argumentantur. Admittenda non est opinio illa quæ receptissimo rationis sufficientis principio repugnat, atqui &c. Ergo Resp. N. Maj. In effectibus materialibus admittendum quidem esse rationis sufficientis principium ostendimus in *Metaphysica*; at in effectibus liberis locum habere non posse, ibidem demonstravimus. Porro creatio mundi pendet ab omnipotenti Dei voluntate quæ est suprema & ultima rerum creaturarum ratio. Itaque principium illud in effectibus liberis etiam humanis rejiciendum omnino est; imò in effectibus etiam materialibus parce admodum adhiberi debet; neque tantam quam Leibnitiani prædicant, utilitatem habere potest; cum enim nos ut plurimum lateat rerum sufficiens ratio, firmissima non sunt argumenta quæ ex ratione sufficiente desumi solent. Principium istud ad-
ver.

versus nostram conclusionem minime valere certissimum est; dum enim vacuum admittimus, de spatii natura nobis prorsus ignota nihil pronuntiare audemus, atque satis nobis est rejicere *plenum Cartesianum*; neque aliquid affirmare volumus de obscurissima controversia, an plenum & vacuum pro phænomenis haberi debeant, ut explicavimus in præcedenti responsione. Igitur probe observandum est discrimen inter hypothese[m] Cartesianam & Leibnitianam; hæc ultima tum plenum, tum vacuum ut mera phænomena judicat, neque hæc opinio iisdem laborat difficultatibus quibus obnoxia est Cartesianæ hypothesi. Ita adversus plenum Cartesianum objici solet motus impossibilitas cujus quidem objectionis non tanta est vis quanta in vulgaribus Physicorum libris jactatur; at in Leibnitiana hypothesi nulla est omnino. Dum enim dicunt Leibnitiani corpus aliquod data velocitate datum spatium percurrere, motus & spatii nomine non intelligunt realitatem aliquam in rebus existentem, sed dumtaxat ideam consulam quam mobilis perceptio diversusque coexistentiæ ordo in anima producant. Hoc modo interpretandum esse ajunt celebratissimum Zenonis argumentum de Achille & testudine. Et quidem minus verisimile existimant eo insanix unquam devenisse aliquem, ut motum prout est phænomenum negare potuerit, eumque a Zenone negatum fuisse opinantur in eo dumtaxat sensu, quod notiones spatii, loci, temporis motusque sensibilis velut imaginarias habuerit. Cæterum tantum abest ut ex hac rerum physicarum obscuritate tantaque opinionum varietate aliquid utilitatis præclarissimæ huic scientiæ detrahi possit; quin contra hinc derivari possint utilitates maximæ, quas in appendice demonstrabimus.

C O N

CONCLUSIO II.

CORPORA OMNIA INNUMERIS PORIS PERTUSA ESSE DEMONSTRATUR.

I. Corpora omnia etiam ponderosissima infinitis propemodum poris seu foraminibus cribrata esse, manifestum est exemplo crySTALLI. Nulla in crySTALLI superficie assignari potest pars vel minima quæ non sit eximie pellucida. Hæc autem pelluciditas summa intelligi nequaquam potest, nisi ad opposita superficierum puncta radiis lucis pateat facilis transitus. Hinc evidens est crySTALLUM non solum innumeris poris scatere, sed nihil fere materiæ omnino solidæ continere. Inde autem ad examen revocari potest auri porositas; notum enim est experimentis, pondus auri esse ad pondus crySTALLI sub eodem volumine ut 8 ad 1; quare quantitas materiæ in auro est ad quantitatem materiæ in crySTALLO ut 8 ad 1, ideoque aurum licet sit corporum omnium quæ nobis nota sunt, ponderosissimum, nihil fere habet materiæ ac proinde infinitis propemodum poris pertusum est. Et quidem si aurum redigamus in tenues lamellas easque microscopio contemplerur, non solum apparent pellucidæ, sed variis modis implexæ innumerisque meatibus hiantes observantur. Simili ratione argumentando a *fortiori*, ut dicunt, demonstratur multo magis porosa esse corpora alia.

II. Præcedens demonstratio satis quidem esset; sed afferre non abs re erit experimenta nonnulla quæ utilissima esse possunt. Durissima etiam marmora a fluidis plurimis penetrantur, a spiritu vini, a spiritu terebinthinæ. Parare
do-

docuit clariss. Dufaius in Mon. Paris. ann.
 1728. 1732. liquores plurimos qui compactissi-
 mos quoque lapides facile pervadunt suaque
 relinquunt vestigia. Hinc si liquores illi variis
 tingantur coloribus, atque in aliqua superfi-
 cie ducantur lineamenta, per varia lapidis strata
 ad oppositam usque superficiem, liquorum
 vi transmitti poterit imago quælibet suis picta
 coloribus. Notissima est Physicis perspiratio in-
 sensibilis quæ a primo observatore Sanctorio,
 nomen *Sanctoriana* retinuit; ex octo alimento-
 rum libris quas aliquis uno die sumeret, quin-
 que circiter hic apud nos, ætate vegeta, vita
 commoda, victu moderato, per transpirationem
 elabuntur; hujus tamen transpirationis copia
 major vel minor est pro regionum varietate di-
 versaque cæli temperie. Omnium animalium
 cutis scatet vasis innumeris quorum aliqua *ab-*
sorbentia, alia *exhalantia* vocantur; Hæc va-
 scula quæ sub squamulis *epidermidis* oblique
 patent, tantæ sunt subtilitatis ut computante
 Leenvvenhockio in spatio unius arenæ globulo
 non majori hient plusquam 125000 hujusmodi
 meatus. Hi, *absorbentes* scilicet, subtilissimis
 particulis ingressum; isti autem, nempe *exha-*
lantes, exitum permittunt. Ex hac corporis
 humani porositate intelligitur balneorum usus,
 per totam corporis superficiem introductis a-
 quæ particulis ad sanguinem usque, cujus mo-
 leculas nimium cohærentes dividunt & ad cir-
 culationem faciliores reddunt. Hæc summa
 porositas in arboribus plantisque omnibus obser-
 vatur; vegetabilia omnia e terræ gremio per
 poros suos succum nutritium hauriunt & per
 totam substantiam quaquaversum propagant.
 Legenda sunt pulcherrima hac de re experi-
 menta quæ habuit clariss. Halesius in *Statica*
vegetabilium.

N:

Neque prætermittenda est ovorum porositas ex qua trahi potest utilitas non exigua. In suprema ovi recens exclusi superficie videre est substantiam quandam lacteam; hæc autem progressu temporis evanescit per ipsos corticis poros elapsa, atque hinc ova nutritioni minus fiunt idonea & tandem corruptioni obnoxia. Ut autem hæc materia servetur integra ovaque a putredine liberentur, hoc remedium excogitavit Reaumurius. Ovi putamen adipe ovina, vel etiam *vernice*, ut vocant, facta ex spiritu vini, ex omni parte imbuunt; hoc artificio materiæ lacteæ exitus præcluditur, & ova per plures menses integra servari possunt, non secus ac si recens fuerint exclusa; quod quidem in longinquis navigationibus in primis utile esse potest.

In vulgaribus Physices institutionibus describitur atramentum quod *sympaticum* vocant; Hoc autem modo parari solet. Lythargyri uncia una sumatur quæ cum aceti distillati unciis quinque vel sex misceatur; ubi autem acetum lythargyro probe saturum est, illud per chartam de more percoletur. Hoc liquore qui *acetum saturni* a Chymicis appellatur, utendum est ad exarandos characteres, quos non magis conspicias quam si aqua scripseris; verum si adhibeatur liquor alius mox dicendo artificio comparandus, jam characteres pulchre fiunt conspiciui. Itaque capiatur auripigmenti uncia una quæ cum calcis vivæ unciis duabus misceatur, mixturæ immittatur aqua, habebitur liquor alter quo imbuenda est charta aliqua characteribus antea descriptis imposita, centum etiam interpositis chartarum foliis; statim hujus liquoris particulæ multa permeant chartæ folia, & characteres qui antea oculos fugiebant, præclare nigros legemus atque mirabimur.

Ex

SECTIO II. PARS I. CAP. II. 209

Ex descriptis experimentis patet innumeris poris pertusa esse dura cujuslibet speciei corpora; unum duntaxat in corporibus fluidis experimentum afferre satis erit. Fluidorum porositas inde facile colligitur, quod fluida quædam se invicem imbibant. Si intra tubum in quo oleum vitrioli continetur, certa infundatur aquæ quantitas & volumina respectiva notentur, mixtione facta atque fermentatione sedata, volumen invenitur justo minus. In aliis mixtionibus plurimis idem se expertum fuisse testatur Muskembroekius; sed generatim fluidorum omnium porositas ex diversa eorum gravitate specifica facile patet. Itaque ex his omnibus sic concluditur. Admittenda est summa illa corporum porositas quam capta in omni corporum genere experimenta demonstrant, atqui &c. Ergo.

Objic. Si corpora omnia innumeris poris pertusa sunt, jam absoluta corporum pondera non cognoscimus; ignota enim est materiæ quantitas, ac proinde & ignotum pondus quod materiæ quantitati proportionale est, atqui id repugnare videtur. Ergo &c. Resp. C. Maj. N. Min. Nullum inveniri potest corpus perfecte solidum, quod quidem si invenire liceret, jam innotesceret quantitas materiæ in singulis corporibus, illorumque proinde pondus absolutum, conferendo scilicet datam aliquam materiæ portionem cum pari volumine diversorum corporum. Quamobrem cum tali corpore perfecte solido careamus, superfluis conjecturis indulgent otiosi Philosophi qui fictitiis hypothësis materiæ quantitatem determinare conantur; imo totum hoc universum ex materiæ quantitate valde exigua constare probabilissimum est, & præjudicatas hac de re vulgi opiniones demonstrabimus, ubi sermo erit de materiæ subtilitate.

Inst.

Inst. I. Si tanta sit corporum porositas , in errorem nos perpetuo inducerent sensuum organa , falsisque sensationibus nos perpetuo deciperet Deus , atqui hæc illusio divinæ veracitati repugnat . Ergo Resp. N. Maj. Plurimæ sensuum fallaciæ per ratiocinationem philosophicam ad examen revocari atque emendari possunt , nec sensibus temere credendum est : *Non est judicium veritatis in sensibus* ; inquit S. Augustinus . Itaque Deus ad sensuum errorem nos minime cogit . Præterea superbissimos sese ostendunt Philosophi qui humanas cognitiones ultra justos limites longius extendunt ; pauca admodum novimus in rebus philosophicis ; atque in hac cognitionum nostrarum imbecillitate non violatur divina veracitas , sed contra maxime commendatur optimi numinis infinita bonitas , cui placuit eas tantum hominibus concedere cognitiones quæ ad justas vitæ hujus utilitates , & ad finem ultimum vitam scilicet æternam perducere possunt .

Inst. II. Si corpora tot poris pertusa sint , jam per omnium corporum poros perpetua effluerent corpuscula , per ipsos quoque corporis humani poros necessaria ad vitam fluida erumperent ; atqui hæc perpetua effluvia repugnant omnino . Ergo &c. Resp. N. Min. Re quidem vera ex singulis corporibus perpetua exeunt effluvia , quæ quidem ponderis jacturam aliquando demonstrant , interdum autem nullam , pro varia effluviolorum subtilitate . Hanc effluviolorum tenuitatem fere incredibilem ostendunt corpora odorifera quæ per plures annos absque ullo quod observationibus & experimentis conspicuum esse possit , ponderis detrimento , subtilissimas emittunt particulas quibus organi olfactorii papillas pungi atque vellicari necessum est . Quod autem per corporis humani poros necessaria ad
vi-

vivendum fluida non erumpant, id repetendum est ex diversa fluidorum pororumque figura cujus eam oportuit esse varietatem, ut in sani corporis statu necessariis fluidis exitum prohiberet. Itaque rursus semperque laudanda est divina bonitas quæ admirabilem corporis nostri structuram ita composuit ut vivere possemus, & quantum ipse Deus vellet, viveremus, ad immortalem vitam deinde transaturi.

ARTICULUS II.

De extensione impenetrabili.

I. **I**mpenetrabilitatem jam definivimus eam corporis proprietatem, qua fit ut singula corpora omnibus aliis corporibus undequaque prementibus resistent, & quandiu aliquem occupant locum corpora alia ab eodem loco excludant. Porro hic sermonem habemus de impenetrabilitate *sensibili*, qualem per contactum sese manifestat. Non desunt quidem doctissimi viri qui nullam accuratam continuitatem, aut soliditatem admittunt; omnemque contactum immediatum excludunt. Censent ergo materiam omnem & corpora constare punctis prorsus indivisibilibus & inextensis, quæ puncta semper a se invicem distent aliquo intervallo quod imminui quidem possit in infinitum, sed non possit auferri sine punctorum penetratione; putant scilicet puncta illa prædita esse quibusdam viribus quas *repulsivas* appellant; vires nempe illæ imminutis in infinitum distantis augentur in infinitum, ac proinde puncta in minimis distantis cogunt a se invicem recedere, donec tandem in certa distantia adhuc tamen minima nullæ sint, tum directionem mutent, & mutato nomine dicantur attractivæ. In hac igitur hypo-

po-

potheli punctorum vires crescunt atque decre-
scunt, mutataque directione migrant ex attra-
ctivis in repulsivas & contra. Illa tamen pun-
cta viribus attractivis & repulsivis donata fir-
missimas possunt massas constituere, ubi nem-
pe posita sunt in iis a se invicem distantis in
quibus imminuta vel tantisper distantia ingens
habetur vis repulsiva, distantia autem aucta
ingens habetur vis attractiva. Itaque ex ha-
rum virium natura oritur impenetrabilitas, non
ex immediato contactu. Porro quamvis in hac
opinionem nullus sit contactus immediatus, exi-
stet tamen contactus physicus & sensibilis; tan-
tillæ enim sunt punctorum distantia ut omnem
sensuum subtilitatem longe fugiant. De hoc
argumento, iterum oblata occasione, breviter
nobis dicendum erit; quia vero minima pun-
ctorum intervalla sub sensu non cadunt, res
omnes perinde se habent quoad effectus physi-
cos quos quidem in nostris institutionibus uni-
ce considerandos nobis proponimus; hinc de im-
penetrabilitate sensibili & physica duntaxat hic
sermo est.

II. Hanc impenetrabilitatis seu soliditatis spe-
ciem perpetuo experimur; sive enim quiesca-
mus, sive moveamur; continuoprehendimus
alia corpora quibus nostrum corpus innititur,
resistere & resistendo impedire ne telluris super-
ficiem profundius penetremus. Dum quotidiana
necessitate corpora contrectare cogimur, resi-
stentiam manu sentimus, atque ex hac resiste-
ntia originem habent explicatae antea conflictuum
leges. Hæc proprietas corporibus omnibus com-
petit, sive fluida sint, sive firma, sive dura &
fixa, seu mollia & facile mobilia; fluida enim
in vasculis conclusa atque compressa resiste-
ntiam ostendunt, ne quidem excepto aere flui-
do tenuissimo. Quamobrem licet sensu tactus
illam

illam non deprehendamus resistantiam nisi in materiæ partibus quæ possunt tactus organum afficere, tamen, per analogiam naturæ, hanc eandem resistendi vim ad corpora subtiliora sensibus impervia transferre licet. Cæterum patet hanc corporum proprietatem cum vi inertiae conjunctam esse, & ex ea pendere: atque hinc intelligitur ratio cur, præter vulgarem consuetudinem, ultimo loco tractatum sit de extensione impenetrabili atque etiam de penetrabili cujus notionem ex ipsa impenetrabilitate haurimus atque derivamus.

III. Ex hætenus explicatis manifestum est, impenetrabilitatem sive soliditatem a corporum duritie longe distinguendam esse, quod quidem non satis accurate præstiterunt aliqui. Et quidem durities est firma quædam partium connectio saltem *sensibilis* qua fit ut partes illæ ægre divelli possint, & molem quandam constituent cuius figura difficulter mutatur. At soliditas de qua hic agimus, mollioribus durisque corporibus competit. Nec confundi debet soliditas geometrica cum soliditate physica. His gradibus progrediuntur Geometræ. Corpora primum considerant simul cum sensibilibus eorum proprietatibus a quibus deinde abstrahunt, & tandem corpora velut quandam extensionis penetrabilis, divisibilis & figuratæ portionem contemplantur. Itaque corpus geometricum nihil est aliud quam extensionis pars aliqua undequaque terminata. Tres hujus extensionis dimensiones generali velut prospectu primum spectamus; verum ad facilius determinandas proprietates singulas, unicam deinde separamus dimensionem, longitudinem scilicet, alteram postea adjungimus nempe latitudinem & superficiem consideramus; tandem tres dimensiones simul, hoc est, totam soliditatem complectimur. Hinc facile refellitur

tur duplex censorum genus; Alii sunt Sceptici qui inconcussa Matheseos theoremata labefactare conantur, eaque falsis hypothesebus, commentitiis nempe lineis & superficiebus innixa esse obgannunt. Alii sunt imperiti quidam Physici qui veritates geometricas velut superfuis abstractionibus fundatas fastidiose traducunt. Ad hunc ipsum articulum referri potest celeberrima in scholis controversia de extensionis divisibilitate in infinitum; hæc quæstio nobis videtur *logomachia* aliqua laborare; quod quidem in disputationibus plurimis persæpe contingit. Dum disputant Philosophi de extensionis divisibilitate, vel rem intelligunt de extensione *abstracta* & *geometrica*, vel de extensione *physica*, & de qualibet materiæ portione. Rursus autem divisibilitas illa vel est *geometrica*, hoc est, in qualibet extensione concipi possunt & revera existunt partes numero infinitæ, vel divisibilitas illa est *physica* & *actualis*, ita ut extensio quælibet in infinitum dividi possit. Hic est celeberrimæ quæstionis status, jam partes singulas explicabimus.

IV. Physicam & actualem extensionis divisibilitatem in infinitum locum habere non posse evidens est; cum experimentis certissimum sit post certum divisionum numerum sensibus nostris evanescere omnino extensionis phænomenum, ita ut subtilissimis etiam organis sese subducatur. Si quæstio sit de extensione *physica* & de qualibet materiæ portione, jam tota res pendet ex philosophicis litibus quæ adhuc sunt sub iudice. Etenim cum ignota nobis sit intima corporum natura, certo asserere non possumus corpora ex simplicissimis inextensisque particulis esse composita; in hac autem opinione manifestum est materiam non esse in infinitum divisibilem. At si eam teneamus aliorum Philo-

loso-

Iosophorum sententiam quæ materiæ portionem
 quamlibet etiam minimam velut continuam &
 extensam admittit, jam certum est materiam
 esse in infinitum geometricè divisibilem. Ita-
 que tota quæstio pendet ex corporis natura,
 quam quidem in ultimo Physices articulo,
 quantum patitur rei obscuritas, meditabimur;
 nostramque ignorantiam fateri non dubitabimus.
 Interim sit

CONCLUSIO.

**EXTENSIO QUÆLIBET, IN INFINITUM GEO-
 METRICE DIVISIBILIS DEMONSTRATUR.**

I. Extensio quælibet geometricè considerata
 nullas habet partes determinatas; cum enim
 tota extensionis geometricæ notio in sola par-
 tium coexistentium conjunctione posita sit, in-
 determinatus omnino est partium illarum nu-
 merus, nec extensionis notionem ingredi debet.
 Itaque pro arbitrio assumi potest partium nu-
 merus; nempe fingere licet in extensione ali-
 qua contineri decem vel mille partes &c. pro-
 ut pars aliqua pro unitate adhibetur; ita li-
 nea aliqua duas continebit partes, si pars di-
 midia pro unitate habeatur, decem vel mille
 partes habebit, si pars decima vel millesima
 usurpetur pro unitate. Quare cum unitas illa
 sit omnino indeterminata, indeterminatus etiam
 erit partium numerus, quem proinde numerum
 in seriem infinitam abire concipi potest. Igi-
 tur extensio continua erit geometricè divisibilis
 in infinitum.

Hanc eandem ratiocinationem in qualibet
 corporum dimensione obtinere evidens est. Et
 quidem corpus triplici dimensione præditum
 suos habere debet limites atque terminos; alio-
 quin

quin finitum non foret atque determinatum . Igitur corpus habere debet reales limites qui binas tantummodo habeant dimensiones in longum & latum . Etenim utcumque exigua profunditas assumatur , ejus pars interior ad terminum seu limitem pertinere non potest . Is autem terminus latitudine sola & longitudine præditus , dicitur *superficies* . Item superficies quævis finita suum habere debet terminum qui simili argumento latitudine careat , & is dicitur *linea* . Eodem pacto lineæ terminus erit *punctum* nulla extensione præditum . Igitur superficies , linea , punctum non sunt materia seu corpus , sed meræ corporis affectiones quæ sine ipso & per sese subsistere non possunt , nempe haberi debent tanquam termini & limites materiæ reales quidem ; neque a nostra imaginandi vi pendet quod dimensiones finitæ terminum aliquem seu limitem habeant qui ad ipsas non pertineat . Itaque nec superficies erit pars corporis , nec linea pars superficiei , nec punctum pars lineæ , sed realis terminus , nec proinde corpus repetitione & supra positione superficiei , nec superficies repetitione lineæ , nec linea repetitione puncti , sed ductu quodam continuo generabitur . Hinc statim patet binas quasque superficies vel in unicam coalescere & congruere , vel corpus aliquod triplici dimensionem præditum intercipere , binas lineas intercipere , superficiem , bina puncta intercipere lineam ; nec ullam proinde superficiem superficiei , lineam lineæ ita proximam esse , aut punctum puncto ita vicinum ut nihil mediæ distantiae intersit . Ita si corpus quod continuum concipiatur & solidum , sectione quadam plana fecetur , evidens est alteram sectionem priori ita proximam fieri non posse ut nihil corporis inter ipsas sit , sed nova sectio vel aliquid inter-

ter.

tercipiet, vel cum priore penitus congruet. Intervalli autem hujus medium aliquod erit quod nimirum cum neutro extremo congruere potest, ne ipsa itidem extrema congruant, intervallo omni sublato. Quare dimidii intervalli rursus haberi poterit pars dimidia, & ita deinceps in infinitum, ac proinde habebitur necessario divisibilitas in infinitum.

II. Eandem extensionis divisibilitatem in infinitum evincunt argumenta geometrica innumera. Infiniti numero duci possunt circuli, alii aliis majores qui eandem rectam & se invicem contingant in unico puncto, ideoque in infinitum dividere possunt finitum intervallum quod inter tangentem circulumque minimum intimum comprehenditur. Inter easdem parallelas duci possunt parallelogrammi, alii aliis longiores in infinitum, exiguo utcumque parallelogrammo æquales. Ex longissimæ cujusvis lineæ rectæ divisionibus quorcumque agi possunt lineæ parallelæ, ita ut extremæ transeant per extrema puncta rectæ cujusvis utcumque exiguæ, quam omnes secabunt in totidem æquales partes quot partes illa longissima recta habebat, nec unquam exhaurietur exiguum illud intervallum quod semper superest, nec rectæ congruent. Alia ejusmodi sexcenta adhiberi solent quæ vim habent summam & severam demonstrationem efformant pro spatii & extensionis divisibilitate; si enim continua realisque extensio admittatur, jam superficies, linea, punctum non sunt mentis nostræ figmenta, sed realis extensionis reales termini. Nihil tamen ex Geometria petitur evidentius faciliusque demonstrat extensionis divisibilitatem in infinitum quam illud Geometris notissimum, quod nempe datis binis rectis possit semper inveniri tertia continue proportionalis post ipsas. Si enim

Jacq. T. IV.

K

assu-

assumatur recta quævis utcumque parva, tum alia utcumque magna quæ illam contineat vicibus quotcumque, semper invenietur tertia post hanc & illam quam hæc totidem vicibus contineat, ideoque continebit hæc tot partes quot libuerit, & quemadmodum nullus erit limes ultra quem augeri non possit hæc magna linea, ita nullus itidem erit ultra quem illa tertia imminui non possit.

Hæc quidem argumenta ex primis Geometriæ elementis desumpta sunt; sed iis quoque consulendum qui rebus geometricis haud assueti, demonstrationum evidentiam facile non percipiunt; quare libet argumentum unum physicum ex motu petatum proferre. Si extensum constaret ex indivisibilibus, æque veloces forent motus omnes, nec minus spatium eodem tempore percurreret segnissima testudo quam velocissimus cursor. Etenim non posset testudo minus spatium eodem temporis puncto percurrere; indivisibile enim ponitur spatium temporis puncto indivisibili descriptum, ac proinde cum repugnet indivisibile alio indivisibili minus, spatium minus a testudine percurri repugnat, quare spatium æquale describet. Idem dicendum de alio quovis tempore, ac proinde spatia æqualia ab utroque semper describentur, & cursor velocissimus non plus conficiet spatii quam testudo tardissima, quod est absurdum. Plurima alia ejusdem generis absurda ex eadem indivisibilium hypothesi colliguntur; verum quæ dicta sunt, sufficiant; cæterum evidens est præcedentes demonstrationes valere etiam pro materiæ divisibilitate, si materia continuam extensionem habere ponatur. Etenim singulis spatii partibus singulæ respondebunt materiæ partes quæ proinde non secus ac spatium erunt in infinitum divisibiles. Verum in
hy-

hypothesi Leibnitianorum & aliorum Philosophorum qui inextensa & simplicissima materia puncta admittunt, jam materia non erit divisibilis in infinitum, & ideo hanc nostram conclusionem de sola extensione enuntiavimus.

Objic. Si extensio divisibilis esset in infinitum, in quovis extenso existeret numerus partium infinitus, quo posito maximum sequeretur absurdum. Nam si numerus partium infinitus in quovis extenso daretur, nullus haberi posset motus, ne quidem per minimum spatium, cum in minimo spatio numerus partium sit infinitus. Ergo &c. Resp. N. Sequelam Ant. & Conf. Quamvis numero infinitæ sint spatii percurrendi partes, eæque nonnisi tempore aliquo a mobili percurri possint, illæ tamen partes non sunt finitæ magnitudinis, sed infinite parvæ, hoc est, ut vocant, *infinitesimæ*. Hinc ut percurrantur, non egent tempore finito, sed tantum particula temporis infinite parva, nisi fingamus mobilis celeritatem esse infinite exiguam. Ratio est quia tempus non secus ac spatium dividi potest in partes multitudine infinitas & magnitudine infinite parvas. Itaque si mobilis celeritas finita sit, quælibet infinite parva spatii particula in omologa temporis particula a mobili absolvetur, ac proinde totum aggregatum multitudinis infinitæ particularum infinitæ parvarum spatii, seu totum spatium finitum describetur a corpore in aggregato multitudinis infinitæ tempusculorum infinite parvorum, seu tempore finito. Quare falsum est, posita divisibilitate in infinitum, nullum haberi posse motum, ne quidem per minimum spatium, sive minimum spatium nonnisi infinito tempore percurri posse. Quod ut magis declaretur, probe attendi debet jam antea fusiùs explicata temporis, motus spatiique analogia.

Tres illæ notiones ita necessario sunt conjunctæ ut una alteram indivulso nexu contineat. Nulla extensionis alicujus determinatæ clara idea haberi potest, nisi nobis exhibeamus mobilis alicujus velocitatem datum spatium dato tempore percurrentis; & viceversa mobilis alicujus velocitatem clare intelligere non possumus, nisi ope spatii dato tempore descripti. Hinc fit ut ex tribus temporis, velocitatis spatiique conditionibus, datis duabus; tertiam inveniant Geometræ; ut explicavimus in articulo de motu.

Inst. I. Si extensio contineat partes numero infinitas, infinitum containeretur in finito; extensio enim finita haberet partes multitudine infinitas; quod quidem absurdissimum est. Ergo &c. Resp. Dist. Ant. extensio finita containeret partes numero infinitas, sed infinite parvas, C. Ant. partes numero infinitas & finitæ magnitudinis, N. Ant. Quare N. Conf. Hæc objectio falsa laborat hypothesi, quod nempe quantitas aliqua ex partium numero tantum æstimari debeat; cum tamen certissimum sit eam ex partium multitudine & magnitudine simul æstimandam esse. Igitur quantitas finita continere quidem non potest partes finitas numero infinitas; potest tamen dividi in partes numero infinitas & infinite parvas. Et quidem si partium magnitudo eadem ratione minuatur, qua earum numerus augetur, totum ex his omnibus partibus compositum idem manebit; ac proinde finitum erit, etiamsi partium numerus augeatur in infinitum. Exempla plurima suppeditat Arithmetica, fatentibus ipsis adversariis, ubi numerorum series est infinita, manente tamen summa serici finita. Ita demonstrant Arithmetici seriem in infinitum continuatam $\frac{1}{2} \cdot \frac{1}{4} \cdot \frac{1}{8} \cdot \frac{1}{16}$ &c. unitati æqua-

æqua-

æqualem esse ; at nemo negabit seriem hanc infinitas partes habere . Verum ut huic argumento aliisque id genus plurimis paretur responsio , tollenda est omnis vocabuli ambiguitas . Dum extensionem in infinitum geometrice divisibilem esse demonstramus , quæstio minime est de *actuali* infinitæ divisionis possibilitate ; hoc unum intelligi volumus , in minima qualibet extensionis parte minores alias concipi posse particulas , atque hoc ipsum est quod divisibilitas in infinitum appellari solet ; nomine enim infiniti venit id omne cujus limites assignari non possunt .

Inst. II. Si extensio quælibet finita dividi posset in partes numero infinitas , magnitudo quantumvis exigua in tot partes dividi poterit ac quælibet alia quantumvis maxima . Maxima itaque æquabitur minimæ ; imo omnes quocumque magnitudines utcumque diversæ , æquales erunt utpote ex æquali partium numero , nempe infinito , constitutæ ; quod quidem absurdum vitari non potest , nisi dicatur magnitudines esse infinitas alias aliis majores ; hic autem infinitus infinitorum ordo a ratione omnino alienus videtur ; Ergo quocumque se vertant hujus opinionis patroni , multis sese implicant ambagibus & absurdis Resp. N. Seq. Ant. & Conf. Responsio ad primam objectionis partem patet ex responsione præcedenti . Etenim quodnam est absurdum duas magnitudines inæquales in eundem partium numerum dividi ? An quia partes sunt numero æquales , composita sunt æqualia ? Si hoc verum esset , verum itidem foret pedem digito æquari ; pes enim non secus ac digitus in duodecim partes dividitur . Quod spectat alteram objectionis partem , diversum nempe infinitorum ordinem , res est difficilior . Ut autem hæc objectio &

tota simul quæstio in bono lumine collocetur ; sublimem quantitatum infinitarum & infinite-simarum doctrinam , quantum per harum in-situtionum præscriptam facilitatem nobis fa-cere licet , explicabimus .

Quantitatum infinite parvarum nomen ha-bemus adhibuimus , verum id fecimus brevitatis causa & ut receptum servaremus loquendi usum . Et quidem nulla quantitas in se specta-ta & sine nostro cogitandi modo , aut infinite parva est aut infinite magna , sed in se deter-minata est & finita , quod facile patet ex de-monstratis de extensionis divisibilitate . Et certe data quavis magnitudine utcumque parva vel utcumque magna , alia semper minor in primo casu , & alia semper major in casu altero ha-beri potest ; nobis enim licet quantitatem exi-guam vel ingentem considerare , primamque minuere , alteram augere , abstrahendo animum a quovis limite determinato . Priorem quanti-tatem dicimus *infinitesimam* vel *infinite par-vam* , quantitatem alteram appellamus *infini-tam* vel *infinite magnam* , accipiendo infinitum pro indefinito , quod diligenter notandum est ; cum infinitum nusquam sit in rebus , sed in nostro concipiendi modo . *Finitam* dicimus quantita-tem quamvis quæ vel non concipitur variabi-lis , vel si concipitur variabilis , ultra quosdam determinatos limites variabilis non considera-tur ; rationem quam duæ quantitates finitæ habent ad se invicem , *rationem finitam* voca-mus . Unam e quantitibus quæ imminutæ concipiuntur ultra quoscumque limites & *ad ar-bitrium assumptam* , dicimus infinitesimam *pri-mi ordinis* . Si sit quantitas alia quæ ad hanc infinitesimam habeat rationem quam ipsa infi-nitesima habet ad quantitatem finitam , quan-titatem hanc dicimus infinitesimam *secundi or-dinis* .

dinis, & ita deinceps. Viceversa, si quædam quantitas sit ad finitam quantitatem illam ut illa ad infinitesimam primi ordinis, eam dicimus infinitam *ordinis primi*, & eodem pacto superiores infinitorum ordines definimus. Hæ autem quantitatum infinitesimarum & infinitarum notiones sunt omnino distinctæ.

His explicatis jam patet diversos esse infinitorum & infinitesimorum ordines; nam circuli diameter quæ finita est, se habet semper ad cordam ut est corda ipsa ad abscissam, ac proinde si in circulo fingatur corda infinite parva primi ordinis, erit abscissa infinitesima ordinis secundi. Si autem corda sit infinitesima ordinis secundi, erit abscissa infinitesima ordinis quarti & ita deinceps. Itaque ex infinitesimis primi ordinis statim derivari evidens est quantitates infinitesimas aliorum ordinum ac proinde etiam varios infinitorum ordines. Hinc non satis claram hujus doctrinæ cognitionem habuisse videtur D. Nievventit, qui concessis infinitesimis primi ordinis, alios infinitesimorum ordines rejecit. Id ergo probe recordandum est, infinite parvas & infinite magnas quantitates a nobis quidem admitti, sed in eo duntaxat sensu quod quantitates illæ sint indefinitæ, hoc est, ut augeri vel minui concipiantur ultra quoscumque limites. Constituta autem talium quantitatum definitione accurata, alteri objectionis parti satisfactum est, atque etiam aliis objectionibus plurimis quæ ex quantitatum illarum natura non satis explicata desumi solent.

Superest ut de earumdem quantitatum usu quem quidem in nostra Physica aliquando usurpavimus, breviter aliquid adjungamus. Usus omnis positus est in comparandis inter se quantitibus finitis earumque rationibus & affectionibus determinandis. Si comparatis inter

se binis quantitativis finitis, negligentur differentiarum quæ earundem quantitativum respectu sunt infinite parvæ, vera æqualitas haberi debet, nec ullus ne infinitesimus quidem error committi potest. Etenim finitæ quantitativæ dicuntur illæ quæ sunt in se determinatæ; infinite autem parvæ eæ vocantur quæ concipiuntur minui ad arbitrium ultra quoscunque limites in se determinatos. Porro his neglectis quantitativis, nullus error ne quidem infinitesimus oriri potest; Si enim inæquales essent finitæ quantitativæ illæ, haberent differentiam aliquam in se determinatam. Quoniam autem quantitativæ infinitesimæ minui possunt ultra quoscunque limites in se determinatos, omnes simul poterunt esse minores differentia qualibet determinata. Itaque minus accurate loquuntur aliqui dum dicunt negligi posse quantitativæ infinite parvas, quia error est infinite parvus; revera enim nullus est. Igitur tota res huc reducitur ut nempe, ad demonstrandam duarum quantitativum æqualitatem, ostendatur differentiam esse assignabili qualibet differentia minorem. Hanc autem methodum accuratissimam omnino esse nullique errori obnoxiam, evidens est; tota enim pendet ex hoc Euclidis theoremate, nempe: *quantitativæ duæ sunt æquales, si differentia sit quantitate qualibet assignabili minor*; etenim si forent inæquales, differentia posset assignari; quod est contra hypothesim. His fundamentis innititur calculus *infinitesimalis* qui *primarum & ultimarum rationum* vel etiam *limitum* calculus, cum Nevvtono rectius appellari potest.

ARTICULUS III.

De figurabilitate.

I. *Figurabilitas* appellatur illa corporum proprietas qua fit ut externa illorum superficies in longum, latum & profundum certo modo extendatur atque terminetur. Intricatissimæ a Philosophis proponi solent quæstiones duæ: 1. est: An minimæ elementares particulæ ex quibus corpora componuntur, perpetuam ac determinatam habeant figuram quæ nulla naturæ vi frangi possit: 2. autem est: An corpora per diversam minimarum particularum naturam specie distinguantur; an per solam earundem particularum dispositionem. Sed quidquid sit de illis duabus quæstionibus speciali conclusione mox explicandis, certum est corpora in tenuitatem immanem reduci posse; quod paucis utilioribus experimentis demonstrare satis erit. Auri ductilitatem fere incredibilem contemplemur & ad calculum revocemus. Aurum malleo tunditur & in lamellas extenditur. Pes cubicus auri pondus habet librarum 1349, seu unciarum 21584; nam 16 unciaë libram parisiensem constituunt. Jam vero linea eandem habet rationem ad pedem quam habet 1 ad 144. Quare si numeri ad potentiam cubicam evehantur, erit linea cubica ad pedem cubicum ut 1 ad 2985984, hoc est, pes cubicus lineas cubicas 2985984 continet; sed pes cubicus auri pondus habet unciarum 21584; ergo si per hunc numerum antecedens numerus dividatur, quotus $138 + \frac{7392}{21584}$ exprimet quot lineas cubicas uncia auri comprehendat. Jam si ex uncia auri formetur cubus, illius latus seu

K 5

al-

altitudo erit $5 + \frac{1}{6}$; hæc enim est radix cubica numeri præcedentis, quam prokime. Quare si numerus hic in seipsum ducatur, erit basis cubi $26 + \frac{25}{36}$ linearum quadratarum. Præterea sciendum est artifices qui aurum tundunt ac in tenues lamellas extendunt, unciam auri ita attenuare & in tam amplam redigere laminam, ut ex illa commode ducant 2730 bracteas quarum latera quaquaversum sunt linearum 34, neglectis segminibus quæ tamen sunt ponderis dimidii. Jam si bractearum latera sunt 34 lin. erunt in bractea qualibet lineæ quadratæ 1156, ita ut, si bracteæ omnes in unam denuo coeant superficiem, habeatur superficies linearum quadratarum 3155886, cui numero si vel tertia pars pro segminibus addatur, id est, si addas 1051960, patet opifices ex unica auri uncia efficere 4207840 lineas quadratas visibiles; sed hujus superficiei amplitudo nempe linearum quadratarum 4207840, continet basim istius cubi nempe $26 + \frac{25}{36}$, vicibus 159092. Ergo uncia auri efformata in cubum $5 + \frac{1}{6}$ lineis altum, dividitur in lamellas quadratas 159092. Porro quodlibet lineæ quadratæ latus, instrumenti acuti mucrone in 6 saltem partes dividitur, ac proinde integra quadrata linea in partes 36. Quare si numerus linearum quadratarum 4207840, multiplicetur per 36, nempe per numerum partium in quavis linea facile visibilium, productum 151482240 exprimet numerum partium quæ in unica auri uncia conspici possunt; quod prorsus mirum videbitur.

Sed longe major apparet auri ductilitas, si tenuissimæ aureæ lamellæ argentum ac filum fericum circumvestientis crassities examinetur.

Ar.

SECTIO II. PARS I. CAP. II. 227

Artifices massam argenteam sumunt ponderis 8 libr. quam componunt in cylindricam figuram, altitudinis duorum pedum cum digitis 8, seu lin. 384, cujus peripheria est 2. dig. cum lin. 9 seu 35 lin. quæ si ducatur in altitudinem cylindri, superficies prodibit 13440 lin. quadr. superficiem hujusmodi aureis bracteis obducunt quarum pondus semiunciam adæquat. Tum cylindrum sic inauratum per diversa laminæ chalybeæ foramina trajiciunt, & massam illam ita extendunt ut capillarem subtilitatem imitetur & in ipsa tamen superficie inaurata maneat; atque hinc massa cylindrica in tenuissimum filum traducitur, cujus fili pondus grana 36 adæquat; in 150 pedes extenditur, ac proinde totus cylindrus in filum 307200 pedes longum extendi poterit; reducatur enim cylindri pondus in grana; libra gallica 16 uncias continet, hæc drachmas 8, drachma 3 scrupulos, hic 2 obulos, obulus 12 grana, pondus 8 libr. continebit grana 73728. Itaque ad habendam longitudinem ad quam totus cylindrus produci potest, dicatur $36 : 150 = 73728$ ad quartum proportionalem 307200, atque hæc hæc erit longitudo tenuissimi fili. Ergo semiuncia auri in tot visibiles partes distribui potest quot lineas complectuntur pedes 307200, nempe 44236800 lineas; sed linea in 6 visibiles partes ad minimum dividi potest; quare si 44236800 numerus linearum quæ in 307200 continentur, in 6 ducatur, numerus 265420800 designabit partes visibiles in dimidia auri uncia. Verum postquam filum per angustissimum laminæ chalybeæ foramen trajectum est, inter duas rotas chalybeas lzvigatissimas complanatur, & cylindrus in binas planities parallelogrammas reducitur, ac proinde numerus partium quadruplo major distingui poterit in tenuis.

nuissima lamella quæ tamen semper continua & inaurata apparet ; itaque numerus partium in auri semiuncia oculo inermi conspicuarum erit 1061683200 . Postquam massa cylindrica in prædictam longitudinem exporrecta est , tenuissimam acquirit crassitiem ita ut illius diameter vix æqualis sit crassitie auri longissimam argenteam lamellam vestientis , quæ quidem crassities a Clariss. Reaumurio statuitur

non major $\frac{1}{274881}$ lineæ . Imo si consideremus auri bractæas non ubique ejusdem crassitie , sed in aliquibus locis duplo graciliores apparere , crassities auri argenteam lamellam obducentis in quibusdam partibus major non e-

rit $\frac{1}{100000}$ unius lineæ ; quæ quidem crassities minor adhuc fieri poterit , si argentea lamina sic inaurata rotis diligentius fuerit subacta . Rem longius describere & calculi apparatus subicere placuit , ob mirandam omnino & stupendam artis subtilitatem .

Quamvis tanta non sit vitri ductilitas , hæc tamen Philosophorum meditationibus dignissima est , & artificum laboribus aliquando fortasse perficienda . Notissimum est artificium quo vitrum in longissima subtilissimaque fila protrahi solet . Vitri frustulum flammæ admoveatur , vi ignis subigitur & in mollem veluti ceram redigitur . Quo facto , uncinus vitreus fuso vitro adhibetur & deinde retrahitur ; uncino autem retracto abducitur filum vitreum massæ vitreæ perpetuo adhærescens ; filum illud uncino interceptum rotæ circumponitur , & rota rapidissime pro arbitrio circumagitur , atque fila vitrea ipsam rotæ circumferentiam perpetuo amplectuntur . Tanta
au-

SECTIO II. PARS I. CAP. II. 219

autem aliquando obtinetur filorum subtilitas, ut araneæ telæ tenuitatem æmulentur. Observavit clarissimus Reaumurius cum filorum tenuitate ipsam quoque flexibilitatem crescere ita ut vitrea fila ad majorem subtilitatis gradum perducta pannos atque hominibus vestimenta præbere possent. Hujus utilitatis specimen aliquod videre est in puerilibus ornamentis ex mobili vitreorum filorum fasciculo contextis; talia enim ornamenta capiti imposita capillorum instar flectuntur, nec franguntur aeris motu agitata. Plurima alia experimenta legere est in vulgaribus Physicorum libris qui omnium manibus teruntur.

II Admiranda plane est materiæ subtilitas ad quam ars pervenire potuit; sed longe major est & omnem imaginandi vim superat particularum tenuitas quam in corporibus nonnullis ipsa natura demonstrat. Lucis radios corporaque odorifera iterum contemplari satis esset; sed jucundissimum argumentum alio exemplo illustrare non ab re erit. Solertissimus naturæ indagator Leevvenhoekeius in aqua per aliquot dies asservata exquisiti microscopii ope, minima observavit animalcula quorum mille centena millia vulgaris arenæ globuli magnitudinem non excedunt. Jam cum animalculum quodvis sit corpus organicum, perpendamus paulisper quam delicatulæ & subtiles esse debent partes ad ipsum constituendum & ad vitalem actionem conservandam necessariæ. Haud facile concipitur quo pacto in tam angusto spatiolo comprehendendi possint cor quod vitæ fons est, muscoli ad motum necessarii, glandulæ ad liquores secernendos, ventriculus & intestina ad alimenta digerenda, & alia membra innumera sine quibus animal esse non potest. Præterea cum singula memorata mem-
bra

bra sint etiam corpora organica, aliis carere non possunt partibus ad suas actiones necessariis. Constabunt ergo ex fibris, membranulis, tunicis, venis, arteriis, nervis & his similibus canaliculis numero fere infinitis quorum exilitas imaginationis vires longe superat. At his infinite propemodum minores esse debent partes fluidi quod per canaliculos decurrit, nempe sanguis, lymphæ & spiritus animales quorum in grandioribus animalibus incredibilis est subtilitas. En quanta in vilissimo animalculo portenta divinæque omnipotentiae argumenta! Ex tanta & fere infinita *actuali* materię divisione evidens omnino fit a præjudicatis vulgi opinionibus longe differre mundi hujus structuram. Sibi facile persuadet imperitum vulgus, corpora magnam continere materię quantitatem illorumque partes singulas strictè continuas esse; cum tamen certissimum sit corpora etiam compactissima exiguam omnino & fere nullam habere materię portionem, eamque in tenuitatem incomprehensibilem esse divisam.

Neque hic prætermittendum est eximium problema quod analytice solvit Clariss. Keilius in institutionibus astronomicis; Problema est hujusmodi: *Data utcumque exigua materię particula eam per spatium utcumque magnum ita distribuere, ut nusquam habeatur spatiolum vacuum majus data mensura utcumque exigua.* Facili ratiocinatione rem intelligere licebit. Fingamus pollicem cubicum materię solidæ in sphaeram cavam ad Saturnum usque extendi; quod certe non repugnat, cum materia sit in infinitum divisibilis. Hæc autem sphaera exiguam habet crassitiem, omnino tamen solidam. Jam sphaera ad minima intervalla minimisque poris pertusa fingatur, ita ut po-
ro.

SECTIO II. PARS I. CAP. I. 231

rorum distantia & magnitudo , datam mensuram utcumque exiguam non excedant . Tum ex decidua materia quæ poros antea occupabat , componatur iterum sphaera quæ priori sphaeræ sit quamproxime contigua . Hæc autem secunda sphaera minimis poris rursus perforata intelligatur , atque ex materiæ ramentis tertia fiat sphaera , & ita deinceps . Manifestum est hoc modo obtineri posse sphaeram integram , ex aliis sphaeris ita compositam ut eadem maneant phænomena quæ in præsentī huius mundi structura cernimus , eademque servetur apparens corporum continuitas . Jam vero ad propositas quæstiones duas redeamus . Cum itaque corpora quævis corporumque partes naturæ artisque viribus in minima corpuscula dissolvantur , a Philosophis quæsitum est , num primigeniæ corporum particulæ certos habeant limites ita ut perpetuam servant figuram , atque ex sola homogenearum particularum conjunctione variaque dispositione repetenda sit diversa corporum natura , vel species . His præmissis sit ,

C O N C L U S I O .

DE PERFECTA MINIMARUM PARTICULARUM DURITIE , DIVERSAQUE ILLARUM NATURA NIHIL AFFIRMANDUM VIDETUR .

Prob. I. pars . Nihil certo affirmare licet de illis quæstionibus philosophicis quæ nulla observatione , nullo experimento nullaque satis valida ratiocinatione probari possunt ; atqui &c. Ergo Prob. Min. Quod spectat observationes & experimenta , res est evidens ; cum minimæ etiam corporum particulæ quæ

quæ ab elementorum tenuitate, si quam habent, longissime distant, nullis observationibus vel experimentis subijci possint. Neque etiam metaphysicis rationibus quidquam evinci potest. Requidem vera nullum corpus perfecte durum in hac rerum universitate novimus; durissima quæque corpora in pulverem franguntur, ex silicibus ipsoque adamante fumum exprimunt solares radii in speculi ustorii foco collecti. Sed quid inde concludi poterit de primigeniis corporum elementis? nihil sane. Neque falsa demonstrari potest eorum Philosophorum hypothesi quæ simplicissima materiæ elementa atque inextensa admittit, ut jam observavimus & in sequenti articulo fusiùs explicabimus. Nec etiam invicte refelli possunt contrariæ opinionis patroni; quod enim de continuitatis lege proferri solet, demonstrationis vim non habere ex objectionum serie manifestum fiet.

Prob. II. pars, quæ ex prima omnino pendet. Et quidem si nos lateat utrum elementa sint simplicissima, an extensa; utrum sint perfecte dura, an artis & naturæ viribus divisibilia, multo minus de elementorum natura aliquid pronuntiare licet. Æque felici successu per diversam elementorum naturam, vel per diversam elementorum similium dispositionem explicari posse videtur diversa corporum species. Et quidem mirum est quantam specierum varietatem induant corporum partes variis motibus vexatæ atque mutatæ. Ad hoc argumentum referuntur quæ diximus in appendice ad caput tertium, atque de eadem re nonnulla adjungemus in objectionibus. His rationibus inductus Cartesius dicere ausus est; *Da mihi materiam & motum, mundumque componam*: Hic autem data occasione, depellenda est conjecta in Cartesium calumpnia qua nulla gravior esse

SECTIO II. PARS I. CAP. II. 237

esse potest. Dum hæc verba protulit Cartesius, materiæ creationem & supremi motoris necessitatem inficiatus non est magnus ille Philosophus, sed nihil aliud significare voluit, nisi supremum rerum omnium auctorem figura duntaxat & motu usum fuisse ad diversas corporum species distinguendas. Quod quidem breviter observatum volui, ut a falsis criminationibus religiose abstineant Auditores nostri ad pietatem magis quam ad scientias instruendi.

Objic. adversus primam partem : Physicis notissima est lex *continuitatis* qua jubetur nihil in rerum natura fieri per *saltum*, ita ut corpus ex aliquo statu ad alium transire non possit, nisi omnes percurrat status intermedios. Vi hujus legis corpus è motu ad quietem statim transire non potest, nisi singulos velocitatis decrescantis gradus traiciat. At si aliqua sint corpora perfecte dura, jam violatur lex illa. Etenim si corpora duo perfecte dura æquali motus quantitate in partes contrarias sibi invicem occurrant, ambo post conflictum statim quiescunt; Si autem inæqualis fuerit motuum quantitas, corpus quod minorem habet velocitatem, directionem statim mutat, ut patet ex demonstratis conflictuum legibus. Unde sic argumentantur. Existere repugnat corpora illa quibus admissis violatur lex continuitatis, atqui &c. Ergo Resp. N. Maj. Lex continuitatis tota innititur principio rationis sufficientis. Sic enim ratiocinari solent qui hanc tuentur legem : Status in quo reperitur ens aliquod, suam habere debet rationem sufficientem cur in tali statu existat potius quam in alio. Hæc autem ratio contineri non potest nisi in statu antecedenti. Igitur status antecedens continebat aliquid ex quo natus est status subsequens; illi nempe duo status ita sunt inter se conjuncti ut
nul-

nullus possibilis sit status intermedius. Si enim inter statum præsentem & antecedentem aliquis foret status possibilis, primum statum natura mutasset nondum a secundo statu determinata ac proinde sine ratione sufficiente. Hæc est vulgata apud Leibnitianos ratiocinatio. Verum de principio rationis sufficientis sæpius sermonem habuimus, illudque ita explicavimus ut in præsentī casu minime valere possit. Itaque lex continuitatis huic principio innixa tanquam universalis naturæ lex demonstrari non potest. Quidquid sit de lege illa in magnis corporibus observata, eandem legem in minimis corporum elementis vigere nequaquam evincunt instituta in magnis corporibus experimenta, nisi ostendatur ex ipsa corporum natura continuitatis legem profluere, quod certe nemo affirmaverit.

Quamvis autem perfecta elementorum durities nullo satis valido refelli possit argumento, hanc tamen ad intelligendam & explicandam specierum varietatem minime necessariam esse credimus. Neque enim vim maximam habere videntur hæc quæ vulgo afferri solent, nempe: Natura semper est uniformis; ex iisdem seminibus eadem oriuntur plantæ, eadem nascantur animalia; novæ non generantur corporum species: porro, inquit Nevvtoniani, si dura non sint materiæ elementa, jam vehementissimis frequentissimisque naturæ motibus jactata perpetuo frangerentur. Hinc minimæ corporum particulæ modo subtiliores, modo crassiores factæ, modo duriores, modo molliores, varias constituerent species, naturaque universa faciem perpetuo mutaret. His autem rationibus hæc in promptu esse potest responsio. Ad servandam specierum uniformitatem satis esset minima materiæ elementa nullis frangi viribus actu existentibus, quamvis tamen majoribus viribus supe-

superari possent. Præterea elementa illa viribus licet naturæ frangenda, suam tamen servare possent propriam unicuique speciei naturam. Itaque argumentum illud ponit quod est in quæstione, nempe specierum diversitatem ex sola partium dispositione pendere; quam quidem hypothesim mox expendemus.

Objic. adversus secundam partem. Per diversam similium particularum coagmentationem & dispositionem simplicius atque elegantius explicatur specifica corporum diversitas. Et quidem infinita propemodum varietate, formam speciemque mutat eadem materiæ portio. Sic metalla liquantur, ignis vi dissolvuntur, corpora fluida imitantur, in minutissimum cinerem rediguntur, in alia transeunt corpora variasque constituunt species. Hanc sententiam confirmare videntur colorati lucis radii prismate vitreo separati; ii enim nullam coloris diversitatem induunt. Quare minima lucis corpuscula quæ coloratum radium constituunt, sibi sunt simillima. Ex sola partium dispositione fit ut corpora certos colorum radios reflectant propriumque colorem exhibeant. His positis, sic ratiocinantur plerique Physici. Tenenda est sententia illa quæ divinæ simplicitati magis est consentanea, & innumeris experimentis confirmatur; atqui &c. Ergo Resp. N. Min. Quamvis infinita sit Dei simplicitas perfectissimusque illius operandi modus, exigui tamen ponderis æstimari debent argumenta quæ inde promovere solent Philosophi qui divinorum operum simplicitatem atque perfectionem ex limitato atque imperfectissimo nostro intelligendi modo metiri præsumunt. Etenim quæ nobis videntur composita, simplicissima omnino sunt Deo qui omnia unico & simplicissimo intellectus

lectus actu cognoscit, itemque unico & simplicissimo voluntatis actu decernit atque exequitur.

Quod reliquas spectat objectionis partes, certum quidem est ex varia partium dispositione pendere plurimas *sensibiles* corporum species; verum quæstio non est de corporum *massis*, sed de minimis *moleculis*, quæ *Elementa* solent appellari. Itaque mixtæ corporum species mutantur quidem, si naturæ vel artis viribus separari vel aggregari possint componentes particulæ. Verum diligentissimis experimentis compertum est immutatas manere corporum species nonnullas, etiamsi vehementius torqueantur, variisque modis utcumque vexentur. Ita ex puriori aqua, nil nisi aquam, ex igne nil nisi ignem elicere valent Chymici. Porro etiamsi corpora omnia quæ chymicis physicisque experimentis agitari possunt, in varias transirent species, ad minimas corporum moleculas trahi non possent experimenta illa; id ergo multo minus facere licebit, si corporibus quibusdam nulla mutatio vi etiam maxima inferri possit. Quod autem de diversis colorum radiis in objectione adjungitur, hoc unum probat, pro varia corporum textura variaque partium dispositione diversos reflecti colorum radios; at inde minime colligitur simillima esse radiorum corpuscula. Prolixiori responsioni non est hic locus, sed ad colorum doctrinam pertinet. Cæterum licet in tota hac responsione de *materiæ homogeneitate* nihil affirmare velimus, haud potiori jure pronuntiant aliqui Philosophi nulla esse nequidem duo simillima *materiæ elementa*. Tali ratiocinatione suam conantur probare opinionem quam *principium indiscernibilium* appellant Leibnitiani. Si duæ sint perfecte similes *materiæ* portiones ita ut una alteri substitui possit,

possit, *ceteris paribus*, jam nulla est ratio cur hæc vel illa hunc vel illum locum occupet, cum ambæ eundem locum occupare potuerint; id vero repugnare ajunt rationis sufficientis principio. At cum hoc principium ita generatim explicatum sæpe sæpius a nobis rejectum fuerit & valide confutatum, non est quod refellendo *indiscernibilium* principio diutius immoremur.

Ex hæcenus dictis intelligitur quid sentiendum sit de pervulgatis apud nonnullos Philosophos corporum elementis. Aristoteles quatuor enumerat corporum elementa, *terram* nempe, *aquam*, *ignem*, & *aerem*, ex his autem mixta omnia componi docuit; & requidem ipsa, ex omnibus fere mixtis hæc quatuor corpora vel horum aliqua eliciunt Chymici. At patet elementa illa esse sensibilia duntaxat corporum principia, minime vero tanquam primigenia elementa considerari posse. Idem dicendum est de Chymicorum elementis. Corpus in elementa sua resolvendum, exempli causa, *vinum*, in clibanum mittunt, subjectoque igne, quasdam partes solvunt in vapores qui frigore addensati alio vase excipiuntur, fiuntque liquor acuti saporis quem *Mercurium*, *spiritum* seu *aquam vitæ* appellant. Deinde continuato igne liquorem saporis expertem exprimunt quem *Phlegma* vocant; idque facere pergunt donec glutinosa tantum materia, *Mellis* instar in clibano supersit. Materiam illam glutinosam in ampullam retortam injiciunt, & subjecto igne *Phlegma*, ut prius exprimunt: postea liquorem acidum quem iterum *Mercurium* dicunt; dein liquorem alium minus fluentem in modum olei ignique concipiendo aptum quem *Sulphur* nominant. Postremo quod in ampulla retorta superest comburunt ejusque cineres in cymbium fecti-

ficile immittunt, admixta aquæ portione quæ cum brevi tempore salis saporem referat, percolando purgatur, remanetque in cymbio fictili pulverulenta quædam & expers saporis terra quam *caput mortuum*, seu *terram damnatam* appellant. Aqua autem limpida alio vase excepta lento igne in vapores solvitur, tumque in fundo vasis superest corpus durum & *frabile*, salis speciem referens quod ideo *Salem* dicunt. Hæc quinque elementa ex vino aliisque corporibus plurimis eruunt Chymici, ex corporibus aliis horum elementorum aliquaduntaxat educunt. Hinc ex illis elementis varie permixtis omnem oriri corporum varietatem sibi facile persuadent.

His elementis tria alia substituit Cartesius qui rem totam hoc modo explicavit, seu potius implicavit. Deus creavit materiam homogeneam, hanc divisit in particulas proxime æquales, tali scilicet modo ut earum anguli spatium accurate replerent, puta in partes cubicas. Creatam & divisam materiam Deus moveri jussit ea motus quantitate quam etiamnum eandem invariata in corporibus perseverare fingit Cartesius; hoc autem motu factum esse ait ut omnes materiæ partes circa centrum commune & singulæ circa proprium revolverentur. Ex hac rotatione mutuoque partium conspectu angulos abradi oportuit, indeque duo prodierunt ramentorum genera; aliud nempe fuit pulvis tenuissimus & agitativissimus quem materiam *ætheream* vocant Cartesiani. Aliud autem emerfit ex attritis fractisque partibus, sed crassiusculis & ad motum minus idoneis. Tandem partes cubicæ abrafis angulis abierunt in sphaeras ad motum maxime accommodatas. Ex his tribus elementis universum dicunt compositum; & quidem mate-

materia subtilis solem præsertim constituit nostri systematis planetarii centrum. Secundum elementum constans ex attritis particulis & in rotunditatem conformatis *globulosa* materia dicitur, spatiisque cælestibus replendis destinatur. Tertium denique elementum componit globum terraqueum cæterosque planetas. At materia *subtilis* sive *ætherea* illa est quæ replendis omnibus interstitiis sese citissime accommodat. At hoc modo philosophari, fabulari omnino est, atque hinc factum est ut hoc cartesiani systematis commentum rejiciant superiores cartesianæ Physicæ reformatores. Quod autem spectat materiam ætheream, in tota Physices serie de ea jam plura diximus. Quia vero materia illa sub sensus cadere non potest, mirum non est quod de hujus materiæ natura & proprietatibus tot hypotheses, proferant Philosophi qui conjecturis delectantur. Sed de hujus materiæ usu vel potius abusu sermo deinde sæpius recurret in Physica particulari. Cæterum quod in hac quæstione prolixius quidem tractari solita rerumque physicarum copiosissima, brevius egerimus, nemo nos tanquam justo breviores reprehendat; brevissimas enim curtissimasque esse nostras hac in re cognitiones ingenuè fatemur.

ARTICULUS IV.

De corporis natura.

I. CUM de universalibus corporum proprietatibus in universa Physica generali hætenus disputatum sit, hinc doctrinæ ordo postulat ut celeberrimam de corporis natura sive essentia quæstionem adgrediamur, atque tandem primæ Physices parti finem imponamus. Hic
 au-

autem caveri maxime debet vocum ambiguitas. Observavimus jam in Metaphysica duplicem esse *essentiæ* significationem; vel enim essentia est *realis*, hoc est, primum illud attributum ex quo derivari possunt alia omnia attributa, quam quidem essentiam nobis ignotam esse demonstravimus; vel essentia est *nominalis*, collectio nempe omnium attributorum quæ in re aliqua observantur. Rursus autem attributa vel sunt *essentialia*, vel *universalia* duntaxat; hæc autem duo probe distinguenda sunt; fieri enim potest ut attributa quædam in omnibus corporibus deprehendantur quæ tamen ad ipsam corporum naturam non pertineant, sed pro mera naturæ lege haberi debeant. His præmissis quæ quidem in Metaphysica atque etiam in Logica accurate explicavimus, jam *corpus*, sive *materiam* definire licet substantiam *sensibilem* quæ explicatas in Physica generali proprietates habet. Illas autem proprietates uno, ut ita dicam, oculi ictu contemplari iterumque revocare operæ pretium est.

II. In præcedenti definitione notandum est diligenter, corpus dici *substantiam sensibilem*; hic enim consideramus tantum corpus *physicum*, nihilque de simplicissimis & inextensis materiæ elementis affirmare audemus. Et quidem si elementorum naturam investigantes, ea extensa esse dicamus, nihil prorsus dictum videtur; rursus enim elementa illa alias haberent partes aliaque elementa. Si autem ea extensa non esse dicamus, res videtur absurda; qui enim intelligi potest id quod extensum non est, extensionem aliquam constituere? respondere quidem posset Leibnitianus extensionem velut *phenomenum* habendam esse. Verum hypothesis illa de qua frequens mentio jam ante incidit, precaria omnino est, totaque

que innixa sufficientis rationis principio quod sæpe sæpius impugnavimus. Alii autem & quidem percelebres viri corporis nomine intelligunt punctorum systema pro diversis viribus attractivis & repulsivis per varias spatii *realis* loca, ad diversas distantias dispositum, ut antea explicavimus. In hac scilicet opinione nullus est contactus *immediatus*, nulla *continuitas* vera & accurata, sed *relativa* duntaxat & *apparens*. Et certe a nobis per sæpe creditur continuitas vera quæ procul dubio est apparens. Si enim corpora quædam ad talem inter se distantiam constituta sint, ut sub angulo 10" minori videantur, in corpus unicum perfecteque continuum coalescere oculis apparent.

Verum hæc opinio tota fundatur in ipsa continuitatis lege quam quidem in omnibus corporibus & in minimis materiæ elementis accurate demonstratam esse, nemo affirmabit. Quæ cum ita sint, præsens quæstio difficultatis, & *periculose plena aleæ* nobis videtur; quare ab ullo hac in re iudicio nobis abstinendum esse existimamus, subtilioremque controversiam sagacioribus ingeniis relinquimus.

Unum observare satis erit, nihil omnino esse in his opinionibus quod fidei vel leviter contrarium reprehendi possit; inter animas & corpora, *essentiale* & *intrinsicum* semper manebit discrimen in his duobus positum, quod materia sit sensibilis & cogitationis ac voluntatis incapax; at spiritus neque sensus nostros afficiunt neque possunt cogitare aut vel-
le. Nec quis sibi persuadeat Metaphysicis detrahi desumptum ex materiæ extensione argumentum, quo scilicet validissime probant materiam cogitare non posse; totam enim vim retinet argumentum, etiam si corpus physicum

constet ex simplicissimis & inextensis elementis ; Si autem elementa conjuncta cogitare non possint, ea quoque seorsim cogitare repugnat. Hæc autem omnia comparari debent cum iis quæ de animæ spiritualitate in Metaphysicis institutionibus fufe & magno rationum pondere explicavimus.

III. Iisdem fere difficultatibus obnoxia est gravissima alia de *impenetrabilitate* controversia, an scilicet ad corporis essentiam proprietas illa pertineat. Et quidem si extensio inter essentielles corporis proprietates numerari non debeat, jam nihil absurdi videtur quod plures corporis partes eundem occupent locum ; id quidem præter universales naturæ leges & corporum omnium proprietates, ac proinde non sine miraculo contingeret ; at immutabili corporum essentia minime repugnaret. Simili ratione si admittantur in minimis & simplicissimis materiae elementis vires quædam ad certos limites repulsivæ, ex quibus oriatur impenetrabilitas ; illæ quidem vires pro naturæ legibus haberi debent, quas proinde leges supremus naturæ autor suspendere & immutare potest, ideoque ad corporum essentiam non pertinent ; cum essentias rerum immutabiles omnino esse & necessarias, demonstratum sit in Metaphysica. Nec minus difficilis atque implicata evadit quæstio in hypothesi Leibnitiana juxta quam *extensio*, *locus*, *spatium* pro meris phænomenis haberi debent, ac proinde & pro mero phænomeno haberi etiam posset impenetrabilitas quæ ex notione loci omnino pender. Igitur in hac hypothesi, *extensio* & *impenetrabilitas* sunt proprietates corporum *relative* duntaxat, non *absolute* & *essentiales*. Sed quidquid sit de quæstionibus illis, nulla ingenii subtilitate, unquam fortasse

SECTIO II. PARS I. CAP. II. 243

solvendis, certissimum est inter universales corporis naturalis proprietates recensendam esse impenetrabilitatem.

IV. Quod spectat corporum vires, *gravitatis* scilicet, *attractionis* & *inertiæ*; illarum quidem virium effectus in rerum natura constanter observamus; sed quid sint vires illæ, an ad ipsam corporum essentiam pertineant, nobis omnino ignotum fatemur; eas velut universales corporum proprietates habere nobis satis sit; in nostris enim institutionibus Physicis effectus præsertim consideramus eoque calculo, quantum nobis licet, æstimamus, quod quidem sæpe vos monitos volumus. Probe autem observari debet virium illarum notio, neque credendum est sibi mutuo repugnare vim inertię & vim attractionis. Re quidem vera, si omnes materiæ partes sese mutuo attrahant, jam nulla erit perfecta quies in rerum natura, idque etiam verum erit in ipsa Peripateticorum sententia. Etenim secundum Peripateticos, cælestia omnia corpora quæ intuemur, in perpetuo sunt motu & centrum gravium in ipso telluris centro positum est, ac proinde necessum est ad cuiusvis lapidis jactum, æquilibrio nonnihil mutato, totam telluris molem commoveri. Id quidem vi inertię contrarium videri posset; corpora enim tenderent ad motum. Verum dum dicimus per vim inertię corpora manere in quiete, seclusa vi qualibet impressa, res intelligenda est de quiete *apparente*; atque hinc patet qua ratione intelligi debeat *quiescibilitas* inter naturales materiæ proprietates numeranda. Neque tamen dicendum est materiæ motum esse necessarium; cum enim vim quamlibet motricem materiæ indiderit supremus rerum omnium auctor,

hanc eandem vim pro arbitrio potest auferre & corpora hac proprietate exuere. Tandem patet in iis quæ hæcenus explicavimus, contineri etiam *figurabilitatem* quæ ex mutua attractione viriumque varietate pendet; Sed meminisse oportet *vis* nomine nihil aliud a nobis intelligi nisi effectum aliquem. Itaque corpus naturale merito definivimus substantiam sensibilem octo universalibus jam recensitis proprietatibus præditam. Probe autem notandum est proprietates illas a nobis dici *universales*, non *essentiales*. Si quis igitur corpus consideraret, omissa ex his proprietatibus aliqua, is quidem *incompletam* haberet corporis notionem, nec tamen *essentiale* aliquod corporis attributum prætermisisse dici posset.

V. Ex his quæ in hoc articulo explicavimus, lux fortasse aliqua accedere potest iis quæ de *materia*, *forma* & *privatione* obscure tradunt plerique *Scholastici*. Affirmant scilicet omnium corporum principium esse materiam *primam*, formam & privationem. Materiam primam definiunt, *quod neque est quid, neque quantum, neque quale, neque quidquam eorum quibus ens denominatur*. Hæc autem definitio ita potest intelligi ut materiam *indeterminate* & *abstracte* consideratam significet, non attempta illius forma. Verum ut fiat corpus aliquod *determinatum*, *formam substantialem* adungi oportet; vocant autem formam substantialem id per quod singulæ corporum species a se invicem differunt. Hæc autem omnia licet a veteribus Philosophis paulo obscurius dicta cum recentiorum opinionibus componi fortasse possent. Etenim si in corporibus admittamus vires quasdam *motrices*, *attractivas* scilicet & *repulsivas*, ex quibus oriatur specifica corporum differentia, vires illas pro for-

mis

ra, quibus sane non parum honoris & gloriæ detraxerunt aliqui interpretes. At non sine maxima recentiorum injuria negari posset, in effectuum observatione & cognitione longe feliciorum & locupletiorum esse hodiernam Physicam, quamvis post longam sæculorum seriem circa effectuum causas nihil fere plus scire datum sit, nec fortasse dabitur unquam, donec rerum effectuumque omnium causam D. O. M. æternum intueamur.

A P P E N D I X

De quibusdam capitulis præcedentis utilitatibus.

I. **A**mplissimam meditationum Philosophicarum copiam suppeditat caput præcedens, ex multis pauca utiliora seligemus. De summa corporum porositate perpetuisque effluviis sermonem habuimus; Hinc vero occasionem nacti, quotidianas corporis nostri mutationes & vicissitudines contemplabimur. Accuratissimis observationibus compertum habuit Sanctorius ex octo alimentorum libris quas quis quotidie sumeret, quinquagesimam circiter partem in corporis substantiam converti. Sumpta igitur quinquagesima parte 8 libr. provenient $5 \frac{1}{2}$, semiunciæ quas scilicet singulis diebus acquirimus ac proinde per anni spatium corpori nostro accedunt 58. libr. 12. $\frac{4}{5}$ semiunciæ, hoc est, plusquam tertia pars totius corporis; tantumdem ergo per continuam dissipationem de corporis substantia decedere debet; alioqui in enormem excresceret molem. Jam vero si jactura eum in modum sese haberet ut vetustissima corporis materia primum abiret, deinde quæ proxime minus

SECTIO II. PARS I. CAP. II. 247

minus vetusta est & sic per gradus ad recentissimam usque, manifestum est ita omnino dissipari corporis nostri substantiam ut post tres annos, nihil vetustæ materiæ superstes esset, alia plane ejus locum occupante. At quoniam veteres succedentesque particulæ simul pro ratione utriusque quantitatis promiscue expelli debent, fieri non potest ut omnis materia in auras avolet, etiamsi mille annos homo viveret. Rem exemplo illustrabimus. Ponatur vas aquæ plenum, continens 150 libras, ex quibus hauriantur $5 \frac{1}{2}$, semiunciæ, & loco haustæ aquæ infundantur vini puri semiunciæ $5 \frac{2}{3}$. Sequenti die ex hoc mixto detrahantur iterum semiunciæ $5 \frac{1}{2}$, & dein adjiciantur $5 \frac{1}{2}$, vini puri & ita deinceps singulis diebus per annum integrum; quæritur quantum aquæ & quantum vini post annum futurum sit. Problematis hujus solvendi modum indicabimus. 150 libræ aquæ conficiunt 4800 semiuncias, ex quibus detractis $5 \frac{1}{2}$, semiunciis aquæ & iterum affusa æquali quantitate vini puri, remanent in vase 4794 $\frac{2}{3}$ semiunciarum aquæ cum $5 \frac{2}{3}$ semiunciis vini permixtæ. Jam si secundo die ex hac mixtura rursus detrahas $5 \frac{1}{2}$ semiuncias & tantundem vini puri adjicias, illæ semiuncie detractæ $5 \frac{1}{2}$, non ex aqua pura constabunt, sed tantillum vini continent quod in eadem proportionem erit ad aquam ut $5 \frac{1}{2}$, ad 4794 $\frac{2}{3}$ id est, numerus semiunciarum aquæ residuæ post secundam detractionem erit tertius proportionalis ad 4800 & 4794 $\frac{2}{3}$, quod quidem evidens est. Simili ratione, tertio die detractis ex mixto semiunciis $5 \frac{2}{3}$, patet numerum semiunciarum aquæ residuæ esse quartum proportionalem ad 4800

L 4

&

& 4794 $\frac{2}{3}$, & ita porro. Ergo completo anno, scilicet post 365^{am} extractionem, residuæ aquæ pondus habebitur sumendo 366^{am} proportionalem ad 4800 & 4794 $\frac{2}{3}$, seu evehendo 4794 $\frac{2}{3}$ ad 365^{am} potestatem & dividendo per numerum 4800 itidem ad 364^{am} potestatem evectum, quod quidem laboriosissimum per plures mentes calculum poslularet. At rem per *logarithmorum* tabulas compendiose absolvunt Algebristæ, inveniuntque post completum annum remansuræ in vase 3251 $\frac{1}{3}$ semiuncias aquæ ideoque 1548 $\frac{4}{5}$ semiuncias vini. Exemplum ad præsentem casum transferatur. Aquæ puræ 150 libræ repræsentent materiam ex qua corpus componitur, 5 $\frac{1}{3}$ semiuncie vini puri quotidie infusi referant novam materiam corpori nostro singulis diebus additam, erit materia verus semiunciarum 3251 $\frac{1}{3}$ seu libr. 101, semiunciarum 19 $\frac{1}{3}$; nova autem substantia erit libr. 48, semiunciarum 12 $\frac{4}{5}$. Itaque corpus humanum tertiam fere substantiæ partem post annum integrum amittet, & protracto calculo invenitur elapso decennio superstitem futuram esse dumtaxat partem quinquagesimam. Prætermittendum tamen non est a nobis positum fuisse omnes corporis partes æquabiliter & uniformiter dissipari; quanquam certissimum sit ossium dissipationem multo lentiorē esse quam partium fluidarum. Sed quid sit, ex his saltem manifestum est in corporibus nostris velocissimam mutationem contingere, atque huic perpetuæ visitudini obnoxias quoque esse durissimas corporis nostri partes; & quidem nullum est in corpore animali os tam durum, tam compactum quod non nutriatur ac proinde quod non mutetur & partem sui amittat novamque recuperet.

Ec.

SECTIO II. PARS I. CAP. II. 249

Ecquis non mirabitur omnipotentem Dei manum quæ in corporis nostri structura, tot subtilissima disposuit instrumenta ad nutritionem & evaporationem necessaria! At singulos ætatis humanæ gradus diversosque corporis nostri status paulo attentius contem-plemur. In puerili ætate partes sunt tenel-læ, viscosæ, aqua abundant, infinitisque ca-naliculis perforatæ, quos quidem canalicu-los in ossibus, membranis, cartilaginibus, vasorum tunicis, tendinibus & in cutē ipsa demonstrant injectiones anatomicæ. Hinc fit ut vis quæ in corpore animali mo-tus principium est, quæcumque sit vis illa, molliores partes facilius extendat. Progressu temporis robustiores fiunt partes atque con-firmantur, in adulta scilicet ætate; atque id tandiu fit, donec tandem extendendis so-lidis haud amplius satis sint cordis vires. Attamen facile adhuc flexibilis manet *cellu-laris* textūra, multis in locis pinguedi-nem sanguinemque admittit; hinc pingui-ores fiunt adulti ad certum usque tempus, nec tamen crescunt. Profecta ætate textu-ra cellularis fit crassior, rigescunt senum ossa, cartilagines in ossa convertuntur, vasa excretoria comprimuntur, minima orificia clauduntur, secretiones minuuntur, sanguis exsiccatur, & in singulis corporis partibus terrestrem veluti humorem deponit. Hinc partes omnes duriores observantur, hinc crustæ osseæ in ipsis arteriis, in ossium su-perficie & maxime in vertebris deprehen-duntur. His gradibus ad senectutem mor-temque ipsam pergimus, solvitur tandem fragilis hæc corporis nostri machina iterum reparanda & ad meliorem æternamque vitam revocanda.

II. *Resurrectio mortuorum*, inquit S. Augustinus serm. 150. *præcipua fides Christianorum*: Et quidem, *statutum est hominibus semel mori, post hoc autem iudicium*: Ait S. Paul. ad Hebr. 9. Itaque cum increduli quidam impiique homines, ex iis quæ num. præced. diximus plurima obijciant resurrectionis dogmati contraria, hinc officii nostri partes esse duximus sanctum illud religionis decretum spei timorisque plenum a cavillationibus vindicare. Quomodo, inquit, eæ corporis particulæ quæ per insensibilem transpirationem assidue evanescent, in idem corpus iterum coalescent? Illæ eædem particulæ in alia corpora, in aliorum hominum substantiam transeunt; objectioni vim addere conantur, fingendo hominum corpora ab animalibus carnivoris vel antropophagis hominibus absorpta. Qua ratione fieri poterit ut unusquisque carnem suam repetat atque revocet? cum unius hominis caro in carnem alterius transmigraverit. Porro quamvis *corporum resurrectio solius divinæ potestatis opus sit cujus causas & rationem temere quis investigaret*, ait Athenagoras de mortuorum resurrectione, everti tamen debent argumenta quibus fidem nostram oppugnare conantur religionis hostes. Igitur quamvis corporis nostri materia per insensibilem transpirationem avolverit & in belluæ carnivoræ aut barbari hominis substantiam transiverit, Deus eandem discernet & corpori cujus erit, restituet. Particulæ omnes quæ ab ortu ad mortem usque corpus nostrum per diversas ætates compegerunt, nobiscum non resurgent; tunc enim enormis magnitudinis monstra excitaremur. Deus eam nobis restituet quam ipse decrevit magnitudinem, de qua quidem magnitudine nihil fides docet. Nihil autem a ratione alienum est

SECT. II. PARS I. CAP. II. 251

est, imo ratio ipsa demonstrat Deum omnipotentem dispersas materiæ particulas quæ uniuscujusque hominis substantiam per totum vitæ decursum componebant, colligere & eligere posse atque in eam quam jubet magnitudinem revocare: *ita modificabitur illa in unoquoque materies ut nec aliquid ex ea pereat & quod alicui defuerit, ille suppleat qui etiam de nihilo potuit quod voluit operari.* Ut ait S. Augustinus in Encheiridio cap. 90. Quamvis ergo mortuorum resurrectio & omnes quæ ad eam pertinent mutationes *divinæ sint potestatis opus altissimumque mysterium*, id tamen rationi minime contrarium est & certa fide tenendum, omnes homines in propria carne resurrecturos, ante divini judicis tribunal constituendos, ut probi donentur præmio, improbi autem supplicio mancipientur.

III. Quamvis in adorando Eucharistiæ Sacramento potentæ, amoris & benevolentiæ thesauros effuderit & explicaverit Christus Dominus, non desunt tamen ingratisimi impiissimique homines qui ad oppugnandum illud divinæ bonitatis mysterium, in disputationibus philosophicis de corporum natura ineptissimas cavillationes quærunt & audacissime jactitant. Cavendum quidem est ne sacrosancta religionis mysteria curiosius scrutari atque explicare præsumant Philosophi; Si enim opinio aliqua aut theologica aut philosophica mysterii rationem ita afferat ut nullum fidei locum relinquat, hæc statim rejicienda est atque detestanda. At omnes ingenii sui vires intendere debent religiosi verique Philosophi ut sanctissima fidei dogmata ab impiorum hominum conatibus defendant, eaque supra rationem esse, non tamen rationi contraria, ostendant. Quatuor sunt argumenta philosophica quæ Nova-

tores maxime jactare solent. 1. Corpus Christi simul esse in pluribus locis. 2. Corpus Christi veras non habere corporis proprietates; non esse quantum, locum non occupare; 3. Accidentia panis & vini remanere post factam consecrationem sine subiecto; 4. Accidentia illa habere omnes proprietates substantiæ. Ex illis objectionibus duæ pertinent ad corpus Christi, duæ aliæ ad accidentia; quæ quidem omnes ex dictis de corporis natura facile refelluntur. Quod duas priores objectiones spectat; pater rationi contrarium non esse illum existendi modum quo Christum in Eucharistia existere certa fide docemur. Etenim de ipsa corporis essentia non consentiunt inter se Philosophi; imo plurimi apud ipsos Novatores cultissimi doctissimi-que Physici extensionem & impenetrabilitatem ad corporis essentiam non pertinere sine ulla dubitatione affirmant; in qua quidem sententia duæ priores objectiones evanescunt. Certissimum omnino est corpus Christi in Eucharistia suam habere quantitatem; nempe partes revera sunt diversæ & extra se invicem; alioqui non esset corpus humanum. At quantitas illa quam habet corpus Christi in Eucharistia dicit quidem extensionem partium *in ordine ad se*, seu per eam quantitatem fit ut pars sit extra aliam partem; sed non dicit extensionem *in ordine ad locum*; hoc est, per eam non fit ut pars occupet locum. Igitur corpus Christi in Eucharistia nec *definitive*, nec *circumscriptive* continetur; non quidem *definitive*; nam corpus Christi contineri *definitive* sub *speciebus*, est ita sub illis existere ut non sit alibi, quod repugnat fidei quæ docet Christum esse in cælis & in hostiis consecratis. Neque continetur *circumscriptive*; nam contineri *circumscriptive* est respondere variis spa-

spatii partibus ; At corpus Christi non respondet variis spatii partibus ; cum non habeat extensionem impenetrabilem. Ille quidem existendi modus nullum in rebus creatis exemplum habet & miraculis plenus est ; ac proinde merito vocatur *sacramentalis* ; seu, modus qui soli Sacramento conveniat. At modum illum existendi absurdum non esse & divinæ omnipotentiae ac rationi non repugnare, patet ex iis quæ de extensione, impenetrabilitate, loco & spatio, fufe differuimus.

Quod spectat *accidentia*. Accidentium nomine intelligunt panis & vini qualitates, *colorem, quantitatem, saporem*. Ex autem qualitates remanent in Eucharistia, iis afficiuntur sensus nostri, facta consecratione. Qualitates illæ a Concilio Lateran. IV. vocantur : *Panis & vini species* : a Concilio Constantiensi dicuntur : *accidentia panis & vini* ; Concilium Tridentinum Lateranensis Concilii phrasim retinuit. Observandum est duplicem a Peripateticis distingui *quantitatem* : *aliam internam, externam* aliam. Primam dicunt *partes entitativas & substantiales* quæ ita sunt de essentia corporis, ut iis sublatis destruat corpus. Hæc quantitas corpus extendit in ordine ad se, hoc est, partes entitativas alias extra alias ita constituit, ut entitas partis unius, tota sit extra entitatem partis alterius & tamen omnes in eodem loco repetantur. Quantitas externa nihil est aliud quam extensio sensibilis quæ partes jam extensas in ordine ad se, extendit in ordine ad locum. Hæc Peripateticorum opinio aliqua ex parte convenit cum hypothesi Leibnitiana quæ corporum partes ab ipsa extensione distinguit, sed extensionem sensibilem velut merum phænomenum, non tanquam aliquid substantiale aut accidens absolutum admit.

mittit. De fide est, accidentia remanere sine subiecto *substantiali* panis & vini; at de fide non est ea non habere subiectum aliquod accidentale. Accidentia manere ajunt plerique Theologi in panis & vini quantitate *externa* scilicet, quæ remanet in Eucharistia consecrata, & quantitatem illam aliasque sensibiles qualitates *accidentia absoluta* appellant, eo quod sine ullo subiecto maneant. Novam opinionem excogitavit aut saltem maxime illustravit atque amplificavit Magnanus noster. Species sensibiles quas *intentionales* vocat, non aliud esse docet quam actionem ipsam obiectorum in sensus. Cum autem in Eucharistia non supersit panis substantia, in sensus illa agere non potest; sed Deus per seipsum soloque imperio supplet actionem substantiæ panis, facta in sensibus nostris eadem *modificatione* sive impressione quam panis ante consecrationem producebat. Unum hic diligenter monere oportet Concilia Lateranense, Florentinum & Tridentinum *accidentium* nomen non usurpasse, sed *specierum*. Quæ cum ita sint, catholica fide certum ac definitum non est accidentia absoluta ad fidem pertinere; sed hoc certissime tenendum est totam panis & vini substantiam converti seu transmutari in corpus & sanguinem Christi; species vero seu accidentia remanere fidei autoritate & sensuum judicio indubitatum est; Verum quid sint & in quo consistant species illæ, Ecclesia non pronuntiavit. Quamobrem dum Synodus Constantiensis damnavit hanc Wicleffi propositionem: *In Eucharistia non manent accidentia sine subiecto*: censent Theologi censuram non cadere in accidentia, sed in accidentium subiectum, scilicet in substantiam panis & vini quam superesse dicebat Wicleffus. Quod autem nutritio-

nem

SECT. II. PARS I. CAP. II. 255

nem spectat, responderi solet vel Deum aliam substituere materiam qua corpora nutriantur, vel per se corpora nostra sustentare; qui enim corpora ex nihilo produxit, potest haud dubie illa sustentare ac nutrire. Itaque ex his omnibus concludere licet sacrosanctum Eucharistiæ mysterium incomprehensibile quidem esse & ineffabile, non tamen a divina omnipotentia & ratione alienum. Quare hanc appendicem absolvemus Concilii Tridentini verbis sess. 13. cap. 1. ubi sermo est de ratione qua Christus est in Eucharistia: *Etsi eam verbis exprimere vix possimus, possibilem tamen esse Deo, nosque cogitatione per fidem illustrata assequi eam posse & constantissime credere debere*: quæ quidem verba non de hoc Sacramento tantum, sed de aliis omnibus fidei nostræ mysteriis sancte tenenda sunt.


F I N I S.




99 266964


[illegible]

1. 2. 3. 4.







1.



2






23.




27

24.



26



K

